

BIBLIOTEKA

Zakl. Nar. im. Ossolińskich




6,160


R

Henryk Lubomirski
1830.

MB. Ten wycieczki niema
w Zespole Lubomirski.

3/44





LUCÆ OPALENII

Regni Poloniæ Mareſcalli

DE OFFICIIS

Hominis Chriſtiani

LIBRI TRES.

LUCK OP ALLEN

Regni Poloniae Mariscallo

DE OFFICIIS

Honoris Christiani

LUCK OP ALLEN

In quibus: p. 1. de Christianis, 2. de
in 1. de Christianis, 2. de
in 1. de Christianis, 2. de
in 1. de Christianis, 2. de
in 1. de Christianis, 2. de

DE OFFICIIS

Honoris Christiani

LUCK OP ALLEN



VENIT

Superior

LUCÆ OPALENII

Regni Poloniae Marescalli

DE OFFICIIS

Hominis Christiani

LIBRI TRES

In quibus Sapientiae Christianae, idest Moral
Philosophiae, Jurisprudentiae, imò
& Theologiae, pleraque & praecipua no-
va haecenus ratione, atque methodo,
accuratè explicantur.

*Post editionem tertiam Viennensem
Prima Veneta.*



VENETIIS, M. DC. XCVIII.

Apud Andream Poleti.

SUPERIORUM LICENTIA.



Verba Sapientium sicut stimuli ;
& quasi clavi in altum defixi ,
quæ per Magistrorum consilium data
sunt à Pastore uno . His amplius , Fi-
li mi , ne requiras . Faciendi plures
libros nullus est finis ; frequensque
meditatio , carnis afflictio est . Fi-
nem loquendi pariter omnes audia-
mus : Deum time , & mandata ejus
observa ; hoc est enim omnis Homo .
Eccles. 12.




XVII - 6160 - II .



INDEX CAPITUM.

Prologomena pauca , quæ veluti
fundamentum Operi sub-
sternuntur , *potissimum contra*
ATHEOS. fol. 9



LIBER OFFICIORUM I. DE PROBITATE.

A fol. 21.

CAPUT I.

DE NON PECCANDO , PRI-
MA PARTE PROBITATIS.

A fol. 22.

*

3

Pars

Pars Capitis prima , *Explicatur pri-
mus rixus peccati*, Concupiscentia
Carnis. 24

Pars Capitis altera . *In qua explicatur ,
quid sit* Concupiscentia Oculo-
rum . 27

Pars Capitis tertia , *Declaratur ter-
tius rixus peccati , qui est* Superbia
Vitæ. 32

C A P U T II.

DE REGIMINE COMMOTIO- NUM, ALTERA PARTE PROBITATIS.

A fol. 41.

Pars Capitis I. *An, Quid, & Quot Sint*
Commotiones. 42

Pars Capitis II. *In qua Amoris tres*
proprietates ostensæ ; tum singularum
Commotionum qualitas , & effica-
cia. 47

Pars Capitis III. *Ostenditur , qualis*
esse

*esse debeat Amor ; & ex illo commu-
nes primum regulæ , tùm verò sin-
gularum Commotionum Ordina-
tio.* 53

C A P U T III.

DE EXERCITIO VIRTUTUM, TERTIA PARTE PRO- BITATIS.

A fol. 70.

Pars Capitis I. *Quid sit Virtus, osten-
sum ; ejusque & Unitas , & Parti-
tio.* 71

Pars Capitis II. *Monstratur , qualis
esse debeat Virtus ; & præmissa Pru-
dentia varia notione , monitisque
ejus ; Singula , prout tributæ sunt ,
explicantur.* 74

Ubi de certo vitæ Statu eligendo. 78

De { Temperantia . 85
 { Justitia . 91
 { Fortitudine . 96


* 4 Pars

Pars Capitis III. *Declaratur ; unde ,
& quo principio paretur , & insit ho-
mini Virtus.* 105

Ubi de prædeterminatione physica. 115

APPENDIX.

Monita ad Probitatem retinen-
dam pertinentia. 122



LIBER OFFICIORUM II. DE CHARITATE.

A fol. 129.

CAPUT I.

Qualis Charitas in Statu In-
nocentiæ fuisset : & quo-
niam tam exacta post pecca-
tum haberi non potuit ; ex
illius defectu , de Origine
Juris. 132

Pars

Pars Capitis I. *De Statu Primitivæ
Charitatis.* 133

Pars Capitis II. *De impossibilitate Pri-
mitivæ Charitatis in hoc statu.* 135

Pars Capitis III. *De necessitate Juris
Scripti, ad Societatem Civilem
(cujus Origo ostenditur) retinen-
dam.* 138

C A P U T II.

Ostenditur, quid sit Jus; &
quotuplex: & quales esse
inter homines debeant re-
censitæ ejus partes, & spe-
cies. 143

Pars Capitis I. *De Potestate, prima
Juris specie.* 146

<i>De Po- testate.</i>	{	Naturali,	ibid.
		Acquisita,	150
		Concessa,	153

Pars Capitis II. *De Dominio, altera
Juris specie.* 167

Pars

Pars Capitis III. *De Obligatione, ter-
tia Juris specie.* 176

C A P U T III.

In quo ostenditur tempera-
mentum summi Juris, per
Charitatem : idque Admo-
nitione, Consilio, & Exem-
plo Christi Jesu. 184

Pars Capitis I. *De Temperamento Po-
testatis.* 187

Pars Capitis II. *De Temperamento
Dominii.* 191

Pars Capitis III. *De Temperamento
Obligationis.* 193

APPENDIX.

De Amicitia. 199



LIBER OFFICIORUM III.
DE PIETATE.

A fol. 209.

CAPUT I.

De Notitia Dei. 210

Pars Capitis I. *De Natura Dei ; & quid in se sit ; ubi novo modo , & ratione , dogma SS. Trinitatis explicatur .* 212

Pars Capitis II. *Ut erga nos est Deus . Ubi Creationis primum , & post Missionis ad nos Divinarum Personarum ineffabile beneficium expenditur : ex quo manarunt triplicia* 246

Dona	{	Naturæ .	247
		Gratiæ .	252
		Gloriæ .	277

Specialiter de Messione Spiritûs Sancti . 267

Pars

Pars Capitis III. *Ut à nobis nosci vo-*
luit Deus . Ubi Religionis veræ
triplex , per tria tempora Status :
ejusque ultimæ , idest Christianæ
Fundamenta ; ac Signa , per quæ
Hæreses ab illa facile dignosci , vi-
tarique possunt . 288

Status	{	Naturæ.	289
		Scriptæ.	292
Legis	{	Gratiæ.	295

Ubi novendecim Solidæ Præscriptiones
contra Christianos Acatolicos . 305

Eædem undecim argumentis ad homi-
nem (ut Philosophi loquuntur) pro-
bataæ . 313

Gravis , & Solida exhortatio ad erran-
tes in fide . 317

C A P U T II.

De Cultu Dei . 320

Pars Capitis I. De Cultu Dei Privato ,
seu Devotione . 323

Pars

Pars Capitis II. *De Cultu Mystico;*
quem Religio præcipit , exigitque.

337

Pars Capitis III. *De Cultu Relativo,*
qui Creaturis tribuitur ; sed propter
Deum, ad quem dirigitur. 356

Ubi de Cultu Deiparæ Virginis. 364

C A P U T III.

De Amore Dei. 373

Pars Capitis I. *De Mortificatione;*
cujus natura , & modus explicatur.

375

Pars Capitis II. *De Abrenunciatio-*
ne ; cujus vis , atque modus decla-
ratur. 380

Pars Capitis III. *De Abnegatione;*
quæ describitur ; ostenditurque quo-
modo tandem Deificatio proveniat.

384

APPENDIX.

Documenta digna Viro Chri-
stiano, Probitatem, Chari-
tatem, & Pietatem, non
hypocriticè speculante, sed
practicante secundum De-
um.

393



ION

NOI REFORMATORI

Dello Studio di Padova.

HAvendo veduto per la fede di revisione , & approbatione del P. Fr. Antonio Leoni Inquisitor nel libro intitolato *Lucae Opalen Regni Poloniae Marefcalli , &c. de Officiis libri tres* , non esservi cosa alcuna contro la Santa Fede Cattolica , e parimente per attestato del Segretario nostro niente contro Principi , nè buoni costumi , concediamo licenza che possi esser stampato osservando gl' ordini in materia di stampe , e presentando le solite copie alle pubbliche Librerie di Venetia , e di Padova .

Dat. 8. Zugno 1697.

§ Ascanio Giustinian 2º. Cav. Ref.
§ Sebastian Foscarini C. Proc. Ref.
§ Francesco Cornaro Proc. Ref.

Agostino Gadaldini Segret.

ER-

ERRATA.

Pag: 1. lin: pen:	tractaturns	Lege	tractaturns
pag: 2. lin: 17.	distinſe		diſtincte
pag: 17. lin: 16.	diſtrahunqae		diſtrahuntque
marg: 2.	memoriae		memoria
pag: 22. lin: 13.	αναμαρτιδω		αναμαρτισια
pag: 27. lin: 11.	neceſſarium		neceſſariam
lin: 12.	tanquam		tanquam
pag: 28. lin: 23.	definit		definit
lin: pen:	Avaritia		Avaritiæ
pag: 37. marg: 4.	ejuſdem		ejuſ dum
pag: 39. lin: 11.	exanuit		evanuit
pag: 41. lin: 17.	μετρητοιαδω		μετρητοιαδω
pag: 42. marg: 1.	affectibus		affectibus
pag: 48. marg: 4.	ea		eam
pag: 58. marg: 4.	ſevities		ſævities
pag: 61. lin: 5.	qubus		quibus
lin: 11.	Theologicam		Theologicam
pag: 71. lin: 10.	ηγμενικον		ηγμενικον
pag: 98. marg: 2.	conſciſcas		conſciſcat
pag: 104. lin: 19.	της		της
pag: 105. lin: 22.	εευπραξιας		εευπραξιας
pag: 124. lin: 25.	?		?
lin: 27.	?		?
pag: 145. lin: 23.	explicitnr		explicitnr
pag: 175. lin: 20.	αγενεαλογηταις		αγενεαλογηταις
pag: 210. lin: 10.	moret		moret
pag: 248. lin: 8.	ανταξισιν		ανταξισιν
marg: 4.	elaboratam		elaboratum
pag: 259. marg: 2.	famina		fæmina
pag: 307. marg: 1.	toti		uti
pag: 309. lin: 3.	διοκρατιαν		διοκρατιαν
pag: 331. lin: 21.	βαττολογησειν		βαττολογησειν
pag: 356. lin: 16.	αχρηκη		σχετικη
pag: 357. lin: 12.	blaterenr		blaterent
pag: 366. lin: 3.	aſſenium		aſſenſum
pag: 378. lin: 5.	convctat		convertat

PRÆ.



PRÆFATIO OPERIS,

Ejusdemque Dedicatio

LECTORI.



*Uienim potiùs,quàm Tibi Le-
ctor Opus meum dedicem?*

*Causa cur
lectori o-
pus in-
scribatur.*

Tibi illud scripsi: laborisque

*& operæ non aliud mihi pre-
tium, quàm tuum commodum assigna-
vi: ut legas,inquam, ista: capias: pro-
bes: & utare. Meritò itaque ea Tibi in-
scribo:utinam tali cura noscenda, qua-
lem ego impendi: & quam vel magni-
tudo, vel utilitas meretur argumenti.
Sapientiæ etenim Christianæ,specimen
quoddam adfero:cujus cum multa sint;
quæ fructum uberem habeant adfe-
rantque,tum nullus in illa utilior præ-
stantiorque locus, quàm hic, quem tra-
ctaturus sum de Officiis: ab eo nam-
que benè sanctèque vivendi præcepta*

*Ejus ar-
gumen-
tum.*

*Unde
haustum.*

A

du-

Nova e-
jus me-
thodus.

An tra-
ctata di-
stinctè.

*ducuntur. Hæc verò ut exactè explica-
rem, non modo putavi necessarium, con-
jicere præcipua, quæ Moralis Philoso-
phia continet ac præcipit: sed etiam
nonnulla è media Theologia petenda
censui. Juris quin immò principia eo-
dem pertinere, ideoque ex professo
tractanda existimavi. Quæ omnia de-
duxisse mihi visus sum, ut nova ratione
ac ignotà hætenus metodo, ita & ra-
ro profectò pro magnitudine rei com-
pendio. Dum nempe tribus exiguae mo-
lis libris, totidemque libri cujusque ca-
pitibus, tantam rerum copiam inclu-
do. Præterea, quod alibi in tractatio-
ne Philosophica requirere Cicero vide-
tur; ut fiat distinctè, graviter, & orna-
tè, id ut probè implem animus cona-
tusque fuit, nescio an successus. Distin-
ctè imprimis studui rem aperire: accu-
ratè & aptè (prout quidè captus meus
erat) partiendo argumentum. & factà
definitione, ac divisione cujusque rei,
et si ut plurimum nova, puto tamen non*

in-

incommoda. Talis autem methodus, artis specimen habet: & enucleatius rem explicat: & melius memoriae imprimitur. Denique præclara & rara est: quia difficilis, & ardua: cum non possit fieri, nisi prius probè cognita rei natura, & ut ita dicam, subacta materia. Graviter deinde volui in serio hoc scripto versari. Itaque nec amœnitatis studio, in longas dissertationes me effudi: nec declamatoria illa, & tautologia ubertate, qua Seneca præcipuè audit, lascivire volui: nec superflua ostentatione eruditionis ineptire. In ejusmodi enim scriptione, paucis, sobriè, & graphice decet *γρηγορεύ* nihil bis dicere: sancire quodammodo & decernere: sine vano lenocinio eloquentiæ; verum, quod sat per se pulchrum est, aperire: denique inserere quædam animis, quæ cogitatione propagata, latius sua sponte pullulent, & fructum per se ferant. Attamen nec Ornatum penitus omittere volui: Necessa-

Et graviter.

Sententiam dicere.

Et non fi-
ne orna-
tu?

*riū existimans verba rebus paria red-
dere: ne vitio sermonis, ac vili tra-
ctatione, non modo nativam sui cogni-
tionem, sed dignitatem etiam amitte-
rent. Itaque huic fini, commodè ac de-
corè ab aliis dicta, Operi meo intexui;
et si non editis plerumque Authoribus:
ratus; nec eruditis id esse necessarium;
agnoscent enim: nec minùs peritis pro-
ficuum; cùm à ratione potiùs pondus
peterem, quàm auctoritate: præser-
tim verò profana, à qua, velut à non
idoneo teste, nihil veritati Christianæ
accedere posse existimo. Sacram verò
ac divinam, prorsus, ac primo loco,
censui advocandam. Quanquam nec
hujus anxie (ut plerique solent) loca
indicavi, eò quòd, censerem pudorem
esse Christiano, ea ignorare. Jam ve-
rò, an tria hæc, quæ ex Cicerone ad-
duxi, impleverim præstiterimque; cen-
sebis Lector. Censebis inquam: sed
haud rectè, nisi legas totum, probe-
que cognoscas. Quod, a te, & brevi-*

Id iudicio
lectoris
subjicitur

tas

OP E R I S. 5

tas libri facile impetraverit : & structura ejusdem omnino requirit . Nisi enim à capite ad calcem decurras ; partium ejus non invenustam Symmetriam , & quomodo prima mediis , & hæc postremis , respondeant ; videre non poteris . Perieritque primum labor meus ; quem scio me non levem , nec tenuem subisse : deinde fructus tuus , qui haberi non poterit , propera ; & desultoria lectione . Ultimum , quod adhuc præfari ad te opportunum existimo , est : ne , dum de Officiis promisso sermone , in abdita pietatis , immò & Sanctitatis Christianæ te deduci videbis ; ne inquam , putes , Titulo libri , Tractationem haud respondere : aliudque promitti , aliud præstari . Consultò , sine jactantia , & modica inscriptione Opus insignivi : tali tamen , quæ tractata complecteretur , ideoquè requireret . Ut enim Plato Rempublicam , Cicero Oratorem , Stoici Sapientem , ideo id in summo exemplari

Sed si totum , & cum cura legerit .

Cur in summo exemplari Officia posita .

Causa adfertur .

ri ostendere, ut excitarent conatum
 quam proximè accedendi, & citra
 quamvis consistentibus, laudem assi-
 gnarent; ita & mihi de Officiis Ho-
 minis Christiani dicturo, proponen-
 dum omninò fuit, quod summum
 consummatissimumquè censerem. Præ-
 sertim cum certissimum sit, veram Sa-
 pientiam, à pietate; & sanctitate,
 non posse secerni; & culmen Chri-
 stianæ Philosophiæ, religionem ac
 Dei cultum. A Pietate
Sapientiã
non posse
separari. Dei cul-
tum. Deos & Beatos esse. Veteres illi, lumine
 fidei orbi, atque destituti, alios ha-
 buere, qui Sapientiam profiterentur;
 nec Deos quærerent: alios; qui in
 Deorum vano cultu occupati, Sapien-
 tiam non curarent: ideoque dum hæc
 ab invicem sejungunt ac separant, nec
 veram (ait Lactantius) sapientiam,
 nec Religionem habuere. Nobis Chri-
 stianis, par, & juncta cura utrius-
 que: aut unius potius, nempe San-
 ctitatis, sed in qua totum istud sape-
 re continetur: atque adeò tota Scien-
 tia,

tia, Deus est. Ille Principium & Finis: ab hoc ducuntur; ad hunc omnia referuntur. Faceſſat ergo iſta ex ſolo Ariſtotele deſumpta, & ſeorſim à doctrina pietatis tractata Ethicè, & neſcio quæ, partitio virtutum, à Chriſtiana profeſſione, ac perfectione ſe-junctarum. Prodeat verò, illa, illa, ignorata profanæ Philoſophiæ, pa-rum nota plerisque Chriſtianorum, intra penetralia ac cellas aſcetarum clauſa, ſimplici & humili, ideoquè ſæpe illuſa pietate occultata, ſed alta proſectò, & ſola vera, quia Di-vina Sapientia: qua homo hic, offi-cium perfectè implere, & olim præ-mium conſequi, ac beatus eſſe poſſit.

Chriſtia-nè itaque philoſo-phandum.

Quod ego cona-tus.

Feci ego, quantum potui; ut illam proprio vultu oſtenderem: facile mi-bi promittens fore; ut multos ſubli-mitas ejus in admirationem rapiat, & pulchritudo in amorem. Moveat verò etiam eos; quos vel nimia re-rum hujus vitæ cura in tantum ob-

8 PRÆFATIO OPERIS.

Utinam
legentiū
bono.

ruit, vel vana sæculi eruditio, ac ratio humana, aded occupavit, ut fastidire quodammodo, & nauseare videantur Christianam omnem pietatem. Faciet Deus, ut novo hoc velut condimento, palatum eis excitet, novo igne teporem auferat, ac fidei fervorem succendat veritas à multis ignorata, ideoque spreta. Et quidquid, ipso Authore, à me scriptum est, eo incrementum faciente, cedat in bonum tuum Lector; ipsius laudem, honorem, & gloriam.



Pro-



*Prologomena quædam pauca ,
quæ velut fundamentum Operi
substernuntur .*



Ntequam Tractationem pro-
missam ordiar ; consultum ;
immò necessarium omnino
videtur , præmittere solida
quædam immotaque , de Deo , & quæ
ejus notionem consequuntur , princi-
pia: quibus Opus tutò inniti , & firmi-
ter superstrui possit . Frustra etenim Of-
ficia ducere conarer , causa eorum &
origine , quæ Deus est , non deducta .
Etsi itaque in libro tertio , ubi de Pie-
tate agetur , de illo tractatus erit ; attamen
hic etiam præmittenda sunt saltem
illa , quæ de eo , recta dictat docetque
ratio: sepositis in prædictum locum iis ,
quæ à revelatione habentur .

*Funda-
mentum
ponitur
operis .*

Sit itaque lapis fundamenti , & ini-
tium sapientiæ ; ut certò scias , semper-
que & impressè memineris Deum esse .
Istud autem , etsi certius est omni de-
mon-

*Deū esse
propter
atheos
probabitur .*

monstratione, & tam necessarium, ut probari non indigeat; Attamen, cū pravis quibusdam ingeniis, vel inesse, vel faciliè adhærescere soleant nonnullæ

Atheismi

Causæ a-
theismi
recensent.
iur.

1. Ingeniū
acrimo-
nia pen-
sulans.

2. Malis-
tia.

3. *Fero-*
cia.

4. Dispu
tandi li
centia.

καὶ θεόγνωτος causæ ; omnino , iis re-
censitis , argumenta ponenda sunt , ad-
struendæ Divinitatis . Quod igitur ne-
gant quidam , vel non , ut oportet , ad-
fatentur Deum : Fit primùm , ingenii
proterva & petulanti acrimonia , quæ
ratiocinando , antecedere principium
frustrâ conatur ; cùm illud , nulla ante-
cedentiâ habeat : Si enim haberet , prin-
cipium non esset . Dum ergo ex ante-
cedentibus non colligit ; cur , & quo-
modo Deus sit , ne esse quidem putat :
& fidem aspernatur ; qua potissimum
Divinitas agnoscenda est . Deinde , fit
idem , ex perversitate & malitia , quæ
Arbitrum sui defugit : nolletque inesse
Deo occultorum scientiam : quia sua
occulta nollet prodi : & ne timeat vin-
dicem , negat Authorem . Tertiò , à ru-
di quadam ferocia , quæ detrectat à su-
prema aliqua vi domari , ac contineri .
Ideoque omnipotentis Dominii osor ,
ac contemptrix est . Quartò , ex vaga
disputandi de religione licentia . Tales
enim ,

enim, cum nusquam conquiescunt; desperatione veri, Deum aut non curant, aut diffidentur. Quintò, dum bonis mala, & malis bona vident evenire; de providentia primùm queruntur: mox dubitant: & demum illam, atque Deum una, tollunt. Postremò, illecebris præsentis vitæ occupata mens, inani- bus curis negotiisque mersa, se primùm fugit: tum verò Deum, qui nequit esse pabulum turbatæ, multiplicis, & inquietæ mentis. His ferè de causis, cum multi, à debita agnitione Divinitatis, arceantur; operæ pretium est, in limine hoc scripti ostendere; Deum esse. Id verò non illis argumentis, quæ ducuntur à priori: (hoc enim probationis genus, ut dixi, locum non habet, in prima & principe causa:) sed quæ colliguntur à posteriori, id est à convenientia rei: & si negetur, ex absurdo. Deinde verò ab effectis, quæ causam apertissimè monstrant, ac testantur.

5. Ob
venit
varios
provi-
dentia
negatio.

6. Postre-
mò curæ
mortales
ac illece-
bræ.

Afferen-
da ergo
divini-
tas.

Argu-
mentis
ut vocat
à poste-
riori.

Existere itaque summam aliquam Divinamque naturam; & ratio, & generis humani consensus, & denique ordo mundi, seu creaturæ testimonium evincit. Ratio inquam imprimis facil-
limè

*Ratio e.
vincit
Deum ef-
se .*

limè colligit , mundum hunc non esse
ab æterno . Causa : quia constat par-
tibus , & ex illis compositus est . Quis
autem eum composuit ? Non seipse ;
nam conjunctionem partium antequam
haberet , non habuit : ideoque dare si-
bi , quod non habuit , non potuit : ne-
cessariò itaque ab alio eam sortitus est .
Si autem ab alio ; deveniendum erit ad
principium , quod non habeat aliud
principium : quod est per se Deus , ne-
cessariò ab æterno existens : qui nisi es-
set , nihil esset . Quæ enim ab alio sunt ;
aliquando non erant : dum non erant ,
efficere ut essent non poterant . Nun-
quam itaque extitissent , nisi quidpiam
per se esset , quod illa efficere potuisset .
Nisi itaque Deus esset , nihil eorum , quæ
sunt , esset . Atqui se esse quisque sentit
agnoscitque ; necessariò itaque fatebi-
tur , & Deum esse . Quod ipsum non ra-
tiorinando , sed sponte natura , & qua-
dam anticipatione (quam πρόληψις vo-
cant) agnovit semper , omne genus hu-
manum . Tam firma autem , tam con-
stans , tam communis omnibus , notio
Divinitatis , vel indita à Deo mentibus
nostris sit , oportet : vel à primo Paren-
te

*Et con-
sensus ge-
neris hu-
mani .*

te posteritati per manus tradita . Utro-
cunque autem modo ; ingens profectò
est veri argumentum . Nihilò autem
minus & illud , quod ducitur à rebus
creatis . Habet enim Deus testimo-
nium (inquit Tertullianus) totum hoc
quod sumus , & in quo sumus . Nam ex
tanto , tamque consummatæ artis ope-
re , quale Mundus est , utique Summus
& Omnipotens Opifex ; ex productio-
ne rerum in pondere , numero , & men-
sura Architecti mens immensa ; ex Ele-
mentorum mira temperie , & in pugna
quamvis , conservacione ; vis supre-
ma , omnia continens ; ex motuum cæ-
lestium certa , ac statuta vicissitudine ,
motor ipse immotus ; ex elegantia , pul-
chritudine , convenientia , ac demum
bonitate rerum , unum simplex ac so-
lum Bonum , in quo fons omnis com-
municatæ bonitatis ; ex humani deni-
que tam corporis quàm animi admi-
randis , id est , ex compendio ac epitome
universi , Author omnium Deus , spe-
ctatur manifestè .

*Et demò
testimoni-
um crea-
turæ .*

Atqui dicunt quidam , hæc non à *Obiectio
de natu-
ra solvitur .*
Deo esse , sed à natura provenisse . Peto
verò qua natura ? si sensu & rationis
exper-



experte; qui fieri poterit, ut quod non sentiat, nec intelligat, causa sit sentientium & ratione præditorum? Utique necesse est, ut causa effectui, quem producit, aut præstantior sit, aut saltem eum vi & virtute intra se contineat. Quomodo autem res non sentiens continebit vim sentientis naturæ? quomodo id, quod rationis expers, producet effectum se tanto intervallo potiorum? Quodsi naturam dicunt intelligentem, omnium effectricem; hoc quod naturam vocant, Deus est.

*Deus cre-
avit res
ex nihilo.*

Est ergo, est Deus: &, ut ex dictis patet, conditor est universi: idque ex nihilo. Nam si ei coæternam, increatamque statuamus materiam, illa quoque Deus alter esset, quia à se esset. Quomodo autem à se, quod non possit agere, sed pati tantum & recipere? & quomodo Deus sine sensu? & Deus corpus, & corpus sine forma? Verbo itaque ac jussu fecisse omnia dicendus est.

*Idemque
eorum
conser-
vator.*

Consequitur verò etiam: ut Rector sit ac Conservator ejus, quod produxit. Sive enim voluntatem ejus spectes; amavit, dum benefecit: & vidit, quod essent cuncta, quæ creavit, valde bona.



bona. Neceſſe eſt ergo, ut bonus bonis bene velit. Sive ſcientiam; ſcivit con-
dere: oportet ut noverit conſervare.
Sive denique potentiam; ſi ex nihilo
potuit producere; quantò magis, ne
in nihilum recidat, retinere? Et ut pau-
cis totum dicam: cùm oſtenſum ſit evi-
denter, ab eo fluxiſſe omne eſſe, neceſ-
ſariò ab eodem dependebit totum hoc
exiſtere.

Exiſtere verò, ac conſervari id, quod
ex tot diverſis, ac inter ſe pugnantibus
partibus eſt conſtitutum, non poteſt:
nifi certo modo, ac ordine, à ſuprema
aliqua vi, ac poteſtate, præſcripto,
præſinitoque. Talis autem poteſtas,
non eſt, niſi plañæ, & Factoris, in opus
ſuum: id eſt Dei. Hinc prodibit Divi-
na providentia: quæ ſine ulla anxia cu-
ra, curat reſ, & omnes, & ſingulas: ea-
rumque naturam, & noſcit; & diſponit
ad finem à ſe præſtitutum.

Neque obſtat, quòd Epicurus apud
Ciceronem dicit, hoc modo fore in-
quietum, plenumque negotio Deum.
Non enim poteſt eſſe ulla inquieta cura
illi, apud quem par voluntati pote-
ſtas eſt: & qui ut aliquid præſtet, non
indi-

*Et provi-
dentia
cũta re-
gens.*

*Sine ſoli-
tudine
& labore.*

indiget, nisi seipso: id est voluntate sua. Sollicitudo, & labore eorum est; qui volunt perducere in potestatem suam, rem sibi non obsequentem. In cujus vero potestate, cuncta sunt posita, is sollicitudinis expers erit: dum ea, quæ sine labore produxit, sine labore gubernabit. Si enim, cum non erant, vocata parvere, ut essent; quanto magis, postquam ejus jussu esse cæperunt?

*Ab eo du-
ratio re-
rum.*

*Eam ho-
mini infi-
nitæ da-
tam.*

*Quod pro-
batur ex
animi
potentiis.*

In modo autem gubernandi, præcipuum locum obtinet, durationis cuiusque naturæ terminus: quem ille, quibusdam parcius, abundantius aliis indulgit: prout ejus omniscia disposuit voluntas. Homini certè, jus vitæ pro- rogasse in infinitum, vel exinde censendus est, quòd animum ejus tam vastum produxerit, ut expleri nequeat; nisi ipso. Experimento enim didicimus, cuncta hæc creata, nunquam sedasse ejus sitim, sed irritasse; aut certè fastidium sui potius, quam saturitatem se contentam, attulisse. Fassi hoc ultrò sunt, compotes omnis, mundanæ felicitatis. Sed magis hoc ipsum adfateri cogetur, quisquis tres animi facultates, seu potentias, Memoriam nempe,

Intel-

Intellectum, Voluntatem, expenderit :
videritque quomodo nonnisi proprietatibus *τὰ ὅντες* id est uno, vero, bono Entis.
expleri, & in illis tantum conquiescere possint. Videamus hoc paulò attentius: & nulli, quod sciam, plenè notatum, penitiùs pensitemus.

Dico itaque imprimis: quòd Memoria non possit sibi planè constare, nisi omni multiplicitate rejecta, cuncta videat redacta ad unum. Nullum autem est unum præter Deum, quod in se cuncta contineat. Hoc ergo solum visum, eam quietam reddere potest. Nempè sine phantasmatum infinita copia, quæ eam turbant, distrahunque; dum videbit Deum, videbit totum, quod semper erat, est, eritque. Itaque nulla reminiscencia præteriti, nulla futuri cogitatione fatigata, unico intuitu, in idea totius quod est, defixa, ac quieta manebit. Intellectus non potest consistere, donec agnoscat Verum. *Memoria enim scilicet in Uno.*
Intellectus consistat vero.
Verum autem non cognoscitur exactè, nisi in causa prima: quæ causas omnes continet, & ultra quam non datur progressus. Talis autem Causa Deus tantum est, ergo in illo tantum subsistit Intellectus.

telleetus. Tum enim cognoscet, cur, & quomodo ab eo, quod solum verè est, fluat omnis essentia; & quis ille sit nexus causarum sese consequentium, qui initium accipit ab eo, quod non habet initium. Hac verò agnitione, omnem perplexitatem, hallucinationem, falsum, effugit: planèque conquiescet. Voluntas denique non potest expleri, nisi apprehendat bonum. Bonum autem nullum est consummatum, nisi quod à se est. Tale enim cum à se possit habere; non potest non velle sibi inesse omne bonum. Ut verò ipsum solum bonum, ita omne, quod communicatum ab eo. Itaque hoc totum, unicuique est bonum ejus, cui se communicavit. Communicavit autem se Animæ, cum illam esse; & talem, ut est, esse; gratuita bonitate voluit. Ergo hoc solum Bonum ejus erit: ergo in hoc Bono, id est in DEO Voluntatis plena saturitas, & quieta possessio. Concludo itaque locum hunc, & dico: Anima Rationalis quieta, id est, beata esse nequit, nisi viso per Memoriam Uno, agnito per Intellectum Vero, prehensio per Voluntatem Bono Deo.

Quod

*Voluntas
conquie-
scit in
Bono.*

Quod si ita est ; necessario consequetur ; ut , quod non possit , nisi participatione & consortio Divinatis , quietem , seu finem suum consequi ; id Divino auxilio elevetur , ad statum tantæ sorti & conditioni parem . Atque aded , ut verè potiatur immortalī Deo ; immortale sit , oportet : Alioqui nec appetere , nec frui posset , bono sibi non convenienti .

Post hanc vitam igitur , necesse est , vitam nobis alteram superesse : quæ nos Dei compotes reddat . Nam status huius præsentis & mortalis , incapax est plenæ fruitionis boni immortalis .

Unde immortalis status deducitur .

Et post hanc vitam vita altera .

Verè itaque pervulgatum illud Augustini , dici ad Deum potest : Creasti me ad te ; inquietum est Cor meum , donec perveniat ad te . Perveniat , inquā , sed tuo auxilio , Nam sicut (ut idem alibi loquitur) non est à carne , sed supra carnem , quod eam facit vivere ; sic non est ab Anima , sed supra Animam , quod eam facit beatè vivere . Et ut vita Carnis Anima est , ita vita beata Animæ Deus est .

Quæ in Deo .

Idemque summum appetendorum ; Summum Bonum , finisque hominis : ad quem benè , rectèque vivendi consilia

Tri summum hominis bonum .

referri ; & quem omne cogitatum , dictum , factum , respicere debet .

*Quod qui
non Appe-
tit, amittit, & perit .*

Porro Bonum hoc , malis ac perversis , qui illud nec appetierunt , nec quaesiverunt , imò spreverunt etiam , salva iustitia , non potest pariter , & ex æquo cum bonis obtingere . Necessariò itaque consequetur ; ut vita futura , dispar sit meritis , ac immeritis : Beata nempè illis , his verò misera & calamitosa .

Sed hæc uberiùs suo loco . Præmittenda verò hìc erant , seu præparandis , seu excitandis animis ; ut visis solidis hìscè principiis , surgentem libri fabricam rectè contueri , ac scandere rutò queant .



LIBER
OFFICIORUM
PRIMUS.

De Probitate.



Acto Sapientiæ Christianæ
velut fundamento, ad Offi-
cium ejus dum venio; illud
ita definio. Officium, est vi-
tæ institutum, & actio, conveniens
Naturæ rationabili. Dividitur trifari-
am. Primum enim est, Probitas: qua
homo se bonum reddit. Charitas alte-
rum: qua erga alios bonus est. Pietas
denique: qua coram DEO bonus est;
cuncta ad eum referens, uti finem.
Tripartita hæc totius Operis & Mate-
riæ divisio, totidem libros requirit: in
quibus explicandæ mihi erunt partes
istæ, compendio quidem & breviter,
sed tamen, ut existimo, accuratè.

*Definitur
Officium.*

*Dividi-
tur tri-
pliciter.*

*Uti &
tractatio
Operis.*

*Probita-
tis defi-
nitio, &
triplex
divisio.*

Probitatem definitio: Tenacem boni
animum sententia, dicto, facto. Tres
ei partes assigno: ἀναμαρτισίαν, μετρί-
τητα, καὶ ἐντροχίαν, seu fugam vitio-
rum, affectuum regimen, & exercitium
virtutis. (Ita enim Græca hæc ver-
to: interpretatione, quæ rem expri-
mat; & quæ, ut Seneca dicit, appella-
tionis vim potius habeat, quàm faciem)
Quæ tria singulis capitibus explicare, ac
complecti conabor.

C A P U T I.

*De ἀναμαρτισίᾳ, Prima Parte
Probitatis.*

*Impecca-
bilitas
explica-
tur.*

Primam Probitatis partem, impecc-
cabilitatem seu impeccantiam fe-
ci. Homo etenim à Deo factus natu-
ra bonus, voluntate autem propria
pravus, & corruptus est, culpa origi-
nis. Id est, per prævaricationem primi
Parentis, quæ eum infecit: & loco de-
biti ad Unum, Verum, Bonum amo-
ris; indidit concupiscentiam multipli-
cis, falsi, ideoque non boni. Hoc fon-
te derivata labes fluxit ad posteros: id-
que triplici, prout partitur Discipulus
Domi-

*Quæ est
in expu-
gnanda
triplici
concupi-
scentia.*

Domini, rivo. Nempe Concupiscen-
 tia carnis, Concupiscentia oculorum,
 & Superbia vitæ, quibus omnem pec-
 candi materiam ostendam contineri. *Per non*
 Per subsidia igitur, quæ Deus homo fa- *peccandi*
 ctus, sufficientia reparandæ naturæ *propositū.*
 præstitit, opus est eradicare ex animo
 mala, firmumque facere propositum
 non peccandi. Nempe post solennia *Per Sa-*
 illa Sacramentorum, (de quibus suo *cramen-*
 loco,) Conscientia formanda est; tan- *ta, &*
 quam Dux, & custos vitæ innocentis. *conscien-*
 Est enim illa: Internum & integrum *tiam, Cu-*
 iudicium, respuens malum; id est pec- *jus defi-*
 catum: veniens, cum abhorrentia; *nitio.*
 admissum, cum angore; in bono au-
 tem, cum gaudio conquiescens: idque
 totum cum Deo, & propter Deum.
 Meritò hæc postrema addidi; nam si ra-
 tionis tantum, non verò religionis di-
 ctamine oriatur, nihil est. Fit tantum
 inanis, vel ostentata Probitas, id est,
 fucus. Firmamentum igitur illius uni-
 cum erit, timor Domini. Porro ut evel-
 lantur vicia, dignoscenda sunt. De sin-
 gulis itaque partitione proposita di-
 cam.

Pars Capitis Prima.

*Explicatur primus peccati ritus,
Concupiscentia Carnis.*

*Defini-
tur Con-
cupiscen-
tia .*

Concupiscentia Carnis est, Abusus
eorum, quæ corpori propria . Fit-
que tripliciter . Nempe molli ac deli-
cata desidia, Gula deinde, ac demum
Libidine . Qui his dediti, illis corpus
voluptati, anima oneri est . Mollitiem
*Pars ejus
prima
Molli-
ties .* voco, nimis delicatam curam corpo-
ris, quæ desidem & enervem vitam red-
dit . Sunt enim quidam in cute curan-
da nimis operosi, nimis compiti, nimis
culti, odorati, uncti, sensuum oblecta-
mentis inhiantes: idque cum quodam
delicato fastidio, quod scitè quidam
præferunt, ostentantque . Taliter oc-
cupatis, non vacat vivere: & hinc non
modo laboris, sed omnis actionis fu-
ga; segne tantum otium, id est vivi ho-
minis sepultura . *Gula
pars al-
tera .* Gula est in esu, & po-
tu excessus . Dum ganeones isti avidè
vorant, liguriunt, ventrem variè far-
ciunt, nec egentem, neccipientem .
Deinde potu ad crapulam sese ingur-
gitant; fructu, nausæ & cruditatis;

qua

qua evanidi pallent, & in vivis caro morticina est. Libidinem vel nominari vetuit Apostolus: igitur definitione illam non dignabor.

*Tertia,
Libido.*

Hæc sunt vitia, quibus homines in bruta animalia degenerant: quam vincant ea potius, quam imitentur. Illa enim, etsi hoc unum agant, & appetant; tamen non ultra naturæ modum, quem homo excedit.

*Hisc de-
genera-
mus in
bruta:
immo ea
superamus.*

Nempe Caro concupiscens adversus Spiritum, postquam pellexit animum suis illecebris, frui illis jubet. Dum autem animus fruitur, & expleri nequit; exigere illas vult ad mensuram sui appetitus: & corpus, citò satiabile, onerat ac torquet: studetque ingenio irritare, ac provocare languentem ejus, falsamque voluptatem. Sed frustra: nam præter inevitabile fastidium, dolor & morbi, intemperantiæ comites, tandem abstinere vel invicem cogunt. Habes detecta mala, quæ Concupiscentia carnis facit.

Et quare.

Remedia contra eam ut adferam; Primum erit: ut voluptatem ejus ab eunte cogitemus. Morsum nempe illum, quem aspernatione, & abhor-

*Remedia
contra
corporis
voluptatem.*

rentia

Annexum ei pœnitere. rentia sui, linquit; Annexum namque semper illi, pœnitere. Et, si rectè expenderis, facilè agnosces; istas, quas vocamus voluptates, ubi modum transcenderint, profectò pœnas esse. Deinde, agnoscamus; quàm id, quod in illis oblectat, & vile, & breve sit; tantoque studio appeti non mereatur. *Turpis.* Tertiò, ut turpitudinem earum aversemur. Mollitie enim, obliviscimur animi; & velut abdicamus meliorem nostri partem; tota cura ad corpus translata. Vitam otio, somno, ignavia conterimus; & occupatio, dotibus animi, prorsus contraria est. *Fœda.* Gula, ad naturam eorum delabimur, quorum tota vita est, ali tantùm, & nutriri. Mactatorum animalium, & intra nos putrescentium, sepulchrum sumus. Et multa ingluvie, & crapula, sordescimus; fætemusque. Libido denique, quàm sit, usu, & obscœnitatis ministerio fœda, fatentur etiam impudentissimi; dum turpitudine adacti, lucem fugiunt, & latebras quærunt.

Vitanda hæc igitur essent Sipienti, seu viro bono; etiamsi non fuissent à Deo vetita; prout etiam docuit vetus illa

illa Philosophia. Quantò verò magis, cum non ratio tantum, sed etiam lex Divina vetat? Profectò & ratione, & præcepto firmatus animus, non modò illecebris corporis se capi & captivari non permittet; sed quò longiùs ab hoc absit periculo, contraria eliget, ac usurpabit. Nempe, prout Schola Christi docet, domabit corpus: & ad servitutem, ac obsequium animi, per necessarium *ἀσκησιν*, rediget. Vivamus hanc vitam igitur; non tanquam propter corpus, sed tanquam non possimus sine corpore.

*Et quia
a Deo ve-
rita.*

Exerci-
tationem.

Pars Capitis Altera.

In qua ostenditur, quid sit Concupiscentia oculorum.

Alter peccati rivus est, Concupiscentia oculorum, seu Avaritia; quam voco; Rerum, quæ extra nos, pravum usum. Rectè vocatur Concupiscentia oculorum. Cuncta enim externa, quæ Avaritia appetit; quid habent, præter spectari tantum, & videri? Tripliciter hîc peccatur: nempe dum illis Fruimur; Non utimur; Abutimur.

*Definitio
Concupiscentiæ
oculorū.*

Fru-

*Fruitio
prima e-
jus pars.*

*Eaque
explica-
tur ac
monstra-
tur.*

*Pars, al-
tera, Par-
citas.*

Fruitio rerum externarum, est: ni-
mia ex illis oblectatio: vel animus ea-
rum specie nimis captus, ac irretitus.
Splendor enim ille opulentiae, & com-
moditas, & arbitrium quoddam in re-
bus humanis pecuniae omnipotentis, &
illi annexa mundana felicitas, per-
stringit primum oculos; & tum mirum
in modum animum fascinat. Præfer-
tim, si quis sit; qui gloriari & gaudere
possit, datas sibi divitias, artemque
fruendi: qui non, ut ganeo, aut pro-
figator; ut plerique, sua haurientium:
sed erudito luxu, qui in omni cultu di-
ligens, elegantiae ac magnificentiae pe-
ritus sit ostentator. Hi inquam tales,
immergunt animum in externa; & eo-
rum pulchro, ac prudenti (prout pu-
tant) usu inescantur. Et quia in veste,
domo, suppellectili, familia, procu-
rant varia, ac comparant; Multa au-
tem requiruntibus, multa petentibus,
necesse est desinit multa: ideo necesse
quoque est, ut anxie & avarè appe-
tant: & ut consequantur, sæpè jus &
fas, insuper habeant.

Altera pars Avaritia est, non uten-
tium rebus externis: idque nimia insa-
na,

na, & sordida parcite. Etenim multi, falso obtentu posterorum; vel inani in senecta egestatis metu, vel nec causa, nec fine habendi; semper egent: semper appetunt: semper congerunt; & congesto pauperes in auro sunt: Dum, quod per tot labores, & curas, sæpè turpi questu paravere; recondunt: maluntque omnem penuriam sustinere, immò etiam emori, quàm sacrum tangere depositum. Itaque pendunt pœnas vitii infelicitis: aliis odio, sibi oneri sunt. Nec quidquam boni faciunt; nisi dum citò moriuntur: cùm sint omnium Officiorum defectores, & nulla erga quenquam charitate.

Tertium genus avaritiæ est, apud eos; qui rebus externis abutuntur: nempe, apud prodigos. Isti enim, dum non alium fructum opulentiae, quam profusionem putant; nullam curam, & cautionem erogandi habent: Sumptuosa convivia, ingentia in veste & familia impendia, immensa largitio, qua perdere sciunt, donare nesciunt. Ita, inquam, effusi in cuncta, queis pecunia prodigitur; dum sua decoquant,

*Ejus in-
genium
describi-
tur.*

*Pars ter-
tia, Pro-
digali-
tas.*

*Ejusque
mala.*

quant, aliena expetunt: & egestas infue-
ta, ideoque intoleranda, acris causa
Avaritiæ est. Cui semper tantum deest,
quantum cupit. Cupit autem quan-
tum prodigit; & prodigit immensum.
Ideoque ejusmodi radix omnium ma-
lorum fit: fraudis nempe, injuriæ, per-
jurii; rapinæ. Quin immò, si animi sint
âcres ac violenti; sæpè seditionis, ci-
viliumque bellorum. Tales, inquam,
solent ad facinora converti: cuncta
miscere: & privata damna, Patriæ ma-
lis reparare.

*Remediū
erit non
amare
externa.*

Hæ sunt causæ: hæc mala avari ani-
mi; & Concupiscentia Oculorum pec-
cantis. Remedio erit, admonitio Sa-
cri Vatis: qua vetat divitiis, si afflu-
ant, cor apponere; id est amare, velut
verè bona; cum non sint: sed ex se,
neque bonis, neque malis accensenda.
Unde meritò exilis eorum æstimatio
animo inferi debet. Caduca nempe

*Quippe
adiapho-
ra.*

*Minuta,
& cadu-
ca.*

sunt: mutationi, & alienæ potestati ob-
noxia: &, ut non eripiantur; morte
tamen mox relinquenda. Deinde, non
vilia tantùm sunt, sed etiam noxia: A-
nimum enim perturbant; & anxie ex-
petita, inquietant: dum acquiruntur,
fati-

Noxia.

fatigant : non adepta , torquent : pos-
 sessa , non satiant : denique custodita
 merum ; erepta , vel amissa , dolorem
 adferunt . Quod si verò ad votum suc- *Et quæ
 nihil ad
 animum.*
 cedant , & possideantur ; tamen nihil
 ex illis accedet ad interna illa , verâ-
 que solatia : quæ pura tantum , & vero
 Bono , id est , Deo nixa , mens conferre
 potest : & , quæ tantò majora sentiun-
 tur ; quantò quisque sibi plura nega-
 verit . Intra nos , nempe , esse oportet ,
 quod nos beatos faciat : externa , he- *Non de-
 cet ita-
 que illis
 frui.*
 terogenea animo sunt : ideoque non
 ei miscentur , seu uniuntur . Et quid
 stultius , quàm bonum rationalis na-
 turæ , in irrationabilibus quærere ? Hæc
 ad tollendam Avaritiam , quæ ex frui-
 tione . Addo : contra insanam Parcita-
 tem , utendum esse opibus . Nisi enim
 utare ; infania (ut apud Poetam est)
 par eris illi , qui cytharæ ignarus , cy-
 tharas undique cõemat , comparer ,
 asservetque . Porro usui , si necessita-
 tem tantum spectes : facilè parabilis ,
 sufficiens , & suppetens erit . Prodigia *Sed uti-
 tatem
 abuti.*
 litatem , seu Abusum dissuadet , quæ
 luxum humili gressu comitatur egestas :
 iubens quidvis agere & pati : agere , in-
 quam ,

quam ; iniqua ; & pati indigna . Ita hinc orta Avaritia , aut scelerata , aut misera , semper verò perdita erit . Quam ut evites , regulam tibi constitues erogandi : eam verò dictabit parsimonia ; virtus huic vitio opposita : de qua suo loco .

Pars Capitis Tertia .

*Declaratur tertius rivus peccati ,
nempe Superbia vite .*

*Definitur
Superbia
vite .
Sui amā-
tem cupi-
ditatem .*

Post detectam corporis , & (ut ita vocem) fortunæ , diram cupidinem ; superest : ut animi *φιλανθρωπία* excutiam . Concupiscentiam nempe sui , quæ est superbia : quæ definiri puto commodè potest ; ejus , quod est supra id , quod sumus , usurpatio .

Ejus origo .

Oritur : dum totum hoc , quod sumus , nos accepisse à Deo obliviscimur ; aut certè , non ut oportuit , meminimus . Deinde , etsi accepisse cognoscimus ; tamen tanquam ex merito , & debito datum . Postremò dum plus nobis attribuimus ; quàm datum habeamus .

Et materia triplex .

Quamvis verò hanc Concupiscentiam , dixi , animi esse ; tamen materies ejus , non ab illo tantum est , sed à dotibus etiam

etiam corporis, ac fortunæ. Unde, à triplici hac materie, prodibit triplex animi elatio.

Prima à Corpore: quam Ferociam *A Corpore re Ferocia.*

voco; nempe viribus corporis nimis fidenter elatumque animum. Sunt enim, qui nacti corpus vegetum, validum, laboris patiens, dum robur ejus respexere; facile induunt animum arroganter: acres ac violentos Spiritus *Que describitur.*

sumunt: acerbo fiunt ingenio: truces, feri, contemnunt infirmos, & depri-
munt: cunctis terrori esse volunt: simulque & in altum efferuntur, & rabie efferantur. Gigantæa nempe proles: quos à staturæ magnitudine; id est corporis viribus famosos, potentes, nihil nisi bellum scientes, disciplinæ, seu mansuetioris vitæ ignaros, Scriptura vocat, & quos Poetæ *ἑρμαῖρες* faciunt. **DEUM**

Ita nempe Superbia exinde orta, quam oppug-
nam revera fragili nitatur fundamen-
to; tamen plurimum extolli solet: dum audax, nihil ratione, sed vi tantum, ac impetu agit; & quantumvis ardua, atque, appetere, & adipisci, eoque conatur; donec seipsam perdat: & præcipitet.

C

Alte-

*A rebus
externis
Fastus.*

Alterum Superbiæ genus, à rebus externis ortum, vocabo Fastum. Nempe ex affluentia earum, vanæ gloriæ vento inflatam mentem. Porro inter externa numero non solum opes, nobilitatem, potentiam, cæteraque infra animum; sed etiam naturales ejus facultates. Pertinet namque ad fortunam, quidquid sorte nascendi contingit: & totum id, velut externum est, quo hominibus apparemus, & videmur. Unde duplex erit, velut dos, fastuosæ elationis: Affluentia nempe mundanæ felicitatis; & excellentia naturalium animi facultatum. Primum, cum insanum vulgus adeo æstimet; ut propterea Sectatores, & turbam famulantium, venerantium, blandien-

Qui duplex.

*A Fortuna
fastus
ad ostentationem.*

tium, promptè exhibeat; facit: ut animus, inani plausu illius, sui obliviscatur: extra se totus exeat: se totum vanitati aptet, & accommodet: & ab interna ista, & inani elatione; sensu, verbis, actione, ad ostentationem, pompam, tyrannum se componat: quod mimicè prorsus, & Histionum instar, fastuosi isti exercere solent. Alterum, dum nempe Memoria, & Intellectus

*A dotibus
ingenii,
judicio
arrogans.*

solito

solito obtigit felicior; & deinde studio
 acquisita doctrina, & scientia, animum
 occupavit: & quæ potissimum eum va-
 nè ostentat, longè provehit, opinione
 inficit, (quippe quidvis struendi & de-
 struendi artifex) Eloquentia: si istarum,
 inquam, dorum præstantiam, quispiam
 fortitus est, facilitè arrogantiam judi-
 cii sumit; ac usurpat. Arrogans verò
 hocce judicium, si ad actionem se ac-
 cingat; è contemptu aliorum, quibus
 præcellere se censeat; alta concupiscit;
 & sæpè ambit: fiuntque tales in Repub.
 imperiū impatientes, & seditiosi. Si in
 cognitione veri ponit operam; aut in
 Philosophiam labitur, aut in hæresim.
 Philosophiam intelligo, quæ rationis
 propriæ tantum viribus constat; & ni-
 titur: prout fuit vetus illa, *ἡ θεοῦ διδασκαλία*, religionis contemptrix, & Dei
 aut penitus oblita, aut tanquam per
 insomnium memor: ipsa verò, adeò
 plena inanæ & insanæ fiduciæ; ut dice-
 ret Sapientem Deo parem. Hæresis
 verò est, quæ scientia inflata, autori-
 tatem receptæ & constitutæ doctrinæ
 spernit: judicio proprio eligens dog-
 mata; eorumque censuram arrogan-
 ter

*Vnde aut
 Philar-
 chia.*

*Aut Phi-
 losophia.*

*Dei ne-
 scia disci-
 plina.*

*Aut Phi-
 lodoxia.*

ter exercens. Ita utraque hæc, aut contemnit fidem; & irridet: aut dum ad suum captum aptat; tollit. Jam verò à voluntatis etiam facultate fastus oritur. Quibusdam enim, ab indole meliori, est moderatio affectuum; & placida animi tranquillitas: exinde verò ad officia virtutum velut congenita quædam propensio. Natura videntur boni, si ad vitia non multum proni. Et videntur sæpè magis, quàm sunt: unde provenit suavis, & blanda φιλαυτία; & dum in se confidunt, tanquam justii, profectus incuria; & ex omnibus istis, interitus veræ Probitatis.

Ab animo proprio superbia. Sed tertium, & perniciosissimum elevationis genus est: quod ab interiori animo, & ut loquimur, Spiritu producit. Deus enim Spiritus est; ideoque vult adorari in Spiritu & veritate. Si itaque quispiam, subactò corpore & fortuna, animum depuravit; id est, in Spiritum vertit; illum verò ad se mirandum, sibique complacendum convertit; & à Deo hoc ipso avertit; is Deum Spiritu oppugnat: fit ei injurius: quippe donis & auxiliis ejus sultus, eum aspernatur, & à se remover. Ideoque

que quod acceperat, amittit; & turpi
lapsu perit. Hæc est vera, proprièque
dicta Superbia; ab hac initium accepit *Primoge-
nita pec-
cati.*
peccatum. Nam & rebellis ille Spiritus,
aliter quam Spiritu ornato gratia, &
gloria, superbire; & velle æquari Deo
non potuit: & homo, re Spirituali,
nempe cognitione illectus est; per quam
fieret sicut Deus. Itaque Ferocia, &
Fastus, velut coram hominibus fiunt;
Superbia propriè in conspectu Dei: qui
ei resistere, id est, quodammodo se ab
illa avertere dicitur, & humilia respice-
re in terra, & in cælo. Hæ sunt partes
Superbiæ, à corpore, à rebus externis,
& ab animo ortæ.

Cæterum materies eorum, aut ple-
nè, & ad votum, non habetur; aut ha-
betur. Si primum; oriuntur vitia pau-
peris superbi. Nempe studemus Ja-
ctantia aliis imponere; deinde satagi-
mus augere ambitione: contendimus
per æmulationem: in victoria, contu-
melia utimur: si vincamur; invidia. Si
alterum; mirum prorsus est, quantum
felicitate corrumpamur. Fortunata
enim Ferocia, tota in belluinam natu-
ram mutatur; cuncta vi ac violentia a-

*Deo ma-
ximè ad-
versa.*

*Vitia
ejus dum
pauper
est.*

*Vitia
ejusdem
abundat.*

git: hinc cædes, bella, id est, populorum latrocinia; & illud occisarium gentium grande scelus. Fastus compos felicitatis mundanæ, mentis impos fit: gloriæ vento abripitur: & eò vesaniæ devenit; ut per illum, (portenta hominum!) se Deos non dici tantum juberent; sed etiam coli. Magnis deinde animi dotibus inflatus; impius est; fanaticus: blasphemus: professus hostis Dei: famulus, & cooperator Dæmonis. Equo Apostatæ, Seductores, & Hæresiarchæ; quorum proprius character est, ut sint filii perditionis: nam se perdunt, & alios. Denique ab animo interiori, & puritate Spiritus, orta superbia, illuditur variè à Dæmone, mutato in Angelum lucis. Primum dulcedine inani fruitionis: tum sæpè extasi: raptu: & falsa gloria animæ, in corpus etiam per miros effectus defluente. Unde suboritur complacentia, amissio gratiæ, & damnationis præcipitium.

*Remediū
ejus, no-
sitia sui.*

Sat puto aperui causas: partes: malique Superbiæ. Remedium adversus immane hoc, & maximè inimicum Deo vitium, unicum esse existimo: nempe
sui

fui ipsius notitiam . Quod etsi verus
quoque Philosophia vidit ; & velut o-
raculum agnovit : attamen nec plenè
intellexit , nec implevit . Notitiam e-
nim sui , seu à corpore fragili , seu ab
externis adeo viribus , ad deprimen-
dam superbiam , idoneam ; facile a-
gnovit : & merito exinde *σωφρωνειν* præ-
cepit : sed cùm ad animum venit ; ad-
miracione ejus abrepta , tota in fastum
exanuit . Atqui undique , ad omnem
nos modestiam , non duci tantùm , sed
etiam compelli , manifestum est . Fe-
rocia enim , ut altos ponat Spiritus ;
vel invita à corporis fragilitate adigi-
tur : cujus non vigor tantùm , sed vita
etiam facillimè interit . Vita , inquam ,
halitus tenuis ; brevi tempore suapte
extinguendus : quem supprimit sæpè ,
levi causa , morbus : quem eripere po-
test , quidquid tandem est : Nam ortus
illi unus , exitus innumeri . Porro si il-
la tam instabilis ; cur homo firmitate
corporis superbiat , ejusque virium o-
pera , tam alta moliri conetur ? Itaque
ab hac tui parte , nosce te ; & non ad
vim corporis animum apta ; (quod est
proprium Ferociæ :) sed ad vim animi
corpus .

Tempe-
ranter a-
gere .

A corpo-
re fragili
contra
Ferociam .

corpus redige : exerce ; doma ; & quandoque libens impende : quæ est , ut ostendam alibi , Fortitudo . Ista sunt , quæ ferociam tollunt . Ad exvendum verò Fastum ducit : primò ; rerum quæ extra nos , vilis conditio ; & par illis æstimatio . Quam superiùs cum satis demonstraverim ; superfluum est repetere . Certè exinde extolli , tam insanum est ; quàm commodata ad tempus aliena veste , vel comico ornatu , aut persona superbire . Ducit eodem ; naturalium animi facultatum imbecillitas : quarum tenebras , hallucinationem , miseriam , quando non experimur ? In memoria ; ecce confusa phantasmatum multiplicitas est : in intellectu ; erronea opinio : in voluntate , inordinatus amor : quæ nisi in nobis videmus continuò ; valde ignari nostri sumus . Itaque ut id agnoscamus ; & ne vano fastu inflemur ; sibi attendere , & se nosse decet . Postremò , eadem sui notitia , etiam ab interiori animo , vetat extolli , ac superbire . Quamvis enim eximius ille est ; tamen quantus quantus est , ab alio est ; & ipse per se nihil . Quamvis superemineat ; tamen Deo

A vilitate rerum externarum contra Fastum .

Ab animi instabilitate contra superbiam .

Deo comparatus, pusillus. Quamvis denique virtute, & gratia pulcher; tamen à se sædari facilis, & ni Divino sustineretur auxilio, continuò culpa turpis. Hæc tria probè expendentem, humiliari coram Deo necesse est. Quis enim de alieno, minuto, & corrupto superbiat? Itaque vera animi notitia, ad omnem modestiam flectamur. Quod non abjectionis est: sed roboris, ac firmitatis. Id enim verè est sibi dominari; seque majorem effici: quod summum fortitudinis opus esse, cum de illa agam, demonstrabo.

Que cuncta humiliari cogunt.

C A P U T I I.

De Regimine Commotionum seu de

Alterâ Parte

PROBITATIS.

Absolvi primum officium Probitatis. Ordior alterum: nempe Regimen Commotionum, id est, Affectuum, Perturbationum, ac Passionum. De quibus dicam quædam paulò aliter, quàm vulgus Philosophantium solet. Et primum ostendam istas Commotiones esse; & quid, & quot sint: deinde

deinde quales sint : postremò quales
esse debeant . Erit ergo ;

Pars Capitis Prima .

An sint , quid sint , & quot sint
Commotiones ?

*Vetus cõ-
tentio de
affecti-
bus .*

*In quo si-
ta descri-
bitur .*

*Verbo-
rum veli-
tatione .
Et vana
ostendi-
tur .*

INter Sectas veteris Philosophiæ , a-
cris , ut notum est , fuit illa de Affe-
ctibus controversia , & contentio . In
eo fere sita : quòd Peripatetici eos tem-
perarent ; Stoici tollerent . Illi , à natu-
ra esse , ideoque inevitabiles , & mo-
derandos tantum ; hi , ab electione , &
voluntate ; ideoque tolli posse , ac nul-
los esse debere ; non parvos . Denique
illi censebant , imperum ac vigorem a-
nimi ab illis esse ; ideoque , si modus
adsit ; laudabiles : hi , quasi morbos
eiusdem dicebant ; ideoque vitandos
prorsus Sapiènti . Et multa ultro ci-
troque argutabantur , sueta illis λογό-
μαχία . In quo utrique frustra fuerunt .
Nam & hi , qui affectus prorsus sustu-
lerunt ; & illi , qui modum tantum ,
non verò finem etiam eorum specta-
runt ; aberravere . Sed tota hæc pu-
gnax

gnax disceptatio, uti & alia, quæ de
Affectibus prodita hæcenus sunt,
nunc primum, puto, patebunt evi-
denter, ex hac, quam sic instituo
tractatione.

Apertum & evidens est, omnibus *Origo cō-*
rebus inditam esse appetitionem eo- *motio-*
rum, quæ suæ naturæ conveniunt. Ea *num ge-*
appetitio, in rebus inanimatis *nerica*
Pondus
est ad locum proprium; In viventibus
vegetatio; In sensitivis *Instinctus* ad se,
speciemque suam conservandam; in
ratione præditis *voluntas*; seu effe-
ctus ejus, Amor: qui unum, proprium
naturalemque terminum, habeat ne-
cesse est; alioqui supervacaneus, con-
tra naturam naturæ esset. Hic autem
terminus ejus est, Bonum. Bonum au-
tem est; quod propriè, & unicè ei na-
turæ, cujus bonum est, convenit. A-
mor verò, dum hic vivimus, nihil est
in nobis aliud, quam incitatio & fer-
vor voluntatis, ad apprehendendum
agnitum istud Bonum. Cui opposi-
tum Odium; seu ejusdem voluntatis
aversio à malo.

Porro ut illa prima τὸν ὄρον, si ob- *Entium*
tineant id, quod naturæ eorum con-
venit,

*Origo earundem
specificarum.*

venit, conquiescunt. Si verò impedian-
tur, arceanturque; commoventur: &
vim sibi inferri, aperta resistantia osten-
dunt. Ita & homo, si potiretur, frue-
returque bono suo, in quiete seu gau-
dio esset: omnis commotionis, nem-
pe affectus, Perturbationis, ac passio-
nis expers. Sed quia, vel nondum bo-
ni planè capax est; ideo Affectu move-
tur: vel circa bonum impeditur; ideo
necessariò perturbatur: Vel denique
partim imperfectè fruitur; partim fru-
stratur; ideo Passioni subest. Et hinc
patet, triplicem hanc esse Commotio-
nem: dum hìc vivimus, necessariò no-
bis adhàrentem.

*Nempe
Affectuum.*

Primum enim, non est homo plenè
capax boni, quamdiu hìc vivit. Quip-
pe (ut in ipso limine scripti docui,) Bo-
num ejus Deus est: Deo verò frui hic
plenè non potest: ideoque nec affectu
carere: cujus causa & origo vera est,
Amor non compos Boni: Et definire
illum possis: Motum amoris, bono
suo non fruētis. Hic motus, cum
duplex sit, nempe, quo nos amor ad
bonum fert; & quo odium à malo re-
movet; Duplex erit & affectus: De-
side-

fiderium ſcilicet ; & abhorrentia , ſeu Fuga .

Deinde , cū infirmitas naturæ , ex Spiritu ac corpore conſtitutæ , impedi-
 ri in conſequendo facile poſſit ; ideo
 perturbari eam neceſſe eſt . Perturbatio-
 nem verò deſinio : Amoris ex præpe-
 dito , aut dubio bono commotionem .
 Ea eſt quadruplex . Nam ſi ita impe-
 diatur bonum , ut vinci tamen poſſit
 impedimentum ; tunc provenit ira . Si
 bonum ad futurum videatur ; oritur
 Spes . Iterum verò ſi impediti boni ,
 periculum appareat , à malo Metus
 naſcitur . Si certò malum putetur fu-
 turum ; prodit Deſperatio . Unde pa-
 tet , quatuor prout dixi , perturbatio-
 num ſumma genera eſſe : duo ad bo-
 num , totidemque de malo . Sed per-
 turbationes iſtæ , valde moderatæ ſunt ;
 unum , verum ; bonum continuò appe-
 tenti . Eſt enim illud natura ἀκωλυτον ,
 ὁ δὲ διαφαιρετον , id eſt : quod nec impe-
 diri , nec prohiberi , multò verò mi-
 nus eripi poteſt , niſi ipſe velis . Itaque
 ira , metus , deſperatio , tamdiu locum
 vix habent ; quamdiu homo unum ,
 verum , bonum quærit . Spes tantum
 manet :

Pertur-
 batio-
 num .

manet : sed blanda , & interdum gaudio brevi mixta : ut Apostolus jubet esse bonos , spe gaudentes . Nisi quod quandoque Deus vel permittit , vel immittit etiam , breves quidem , sed tamen acres istas turbellas in bonos : seu in pœnam alicujus culpæ ; seu in exercitium virtutis ; seu denique in stimulum , ac incitamentum : ad appetendam tantò magis veram , ac immortalem quietem , quæ nos olim manet .

Passionū.

Vnde patet sapientem non esse apathem, seu impassibilem.

Impassibilis.

Sed tertium Commotionum genus , posueram Passiones : non minùs , quam duo prima , inevitabiles . Idque ob fruitionem , vel brevem , vel frustratam . Est enim Passio : amoris ex bono , aut aliquantum possesso , aut amisso , sensus exultans suavitate ; vel concidens amaritudine . Ille est lætitia , hic tristitia .

Multò minùs malum, seu stultum.

Non erit itaque Sapiens , id est , vir bonus , in statu hoc mortali ἀπαθής , ut Stoici nugabantur . Quia securitas , perpetuitasque pacis , & quieti gaudii , adhuc illi deest . Malus verò , & qui stultè falsa bona consecratur , evidens & necesse est , ut Affectibus , Perturbationibus , Passionibusque multò magis

magis commoveatur . Quippe , & æ-
grè consequi ac retinere potest , quæ
extra ejus sunt potestatem ; Et ut con-
sequatur , habeatque ; tamen minimè
quiescet : nempe , non in bono . Itaque
& avida cupiditate inhiat bono , quo
expleri nequit : & aversatur frustra id ,
quod non est malum . Deinde & ira
exæstuat , inque audaciam impetu ruit ;
dum illi facilè , bonum opinabile impe-
ditur : & alternante spei , metusque flu-
ctu agitur , quatiturque ; dum adeo
dubia , & incerta petit . Denique aut ef-
ferrur vana , brevique læticia , si contin-
gat consequi opinabile bonum ; Aut ta-
bescit dolore , si eo frustretur . Et hæc
illi continua , gravis , & infelix pugna
est , in animo decepto , & frustra quie-
tem in falso bono quærente .

Pars Capitis Secunda .

In qua Amoris tres proprietates osten-

sc : ium singularum commotio-

num qualitas , & efficacia .

HAbes reclusum Commotionum
fontem : Ex quo , etsi facilè qua-
litas earum peti , ac hauriri potest ; ta-
men

Premittitur amoris energia. men singulas separatim producam : Sed præmissa prius , explicataque breviter amoris energia : hæc enim probè intellecta, lucem Commotionibus istis confert.

Se perfectius appetit. Amoris itaque prima proprietas est ; ut majus se quidpiam , perfectiusque appetat . Bonum enim semper potius perfectiusque est re , cujus bonum est :

Vnit cum re amata. atqui amor , non appetit nisi bonum : perfectius ergo appetit . Altera Proprietas ; ut amor amatae rei uniat .

In ea quâ potest transmutat. Etenim uniuntur ea facile ; quorum unum , & potest , & studet apprehendere ; alterum item , & potest , & avet communicari . Tale autem est Amor & Bonum : unde coalescant in unum , est necesse . Tertia , eaque summa Proprietas ; ut amor non uniat solum , sed etiam , quâ potest , transmutet . Essentiae enim annexa operatio est : Amoris verò Operatio ; dum se penitus linquit , & tota in amatum transiit ; ideò in illum , & esse suum quodammodo transfert . Hinc verò consequitur hæc , quam dixi , transmutatio . Magna verò prorsus ac mira , in hisce tribus , Amoris vis , ac energia est , per quam (ut benè quidam nuper dixit ;) plus nobis da-

datum est in eo, quod esse possumus, quàm quod sumus. Datur enim libera optio, ut quodammodo id sis; quod esse volueris: id fias; quod amaveris. Hæc non re, sed verbis, pauca de Amore.

Ad Commotiones transeo; primùm *Definitur primus affectus: Desiderium.* Definitur: boni absentis naturalis appetitio. Propriè vocatur Affectus, quia afficit intimè voluntatem. Inest Amori; ejus inseparabile accidens: & dum hìc vivitur, ob absentiam, nunquam se plenè impertientis boni, perpetuum. Est nempe motus animi, quo ille fertur, quòcumque fertur. Si in verum bonum; etsi magno, placido id tamen facit conatu, pleno spei, dulci, ac jucundo. Appetit enim, quod Naturæ ejus convenit; quod eam explet, perficitque. Si verò fertur in bonum opinabile; quidquid agat, inutiles anxietate, & cura; irritum conatum sentiet, & agnoscet se appetere, quod prava cupido suadet, reluctanti Naturæ, & invitæ. Alter Affectus, *Alter: Fuga.* oppositus Desiderio, est Fuga: id est mali imminentis abhorrentia. Si verè mali;

faciliseffe potest, parato semper auxilio Dei, si invocetur. Sin illius, quod non est malum; stulta, inanis, & frustra est.

Perturbatio prima, Ira.

Sequuntur Perturbationes. Et primum Ira: quæ est; Commotio animi aut resistentis, aut pugnantis in ea, quæ bonum impediunt. Merito, & propriè Perturbatio vocatur: quippe ut plurimum inquieta, & turbata. Initium sumit ab Indignatione, qua velut decernit; comparans boni præstantiam, cum indignitate adversantis justam pugnae causam. Et hinc sumpto impetu, resistit malo, forti tolerantia; oppugnat verò idem, animosa audacia. Difficillimè modum patitur: quippe sæpe incitata, fervida, ardens. Et dum omni conatu renititur, nititurvè; moderationem pusillanimitatem existimat. Si falsum bonum tuetur; aut in obstinam pervicaciam vertitur: aut ad temeritatem prorumpit: Et victa angitur; & in victoria sævit, ac vindictam exercet.

Alter Metus.

Metus, est Perturbatio opposita, contrariaque Iræ; ideoque definitur, Contra illa, quæ bono adversantur, resi.

resistendi detrectatio, & certaminis fuga. Oritur ex opinione, phantasmate, ac imagine mali; quæ, si animus terretur; concidit: si verò modum teneat; recteque causam metus æstimet; & vereri sciet, & tutò aggredi. Tertia Perturbatio, Spes; nempe repræsentatio, & exinde velut odor quidam in animo, successuri desiderii, qui illum extra se promoveret; ideoque perturbat. Ortum habet à possibilitate. Quæ si certis, firmisque niti videatur signis, producit fiduciam: A qua curæ, & laboris condimentum, conatusque calcar. Modum si excedit; vana & præceps est: & ludibrium sibi debet. Pro-
na in illam magnanimitas: Desperatio illi opposita; id est, mali eventus, præsumpta opinio. Prodit ab animo pusillo; cui omnis difficultas magna, & insuperabilis videtur. Dum nimia; sæpe gravioris mali causa est; quàm sit, quod putat eventurum.

*Tertia
Spes.*

*Quarta
Desperatio.*

Ad Commotionum illud genus venio, quod Passiones vocavi. Inter eas primum est Gaudium. Hoc dum plenum, & immutabile est; quies est. Ergo non Motus, sed potiùs Pax, & Frui-

*Passio
prima,
Gaudiū.*

tio. Sed quoniam, (ut dixi ;) tale in hac vita non contingit ; ideo breve id, quod accidit aliquando, Commotionibus accensetur : Quia nempe commovet ; dum continuò, & venit, & recedit. Passio verò propriè vocatur, quia in illo animus, non tam agit, quàm recipit. Definitio illud : Usuram brevis fruitionis, velut possessi boni. Eget temperamento, etiamsi oriatur ex vero bono : prout ostendam ; cùm ad Præcepta Commotionum veniam.

*Altera,
Dolor.*

Altera, veraque Passio est Dolor. Definitur : Ex bono non obtento, vel amisso, sensus mali. Frequens, & velut proprius est, mortalis vitæ. Præcipuè prima sui parte : & quatenus non est compos boni. Nec rejiciendus omninò, vitandusque ; quin immò proficiuus, salutarisque sæpè : dum Patientiæ, Pœnitentiæ, Resipiscentiæ causa est : prout ostendam tertia, quæ sequitur, parte τῆς μετριοπάδειας.

*Moderationis
affectuum.*



Pars Capitis Tertia.

*Ostenditur, qualis esse debeat Amor: &
ex illo communes primum regulæ, tum
verò singularum Commotionum*

E' ut ex i'a.

Ordina-
tio.

EX Natura ac proprietate Amoris,
quam superius deduxi, ac compro-
bavi, consequitur necessariò: illum so-
li Deo deberi. Etenim, præter Deum,
nullum aliud bonum, natura rationa-
lis se majus perfectiusque habet; in quo
conquiescat: Nec uniri valet; nisi ei,
qui solus, & potest, & vult, infinita
quodam ratione. Nec denique trans-
mutari, quam in causam finemque. A-
lia præter Deum, infra illam sunt: Er-
go non ejus bona. Si autem non bona;
ergo non amanda. Neque uniri pos-
sunt; quia redamare nequeunt:
multòque minùs in se transmutare;
quia esse, quod Amor quodammodo
transfert, nec recipiunt, nec refun-
dunt. His de causis Deum tantùm
naturæ rationali convenit, & expedit
amare. Quod si petas; quo modo? Di-
cam suo loco luculenter. Nunc hoc

*Amor so-
li Deo
debetur.
Quia bono.*

Cui uniri.

*Inimò &
in illud
possumus
mutari.*

folùm : Sine modo. Nec enim definiri potest ratio Amoris erga illud, quod est infinitum.

*Commo-
tionum
prima re-
gula : ut
causam
potius,
quàm mo-
dum spe-
tent.*

Atque hinc patet : Commotionum omnium causam magis considerandam, quàm modum : & prius quales sint ; quàm quantæ, expendendum . Nam si circa unum, verum, bonum occupentur ; plerumque mensura earum quò major, melior est . Si ad malum vergunt ; etiam moderatæ, malæ sunt . Itaque prima hæc regula communis, in regendis illis erit : ut accuratè inspicias, unde sint : & quò tendant . Si à bono, & in bonum ; facili eas fræno reges, atque temperabis .

*Altera,
ut prin-
cipio co-
hibean-
tur.*

Altera Regula : ut ipsa initia earum moderere : & mora aliqua interposita, retineas, cohibeasque ; antequam impetum sumant. Habent enim, (uti observatum rectè est :) gradus suos, quibus crescunt. Etenim primum, visum, seu phantasia obiiicitur : tum sequitur *διανόσις*, id est cognitio : eaque recta, vel erronea ; boni, malivè. Mox *ὁρεξις*, ἢ *ἐκκλισις*, id est appetitus ; vel averfatio . Postremò *ορμη* ; vehemens jam, incitata, & cum impetu affectio.

Ergo

Ergo circa ipsum initium hæreas paulisper ; & propositum ordina , atque constitue : & ex illo Commotionis modum .

Ex his verò communibus , particularia præcepta faciliè peti possunt . Atque imprimis , inter affectus , Desiderii : Cujus unica , totaque Regula est , finis humani notitia . Eum omnes censerunt beatitudinem : sed in quo illa consistat ; dissenserunt : idque ignorantia Naturæ humanæ . Nam , qui illam interire , eoque post obitum loco , quo non nata jacent , putavere ; quid miri est , si in rebus , aut actionibus hujus vitæ , assignarunt felicitatem ? Atqui ea non est in hac vita . Non inquam , in rebus , quæ ad corpus , fortunamque pertinent . Nam cuncta hæc mutabilia , incerta , aliena : denique , malis etiam , id est infelicibus , communia . Non item in actionibus ipsis : id est , (ut olim , qui paulò altius philosophabantur , docuere ;) virtute : nam nihil agit ad hoc tantùm , ut agat : & ipsa ex virtute actio , finem scopumque habet se potiore : qui merces ejus vera . Illa verò , post hanc mortalem ,

Particularia præcepta Desiderii .

In agnitione finis nostri .

Qui non est in hac vita .

Non est in rebus externis .

Non in virtute propria .

Sed in in æterna & immutabili vita nos de-
Deo. mum manet: tunc ea fruemur; Deo,
 id est omni bono, se ultro impertien-
 te, & desiderium mira, ignotaque
 prorsus ratione, adimplente. Itaque
 ad hanc finis ultimi regulam, atque
 normam, aptari debet desiderium om-
 ne. Et, cum tota vis ejus & opera-
 tio sit, velle bonum; & appetere id,
 quod summum appetendorum voca-
 tur; id est Deus: appeti verè, & pro-
 priè, & propter se debet; reliqua pro-
 pter ipsum, & quatenus fini consequen-
 do serviunt. Alter verò Affectus, qui
 est Fuga, præceptis aliis non eget;
 quàm, quæ contraria omnia desiderio
 sunt. Id est, ut toto animo fugiat ma-
 lum, quod Deo adversatur: Non de-
 fugiat verò nimium, nec abhorreat, quæ
 non sunt verè mala.

*Inter pas-
 siones Iræ
 præcepta.*

Ad Perturbationes venienti, se of-
 fert primùm Ira. Hæc si debite oria-
 tur; id est, si pugnat, aut resistit con-
 tra ea, quæ impediunt unum, verum,
 bonum; quamvis in Causa justa, ta-
 men initio cohibenda est, ne efferve-
 scat: & in flammam, quæ brevis est,
 abeat: sed in robore potius, constan-
 tiaque

*Ut in cau-
 sa etiam
 unius, ve-*

tiaque immutabilis propositi, consistat. *ri, boni, non ex-*
 Secura victoriæ; si nec cedat loco, nec *stuet.*
 cesset oppugnare. Bonum enim verum, *Et certa*
 quid impedit? Tribulatio? angustia? *sit victo-*
 persecutio? gladius? an mors denique? *rie.*

Certus sis, omnibus istis te superiorem
 fore: & aut fugabis cuncta, aut vin-
 ces; sustinendo. Si autem oriatur Ira *In adia-*
 propulsando, quæ non sunt propriè *phoris, ca-*
 bona, sed commoda tantum vitæ hu- *si teneat-*
 jus; Tum & si jus habet, tenetur vè of- *tur offi-*
 ficio, tueri quidpiam, aut repetere; *cio.*

tamen probè expendat: sitnè tanti
 quod impeditur, aut eripitur; ut pu- *Tamen*
 gnam certamenque mereatur: taxa- *sibi tem-*
 bitque exinde sui modum. Deinde mo- *peret.*

derationem adhibebit, ne nimis com-
 moveatur: ne in furorem, ac temerita-
 tem dicto, aut facto prorumpat. Sed
 potius firmiter statuet; in causa bona,
 magno animo conari, aut resistere: &
 si non succedat; æquanimiter tolerare.

Victoria enim in adiaphoris istis in-
 certa, & dubia est. Unde in utramque
 partem paratum esse debet iræ tem-
 peramentum. Si vinceris; ne ringaris:
 ne iram frustratam, in te contorque-
 as: non te, non Deum incuses. Quin

im-

Villa non immò , vel conscientia quamvis infeli-
ringatur. cis , impleti tamen officii ; te solere ,

Vix vel mederi studeas : vel denique docu-
non se- mentum in futurum cape . Si vicisti ;
viat . ne vindictam sumas : id est , ne dolore

Definitio adversantis fruaris . Falsò enim Aristot-
iræ ab A. teles definivit iram , *ἐπεὶ ἐν αὐτῇ λυγρὸς πόθος* ,
ristotele . id est , cupiditatem refundendi doloris :
cùm id , non Natura , sed vitium iræ

Vindicta, sit . Dolore enim alieno pasci quod
sevities , bonum ? quæ utilitas ? Atqui nihil est à
vitia iræ. Natura ; (ira autem est :) cujus non

Nā vin- constet ratio boni . Meritò itaque vin-
dicta ejus dictam ab ira legitima amoveo : uti &
vitium , sævitiem & crudelitatem , quæ ultionis
est sevit- filia est . Atrox malum ; & quo rabiem
ties . ferarum vincimus . Nam illæ , brevi
impetu sæviunt ; hominis crudelitas
lenta sæpè , meditata , & se pascens , ac
oblectans ; dum , (ut ille dixit ,) ho-
minem homini perdere libet . Hoc ve-
rò demum est , quo potissimum ira ma-
lè audit : Cùm tamen non nisi dum vi-
tiosa , & in noxam abit ; ejus causa

Illa inno- sit . Alioqui innoxia . Bellatrix tantùm
xia alio- contra malum strenua : officii animosa
qui . cultos : excitatæ mentis vigor : denique
Spiritus , ad magna incitans : & ardua

aude-

audere, aggredi, & perficere juvans.
Et hæc ad regendam Iram sufficient.

*Metum
ut moder-
vere.*

Succedit ei opposita Perturbatio;
Metus: qui si oritur ob ea, quæ vulgò
mala putantur; hæc ne nimium nos
exterreant, vera facie noscenda sunt.

Paupertas nempe, Dolor, seu exitus
ejus Mors; & denique Ignominia. Fa-
cilè enim patebit, cuncta hæc stultè
omninò timeri. Paupertas enim Nobis

*Facit ve-
ra eorum
agnitio,
que vul-
gò & fūl-
sè mala.*

congenita & propria, per quam ne-
mo tam egens vivit, prout nascitur
moriturque. Non est ergo mala, sed
quæ in ortu nostro, exituque, docet;
hominem sibi quoad externa posse suf-
ficere. Dolor, si tolerari potest; par-
vus; si non; brevis. Eumque mors
consequitur: id est, quies: id est, ve-
ræ vitæ initium. Igitur mala non est,
nisi malis. Infamia, si ob flagitium
venit; justa. Et culpa tantum, quæ il-
lam promeruit, mala. Sin immeritò:
contemnenda; uti enim honor, ita &
illa, est extra nos: alieni arbitrii: &
verè, *ἐκ ἐφ' ἡμῶν*, Non est verò malum
meum, quod non est mecum. Si ve-
rò hæc, quæ maximè timentur, ma-
la non sunt; quorsum timebuntur? De-

*Non in
nostra
potestate.*

trahenda omninò illis persona; & lar-
 va, qua terrent: Et fatebimur; majus
 malum esse, timere; quàm sit illud
 ipsum, quod timetur. Victo autem
 timore ejusmodi, implebis officii fi-
 nem: & circumspectio erit multa; nul-
 la trepidatio. *Timor* autem veri mali,
peccati. id est peccati, evitatio ejus esse debet:
 nec tam pavere decet illud, quàm ab-
 horrere. At restat ille, timor Domi-
 ni sanctus; & qui facit sanctos. Non il-
 le tantùm, qui à terrore, Judicis ma-
 los punituri, oritur; (quanquam & il-
 le proficiuus: quo configi petit Psal-
 tes; ut à judiciis Dei timeat: horren-
 dum enim est, incidere in manus Dei
 viventis:) sed multò magis ille, qui
 pars est venerationis, Summæ illius
 majestatis, potestatisque; & qui Nos
 humiliet sub potenti manu ejus. Adsit
 itaque: non tamen ille servilis; qui
 meticulosam, pavidam, anxie turba-
 tam, & ad superstitionem factam con-
 scientiam reddit.

Spem ut
contineas,
causam
ejus ex-
pande. Sequitur ratio Spei: Quæ ut recta
 sit, ad idem uti Ira examen, revocan-
 da est. Nempe causam primùm, deinde
 modum ejus, oportet expendere. Si
 fer-

fertur in verè bonum, id est Deum; non
 confundit. Freta quippe auxilio ejus;
 qui cum se unum appetere jussit, vires
 addat; capaces sui, necesse est: sine
 quibus, non potest obtineri. Ideoque
 non dubia possibilitate nixa, firma, &
 tandem rata sit oportet. Nec nimia e-
 rit: si cum Dei ope operetur, agatvè
 gnaviter; & in agendo imploret auxi-
 lium. Et hæc est Spes veri boni, quam
 Theologicam vocant Virtutem Scho-
 læ: Cum nobis qui non ex Lycæo, aut
 Porticu, sed ex Christi disciplina sapi-
 mus, non modo hic, sed & omnis ani-
 mi motus, omnisque virtus debeat
 θεολογίζεσθαι: id est ad Deum referri,
 ac velut consecrari. In summo enim
 semper repræsentare, ac proponere
 decet rationem affectuum, virtutum-
 que: ut exinde tantò facilius fluant, ac
 deriventur minorum officiorum præ-
 cepta. Hæc spes, inquam, veri boni.
 Rerum humanarum autem fallax om-
 ninò est, ideoque cautè admittenda:
 ne nimis incitet, provehatque. Nam
 ventus hic, ni vela contrahas, abripit
 à recto cursu; & naufragii causa est.
 Necessaria ergo, quæ illum temperet,
 mo-

*In bono
 vero non
 confundit.*

*Hanc
 Theolo-
 gicam
 vocant.*

*Spes cir-
 ca exter-
 na fal-
 lax.*

*Itaque non
ei indul-
gendum.*

*Parodo-
xè loque-
bantur.
Volūtatē
divine
acquie-
scendum.
Magis ve-
lis quæ
eveniunt.*

*Despera-
tio in ve-
ro bono
nulla sit;
in adia-
phoris
rara.*

modestia voti. Quam suadet primùm ,
exigua pars ævi , quam hic vivimus :
Et , vitæ summa brevis , spes nos vetat
inchoare longas . Deinde suadet Tran-
quillitas , quæ haberi non potest , si in
rebus his multum spei indulgeas . Nam
eorum successu , necesse est , ut sæpe fru-
streris : Unde perturbatio , & inquietu-
do . Itaque si vis consequi (quod o-
lim Stoici παραδοξέλεγον ,) ut tibi nihil
unquam insperatum , nec præter vo-
tum eveniat : Moderare Spem ; Et fre-
no rationis contine . Et μάλλον δεῖς το
γινόμενῳ , seu potius , quod ex præcepto
æternæ Sapientiæ dicis quotidie ; re
ipsa præsta : ut nempe velis voluntatem
Dei . Cum hoc tamen monito , ne ista
(ut proprio artis verbo utar) resigna-
tio , ullatenus impediatur diligentiam ,
debitæ , & quam officium postulat ,
actionis .

Ultima Perturbationum Desperatio.
Vitanda in vero bono semper : in adia-
phoris , quam diu potest : Potest verò
facile , ab animo Deo fidente . Et cur
non fidat ei , qui summè potest , scit ,
vult , & denique promisit homini bo-
num ? Hac basi firmata providentia ,
& cu-

& cura nostri, securos nos esse jubet;
 & vetat desperare. Quod si verò aper-
 tē pateat, nihil spei reliquum; tum se
 fato permittat; & nec irritē repugnet:
 nec velit malus pati; pati, quod liceat
 bono. Deposita nempe Spes, quietum
 ultra, sed post expletum officium, red-
 dat. Et postquam quæ debuit, fecit;
 expectet; excipiatque, quæ jubeat. Ut
 verò non decet ejulare; detestari; se
 aliosque imprecationibus devovere:
 ita Spe abjecta, consciscere sibi mor-
 tem, nefas. Haftenus de perturbatio-
 nibus:

*Nec sit
 causa
 exisii.*

Passionum verò regendarum præ-
 cepta, Gaudium imprimis requirit;
 Et requirit, etiamsi ex impertito vero
 bono proveniat. Suavitate enim sua
 allicit, & avidos sui facit. Haustum
 verò largiùs obest; officitque. Degu-
 stata enim dulcedine fructuionis, dum
 se compotem boni homo putat; ex na-
 tura gaudii quiescit: id est, in quæren-
 do amplius bono subsistit. In hoc stu-
 dio autem, dum hic vivitur, non pro-
 gredi semper; nec proficere; retroce-
 dere, ac deficere est. Ex defectu au-
 tem, delictum & corruptio. Oriture-
 nim

*Gaudium
 etiam in
 vero bo-
 no modū
 teneat.
 Ne exin-
 de stu-
 dium bo-
 ni repe-
 scat.*

*Hoc enim
 sepe fit.*

*Fruitio,
vite de-
betur,
que nos
manet.*

nim in animo ante tempus gaudente,
diffusio sui, complacentia, inconsulta
securitas, incuria, & denique lapsus.
Itaque plena illa fruitionis dulcedo,
differri debet in illud tempus, cum
(quod Deus faxit) unicuique nostrum
dicetur: intra in gaudium Domini tui:
& gaudium tuum nemo tollet à te.

*Gaudium
Stoicum
futile.*

Nec imponat illud Sapientis gaudium:
quod hìc intra nos nasci, ex nobis ori-
ri, nostræ spontis, ac continuum es-
se, Stoici negabantur: Et quod non be-
nè definivit Seneca: Elationem animi,
(hæc vitiosa semper) suis bonis, viri-
busque, (hæ profectò nullæ) fidentis:
quantò sapientiùs dixisset diffidentis?

*A rebus
externis
falsum.*

Quod si verò hìc, ne internum istud
quidem, & ab animo gaudium, con-
tinuum esse potest; quantò minus erit
adventitium illud, & ab externis rebus
ortum? Certè esse nequit. Primùm,
quia nixum incertis, & mutabilibus bo-

*Quia non
ex bono.*

nis; deinde, quia nec bonis. Quid
enim ista ad animum? immò si probè
examines, contra animum sunt: ejus
vincula & compedes, & ad malum illi-
cia. Itaque ex illis non prodit, nisi
inanis lætitiæ exultatio; effusa, & bre-
vis;

vis : Vitanda sapienti . Quæ Ciceroni
est , voluptas immoderata animi , sine
ratione gestiens , opinione præsentis
boni . Jure ergo risum reputes erro-
rem ; & gaudio fallaci , cum hic vivis ,
dic , quid imponis , quid illudis , quid
decipis ? Præterit figura hujus mundi .
Ibi fixa sint corda nostra , ubi vera sunt
gaudia .

*Vitanda
itaque .*

Dolor , & vix admittit temperamen-
tum ; & non adeo requirit : prout do-
cuere , qui in hac vita , apathejam ne-
scio quam , somniant . Primò enim ,
si in verè malum , id est in peccatum
incidisti ; dolere , ac tristari , bonum .
Hæc enim , (inquit Apostolus ,) se-
cundùm Deum tristitia , pænitentiam ,
in salutem stabilem operatur . Deinde ,
si dolor sit in pænam culpæ ; bonus
itidem : & hic potius , dum minor , &
non ex merito dependitur ; expeten-
dus . Sed præter has causas pæniten-
tiæ , & pœnæ ; proprium vitæ hujus est ,
dolere . Quippe extra Patriam sumus :
quippe in labore , impetimur à carne
& mundo : quippe exercemur variè ; ut
mereamur . Statuit autem Deus , te-
standæ bonitatis suæ , gloriam ; quam
E olim

*Dolor non
omnis fu-
giendus .
Bonus est
pæniten-
tia .*

Et pœna .

*Vita
mortali
proprius .*

olim paravit : non donum tantum esse ,
 sed etiam mercedem . Et mira beni-
 gnitate , velut debere Nobis quidpiam ,
 voluit : Hæc verò , quantulacunque
 (fas sit dicere) obligatio , doloris tole-
 rantia , quam gratia confert , ut plu-
 rimum comparatur . Meritò igitur ,
 sancta *ἀσκήσις* illa alterutrum ; aut mo-
 ri , aut pati peroptabat . Atque ideo
 dolor ex his , quas dixi , causis ortus ;
 bonus : adeo non vitandus , fugiendus-
 que . At ille , qui ob mala externa pro-
 venit , coèrceri debet . Dolemus au-
 tem ejusmodi malis ; aut propriis , aut
 alienis : (quanquam profectò & his
 quoque privato respectu .) In malis
 alienis , misratio est : quam rejecere
 Stoici , velut vitium (inquit Lipsius)
 pusilli animi , collabentis alieno malo ;
 vel , ut Cicero ; ægritudinem animi ; ex
 alterius rebus adversis . At non rejicit
 Christi Schola , quæ rigorem omnem
 aspernatur ; mansuetamque , ac tene-
 ram requirit pietatem . Hæc verò , si
 proximo opitulari aliter nequit ; sal-
 tem condolet , & compatitur : cum
 modo tamen ; & ad testimonium tan-
 tum pronæ in auxilium , & beneficen-
 tiam

Contem-
 platrix .

Ob ex-
 terna co-
 ercendus .
 In malis
 alienis
 commise-
 ratio est .

Ejus mo-
 dus , &
 ratio .

tiam mentis . In malis autem propriis *Doloris
proprii.*
cùm molles sint mortalium animi ; fir-
mandi tantò magis , ne eos nimium
frangat , abiiciatque dolor . Remedia
roboris parandi , & constantiæ erunt .
Primum : cogitare mutationes necessa- *Remediũ
primum :
mutatio-
nis neces-
sitas .*
rias esse . Idque à rebus ipsis : quas in-
dies experimur , suapte corrumpi , & in-
terire . Nempe , hæc est lex mundi ; ut
quædam in illo desinant , quò alia ori-
antur . Et nasci in illo vocatur , incipe-
re esse aliud , quàm quod fuit ante . Por-
rò , si producerentur semper nova , seu
natura , seu Arte ; & nihil periret : non
caperet orbis molem rerum . His verò
de causis , si necessaria mutatio ; neces-
saria erunt , & quæ ad illam ducunt .
Velut , si homines decedere , & mori
opus ; Opus erit eorum , quæ morti
famulantur : nempe morbis , peste ;
bello , fame , tyrannide . Si verò hæc
necessaria ; ergo ferenda : idque liben- *Ideo non
egre fe-
renda .*
ter . Nam necessitatis non aliud effu-
gium est ; quàm velle , quod ipsa cogit .
Alterum doloris remedium ; cogitare : *Alterum:
falsò que-
dam ma-
la voca-
ri .*
hæc quæ , vocantur vulgò mala , reve-
ra non esse : idque à ratione , quam
strictim ; dum metum coërcui , dixi .

Tertium: Tertium : non modò non esse mala ; sed
bona esse etiam sæpè bona : & utilia . Et bona ,
Autore primum origine ; nempe à Deo : bona
Deo . etiam fine ; nempe exercendi , castigandi,
Et fine . puniendi . Omnis enim ista malorum
Exercen- sio , aut Bonos exercet , aut lapsos ca-
di . stigmat , aut improbos punit . Exercitium
 bonorum , necessarium : primò ; ut
 per illud , firmetur eorum animus .
 Nam quemadmodum , si Nautam te
 esse velis , per tempestates docere ; si
 Militem , per pericula : ita si verè vi-
 rum ; per afflictiones . Non enim alia
 ad robur via . Necessarium deinde ad
 experimentum : Ut nempe , quantum
 profeceris ; periculum facias . Postre-
 mò , necessarium ad exemplum : ut tua
Castigan- tolerantia aliis præeas . Castigatio
di . etiam bona . Et juvat ; seu sit flagelli
 loco , cùm peccavimus : seu fræni , ne
 peccemus . Pœna denique bona : quæ
 tollit , quod castigatio non correxit .
 Decet verò justum Deum : expedit ge-
 neri humano : cujus Societas stare ne-
 quit , malitia impunita . His fere ratio-
Puniendi . nibus pulchrè equidem , sed φιλοσοφικῶς
Philoso- satis Lipsius , dolorem non tam cohi-
phicè . buit ,

buit, quàm sustulit. Cohibendus autem, temperandusque tantum est. Im-
patibiles enim nos esse; nec est Condi-
tionis Mortalium, nec Divinæ volun-
tatis. Et, qui sensum malorum non
fatentur; mente obdurata, & pervica-
ci, velut in certamen provocant Deum:
qui sola, sed mansueta, ac domita
patientia vincitur: id est placatur. Et
provocant tamen frustra: Nam scit il-
le telum hoc mærorum ita torquere;
ut quidquid facias; tangi illo, indeque
pati, ac dolere, sit necesse. Animum
enim ipsum, & petit, & ferit: cujus
exultatio, cum sit, prout dixi, insalu-
bris; mæror sæpè proficiuus est. Beati
ergo, qui lugent, & patiuntur patien-
ter. Non uti malefici; sed propter
Deum. Hic character bonorum est. In-
tentationem, & dolorem ergo, si inci-
deritis; beati; quia merces copiosa: &
non sunt dignæ passionēs hujus tempo-
ris, ad futuram gloriam, quæ nos
manet.

*Non pro-
sus dolo-
ri contra
niten-
dum.*

*Frustra
enim, cum
sit à Deo.*

*Ideoque
sæpè pro-
ficiuus.*

CAPUT III.

*De ἐνπράξια, seu exercitio Virtutum,
tertia parte Probitatis.*

Quemadmodum illa, quæ colore,
& succo medicata esse velis, pri-
mum munda reddere; deinde, quod fa-
cilius humorem imbibant, variè præ-
parare; postremò madefacere etiam,
aut intingere oportet: ita animus hu-
manus, per ἀναμάρτισιν purus; per
μετριοτάτην aptus; tandem, ut habi-
tum acquirat, & velut succum imbibat
virtutum; tingendus: aut potius im-
buendus est salutaribus præceptis: è
quibus prodibit hæc, quam tertiam
partem Probitatis feci, *ἐνπράξια*, seu
exactum Virtutum exercitium. Inspi-
ciemus ergo hoc capite officia ejus: &
primum dicam; quid sit virtus; deinde,
Qualis esse debeat. Tertiò, Quomo-
do, & unde insit homini. Hæc verò sin-
gula compendio; Et magis, opinor,
ex natura rei, quam recepta methodo,
& præscripto Scholæ.

Fugam
viti-
orum.
Affec-
tuū
modera-
tionem.

Triparti-
ta hujus
divisio.

Pars Capitis Prima.

*Quid sit Virtus, ostensum; ejusque
& Unitas, & Partitio.*

A Definitione ut incipiam; Virtus, *Defini-*
est perfecta in homine ratio, in *tur.*
habitu verfa, actus ejus dirigens. Ra- *Et expli-*
tio inquam perfecta, quæ à Deo illu- *catur.*
strata, ac directa, principium est ejus,
quod homo, qua est rationalis, agit: id-
que per ἡγεμενικόν illud, Stoicis nomi-
natum, quod Seneca Principale, Cice-
ro Principatum vertit; id est, partem
animæ præcipuam, in qua λογισμός re- *Rationa-*
fidet: cujus est dominari, & imperare *le.*
omnibus Animæ facultatibus. Et in
memoria quidem ratio hæc, ut con-
summata sit; victrix esse debet muta-
bilitatis: qua non constat sibi homo;
fines varios proponendo: Ignorantiæ
in Intellectu, qua à vero aberrat, & opi-
natur: Pravitatis in voluntate, qua in
malum labitur appetitione: Effectrix
verò τῆς ὁμολογίας; &, ut ita dicam, u- *In quo*
niformitatis: τῆς γνώσεως, seu veræ co- *consistat.*
gnitionis: denique τῆς ἀναδωσύνης, id *ut effi-*
est rectissimæ bonitatis. Quæ tria, eum *ciat Con-*
stantem.

efficiunt Cogitatione, Verbo, Opere,
Constantem, Sapientem, Sanctum.

Conveni-
enter vi-
vere: seu
uniformi
ratione.

Sapientem.

Cognitio-
nem, per-
fectionē
esse.

Sanctum.

Unitas,
seu unio.
Una vir-
tus.

Et primū oportet ὁμολογεῖν, quod summum bonum homini, quidam posuere. Id verò est, semper unum velle. Nec opus est exceptione uti; ut bonum nempe sit, quod velis: cum non possit cuiquam semper idem placere, nisi bonum. Itaque unum est necessarium. Sed quoniam non potest appeti unum, nisi ejus contingat notitia; & ignoti nulla sit cupido: Ideo, si vis eadem semper velle; vera etiam, seu cognita, oportet velis. Necessaria ergo erit & cognitio: unde quispiam dixit, γινῶσιν τελειότητ' εἶναι. Postremò, appetere, & nosse non sufficit; nisi etiam apprehendas: id verò fit sanctitate.

Ex triplici hac parte, mira prodit εὐνοίας virtutis. Una enim est ratio recta: &, quæ in illa enumeravi tria; quia singula per se, id est in monade separata, existere nequeunt, quin contineant in se duo reliqua; ideo ex illis, minor modo unita existet virtus. Quam seu Sapientiam, seu Prudentiam nominare licet: normam nempe & regulam ejus habitus; qui naturæ humanæ, pro-

ut

ut rationis incorruptæ est, convenit.

Hæc est velut fons, & radix omnis bonæ actionis, & Virtutis.

Quæ etsi origine una sit; distingui tamen trifariam, & potest, & solet: non in se tantum, prout ostendi; sed à Ma-

teria etiam, & à rebus, quarum rectum usum præcipit, ac exequitur; & quarum

triplex velut classis est. Partim enim corpus spectant; vel ad usum vertendæ moderatum, vel abjiciendæ omnino:

circa quas occupatur Temperantia, opposita nempe Concupiscentiæ car-

nis. Partim, velut extra nos sunt; possidendæ, vel alteri tribuendæ: quas di-

sponit, distribuit, ordinatve Justitia: quæ concupiscentiæ oculorum contra-

ria. Partim denique ad Animum pertinent, vincendæ, regendæ, ac continendæ: quibus debetur Fortitudo; quæ

vitæ superbiam, prout ostendam, vincit, frænat, ac continet. Itaque tres

istæ, ex triplici classe rerum, Cardinales, ut vocant Scholæ, virtutes erunt.

(Prudentiam si excipias; quæ communis, una, & Universalis:) ad quas reli-

quæ, prout ostendam, referuntur. De quibus Quid, & Quot sint, dixisse hæc

pau.

Conveni-
tatem

A tripli-
ci tamen
Materia,
triplex.

Circa
Corpus,
Temper-
tantia.

Circa ex-
terna,
Justitia.

Circa ani-
mū occu-
patur
Fortitu-
do.

pauca sufficiat . Patescet verò id melius
in hoc , qui sequitur , Paragrapho .

Pars Capitis Altera .

*Monstratur , Qualis esse debeat Virtus : &
præmissa Prudentiæ uberiori notione ,
monitisque ejus ; singulæ , prout tri-
butæ sunt , explicantur .*

*Pruden-
tia vir-
tutes re-
git .*

PRudentiam ex divisione Virtutum
excerpsi , ac separavi ; velut uni-
versalem omnium Directricem ; ideo-
que non aliam illi assigno definitio-
nem ; quam , qua Virtutem definivi . Est
nempe illa , velut specimen quoddam ,
ac imago , divinæ illius Sapientiæ ; quæ
una , simplici , æternaque contempla-
tione , in omnibus verum vidit , no-
vit , & per quam benè omnia fecit .
Hanc si homo sibi convenientem , & a-
nalogam haberet ; haberet omnino ve-
ram regulam , ac normam omnis actio-
nis ; mensuramque implendi officii .

*Cur sit
difficilis .*

Sed difficilis & ardua , plures ob cau-
sas : nempe partim propter imbecilli-
tatem animi humani ; cujus judicium ,
& primigenia labe infectum , & con-
suetudine corruptum : Partim propter

res

res ipsas: quarum natura proprietatibus
abditæ, copia prope infinita, circum-
stantiis singularibus variabilis.

Et si verò in tanta difficultate; ta- ^{Habenda}
men habenda, & comparanda est. Un- ^{tamen}
de autem? Facilis, & (ut loquimur) ^{primum}
adæquata responsio erit; à Deo; qui ^{à Deo.}
totus mens, & ratio, & intelligentia.
Apud ipsum (ut Job inquit;) Sapien-
tia: & (ut Salomon;) Dominus pos-
fedit illam, antequam quidquam fa-
ceret. Unde non adventitiam, & à
rerum cognitione hausam habet; sed
omnium effectricem, atque causam;
ipsam verò à se ortam, in se permanen-
tem, & purum actum, non ^{Potentia,}
sed ^{essentiam.} *ὑπόστασις*. Solus autem cum habeat;
solus etiam & conferre potest: uti &
naturæ Author, & gratiæ. In illa in- ^{A quo do-}
genium docile, & iudicium perspicax ^{tes natu-}
largitur; in hac, auxilia illuminatio- ^{re, &}
nis. Sed quia separatim agam, unde ^{gratiæ.}
insit homini virtus, eamque à prima
causa derivabo: nunc è secundis &
proximis; pono primum, Doctrinam. ^{Habenda}
Etenim illa nihil aliud est; quàm benè ^{à doctri-}
intellectarum rerum, in memoria con- ^{na.}
ditorium quoddam; è quo cùm volu-
mus

mus, depromimus, quæ usui esse possunt, ad similia ex similibus dijudicanda. Unde, qui non modo plura, sed quod multò majus est, benè cognita recondidit; faciliùs potest, habebitque ad manum, quibus utatur. Nisi quod à Doctrina sola, generalia tantùm præcepta petantur: quæ nisi exactum iudicium particularibus aptet; sæpiùs error subrepet: nasceturque superba, ac pertinax opinio. Unde necesse est; ut
Denique ab usu. usus quoque accedat, alter velut Prudentiæ parens: & qui Doctrinæ, ut ita dicam, promus condus est: experimento docens, aut monstrans potiùs singularia: circa quæ Prudentia præcipuè occupatur. Hæc verò tria; Nempe, Dei munere natura apta, doctrina ferria, & usus denique, si adsint, & in unum conveniant; tum demum firmam certamque Prudentiam facient.

Ejus energia. Cujus vis, & energia cernitur, partim cùm contemplatur; partim cùm agit; partim cùm facit. Contemplatio, est visio quædam, seu intuitus veri; illaque non illusio, deceptusque. Actio est, ex ista notione dictamen animi, quomodo se gerat, implendo quod natura

tura tenetur . Factum seu efficientia , *Facto.*
eiusdem animi velut externum opus ,
quod in quovis negotio benè peracto
cernitur .

Duo prima ad Sapientiam spectant ;
Hoc postremum propriè Prudentiam
esse volunt . Quod , quia ad officia , quæ
ducimus , magis pertinere videtur ; ideo
paulò diligentius explicandum est . Pri- *Hujus po-*
mum igitur quod Prudentia facit , est *stremi*
Consultatio : quæ quid agendum , omit- *prima*
tendumvè sit ; quærit : & variè indagat . *pars, con-*
Cui propria sollertia , seu sagacitas : ea *sultatio.*
enim modum , & media adinvenire stu-
det , vel expediendi negotii , vel omit-
tendi . Altera pars est , Sententia : quæ *Altera?*
directo quodam iudicii dictamine , *Senten-*
quod consultatio quæsierat , & soler- *tia.*
ter adinvenerat , decernit ; & rationi-
bus apparentibus rejectis , unum ,
certumque quid statuit . Illi annexa
providentia , & consideratio eventus
secuturi . Et si enim iste incertus ; attamen
exacta prudentia , ut plurimum il-
lum conjicit , & assequitur . Unde non
malè illam , Divinationem vocat quis-
piam ; Certiorem utique ex causis ,
quàm ex astris . Tertia pars est Execu- *Tertia?*
tio : *executio.*

tio: quæ id, quod consultum, constitu-
tumque est, effectum reddit. Huic pro-
pria circumspectio: quæ circumstantias
negotii videt, & aut cavet, & evitat
impedimenta; aut subita casuum, qua
potest, emendat. Hæc de Prudentia
abstractè, & generaliter:

*Munus
præcipuū
pruden-
tis, vitæ
genus eli-
gere.*

Cæterum præcipuum, potissimum-
que, quod ab illa ducitur officium est:
certum vitæ statum eligere. Cujus etsi
varia sit sors, atque conditio: tamen
ad tria summa genera, non incommo-
dè referri solet. Primum est: quietum,
& à negotiis subductum; Actuosum
alterum; Tertium, mixtum; & ex
utroque temperatum. De singulis di-
stamina quædam prudentiæ, non abs re
erit subungere.

*Quietum
sine desi-
dia.*

In primo igitur vivendi genere, vi-
tanda est improba Syren, desidia: quæ
invisa primùm; ut ille ait; postremò
amatur: Prono in eam ingenio huma-
no; dum sæpè amore quietis, torpet.
Exercendum itaque est, etiam in otio:
ubi occupatio esse solet cognitionis,
& doctrinæ. In ea verò cavendum, ne
nimiam curam in res minutas, subtiles,
non necessarias, vanas denique impen-
damus.

*Literas
exactas
serias.*

damus. Talibus enim abduci, contra officium est, & ineptiis istis, animum, ad majora natum, detinere; indignum. Philologia igitur, & literæ; quas liberales vocant, cum modo habendæ sunt. Nimia enim horum confectatio, ut plurimum molestos, verbosos, intempestivos, sibi placentes, id est imprudentes facit. Immo etiam habendæ certo fine: & omnis ejusmodi opera, in rerum utilium studio, & usu vitæ, collocanda. Quamvis & mira, abditaque naturæ scrutari; ne tanta Dei opera sine teste sint; & ut Authoris admiratio juxta, ac veneratio, mentibus nostris imprimatur; laudabile. Sed in hoc vitæ genere præstantissimum, longèque pulcherrimum est studium, veræ Sapientiæ; quæ finem hominis quærit, videt: ad illum vera media eligit, adimpletque: latentem veritatem eruit, opinionem & opinationem omnem tollit; & denique animum purum, ac insontem Deo dedit, consecratque: Et præterea, ut alii idem faciant; sæpè salutaribus scriptis monet. Hoc est profectò eximium in otio negotium: hoc est consummatissimæ actionis officium.

Hoc

Et fine.

Magis
verò stu-
dium Sa-
pientiæ.

Hoc est denique quod Dominus porro unum dixit esse necessarium . Quod homo , prima sui origine , purus nempe & innocens , solum unicumque curasset : quod nunc , dum gratia fruitur , solum implere studet : & quod olim in gloria plenè , & continuò exercebit ; atque hoc unum perpetuòaget . Id verò dum hic vivimus , ut exactè fiat ; & nemens illusa vagetur ; alliganda Deo est : & insistendum pressè illis , per quæ se Deus nobis aperuit . Sed hoc in libro tertio , qui de pietate , id est vera ac unica Sapientia , uberiùs dicitur .

A Deo illustratè.

Alterum vitæ genus Actuosum.

Sequitur genus vitæ alterum : nempe Actuosum , quod propriè negotio , opera , labore constat : & quod adminiculo corporis , & rerum externarum impletur . Hoc eo præstantius est , quo magis ab animo ortum sumit ; & ad illum refertur : eò verò vilius , quò corpus magis , & externa spectat . Inter actiones , quæ multum trahunt ab animo , eminent illæ , quæ Reipub. & Civitati , bono Communitatis , Societatisque impenduntur , sive pace , sive bello . Tales splendide profectò , magnanimæ , & quædotibus ingenii , judicii que velut

Laudabiliter Reipubl. impenditur.

ani-

animantur: ostenduntque, non nobis
 nos tantum natos esse; ortusque nostri
 patriam, & quæ hoc vinculo conti-
 nentur, participes esse debere. Proficuae
 verò etiam, maximè Societati humanæ,
 si præsertim exactè, ambitione & ava-
 ritia procul, impleantur: Bonumque
 iis, & salus patriæ, suprema lex sit. Illæ
 autem Actiones, quæ necessitatibus vi-
 tæ præsentis consulunt, iisque parandis,
 acquirendisque impenduntur; aut ad
 Agriculturam, aut ad Mercaturam, aut
 ad Opificia referri solent. Agricultura
 duarum, quæ sequuntur, optima: uber-
 rima quippe, ingenua, innocens; &
 qua non alia est magis libera, & vitio
 carens; ritusque meliùs vitæ prisco-
 rum colat. Mercatura, si copiosa, &
 ampla; non illaudata. Nam commer-
 cio gentes sociat; & subvenit commu-
 nibus commodis: efficitque, ut quod
 uspiam est, apud nos natum esse videat-
 ur. Si tenuis, & propolarum; indigna
 honesto viro: nihil enim proficit, (ut
 inquit Cicero loco hoc, quem totum
 ex illo haurio) nisi admodum mentia-
 tur. Opificia denique, si multum ha-
 beant ingenii, & utilitatis in publicum;

*Vitæ ne-
 cessitati-
 bus ser-
 vit.*

*In Agri-
 cultura:
 quæ in-
 genua.*

*Mercatu-
 ra: non
 semper
 vilis.*

*Opificiū
 haud in-
 dignum.*

F

non

*Si inge-
nuum.* non indigna. In vili autem & abjecta
re, occupata: uti & operæ, quibus exi-
gua merces est auctoramentum servitu-
tis; alique illiberales questus, nihil pro-
fecto possunt habere ingenui.

*Tertium
vite ge-
nus ex
utroque
mixtum.* Tertium vitæ genus, è duobus pri-
mis compositum, perfectissimum existi-
mo: naturæque nostræ maximè conve-
niens. Ad utrumque enim nati sumus:
Cognitioni rerum, & Actioni. Unde
conjugendo utrumque; sequetur sta-
tus, erga se, homines, Deumque; exi-
mii prorsus meriti. Exercitium enim
virtutum, Charitatis, Pietatisque offi-
cia; tum demum optimè exequemur;
cùm Animum verâ Cognitione imbu-
tum, ad Actionem, & negotia confere-
mus, & pulcherrimo temperamento,
vitam ita pariemur; ut eam nobis, aliis-
que, & denique Deo impendamus.

*Monita
quædam
addun-
tur.* His verò ita positis, constitutisque,
addenda adhuc sunt quædam monita:
cuique (ex jam dictis) conditioni vitæ,
admodum necessaria; & unice servan-
da.

*Noscen-
dum suū
cuique
ingeniū.* Atque imprimis, in quocumque ge-
nere Actionis, expendere diligenter
oportet naturam, ingeniumque pro-
prium;

primum: & videre; quid quisque habeat
 sui: nec experiri temerè, sine erroris cer-
 tè evidenti periculo? quàm se deceant
 aliena. Id enim profectò maxime quem-
 que decet; quod est cuique suum maxi-
 mè. Ideoque non tam præstantiora,
 quàm viribus nostris potiùs convenien-
 tia, sectanda sunt. Et cavendum, ne Sce-
 nici plus, quàm nos, habere videantur
 prudentiæ: Illi enim, non illustriores,
 primasque, sed sibi accommodatissimas
 personas assumunt. Pudendum verò
 esset, ut; quod Hystrio videat in scena,
 id prudens ignoret in vita. Peccatur au-
 tem neglectu hujus moniti sæpissime.
 Alii enim par negotiis ingenium, diffi-
 dentia sui, & experimenti detrectatio-
 ne, otio sepeliunt. Alii sese per ambi-
 tum immiscent negotio, cui undique
 impares sunt. Alii parum idoneam ve-
 recundiam rebus adferunt civilibus.
 Aliorum contumacia non facit ad au-
 lam. Ita; dum quisque horum consecta-
 tur, quæ ei non conveniunt; in multa
 sibi adversa incidat, necesse est.

Quod si aliquando necessitas ad ea
 nos detruferit, quæ nostri non sunt in-
 genii; tum adhibenda erit exacta dili-
 gens

*Alicna
non se-
ctanda.*

*Exemplo
per sonæ
in scena.*

*In nego-
tio quod
necessitas
impo-
suerit*

*Utendum
peritorū
consilio.*

gentia: ut talium peritos inquiramus, agnoscamus, eorum consilio utamur, & monitis cum iudicio obtemperemus: Alioqui erroribus innumeris se induere necesse erit. Nam in negotio, qui nec sibi consulere, nec benè monenti parere scit; ille profectò extremi censendus est ingenii.

*Servanda
propositi
consilia.*

Addendum verò etiam, ut in constituto semel vitæ genere, constanter maneamus; & quam nobis sortem, seu ratio dederit, seu sors objecerit; illa contenti vivamus. Nec imitemur eorum levitatem, qui assidua mutatione propositi, præsentia fastidiunt; inexperta appetunt, laudant jam relictà. Qui votis, & omni vita pendent semper: quorum animus natura inquietus, parum in se solatiorum habens, se sibi relictum ægrè fert; tediumque sortis suæ, & tristem vix sustinet patientiam. Huic verò contrarium: tranquillum nempe, placidum, semper æqualem, se contentum statum animi, quem Græci εὐδαιμονία vocant, retinere, ac tueri pulcherrimum, optimumque.

*Animi
tranquil-
litatem.*

*Et in A-
ctione
omni de-
corum.*

Ultimum monitum est, in ordine, decoro, & Convenientia Actionis: quod

Græ-

Græcis τὸ πρέπον, dicitur . Nempe in moribus, sermone, vultu, habitu, incessu, gestu omni corporis, decens ac venustum nescio quid: deinde lentum, grave, sedatum, & denique sine affectatione omni, & nimia cura concinnum & compositum . Præceptis hoc vix includi potest: Tempore etenim, personæ, loco ita servit; ut laudis & vituperii exinde causam sumat . Et quod non opportunum, intempestivum, nec conveniens, id etsi alioqui bonum, indecorum tamen, & ineptum . Ufu ergo ista discantur, exemplo, observatione . Hætenus Prudentia, prout in se, explicata; nunc eandem in tripartita Divisione virtutis videamus.

Decorū.

Quod nō
præce-
ptis .

Sed usu
discitur .

De Temperantia .

Quia corpore & animo constat homo; huiusque imperio, illius servitio utimur: ideò oritur prima virtutis pars, quæ σωφροσύνη Græcè vocata, & ὡς σωφροσύνη φρόνησις ab Aristotele explicata, Latine Temperantia vocatur: definiturque prudens usus eorum, quæ debentur carni; id est, naturæ ejus exigentiam temperans, &

Etimon
Græcum
Tempe-
rantia .

Velut
servans
pruden-
tiam .

Ejus de-
finizio .

Exigentia corporis triplex.

Ejusque ratio.

id quod delectabile censetur, non quærens in corpore. Cujus exigentia partim est naturalis, & omninò necessaria; ut alimentum, & tegumentum: Partim naturalis, sed non omninò necessaria; ut conjugium: Partim nec omninò naturalis, & penitus non necessaria: ut illecebræ ad sensus corporis oblectandos. Primam, ajo, Sapientem, id est, virum bonum, admittere necessariò; alteram voluntariè; tertia abstinere. In omnibus verò, quidquid corpori detrahet, animo conferet. Docebit hoc Frugalitas, Castitas, Abstinèntia, seu quam, Græco verbo ἡγρᾶταιν meliùs forsan voco.

Temperantiam.

Frugalitas in cibo & potu.

Modus ejus exprimitur.

Frugalitas est in esu & potu modus, sustentationi corporis sufficiens: qui Gulæ opponitur. Modus, inquam, in quantitate cibi potusque, qui alat vires, repletque. In qualitate; qui salubri usu, & facilitate parabili, non verò sumptu tantùm, damnoque commendetur. In lenta sumptione, quæ avidam voracitatem cohibeat: In regula denique, quam institutum præscripsit, dum statuta tempora jejunii assignavit. Cæterum, cùm aliæ virtutes ani-

mo tantum profint; hæc etiam robur, *Qui eo*
 fanitatemque corpori confert. Con- *animo eo*
 fert deinde menti; quæ ingluvie ob- *corpori*
 tunditur, & hebescit. Sed præcipue *prodest.*
 amplectenda, quia grata & accepta Deo: *Ideoque*
 cujus regnum non est potus, & esca. *unicè ser-*
 Sobriè ergo vivito, & frugi; & stude *vandus.*
 in hac virtute proficere; quia quotidiani
 est exercitii; quia est velut tyrocinium
 vitæ melioris; denique quia in re mini-
 mè ardua: quam nisi vincis; qui majora
 superare speres.

Castitas contraria Libidini sequitur. *Si nequit*
 Hæc si per continentiam nequit reti- *Castitas*
 neri; Natura, & lege divina, velut re- *continent*
 gulam habebit Matrimonium. Melius *esse, Ma-*
 enim est nubere, quam uri. Et vaga li- *trimoniū*
 bido, non modò Dei præcepto veta- *ineundū.*
 tur; sed etiam ratione, & jure naturæ,
 conjugio illigatur, & adstringitur. Cum
 enim facultatis gignendi & generandi,
 finis sit generis propagatio; obtineri
 is aliter non potest, nisi, quod genitum
 est, educetur. Educatio verò prolis,
 præsertim humanæ, adeo alienæ opis
 egentis, commoda esse non potest, ni-
 si mutua opera, parentis utriusque. *Quod est*
 Cum & inter bruta etiam, præcipue *à natu-*
 ra.

*Idque
causa
educan-
de pro-
lis.*

*Strictius
lege Di-
vina con-
stitutum.*

*Perfe-
ctior illo
cœliba-
tus.*

*Vitanda
obsceni-
tas in
verbis.*

quorum operosior educatio, ut volu-
crum, tam mas, quàm sœmina, sœtum
curent. Si autem taliter educanda est
proles; ineunda est Conjugalis Socie-
tas: quam, uti dixi, naturalis ratio di-
ctat, exigitque. Eam verò lex Divina,
& præcipuè Evangelii, certo instituto
circumscripsit, & strictiori præcepto
devinxit. Dum, & unam tantum uxo-
rem uni Viro concessit; & ab ea sepa-
rari, nisi morte vetuit. Nam divortia,
justam ob causam facta, non tam dissol-
vunt Conjugale sœdus, quàm nullum
contractum fuisse ostendunt. Etsi verò
necessarium, & magnum est in Christo,
& Ecclesia hoc Sacramentum; attamen
Virginitas illo major, altior, ma-
gisque Deo chara; quippe quæ à Carne
remota, illam velut abdicat; & ideo
facile in Spiritualem Naturam assurgit;
Per quam homo purus undique Deum,
qui puritas est, facilius intra se habebit
hospitantem.

Utrobique autem, tam in conjugio,
quàm cœlibatu, castitas primùm in
verbis servanda: in quibus nullam in-
esse turpitudinem, falsò Stoici docue-
re. Dicebant enim: Si esset obscœni-
tas;

tas; eam aut in re fore, aut in verbo.
 In re non esse; quia effertur alio, etsi
 recto nomine; Si autem turpis esset;
 ne alieno quidem, si non suo potius,
 quod itidem turpe esse non potest,
 cum denotat rem, quæ est ostensa non
 turpis. Atqui non sic periit pudor, ut
 hoc nobis imponant. Nam etsi in re-
 bus naturalibus non est ea turpitudine,
 quæ sui usum prohibeat; est tamen
 quæ apertum fugiat, & occultari requi-
 rat. Unde faciem aperimus; sed vela-
 mus illa, quæ ipsa natura, quantum
 commodè potuit, abdidit. Si verò hæc
 tegere honestas jubet; cur verbis, dum
 necessariò nominanda sunt, non tegan-
 tur? Abeat igitur hæc obscænitatis pa-
 trona Sophistice: nobis verecundia sit,
 quam Christiana conversatio requirit;
 obscænitatis ne nominetur quidem: ho-
 nestè, velut in die, ambulemus; & lo-
 quamur, ut decet Sanctos.

*Rejetti
 Stoici,
 qui ali-
 ter docu-
 ere.*

Altera pars Castitatis, in cogitatio-
 ne: quam item puram, & nullo phan-
 tasmate sædatam, casta & sancta lex
 Christi requirit: Ut nempe nec admit-
 tas immunda, nec te illa meditando
 oblectes, & multò minus concupiscas.

*Vitanda
 itidem
 in cogi-
 tatione.*

Præ-

Præstabis verò faciliè, si visum moderare: ab hoc enim potissimum immundæ cogitationis origo. Dic igitur cum Joba: Pepigi pactum cum oculis meis: nempe ne videant (ut Psaltes inquit) vanitatem; & dictum utrumque imple.

*Et demum
in Opere.*

Tertia pars Castitatis, in factis: non tantum ut Fornicationes, Stupra, Adulteria evites, & detestere; quæ, nemo est, qui turpia non agnoscat: sed ut devites etiam, quæ illicia sunt eorum; nempe muliebrem familiaritatem, officia, lenocinia, lascivos procacesque mores, quibus fovetur impurus hic Amor. Quem ut vincas; defugias: nam in aliis vitiis victoriæ causa, pugna est; in hoc, tantum fuga.

*In corporis
cultu
modus.*

Abstinentiam, mollitiæ adversam, voco modum severiorem in cultu, comptu, & situ corporis. Cultus est in veste; quæ sit necessaria, sine nimio sumptu; Commoda, sine inutili copia; Decora, sine futili, & vana vanitate. Comptus in munditie; quæ ut illuviem fordidam, squalloremque vitat; ita crebra nimis balnea, unguenta, calamistra non requirit. Situs est, aut in

*In situ
denique.*

exercitio, aut in quiete. Illud advoco, & re-

& requiro ; ut vegetum , agile , patiens-
que laboris corpus reddat : Hanc ad-
mitto , tolero , ut ut vires reficiat . Non
verò somnolentia , cubatione , gesta-
tioneque molli enervet : duoque vitet
contraria ; nempe , ne quid effæmina-
tum aut molle , & ne quid durum , agre-
ste , aut rusticum sit . Denique & univer-
sum , quidquid affluentia nimis est exqui-
situm , delicatum , & Sybariticum ; quid-
quid affectato fastidio nimis tenerum ;
id totum *εὐπάρετα* aut moderatur , aut
abstinere jubet . Ut verè sit Temperan-
tia , ex Stoica definitione , *ἐξ ἡς ἀρρήτης*
νέουσι . Et ipsa potius vincat omnem
corporis voluptatem ; animumque ejus
fallacibus , & falsis oblectamentis libe-
rum , & vacuum , solidorum , & olim
immutabilium capacem reddat . Utrum-
que autem obtineri non potest ; & qui
hæc confectatur , illa amittet .

*Ubique
nihil ni-
mis mol-
le .*

*Tempe-
rantia .*

*Habitus
invinci-
bilis à vo-
luptate .*

De Justitia .

PEractis , transactisque iis , quæ ad
corporis , ut ita dicam , mora-
lem *δίκην* spectant , cùm in hac vi-
ta rerum externarum egentes natura si-
mus , præscribit , præcipitque Justitia : quo-
modo

*Justitia
definitio .*

modo in illarum usu versari nos oporteat. Est enim illa ex prudentiæ dictamine desumptus habitus; rebus, quæ extra nos, rectè utendi: ut nempe id, quod sub notione utilis venit, iusta administremus ratione. Id autem fit; dum nec nobis vindicamus, nec alteri tribuimus plùs, aut minùs, quàm tenemur. Porro bifariam considerari Iustitia potest. Nempe: vel ut sit aptitudo tantùm, ac potentia animi, firmiter apud se constituentis, legitimum usum proprii; ac alieni debitam cuique attributionem: vel ut sit actus ipse, hoc idem exercens. Prima notione pertinet ad hunc tractatum Probitatis; qua se animus præparat, ac munit, ad præstandum, quidquid jus & æquum requireret: implendumque id totum; unde viri boni nominantur. Altera ad Charitatem; ubi, quid sit jus, suum cuique tribuens, accuratè expendetur. Itaque hic priorem partem tractabimus. Constitutum mihi enim, quidque suo loco, sine tautologia ponere: contra quàm faciunt illi, qui hic ad mentionem Iustitiæ, totam Jurisprudentiam infarciunt.

Iustitiæ autem istius, ut ita dicam, inte-

*Que
partim
est poten-
tia.*

*Partim
actu.*

*Huc pri-
ma spe-
ctat.*

*Altera
ad Cha-
ritatem.*

interioris, fons & origo est, regimen
 severum, adstrictumque ejus affectus,
 quo in id, quod nobis prodesse vide-
 tur, nimis ferimur. Etsi enim ille, à
 natura ad conservationem sui, inditus
 cuique animanti; tamen ubi ratio ho-
 mini accessit, docet illum & admonet:
 ne sua commoda plùs æquo diligar,
 aut quærat: quin immò sæpè impendat
 societatis, & ex illa orti officii causa.
 Occupetur ergo primùm animus in
 expugnando hoc affectu, qui hostis
 unicus Justitiæ; omnia sibi rapiens, &
 nulli reddere, quod suum est, permit-
 tens: statuaturque non modò nihil sibi ar-
 rogare; sed etiam propriis, licitisque
 commodis, societatis & officii causa,
 detrahere. Quin immò, ut id exactiùs
 impleat; meminerit: quàm altum, &
 eximium, quàm liberum, & liberale,
 quàm denique ratione dignum sit; cun-
 cta quæ infra animum, ex animo spre-
 visse. Affectu autem tali victo, con-
 cidet Avaritia, & orietur hoc fonte
 rectus usus rerum, animo illis non ir-
 retito: quin immò adeo firmo in verà
 eorum, id est parva æstimatione; ut
 paratus sit jacturam potiùs omnium
 pati,

Utilitas
 propria
 non ni-
 mis se-
 standæ

Quippe
 hostis
 Justitiæ

Expu-
 gnanda
 ergo

Et Offi-
 cio im-
 penden-
 da.

Virtutis hic habitus oppositus fructioni avara. Rarus & difficilis.
 pati, quam vel latum unguem, ab eo, quod Iustitia exigit, declinare. Hic virtutis habitus, (qui uno nomine non effertur,) oppositus est vitio fructitionis. Rarus verò & arduus: ut sunt Mortalium mentes, captæ concupiscentia opulentiae; quam fulgor & commoditas ejus provocat. Adeo quidem, ut Divino etiam eloquio, magnum & mirabile fecisse dicatur, qui eam abjecerit. Attamen abjicienda est, idque iis rationibus quas attuli, inter remedia vitii huic virtuti oppositi.

Liberalitas, altera pars interioris Iustitiae.
 Altera ex eodem fonte virtus fluit; Liberalitas; contraria parcitati: interiori verò Iustitiae propria, & insita. Quid enim iustius, quam subvenire, largiri, prodesse; id est, quod tibi velis fieri, facere alteri? Id verò præstabis, primum si adsit (ut ita loquar) Libentia: quæ quidquid dat, libenter dat, bono animo, studio, judicio, ratione. Si verò dare nequit; vellet tamen, cuperetque. Ita constabit beneficentia, & benevolentia vera. Deinde, si adsit Gratia: quæ non sæneretur beneficium, non captet, non requirat vicem: largiatur gratis; non mutuum, sed donum.

Postre-

Postremò si adsit Bonitas, quæ adeo fit *Benigna.*
 diffusiva sui, ut benefaciat etiam illis,
 qui odere: & quam potest, æmuletur *Etiā*
 Deum; qui beneficiis afficit ignaros; & *non ami-*
 ingratos; non petentes, abnuentes, *cis.*
 immerentes: sed (quod sufficit ejus
 bonitati) miseros, & egentes. *Modò*
miseris.

Sed Liberalitate, etsi nihil natu-
 ræ humanæ accommodatius; attamen
 ut justa sit, recta, & laudabilis; opor-
 tet, ut cautiones quasdam habeat, *Parsimo-*
 quas suggeret tertia interioris Justitiæ *nia pars*
 pars, prodigalitati adversa; quam an- *tertia in-*
 gusto forsan, sed cùm aliud proprium *terioris.*
 non suppetat, necessariò vocabulo, *Justitiæ.*
 nuncupabo Parsimoniam. Definitur: *Definitio*
 prudens rerum dispensatio: seu men- *ejus.*
 sura, ac regula, nec plus, nec minus,
 quàm opus sit, in alios erogandi. Per
 hanc sufficit modicum justo: hæc tantas
 vires habet, ut multis impendiis, mul-
 tis erogationibus sola sufficiat. Alii
 nempe dividunt (inquit Sapiens) pro- *Et exi-*
 pria, & ditiores fiunt: alii rapiunt non *mius*
 sua, & semper in egestate sunt. Justus *usus.*
 autem dispensator, assignans tribuens-
 que quantum meretur quisque; dum
 sua non prodiget, non rapiet aliena,

*Docet
modicos
esse in-
sumptu.*

*Et in tri-
buendo
equos.*

vitabitque ea, quæ luxus, & hinc fata
egestas, suadere solet: fraudem nem-
pe, & injuriam. Deinde benefaciet, non
ambitus causa profusè largiendo; sed
benignè, merita aut pensando, aut
provocando. Duo itaque præstat Par-
simonia: primum docet nos modicos
esse in omni impendio; nempe in vi-
ctu; veste; supellectili, familia, largi-
tione: idque, ne oporteat inique sarcir-
re damna inconsultæ profusionis. Dein-
de jubet, ut pro cujusque dignitate &
meritis, tribuamus. Nam si hic dele-
ctus non servaretur, nulla ratione æqui-
tas posset servari. Habes Justitiæ, ut di-
xi, interioris, & ad Probitatem pro-
priè pertinentis, lineamenta vera. In
quibus velut in semine, aut radice, in-
clusa vis ejus: à qua pullulabunt facilè
præcepta, & officia Charitatis; de qui-
bus libro agam subsequenti.

De Fortitudine.

*Definitio
Fortitu-
dinis.*

JAm verò, cùm & ea, quæ corpus re-
git; & ea, quæ externa dispensat
Virtus; explicata, ostensaue sit: Su-
perest, quæ animum firmat, ac perfici-
cit: eaque est Fortitudo. Definitio il-
lam:

lam: Prudentiæ habitum, quæ animus
primùm cuncta, quæ infra se habet;
deinde seipsum, postremò victoriam
ipsam vincit, domat, ac Deo subdit.

Nempe, ut illud olim in Philosophia
veteri decantatum *δύτα βέτον καλόν*,
forti & invicto studio superatis, victis-
que impedimentis omnibus, obtineat.

Victoriæ porrò istius, seu *τὸ κρᾶτεος*
materiam præbent ea; quæ nobis sunt
terribilia, molesta, difficilia. Sed quia
in oculos maximè incurrunt ea, quæ
terrent; ideo in illis vincendis, vulgò
& imperitè, tota fortitudinis ratio poni-
tur; cùm hæc pars ejus tantùm, eaque
non potissima sit, prout patebit.

A quâ tamen ut ordiar, definitio il-
lam: & voco Firmitatem imperterri-
tam animi, contra ea, quæ corpori no-
cent. Inter ista autem *φύσερόπικτον ὁ*
θανάτος inquit Aristoteles. Mortem
ergo, cùm officium requirit, & non ti-
mere, & subire; prima, sed non omnis
fortitudo erit: Magna tamen, quoties
non omninò impetu fit; sed causâ, &
consilio. Tum enim plenam Victoriâ
exercet animus in corpus; dum vitam
ejus, velut vestem, quando opus est
exuit,

Per se eli-
gibile,
pulchrû,
seu hone-
stum.

Occupat-
ur circa
terribi-
lia, mole-
sta, diffi-
cilia.

Firmitas
animi.

Mors ma-
ximè ter-
ribilis.
Contra
Mortem.

Sui occi-
sor, & si-
bi manus
inferens.
*Non ut
illam cō-
seiscas.*

*Sed cum
opus est,
subeat.*

*Nempe
vitandi
flagitii.*

*Officii
implen-
di.*

Honesti.

*Dei te-
standi
causa.*

exuit, & ponit. Non ut *αυτοφόνος* & *αυτοκτενός* sit, (Apage Porticensium insanam Sapientiam, quæ falsa specie roboris, infirma & timida, mortem potius sibi consciscit, quàm duri quidpiam, & molesti sustineat: quæ arbitrium Vitæ à Deo acceptæ, Deo eripit; & sibi per arrogantiam pravam vindicat: acta aut ferocia, aut gloria inani.) Non, inquam, ut se perimat: sed ne morte deterreri ab officio patiatur; sit, que paratus pro illo, ut Christus & docuit, & fecit, ponere animam. Qua majorem dilectionem officii, nemo habet. Id autem præstat, partim cum eligit mori prius, quàm honestum deserre; Pejusque letho flagitium timet: & non timet, quæ occidunt corpus, sed quæ occidunt animam; Ubi est mens gnara sui finis; ideoque recti tenax propositi. Partim, dum usque ad periculum mortis propugnât, quod tenetur: putatque dulce & decorum, pro officio mori; Ubi est, amore *καλῶς*, strenuæ & excitatæ indolis pulcherrimus vigor. Partim denique, cum Dei gloriæ, & testimonio vitam immolat: Ubi est fortis supra mortem dilectio;

ctio; Prout fuit in illis, qui torti, se-
cti, usti, caesi sunt, tormentis & morte
strenuè obitè, sed non sibimet illatà.
Hic est primus Fortitudinis gradus, in
quo est Victoria terribilium: idque à
mente tranquilla, & ex proposito, ju-
stam ob causam agente. Ei opposita
pars illa superbiæ, quam ferociam di-
xi: quæ præceps, inconsulta, impetu
agens; acta nempe, ut ita dicam, Gy-
ganteà quadam superbià, ex corporis
robore orta.

Sequitur alter Fortitudinis gradus;
quem in re & materie molesta posui;
& in lucta animi cum fastu, orto à re-
bus externis: Ut nempe eas superet;
id est, infra se deprimat; seu, (ut Cice-
ro id ipsum adscribens Fortitudini in-
quit;) ut ea, quæ eximia plerisque, &
præclara videntur, ratione stabili fir-
mèque contemnat. Vocari, & definiri
hic gradus potest: Constantia animi,
in eodem statu permanentis; externis
nec depressi, nec elati. Sed quia mens
humana, quasi natura extollitur, (igne-
um enim quidpiam & æthereum est)
contra naturam verò deprimitur; Ideo
plus molestiæ sentit in elatione conti-

*Pars al-
tera For-
titudinis
in re mo-
lesta.*

*Que est
Constan-
tia.*

*De tre-
flans de-
primi.*

*Et (quod
operosius)
extolli.*

*Tū enim
animus
secū pu-
gnat.*

*Molesto
certami-
ne.*

nenda, quàm in depressione detrectan-
da. Itaque potior Fortitudinis vis e-
rit in primo: Tum enim verè animus
secum pugnat, certatque. Unde verò
hoc monstrum, animus nempe secum
pugnans? (quærit, & respondet sibi Au-
gustinus.) Unde, inquit, quòd impe-
rat animus corpori, & paretur statim:
imperat sibi, & resistitur. Imperat ani-
mus, ut moveatur manus; movetur;
& vix à servitio distat imperium: Im-
perat animus, ut velit animus, nec fa-
cit tamen. Causa est, quòd non ex to-
to vult, ideoque non ex toto imperat.
Vincendus itaque animo animus est;
ut sibi parere possit: Majorque erit hic
gradus, quàm in terribilium victoria.
Nam vita, ut ita dicam, corporea, cum
infra animum sit, faciliùs ab eo supera-
tur; certamen verò animi secum, tan-
tò molestius est; quantò operosius
par, quàm inferior vincitur: Nemo au-
tem magis par, quàm quisque sibi: Se-
ergo vincere, admodum arduum, ope-
rosumque erit. Porro tum demum ve-
rè se oppugnat, seque vincere studet
mens humana; cum fastum, & inanem
gloriam, qua maximè oblectatur, sibi
eripit;

eripit; seque illa privat. Tum inquam
 primum, velut partes fiunt: & quod
 unum idemque videbatur, dividitur:
 nempe purum illud ac simplex ratio-
 nis, quod Christiana Philosophia Spi-
 ritum vocat, ab illa parte, quæ parens
 cupidinum est. Inter cupidines autem,
 cum præcellat maximè fama & gloria;
 præsertim ea, quæ ut vera tribuitur, &
 ob meritum videtur obtigisse; Ideo ta-
 lis gloriæ abdicatio gravis, & maximè
 molesta sit, necesse est. Diuturnum
 enim certamen, & continuò rediens fit
 lucta; donec omnis dulcedo ejus, &
 gustus, penitus mactetur. Mactari au-
 tem debet: Nam impedit, repellit, &
 arcet verum hominis bonum. Non e-
 nim conveniunt, nec in una sede mo-
 rantur, complacentia vanæ gloriæ, &
 serius veri boni amor. Ergo contra fa-
 ctum felicitatis hujus vitæ, animus fir-
 mandus est; ne inanis famæ applausu,
 ventosus fiat. Ut laudem, inquam, fu-
 giat; quippe semper falsam; id est im-
 meritam, levem, brevemque, & verum
 mentis deceptæ ludibrium. Deinde,
 arrogantiam judicii, ex facultatibus
 animi, devitet; idque sancta illa, vera,

*Ut cupi-
 dines su-
 peret.*

*Inter
 quas emi-
 net vana
 gloria.*

*Quæ vin-
 cenda.*

*Mirum
hec à
nullo
tractata.*

& debita simplicitate , cum qua quæri se jubet Deus. Hæc est fortitudo , in rebus molestis superandis ; quam etsi fatentur passim , eximiam esse ; dum magis expeditum putant , hostem , quàm cupiditatem vincere ; & quæ premunt sustinere , quàm quæ attolunt deprimere : Nullam tamen , quod miror , ejus mentionem faciunt ; cum de virtute hac agunt .

*Summus
fortitu-
dinis gra-
dus hu-
militas.*

Tertius , sumusque Fortitudinis gradus est : Spiritum , ita , ut , dixi , corporis , & Cupidinis dominum , ac victorem , iterum vincere , domare , Deoque subicere . Hanc partem voco Humilitatem ; Quatenus , inquam , respicit Deum : nam quæ se , robur ac firmitas summa est . Definiri potest . Status , & conditionis humanæ , fortiter agnita , retentaque veritas : quæ hominem in suo , quod ex se est , nihilo , firmiter collocat ; & nulla re externa ab illo permittit dimoveri . Sublimis revera , arduusque gradus . Quia etenim animus , ubi superavit partem sui , quæ cupidinum parens est ; facile adeò præclari operis fructu capitur ; se miratur , se oblectat : ideo hoc ipso victoriam ,
quam

*Que de-
finitur.*

quam paraverat , incautus amittit . *Est , ut vincat ipsa Spiritus gloriam .*
 Vincitur enim iterum Complacentia :
 quæ bono principio orta , facile imponit ; & difficillimè deprehenditur : quippe mira celeritate sese insinuans . Difficilius verò superatur ; quia velut spoliare se fructu veri boni oportet : & vim sibi inferre , ne illo fruamur . Immo velut se perimere ; ac mactare : idque parte sui potiore ; nempe quodammodo animo mori . Sciunt experti quid dicam ; & fatebuntur id fieri per humilitatem : quæ est virtus opposita parti illi superbix , quæ ab elatione animi , se bono suo oblectantis , oritur . Hæc , prout dixi , coram Deo , in cognitione sui nihili , sui minuti , sui corrupti , fortiter firmiterque hominem constituit : & adeò ab hac consideratione , seu agnitione sui divelli , aut attolli ulla re non permittit ; ut etiam id ; quodammodo prohibeat vero bono . Quando enim illud influit sua spontè : quoniam delectatio , quam secum adfert , externum jam quidpiam , & productum est ; Ideò , ne illi acquiescere velit , id est , ne effectui potiùs inhiet , quàm causæ innitatur ; seque compotem boni existi-

Idque mira quadam ratione .

*Qua ex-
altè ex-
plicatur .*

flumans, evanescat: ideo inquam, in
 tantum sibi non appropriat id, quod
 suave & dulce influit; ut sataget etiam
 totum & integrum, nullo delibatum
 proprio gustu, & fruitione, reddere
 & refundere datori. Et cum hoc fece-
 rit; se non plenè fecisse, inutilemque
 ideo, & vilem esse, semper & verè agno-
 scit; fateturque; quippe cum talis sit
 revera. Habes Fortitudinis plenam vi-
 ctoriam: Partam primùm, si opus est,
 morte naturali: Deinde, quod semper
 opus, morte cupiditatum: Postremò,
 quod summum opus, morte ipsiusmet
 animi: dum commorimur Deo; & su-
 premam victoriam victoriæ obtinemus;
 nulla ejus dulcedine capti, ne iterum
 vincamur. Quod postremum uberius
 explicabo, cum *περί τῆς Θεώσεως* agam;
 Nunc verò partem tertiam capitis hujus
 absolvam.

De (ut ita
 dicam) de
 deificatione.

Pars Capitis Tertia.

*Declaratur unde, & quo principio
paretur, & insit homini
Virtus.*

QUæsitum id acriter olim, & *Contentio
hac de re
Scholæ,
& Ec-
clesiæ
gravis.*
nunc: neque dum sopita ex inte-
gro controversia. Ad eam namque per-
tinet, referturque magnum illud dis-
sidium, non scoliarum tantum, sed Eccle-
siæ etiam diu grave, de Gratiæ divinæ
necessariis auxiliis, & arbitrii humani
libertate. Operæ pretium itaque erit,
paucis hæc explicare: paucis inquam;
nam haud aliam causam dederim hu-
jus contentionis magis propriam,
quàm multiloquium; dum diffusis di-
sceptationibus sibi mutuò præbent ca-
villandi ansam; quam pauca, & libra-
ta verba tollunt. Est verò omninò ne-
cessarium, ad hanc quam suscepi dia-
triben, locum hunc non præterire. Fun-
damentum enim virtutis, & ἀρετῆς
unicum est: scire, unde illi pe-
rendum sit principium; ne ignoran-
tia veræ ejus causæ, tribuamus nobis,
quod Dei est: & ut eum authorem
gratiæ;

*Necessa-
riū hic
tractan-
da.*

gratiæ; gratiam verò potissimam causam meriti, & præmii, id est gloriæ, agnoscamus. Alioqui si propriis viribus nisi tantum velimus; & iis putemus nos posse summum bonum consequi; tota vita laborantes, nihil capiemus. Merito itaque huic loco insulam. Et primò, opiniones hac de re erroneas adferam; deinde veram sententiam) præmissis quibusdam,) demonstrabo. Tertiò, quæ contra illam dici solent, refellam.

*Idque
partitio-
ne quæ
proponi-
tur.*

*Virtutem
à tempe-
rie Cor-
poris esse.*

*Tempe-
ramentū.*

*Falsum.
A ratio-
ne tantū
humana.*

Imprimis ergo, opinio quorundam fuit: Virtutem à Natura esse; & cuiusque mores nasci; id est, à temperie, & constitutione corporis, provenire. Causa sententiæ à tam arcta animæ cum corpore connexionem; cuius humorum prout est *ὑπερ*, magis minusve videtur in nobis incitare Commotiones; Ex illarum verò modò, virtutes, vitiaque. Sed si animus corpore potior, præstantiorque; quomodo ab illo perficitur? utique, quod ignobilius & inferius est, perficere superius nobiliusque non potest.

Altera ergo sententia sequitur: quæ virtutum petit principium, tantum à ratio-

ratione humana . Quam rectam , puramque homini inditam , sed à corporis consortio , velut contactu infectam , corrigi & depurari , institutione ac doctrina . Itaque propriis insitæ rationis viribus , sufficere quemque sibi ad virtutem : Sententia hæc dum αὐταρκείαν tribuit homini ; impiè Deum relegat . A quò cum sit nostrum esse , quantò magis bonum esse ?

Tertia ei contraria sententia est , quæ dicit : à Deo , velut sorte , dari virtutem : ita ut eam uni conferat , neget alteri : ut nempe animus passivè se tantum habeat , sine ulla συνέχευετα , & extincta omni libertate ; sui que arbitrio . Sententia prima fronte videtur ad Deum ire : sed inspecta penitiùs , bonitati ejus contraria . Causa enim peccati esset Deus . Nam quòd aliquis , virtutis omnis expers sit ; (quales esse multos scimus ;) Deus qui non dedit , in causa esset . Author nempe mali , quia non dator boni . At quomodo ipsummet bonum causa mali ? & quomodo posset esse ultor , cujus esset Author ?

Falsum etiam . Sui sufficientiam .

Fato eam dari , & sorte .

Cooperatione .

Idem falsum .

Deus hominem liberum creavit .

Quartam , veramque sententiam antequam adferam ; Præmittendum est : Deum ,

Deum, naturam ratione præditam, liberæ voluntatis sui que arbitrii creasse. Quod testimonio Scripturæ apertum;

*Decuit
hoc ejus
bonitatē.*

& dogmate Catholico sanctum, sancitumque. Decuit nempe ejus liberalem & munificam bonitatem, cujus est, se quàm maximè communicare: decuit inquam, impertiri ei, quem ad imaginem sui fecit, eximium hoc, & Divinitati suæ proximum, propriumque. Ni-

*Omnipo-
tentia ni-
hil de-
traxit.*

hil detraxit ejus Omnipotentia: quæ ultrò concessa non minuitur potestate, præsertim supremo jure (ut ita dicam) dominii adeo integro; ut in ipso vivamus, moveamur, & simus. Denique

*Sapientiam il-
lustrem
reddidit.*

Sapientiam reddit maximè illustrem: dum mira ratione cuncta ad suam gloriam gubernat, dirigitque; salva parentium libertate. Est ergo liberi arbitrii homo.

*Voluntas
nostra
aut est
per natu-
ram ne-
cessaria.*

Porro ut hujusce libertatis status rectè pateat; sciendum est: quod voluntatis actio, ex vi & proprietate sibi indita, aut est per naturam necessaria, aut per electionem libera, aut per vim coacta. In primo actu retinet vim suam: vult quippe, in quod innato appetitu fertur; nempe in bonum, seu finem,

nem : quem etsi necessariò appetit , non
tamen invita ; & τὸ ἐκείνου integrum il-
li manet . In altero non modo retinet ,
sed eandem liberè exercet : dum nem-
pe aut rejicit , aut admittit aliquid ,
prout sua προαίρεσις movetur : scilicet li-
berè eligit media , quæ seu verè , seu fal-
sò putat convenientia ad finem : ubi
τὸ αὐτοῦ ἐκείνου suum habet . In tertio ve-
rò actu , vim suam prorsus amitteret ,
aut potius ipsamet quod erat , esse desi-
neret : quippe non est voluntas , dum
non vult : nec vult , si cogitur .

Sponta-
neum .

Aut per
electionē

libera .

Electio-
ne .

Liberum
arbitriū .

Aut per
vim coa-
cta .

Hæc est voluntatis humanæ vera in-
nataque vis , atque constitutio . Quam
dum ante peccatum ; originali justitia
integram incorruptamque habuit ; Pri-
mum inclinatione naturali , qua in bo-
num necessariò fertur , sibi proprium
conveniensque appetebat . Deinde ele-
ctione libera acceptare , aut rejicere po-
terat , quod vellet ; & sine ullo animi
liberi impedimento ἀδιαφορίαν plenam
obtenebat : (quanquam tamen ob in-
nocentiæ statum , quodammodo Na-
turalem potius , inditamque à Deo ,
quam προαιρετικὴν ἀρετὴν , haberet ; ideo-
que faciliùs bonum , quàm malum
acce-

Ejus sta-
tus ante

peccatum

describi-
tur .

Indiffe-
rentiam .

Ab ele-
ctione

virtute m-

acceptaret.) Denique non modo ullam non sensit coactionem, (quæ nec ulla propriè dicta dari potest, nec esse nisi ad malum:) sed neque talem, quæ illi gravis & molesta esset, tractionem.

*Ostendi-
turque
quomodo
post pec-
catum
mutavit.*

Post peccatum verò primi Parentis: Primum, mutavit illa Naturalis & necessaria ad bonum inclinatio; cum nempe malum specie boni, per concupiscentiam appetere cæpit. Deinde, in libertate eligendi, equilibrium illud voluntatis variavit; lanceam ejus deprimente peccati originalis pondere: ita ut bona media, quodammodo invitè voluntas eligeret: facillimè autem, & sua sponte, mala. Denique vis quædam, & mancipatio captivantis nos peccati, subsecuta; quæ voluntatem afflixit, & servam quodammodo fecit.

*Ita ut
periisset
ferre.*

A quo enim quis devictus est; hujus & servus est. Ita, omni parte, innata voluntatis energia, vulnerata, debilitata, vitiata, (prout hisce verbis, id exprimere solet, Augustinus:) non tamen interfecta, aut sublata est. Corrumpi enim, infici, & depravari, natura in homine per peccatum potuit: penitus tolli, & eripi non potuit. Mansit ergo

vis

vis & proprietas ejus: sed saucia, mūti-
la; & ad malum tantum prona.

Atque ita perierat homo, dum ma-
lus tantum esse poterat. Sed subvenit
misero benignitas Salvatoris nostri
*Nisi gra-
tia Sal-
vatoris
subvenis-
set.*

Dei: qui manifestus in carne, dum na-
turam, quam sibi propriam assumpsit,
reparavit; etiam nobis, ejusdem repa-
rationis communionem, satisfactione
præstita, & soluto redemptionis lytro
obtinuit. Ita illi tributa iustitia: nobis
data per ipsum misericordia. Et ut

Adamo peccante, ad totum genus
humanum, labes pervenit: ita Chri-
sto promerente, ad omnes gratia per-
tinuit. Gratia porrò hæc, sita in Au-
xilio, Institutione, & Exemplo. Au-
xilium: partim depulso malo origina-

lis peccati, per *πάλιν λένεσθαι* baptismi; *Qua
Christus*
partim collato bono, per internam in-
spirationem gratiæ prævenientis; quæ
memoriam stabilis, illustrat intelle-
*salubre
auxilium.
Regene-
rationē.*

ctum, accendit voluntatem ad bonum;
idque sæpè supernaturali illapsu, qui
creatas vires animæ excedit. Partim
denique, data in bono perseverantia,
per promissam, præstitamque nobiscum
mansionem, & Spiritus Sancti donum.

Insti-

*Institu-
tionem
necessa-
riam.*

Institutio: Partim doctrina, & ultimi
finis, non in hac vita quærendi, noti-
tia: (quod vetus Philosophia ignora-
vit, & Judaica religio non expressè
asseruit.) Partim ad eum facilè obti-
nendum consilio; quod brevissimarum
sententiarum inaffectata majestate, &
arcana veritate aperuit: Partim deni-
que præcepto, & jussu; mysteriis
nempe, & Sacramentis veræ fidei pa-
tēfactis; & sublata (ut vocat Athana-

*De Deo
aberra-
tione.*

sius) θεοπλαστικῇ, religione autem con-
stituta: quæ antehac aut nulla, apud
nescientes Deum; aut falsa, apud
malè colentes: aut imperfecta adhuc

*Exem-
plum de-
nique no-
bis dedit.*

in Judaïsimo erat. Exemplum denique
dedit nobis: dum, quæ docuit, imple-
vit; & quæ imperavit, facere monstra-
vit: meritoque se sequi; suisque insiste-
re vestigiis jussit: ut quod ille fecit,
& nos faciamus. Tot verò, tantisque
subsidiis fulta natura humana, non mo-
do ad pristinum statum rediit, sed lon-
gè majori, & præsidio, & dote gratiæ,
firmata, ornataque est. Primum, quia
major libertas, (inquit Augustinus)
necessaria fuit adversus tot tentatio-
nes, quæ in paradiso non fuerunt: de-

*Ita natu-
ram su-
peravit
gratia.*

inde,

inde , quia dignitas , copiosa redemptio , & misericordia Salvatoris id meruit ; voluitque .

Ex his verò omnibus quæ dicta sunt , *Quadruplex potestatis humane variatio.*
 quadruplex status dignoscitur humanæ potestatis : (posse autem , tantum est ad bonum , nam ad malum est propriè , non posse ,) primò , in innocentia statu , potuit homo benè agere ; & potuit nō peccare . Deinde post peccatum , expers innocentia , non potuit benè agere ; & non potuit non peccare . Tertiò , compos gratia , iterum , atque facilius multò , potest benè agere ; & potest nō peccare . Postremò , cum donatus erit gloria , non poterit non benè agere , (si actio vocanda in ipsa fruitione est ; ubi patitur magis , quam agit :) & nunquam poterit peccare .

Cum itaq ; in statu tertio nunc simus , id est , in libertate , adjuta gratia ; facilis responsio erit , ad quæstionē propositam . Nempe ; Virtutem , & Actionem bonam , *Nunc in libertate , adjuta gratia nos esse.*
 præcipuè verò , sublimem illam : qualis est credere , sperare , diligere , ut justificationis gratia conferatur ; (verba sunt ex Canone Concilii Trident.) non posse esse sine præveniente Spiritus Sancti inspiratione , & auxilio ; ita tamen , ut liberum *Posse tamen gratia sentire.*
 H ho-

hominis arbitrium, in, non dissentien-
do gratiæ, interveniat. Ut enim non
est amissum penitus arbitrium per pec-
catum; ita nec sublatum per gra-
tiam. Et (ut Prosper dixit) quod non
est interfectum per vulnerantem; non
tollitur per medentem. Manet hæc li-
bertas, sed ex se ad unam partem ma-
gis propensa, nempe ad dissensum gra-
tiæ. Unde, cùm Concilii Tridentini
regula decernit, posse voluntatem hu-
manam gratiæ assensum non præbere;
satis hoc ipso ostendit, in quo potis-
simùm gratiæ cooperetur; nempe, in
non detrectando. Talis autem coope-
ratio nihil habet, quo se jactet, & o-
stentet. Nihil enim aliud præstat per
eam voluntas, nisi quòd, non pereun-
di assensum, velit gratia & auxilio Dei,
à se obtineri. Quis autem salutem sibi
adscribat, quòd, cum ex se non po-
tuerit non perire, salvari per alium
non noluerit? Quis exprobet Datori,
quòd donum ejus acceptaverit? præ-
ferim cùm, ut acceptaret, illectus sit,
invitante, seque planè ingerente ejus
bonitate: Et cùm, nisi eam acceptaret,
periret. Certè hinc non usurpabimus
gloriam,

*Coopera-
ri verò in
non dis-
sentien-
do.*

*Hinc ta-
men nul-
la jactan-
tia.*

gloriam, sed ei referemus; qui ad eam
 obtinendam, contulit gratuitam gra-
 tiam. Quin imò confundemur potius;
 cùm videbimus; ægrè, prava volunta-
 te nostra, acceptata ab eo dona, præ-
 miis affici; & munera ejus oblata, suasa,
 commendata, denique nostri commo-
 di causa data, in nobis velut merita
 coronari. Nostrum enim ferme tan-
 tùm est, posse illa respuere; id est, posse
 perire. Et propriè, (ut inquit Augusti-
 nus) non est voluntatis nostræ effectio,
 sed defectio. Nam ut superiùs dixi,
 posse, seu efficere, est ad bonum tan-
 tùm, quod ex nobis nullum. Cùm igi-
 tur gratiæ cooperamur; seu assensum
 non negamus; propriè nihil efficimus
 soli viribus nostris: sed tantùm, adjuti
 gratia, non deficimus; cùm si absque
 illa esset, deficeremus.

Quippe
 propriè
 nil effeci-
 mus. ipsi.

Sed tan-
 tum non
 defici-
 mus.

Hec fru-
 stra con-
 turbant.

Rerum
 novarum
 molitio.

Hæc, natura rei, ac ratione ipsa evi-
 dente, Authoritate Scripturæ, & in-
 terpretatione Patrum, immò doctrina,
 & approbatione Ecclesiæ, firma; tur-
 bavit nuper pruritus disceptandi: &
 illa, scabie insanabilior, quæ
 prodidit dogma tale: Nempe, non pos-
 se hominem gratiæ dissentire; quod

*Qui præ-
determi-
nationem
quandam
inducit.*

verò dissentiat, id à nescio qua prædeter-
minatione esse, ad unum quid, volunta-
tem adstringente. Dicunt enim: Deum,
absoluta sua voluntate, ante omnem
prævisionem voluntatis humanæ, ab
æterno statuisse, ac decrevisse omnes
actiones humanas, cum circumstantiis
omnibus; ita ut aliter fieri non possint.

*Nulla
justa cau-
sa.*

Causas verò sententiæ afferunt istas:
Primam: quia putant aliter non posse
constare providentiam, ac gubernatio-
nem universi. Alteram; quia necessa-
rium dicunt, ut causa prima prius influat
in effectum, quàm secunda. Tertiam;
quia nisi prædeterminatio esset; prin-
cipium justificationis non ex Deo, sed
ex nobis esset. Præter hasce rationes,
se tutantur Authoritate Augustini, di-
cuntque eum ejusdem secum esse sen-
tentiæ. Quod totum, ut plenè refutem;
aperio primùm, quæ exinde sequantur
absurda.

*Absurda
istius opi-
nionis.*

Primum erit; quòd si hæc sententia
obtineret, tolleretur libertas arbitrii:
cujus vis est in electione. Electio verò
non est, ubi non datur è pluribus op-
tio. Optio verò tollitur, si ad unum
adstricta, & affixa sit, nescio qua præ-
deter-

*Libertatis in-
teritur.*

determinatione, voluntas. Alterum
 absurdum; quod benè, secusque meritis,
 promissio præmii, vel comminatio pœ-
 næ, quibus Deus allicit, vel deterret vo-
 luntatem; inutilis, imò ludicra esset; præ-
 determinatione hac, ad unum, cui non
 possit resisti, manente. Tertium; quòd
 quatuor statuum humanæ potestatis, <sup>2. Præmit-
item, &
pene.</sup>
 quos modò recensui, permutatio, ac con-
 fusio sequeretur; si tertius, in quo nunc
 sumus, ut possimus bene agere, & possi-
 mus non peccare, mutaretur vel in quar-
 tum, gloria dotatum, nempe, non posse
 peccare; vel in secundum, gratia desti-
 tutum, nempe non posse non peccare.
 Quartum absurdum; quòd induceretur <sup>3. Con-
turbatio
statuum.</sup>
 fatalis, & cogens necessitas; eaque non
 illa, quam vocant, sequelæ; id est, ex sup-
 positione prævisæ voluntatis; sed ex præ-
 determinatione: atque ita ex mera ada-
 ctione: Indeque prodiret atrox illa, &
 terribilis prædestinatio: quæ immutabi-
 li decreto, faceret hominem, non ideo
 damnandum, quia peccaturum; sed
 quia damnandum, peccaturum. <sup>4. Fata-
lis neces-
sitas.</sup>
 Quintum absurdum; Deum fore authorem
 peccati, & magis quàm Dæmonem: nam
 ille suadet tantum, ac incitat; hic tali,
 quam

quam adstruunt prædeterminatione, iuberet omninò, cogeretque Sextum absurdum; Deum injurium, ac iniquum judicem fore. Quare enim in alio puniret, cujus ipse Author esset? dicerent damnandi: non fuit in nostra potestate, non velle; quod ut vellemus, voluisti: non fuit, quod vellemus, non facere; quod ut omnibus cum circumstantiis faceremus, non decrevisti solùm; juvisti: jussisti; sed motione quadam, & impulsu, cui resistere non potuimus, omninò adegisti; seu potiùs tu ipse fecisti: cur nos ergo punis? Hæc, & plura absurda sequerentur, quorum quidquid tetigeris, ut ille ait, ulcus est.

Effugia frustra, adferunt.

Contra hæc verò omnia satis se tutos arbitrantur, cùm dicunt, Deum prædeterminare ad opus, sed non quàm malum est, & peccatum. Quasi non sufficiat ad complicitatem; ut ita dicam; adigere ad opus, cui annexa, & inseparabilis malitia est. Hac profectò ratione omnis peccans vix peccaret: rarò enim vult peccatum, quàm Deo injurium; sed quàm prodesse, ac oblectare videtur. Prædeterminatio ergo ista, inculpabilis esse nequit. Quod verò concursus Dei natura-

Quæ refelluntur.

turalem attinet ; hic adeò non prædeterminat voluntatem , ut ei potiùs obsequi videatur .

Sed ut refutem paucis rationes , quas adferunt ; Primum , de Providentia Dei , seu potiùs , facultate gubernandi ; sine hac , quam adstruunt prædeterminatione , securos esse jubeo . Constat illi ratio istius potestatis , & imperii : ita ut , nihil ipso incerto , nihil invito , nihil ad efficiendum , aut prohibendum invalido , fiat . Scit omnes eventus , imò semper præsentis sibi spectat , & noscit ; neque huic inspectioni , & notitiæ officit quidquam libertas humani arbitrii .

Uti eorum argumenta .

Deum sine prædeterminatione , esse rectorem universi .

Vult deinde quædam fieri : quædam permittit quandoque , & operari finit causas secundas , prout earum condidit naturam ; nempe liberas liberè agere , sed ipso non invito , alioqui non agerent : Ita neque hic eum impedit libertas humana . Potest denique omnia : etiam si liberos homines creavit . Velle enim illis liberum dedit ; efficere , ac præstare quæ voluerint : sua gubernatione circumscriptis ; suaque omnipotentia (salva agentium libertate) omnia ad finem dirigit destinatum . Neque præ-

determinatione, idest coactione voluntatis opus habet; suppetunt abundè media implendi, vel impediendi effectus. Quod verò argutantur de influxu causæ primæ; Prioritas hæc, sita in eo est, quòd ab illa essentia vis, & conservatio promanet causæ secundæ. Deinde, quòd causa secunda, sine prima nequeat operari: potest verò prima, (quamvis ut plurimum non facit;) sine secunda. Tertiò, quòd causæ primæ concursus, est etiam generalis: secundæ, particularis tantum. Prior ergo exinde, potiorque erit, causa prima. Sed hoc nihil impedit, quo minùs causa secunda, naturam, quam accepit, retineat: &, si necessaria est, agat necessariò; si libera, liberè. Quod verò attinet principium Justificationis, hoc à Deo esse certum est: & sine gratia, auxilioque ejus, nihil prorsus boni hominem posse, omninò profitendum. Nempe, Deus vult omnes salvari, etsi non omnes salventur: quod autem salventur quidam, salvantis est donum; quòd pereunt, pereuntium meritum. Assensus gratiæ potissimum à Deo: dissensus est à nobis, aut potius nec est: cùm peccatum, seu
hic

*Esse item
primam
causam.*

*Et principium
justificationis.*

hic dissensus, propriè nec subsistat, nec sit. Ut enim tenebræ, aut silentium, (scitè hoc Lipsius) non agnoscuntur esse, nisi absentia contrarii; ita & illud. Privatio tantum est, id est deliquium boni. Hac igitur ratione, ut principium Justificationis gratiæ attribuimus; ita Prædeterminationem, quæ principium damnationis esset, à Deo removemus: A quo solo salus, à nobis solis perditio. Postremum est de Augustino, quem patronum causæ suæ, assertoremque glorianitur. Sed ille, cum tam Libertatem arbitrii, quàm auxilia gratiæ, contra hæreses tutatus sit; ut concedam dicta quædam, in calore, ut fit, pugnæ, & contentionis, protulisse; quæ separatim lecta, trahi in partem possint: ita nupera multorum diligentia, satis superque ex ejus scriptis demonstratum est; illum prædeterminationem hanc novam nunquam docuisse; nec talem fuisse ejus in hoc argumento sententiam. Ut verò huic quæstioni finem imponam; quoniam patet, sine auxilio gratiæque Dei, nos malum tantum, id est, nihil, posse: Ideò spem totam boni operis in illo collocare, ab illo opem

*Nos verò
sine illo
perire.*

*Augusti-
num non
docuisse
prædeter-
minationem.*

agen-

agendi, ac perficiendi petere; quæ de-
 mum rectè egerimus, illi soli adscribe-
 re, tribuereque debemus. Fac igitur
 Voto, & præcatio-
 ne clausu-
 la imponi-
 tur. *ò Deus, ut gratia tua in nobis, culpa*
nostra, vacua non sit: & Præcepta
hæc Probitatis, quæ te inspirante di-
cta sunt, te Adjutore ad tuam gloriam
exactè impleantur.

APPENDICIS VICE.

*Monita quædam ad Probitatē reti-
 nendam pertinentia.*

Sed in libri hac clausula, addenda
 quædam monita supersunt; quæ in
 Contextu, & serie tractationis inferi
 vix commodè poterant: cum tamen ad
 recensitas Probitatis partes apprimè fa-
 cere videantur. Merito itaque illis hunc
 librum consignabo.

Primò ergo, ad Anamarthisiam u-
 nicè pertinet, sacrum illud dictum:
 Primum
 monitum,
 memoria
 novissimo-
 rum.
 Mortis.
 Memorare novissima tua, & in æter-
 num non peccabis. Novissima verò
 hæc sunt: Mors assiduò veniens, non
 longè remota, certa eventu, incerta
 tempore: ideoque semper expectanda.
 Non est enim, ut diem rectè peragas,
 nisi

nisi illum ut ultimum existimes . Om-
nem itaque tibi supremum diluxisse pu-
ta . Deinde : cogita reddendæ ratio-
nis , omnium quæ egeris , dixeris , cogi-
taveris , certam & præstitutam diem ;
toties eloquio Dei promissam , ac inge-
minatam . Postremò expende , præmii
aut pænæ magnitudinem , & spem ejus
metumque : prout merueris . Horum
autem viva recordatione , non censeas
reddi vitam terrore turbatam , anxiam
tristitia , & negotiorum , ac omnis actio-
nis , ut superfluæ , incuriosam ; Quin-
imo tranquillam potius , qua ad por-
tum & quietem veram ferimur ; Ter-
roris expertem & vacuam ; dum nem-
pe ille timorum maximus haud urget ,
lethi metus . Emendatam denique :
quippe sedulam boni operis & meriti ;
& exinde lætam semper .

Alterum impeccantiæ remedium ,
cogitare præsentem tibi semper , &
cuncta videntem adesse Deum . Fasti-
dit hoc , & averfatur apud Ciceronem
Epicureus : dum conqueritur , imposi-
tum Cervicibus nostris sempiternum
Dominum , omnia advertentem ,
quem dies & noctes timeremus : Sed
non

Judicii

*Præmii ,
aut pænæ*

*Vita hinc
emenda-
tio , &
quies .*

*Alterum
monitū ,
præsentie
Dei .*

*Qui nobis
adest, &
ineft.* non Christiana nostra Philosophia, cui
initium sapientiæ est timor Domini;
firmum nempe peccati, & temerandæ
conscientiæ frænum. Illud verò non
potest haberi, nisi firmiter agnosca-
mus præsentem nobis Deum. Agno-
scimus ergo, scimusque; quòd non ita
nos ambiat undique, & impleat aer,
ut ille. Imensus enim non esset, ni
ubique esset: ni operi suo & circumfu-
sus, & inditus; extra illud, & intra.

*Et aspi-
cit nostra.* Itaque in illo vivimus, movemur, &
sumus. Ideoque omnes animi, ac cogi-
tationis recessus pervadit, ac pene-
trat: & tacita quamvis, loquitur illi
voluntas. Cùm itaque solus fueris,
cùm fores clauseris: ne putes te esse
sine arbitro. Videt te enim, & aspicit

*Ideoque
eo coram
non pec-
candum.* præsens Deus. Sancti in Deo, & Ange-
li, testes intendunt oculos. Deo verò
spectatore, & olim Judice, & Vindice,
tum verò tot testibus coram, quanta
esse debet non dicam verecundia, sed
abominatio etiam, terror horrorque
peccandi. Altè id ergo defigamus in

*Et invisibi-
lè tan-
quam vi-
dentes su-
stineamus.* animo: in conspectu Dei, Opere, Ver-
bo, Cogitatione versemur? *ὃς τὸν αἰῶνα
τ.ν, ὡς ὄροντες, ἐκαρτερήσασθαι;*

Ter.

Tertium Probitatis retinendæ monitum, & salutare velut Antidotum cenſeo: quod vocare ſolemus Examen Conſcientiæ. Quo velut in numero- to habemus motus omnes animi, ad exemplar ejus, qui dixit: Anima mea in manibus meis ſemper: ut nempe ob oculos poſita, ſpectataque, quotidie e- mendatior eſſet. Quemlibet itaque di- em ſcrutemur. Commotionum, quò nos ducant, quantum raptent, & mo- dum & finem, in nobis ſpeculemur. Quæ vitia magis infeſtent, ac urgeant, expendamus: & huic fini facta, dicta, cogitata remetiatur. Cauſam omni- um, coram interno conſcientiæ Judi- ce dicamus. Et quia hoc arbitro nemo nocens abſolvitur; pœnam etiam pœni- tentia ſumamus, donec exercitatione iſta ſanetur, quidquid corruptum, & pravum fuerit.

*Monitum
tertium,
Examen
conſcien-
tiæ.*

*Quo vita
judica-
tur, &
corripitur*

Verum, quia Judicium hoc, quod de Nobis iſtis inſtituimus, ſæpe depravat, ſemper ſe inſinuans amor ſui, qui connivere quemque ad ſua vitia facit; uſu verò compertum, in aliena nos cer- nere acutiùs: Ideo quartum monitum, magno præſidio ad parandam omnium com-

*Quartū,
varia ad-
monitio.*

commotionum eutaxiam, & virtutum
exercitium erit: Testem aliquem, &
Inspectorem, imò Censorem bonum,
A Viro & prudentem eligere; cui nos aperiamus,
bono. & revelemus. Nam, si est aliquid,
(ut inquit ille) quod ex viro bono, vel
tacente proficias; quantò magis do-

Qui ad cente, instruyente, admonente? Elige
hoc eligē- itaque, qui tibi blandè, temperanter
aus. non affectu sed iudicio, munus hoc a-
mici monitoris exerceat; deinde mo-

Non mo- neri ab eo ne detrectes, nam aliqui
nitus, non *ἀνὰ δέκντος, ἀδελφότητος.* Cæterum vel
correctus. hinc eximius patet fructus, & præstan-
Confessio tissimum veræ probitatis remedium;
Catholica ex instituto Religionis Catholicæ; quo
etiā huic confitemur alter alteri peccata nostra,
fini. & conscios facimus. Conscientiæ no-
stræ: non modò monitores; sed om-
nino Iudices. Sed hac de re suo loco,
nempe libro, qui de Pietate.

Quintum Quintum, ultimumque monitum,
monitum. idque ad eupraxiam propriè pertinens
est. Ut non in præceptorum cogniti-
one tantùm sistamus: sed illa ad usum
etiam aptemus, transferamusque. Cum
enim nulla ars, & artificium solis con-
sistat præceptis; sed addi exercitatio de-

debeat, quæ omnia evincit, perficit-
 que: Certè & sapientiæ, quam artem
 bene vivendi quispiam dixit, adhiben-
 da *dominis* est: quæ illam demum con-
 summatam reddat. Præclarè enim, ut
 multa Epictetus dixit: Peccari à Philo-
 sophiæ studiosis, quòd dogmatum de-
 monstrationem potissimum inquirent,
 usum verò illorum insuper habeant.
 Exempli causa: si ponatur dogma, non
 esse mentiendum; causa inquiritur di-
 cti: & demonstratio mandatur memo-
 riæ; res ipsa non impletur. Itaque
 mentimur quidem, inquit: quamvis
 interrogati, cur non sit mentiendum?
 Causam in promptu habeamus. Ergo
 non in cognitione tantum, & indagan-
 di labore, nec in differendi pericia po-
 nenda est opera: sed facta omnino ad-
 denda; inque illis potissima profectus
 ratio collocanda. Non enim ingenium
 excolere oportet, sed animum: non
 solertiæ laudem aut oblectationem ca-
 ptare ex studio sapientiæ, sed fructum:
 qui nos expertes vitiorum, Commo-
 tionum arbitros, Virtutum compo-
 tes, Temperantes inquam, Justos,
 Fortes reddat. Frustra alioqui notitia
 præ-

*Præceptis
 addendâ
 exercita-
 tionem.*

*Exercita-
 tio.*

*Nec dis-
 putare
 oportet.*

*Sed vi-
 vere.*

præceptorum ; si de virtute locuti , vi-
tia sectemur . Frustra Probitas , quæ
intra verba tantum consistit . Non
enim Auditores legis , ac periti ejus in-
terpretes ; sed factores operis officium
implebunt , ac præmium consequen-
tur .





LIBER
OFFICIORUM
SECUNDUS.

De Charitate.



Insistendo factæ divisioni Officiorum, postquam ea disse-
rui, quæ ad Probitatem pu-
tavi pertinere; aggredior
Officia Charitatis: eum invocans, qui
Charitas ipsa est; ut veram ejus arcanã-
que vim aperiã mortalibus, ac instil-
lem. Hanc itaque ut nova, nec hæte-
nus usitata methodo, ac ratione expli-
cem: primùm ita definiam. Charitas,
est propensio animi erga proximum be-
nigna, benevola, benefica. Benigna
imprimis: nempe judicium, & sensum
de proximo, quàm maximè bonum, re-
tinens: cuncta ejus vel probando, vel to-
lerando, vel amanter corrigendo. Bene-
vola

*Definitur
Charitas*

Benigna.

Benevola

Benefica. vola deinde, in appreciatione, voto, studio, ut bene illi sit: & dum est; gaudio, & congratulatione. Benefica denique: libenter, & copiosè opitulando necessitatibus ejus, id est, opera, ut vocant, misericordiæ, promptè erga illum, & largiter exercendo.

*Debita à
communi
ortu.*

Debita verò prorsus humano generi: quòd uno parente satum, cognationem agnoscere meritò debet; & ex illa mutuum habere amorem. Etenim, cum non animalia modò ejusdem speciei congregentur, conciliante natura; sed inanimata quoq; & sensu carentia conjungi quodammodo appetant; idque pondere, sympathia, ac propagine testentur: Quantò magis id homini conveniet, cui non alia natura, quàm ratio est? ut nempe sui generis societatem quærat, concordiam appetat, commune norit bonum, impleat officium: id est, mutuatam exerceat charitatem.

*Nature
ductu.*

Amare certè, & amari; itemquè sibi mutuò prodesse, natura suadet, exigitque; eique obsequentem hominem, homini non posse nocere, apertum est. Nam si noceret; aut id putaret non iniquum; aut non pejus malis corporis,

ris, & fortunæ. Si primum: quid cum eo differas (inquit Cicero) qui hominem ex homine tollit? Si alterum: erraret in eo, quòd ullum malum gravius malo animi putaret. Naturalis ergo Amor & Amicitia: Contra Naturam verò, ἀφιλία: divisionis, discordiæ, & demum interitus parens.

Amoris
vacuitas.

Quod si Charitas, vel ipsius naturæ & rationis ductu, homini propria: quanto magis jussu Dei? Hoc mandatum ejus primum, & maximum, ut illum diligamus toto animo: Suppar autem ei alterum, ut proximum. Suppar inquam: Justi namque experimentum est unicum, actio cum proximo. Non enim amare Deum potes, quem non vides; si proximum odisti, quem vides. Et si Deum verè amas; nempe bonum tuum: necesse est, ut ames proximum, qui æquè tecum ad amandum eum factus est. Nam quæ tertio congruere tenentur, inter se congruant necesse est: Amorem ergo Dei Amor proximi necessariò consequitur.

Et denique jussu
Dei.

Diligamus itaque invicem: nam plenitudo legis, dilectio. Quam nisi habeam, (inquit Apostolus) nihil sum:

Itaque
exaltè
habenda
est.

nihilque profunt reliqua virtutum officia . Et cum à Discipulo Christi peteretur , cur eam toties ingeminaret ; quia præceptum Domini est , inquit : & si solum fiat , sufficit . De hac igitur libro hoc agam : & qua ratione exactè præstari possit ; tribus Capitibus ostendam .

C A P U T I.

Qualis Charitas in statu innocentie fuisset : & quoniam tam exacta post peccatum haberi non potuit ; ex illius defectu , de origine Juris .

*Causa adfer-
tur , cur
inquiren-
da est
charitas
primiti-
va .*

DE Charitate dicturo , operæ pretium imprimis videtur indagare : qualis Virtus ista fuisset in sua Origine , & velut fonte , id est , in statu innocentie . Cum nempe homo nulla labe infectus , imitator fuisset divinæ bonitatis ; eam erga proximos exercendo . Operæpretium hoc , inquam , inspicere : quò in statu hoc multifariam viciatæ Charitatis , primitivam illam , quàm maximè æmulemur : ut ex defectu ejus , ortum Jus ad illam , quoad fieri potest , revocemus , aptemusque . Dicam igitur

Igitur hoc Capite tria. Primò ostendam statum Charitatis primitivæ. Deinde deducam, illam talem post peccatum subsistere non potuisse. Tertiò illam, inducto Jure sarcire, ac reparare, necessarium fuisse, evincam.

Triparsita capitis divisio.

Pars Capitis Prima.

De Statu Primitivæ Charitatis.

COgitanti itaque de Primitiva Charitate, in mentem primum venit: illam tres dotes, quibus & perficeretur, & conservaretur, necessario habituram fuisse. Nempe, lubentem inter se æqualitatem: Rerum omnium Communitatem: Omnis oneris à se vicissim exigendi Immunitatem. Optimè enim Charitas mutua retinetur, primum inter pares; deinde, nihil ut suum usurpantes; postremò nihil à se vicissim, velut debitum, requirentes. Paritas, seu Æqualitas, prima genitrix Charitatis. Cùm namque naturaliter se quisque amet; idè & sibi similem: id est parem, & æqualem: Nam in illo seipsum. Unde illud: quòd Amicitia pares aut acci-

Charitas primitiva.

Habuisse æqualitatem.

*Comuni-
tatem.*

piat, aut faciat. Communitas deinde al-
tera ejusdem origo. Cum enim præci-
pua dissidii causa esse soleat, à pluribus
usurpatio rei alicujus, quæ pluribus
non potest sufficere; ideo inducta Com-
munitate, & provisa cunctis æquali suf-
ficientia, (quæ necessario fuisset in
communi vita) Charitas faciliè constab-
bit. Immunitas denique auctrix Cha-
ritatis erit. Quia gravis, & servilis, ideo-
que odiosa est exactio debitæ obligatio-
nis: qua sublata Charitas manet spon-
te, ac liberè supplens, quod extorque-
bat obligatio.

*Et dotes
faciles in-
nocentiæ.*

Porro triplex hæc dos Charitatis,
faciliè in statu vitæ innocentis haberi
potuisset. Nam Æqualitas manasset
primùm ab Æqualitate Conditionis,
qua creti sumus; & per quam omnia
habuissimus æqualia: Deinde ab exi-
mia quadam bonitate; quæ non per-
misisset viribus parare potestatem;
quæ naturaliter cuique in se tantum
est, eaque libertas vocatur. Denique
cum sibi quisque adultus ad omnia suffe-
cisset: (prolem solum teneram exci-
pio) opus non habuisset alieno obse-
quio. Communitas item omnium re-

*Quod in
singulis
est editur.*

rum

rum facile constitisset . Nam occupatio , & dominium , & possessio , inutilis prorsus foret ; cum eam sufficientia , & parabilitas rerum sponte provenientium , superfluam fecisset . Denique Immunitas mutua foret : & extorsio obligationis necessario cessasset . Cum , ut alter alteri munifex esset ; nec ullius necessitas egeret , nec quisquam exigeret , sed voluntati tribuentis relinqueret . Quanquam nec tribuere opus foret : cum in *αὐταρχία* , cuiusque , benevolentiae tantum , vix beneficentiae locus esset . Et hic futurus fuisse videtur status exactae , ac consummatae Charitatis . In quo lege , aut scripto jure opus non fuisset : cum sine mala libidine , & concupiscentia ; eoque sine pæna , aut coercitione , agere potuissent .

Sui sufficientia .

Ita ut scripto jure opus non fuisset .

Pars Capitis Secunda .

De impossibilitate Primitivæ Charitatis .

Corrupto verò per peccatum primi Parentis genere humano , nullo modo ejusmodi Charitas potuit retineri . Nam in pænam peccati , invasit

Post peccatum orta .

*Infirmi-
tas.* nos, primùm Infirmitas: dum pulve-
rem nos esse; facilem dissipari, primo

*Indigen-
tia.* est. Deinde Indigentia; dum ab eodem

Labor. sterilem alendis Nobis terram, spinas

*Hæc di-
ctas do-
tes sustu-
lere.* tantum & tribulos suapte germinan-
tem, accepimus. Postremò Labor ac-
cessit, cum in sudore vultus pane vesci
iussi, & damnati sumus. Hæc tria verò
Æqualitatem exuere, proprietatem
quærere, obligationem pacisci coege-
runt.

*Sed sub-
venit in-
firmitati
potestas.* Etenim ad auxilium Infirmittatis,
necessariò debilioribus ferenda: vali-
dioribus verò ad maiorem commodita-
tem, viribus paranda: & ne priva-
tim parta, nimium excresceret, tan-
dem consensu, Civitati deferenda fuit
Potestas. Tollenda verò Æqualitas,
per quam Charitate cessante, nec ho-
spes ab hospite tutus, nec sibi sufficiens
quisquam erat.

*Indigen-
tia domi-
nium.* Deinde: Cum etiam non sufficerent
nobis, quæ ad usum vitæ pertinent; ea
verò, naturæ seipsam conservantis du-
ctu, acquirere quisque sibi mallet, quàm
relinquere alteri: In communi om-
nium Indigentia, ad occupationem ven-

tum

tum est : ut , quod quisque primus manu apprehendisset , vel pede calcatum limite signasset , id ei , eripere alteri , fas non esset . Ita necessariò Communitas , (aucto præsertim genere humano , & non habente sufficientiam) paulatim sublata , rerum omnium , quæcunque occupari potuerunt .

Tertiò denique : Quia labor gravis , & onerosus nimium erat ; nec suus cuique sufficebat ; obligatione varia , ad operas præstandas , fructus ex iis tribuendos , ac communicandos , se mutuò obligare , ac obstringere , & promissa , pacta , Contractus , exactè exigere , necesse fuit : Immunitate sublata . Præsertim cùm etiam conjunctim , & in commune laborem impendere non minus grave foret . Nam opera in rebus parandis , & usus in consumerendis par omnibus esse debuisset : quod deficiente Charitate fieri non poterat .

Ad hanc corporis miseriam , quæ Charitatem illam Primitivam ægrè permisit retinere ; accessit illa , quæ animum corripit , triplex Concupiscentia : auxitque immensum impedimentum mutuae dilectionis . Per hanc etenim ,

Laborem obligatio , seu opis alienæ exactio .

Ex concupiscentia Charitatis noxa .

nim, non contenti homines necessitati subvenire: ultra ejus exigentiam appetiere inania, & superflua; id est mala. Illecebras nempe Corporis, blandimenta fortunæ, & inanis gloriæ, & elationis varia nutrimenta: quæ sat, retegendo vitia, quibus scatet genus humanum, recensui. Ita Avaritia præcipuè, & Ambitio Charitatem sustulit: rupit concordiam: vim & bellum intulit: & exinde Æqualitatem, Communitatem, Immunitatem penitus extinxit. Quæ non extinguenda omnia erant, sed ad certum modum, & temperamentum reducenda.

Et fere
interitus.

Pars Capitis Tertia.

De necessitate Juris scripti, ad Societatem Civilem (cujus origo ostenditur) retinendam.

Jus institutum
reparavit
Charitatem.

FAcit ergo hoc, & præstat Juris scripti institutio. Quæ necessario subsequi debuit, potestate, & obligatione introducta. Nisi enim hæc jure temperata essent; perpetuum dissidium, bellum, & dissociatio generi humano imminebat. Si enim liberum
cui-

cuique fuisset, subjugare quos vellet, occupare quæ vellet, adstringere quocunque modo vellet; vi & armis omnia agerentur. Cum præsertim par quoque libertas esset renitendi, & resistendi; & fas tam propulsandæ violentiæ, quàm inferendæ. Itaque æterna semper odia mortales gererent, nec cæptus unquam cederet ex animis furor, & arma fortior ac felix teneret, infelix verò ac victus studio ultionis nova compararet. Ac denique ferina vita, & belluina rabies, & interitus Societatis inter homines, jure non constituto esset.

*Alioqui
fera vi-
ta homi-
num fu-
isset.*

Porrò Societatis origo, est mutua sui Indigentia: illicium sermo: initium proles: progressus familia: consummatio Civitas: ejus autem anima Jus.

*Societa-
tis civi-
lis ortus,
progressus,
& consum-
matio.
Causam
habet In-
digentia
mutuam.*

His inquam gradibus crevit forma Civitatis, & hinc petenda est intima ejus causa. Quia enim mutuæ opis Indigentia inter nos evidens erat; (Cum, uti supra dixi, infirmam, omni præsidio destitutam, rerum externarum egen-tem conditionem sortiti simus) Ideo nisi communi ope ac viribus fulciremur, interire nobis necesse foret. Quemadmodum autem membra sin-
gula,

gula, varia functione ac ministerio, usui, & commoda sunt toti corpori: Ita diversa multorum officia, munia, operæ, artes, labores in commune Societati consulunt; se vicissim juvant, & socialem vitam omnino expetibilem faciunt. Præsertim verò cum accedat non alia causa, quàm colloquii & conversationis, datus nobis sermo: quo ad Consociationem & commercium alligamur, alioqui frustra eo instructi à Natura, seu Deo. Hinc & litteræ inventæ, quibus absentibus etiam; imò & posteris loquimur, & memoriam majorum retinemus: Conamurque earum beneficio, velut præsentis conjunctosque habere, qui erant, & qui fuere. Tanta est Consociationis appetitio.

*Instru-
mentum
ejus ser-
mo.* Initium Societatis prolem feci. Etenim conciliante natura, prima est inter Parentes, & Natos, charitas. Ea verò jubet, quod genitum, fovere, curare, educare. Incipit itaque exinde homo non solus esse: nec sui tantum curam gerere; sed Societatem inire, è qua prodit Familia, quæ ex Matre, Patre, Filio, & Servo constat; & domum, variè aucta, facit. Denique ex

Con-

Confociatione Familiarum Vicus, Op- *Et de-*
pida, Urbes; ex illis verò mutuo fæde- *mum Ci-*
re vindicis; & communi rectore, ac for- *uitas.*
ma certa summi imperii constitutis;
Magna illa unius populi Civitas ortum
habet; Cujus animam dixi jus esse. Ut
enim eo fruamur, violentiæ ac injuriæ
securi; multitudo in unius populi cor-
pus coaluit.

Jus verò, (prout rectè divisit, si fa- *Jus ad*
ctæ divisioni institisset, eamque sensu *personas*
alio posuisset Justinianus:) vel ad per- *est pote-*
sonas pertinet, vel ad res, vel ad Actio- *stas.*
nes. Personis respondet Potestas: Re- *Ad res*
bus Dominium seu possessio; Actioni *dominiū.*
Obligatio. Hæc tria, inquam, ad cer-
tum modum jus redigit, ordinatque. *Ad actio-*
Ita ut & sarciri possit Charitas, socie- *nes obli-*
tasque retineri: & nihilominus ad con- *gatio.*
servationem sui sua cuique constare
commoditas.

Hæc autem humani juris partes, *Has par-*
speciesque introductas, ut offensum, *tes juris*
necessitate ipsa; comprobavit Deus *sanxit*
præscripto Decalogi, Hebræis quidem *Deus*
tantum primitus dato; Sed deinde & *Decalo-*
Christianos meritò obligante: Quippe *go.*
cùm socialis vitæ vim totam exactè
con-

*Ejus
præcepta
ad pote-
statem
pertinen-
tia .*

*Ad do-
minium .*

*Et obli-
gationē .*

contineat . Nam post capita , quæ ad Deum & pietatem pertinent ; primum nempe & tertium ; reliqua recensitas juris species evidenter complectuntur . Ad potestatem enim refertur imperatus capite quarto honor parentum ; id est majorum , superiorumque ; & qui nostro bono & commodo nobis præfunt : omnes enim hi meritorè vice parentum habendi ; debeturque iis , ex hoc præcepto , veneratio & obsequium . Deinde eodem pertinet , & prohibitio occidendi , capite quinto . Nam dum vis iniqua arcetur , & violenta potestas contra fas usurpata vetatur ; hoc ipso legitima constituitur . Quinimò & adulteria capite sexto ideò vetita , quia per illa naturalis potestas (de qua mox) violaretur , ac interiret . Et hæc sunt quæ potestatem spectant . Ad dominium verò , & possessionem firmandam , furta prohibentur , & alieni omnis concupiscentia ; capitibus septimo , nono , & decimo . Denique ad obligationem stabiliendam , capite secundo , sancitur juramenti religio : dum vanum seu irritum vetatur . Tum verò octavo fides & veritas , id est fundamentum

spon-

sponsionum præcipitur, dum falsidicum testimonium prohibetur. Atque ita tota, quod dixeram, juris humani ratio, divina autoritate constituta, firmataque est: & tabulis (ut Tertulianus loquitur) cœlestis edicti, & sanctissimæ legis sancito, potestas, dominium, ac obligatio approbata. Ideoque meritò teneri nos hisce vinculis oportet, quæ necessitas invexit, Deus probavit, & juris institutione retinere, certo modo, ac ratione injunxit.

Ob tantam auctoritatem, teneri hoc jure.

CAPUT II.

Ostenditur quid sit Jus, & quotuplex, & quales esse inter homines debeant recensitæ ejus partes, & Species.

PAtet aperte ex antecedenti Traditione, Jus ita commodè definiriposse: ut sit Regula conservandæ inter homines Charitatis, seu Societatis: idque post introducta in usum ea, quæ ei repugnare videntur.

Definitio Juris.

Hujus Regulæ fons est & origo, Verum: quod inest Divinitati, velut lex quædam æterna, & immutabilis Recti,

Origo ab æterna Dei lege.

*Quæ
partim
nobis in-
sita .*

*Partim
promul-
gata .*

*Partim
constitu-
tione hu-
mana ,
Dei per-
missu ,
expressa .*

ac boni : à qua tota Juris ac Justitiæ na-
tura manat , ac derivatur . Partim enim
æternam legem hanc, ejusque rationem,
DEUS naturæ rationali , dum eam
crearet , indidit : (alioqui rationabilis
non esset, si rationis istius expers esset :)
unde fluxit illa ante peccatum nobis
insita , & post peccatum non penitus
extincta Notio eorum , quæ naturæ
nostræ conveniunt : Exinde verò or-
tum , quod vocatur Jus naturale . Par-
tim voluntario sancito nobis promul-
gavit : unde Jus Divinum , quod vocant
Positivum . Cui inest quidem eadem ra-
tio , sed non expressa , & supremi justifi-
simique Conditoris voluntate velut tē-
cta ; cui jus est , ita sancire quædam ,
ut sanciti sui ratio non reddatur . Ejus-
modi verò Jus, aut ipsemet dedit Judæis
per Moysen , & Nobis in Christo ; aut
vicariæ suæ potestati reliquit : cui li-
gandi quidvis , ac solvendi faculta-
tem concessit : cum rati habitationis pro-
misso : Unde Jus Ecclesiasticum , seu
Canonicum . Partim denique permisit ,
eandem æternam legem exprimere hu-
mana Constitutione , (quæ ut sit justa ,
conformis illi , aut certè nullo modo
con-

contraria esse debet :) inde verò est Jus Humanum . Quod vel usu , & consuetudine nationum receptum , Jus Gentium nominatur : vel legibus cujusque populi , seu Civitatis descriptum ; Jus Civile dicitur .

Totum verò hoc simul sumptum , *Et aliquid homini posse habere aut vetat , quid vetat , permittit , jubet .* nempe illicitum ; aut permittit , nempe licitum ; aut præcipit , nempe debitum . Quanquam si propriè loquendum est , quod vetatur ; nefas : quod permittitur ; fas : quod jubetur ; jus est .

Hac origine , ac partitione Juris demonstrata , superest , ut cùm superiori capite ostenderim : quod tria hæc ; Potestas nempe , Dominium , & Obligatio , necessario quamvis introducta , imò & Divino approbata edicto , adversarentur tamen Charitati , nisi Jure temperata , & ad certum modum reducta sint ; Superest inquam , ut modus hic circa singulas hæc partes explicetur deinceps : & ex illo liciti , vetiti , jussi denique , tota ratio , ac regula statuatur . Sit itaque .

Pars Capitis Prima.

De Potestate, prima Juris Specie.

Necessitas inter homines potestatis ostenditur.

Regi, & regere.

Post sublatam Æqualitatem, quæ (ut superius ostendi) in statu corrupto manere non potuit, Potestatem certa ratione constitutam, hominis in hominem fieri ἀποχρηστικῶς ἀποχρηστικῶς necessarium omnino fuit. Causa est: quia nec sine Societate homo sibi sufficiebat, nec Societas retineri potuit, nisi quidam regerent, quidam regerentur. Nam cum & Æqualitas constare non posset; & omnes imperare mallerent, quam parere: non Societas tranquilla, sed certamen continuum fuisset de principatu; nisi illud aut natura, aut vis major, aut consensus finivisset. Quæ tria triplicem fecerunt Potestatem. Prima est naturalis, & Necessaria, in Uxorem, prolem, ac natura regiminis indigum: Altera violenter acquisita, in servos: Tertia sponte concessa, & delata imperantibus. De singulis consueto compendio dicam.

Eaque triplex esse declaratur.

De Potestate Naturali.

Potestas viri in feminā.

Potestatem Naturalem in Uxorem confert primum Jus naturæ, quod

quod jubet præstantiorem sexum ,
firmiorem , fortioremque , sequiori ,
infirmiori , & imbecilliori præesse .
Idem Jus Divinum præcipit , dum sub
potestate Viri sæminam constituit .
Jus demum humanum , & consuetudi-
ne , & lege id implevit . Uxorem ergo
debet dirigere , sed simul & diligere .
Nam imperium hoc amoris , & Chari-
tatis esse debet , nempe erga comparem
thori , & vitæ sociam , castam , probam ,
viri , liberorum , domus studiosam , ac
sollicitam : quæ fatalis non est , sæpe
vitium ex eo mariti . Prudens certè re-
get eam leni fræno : retinens , ac procu-
rans maximè concordiam ; nempe Ma-
trimonii & ornamentum , & suave ac
unicum condimentum . Qui verò ma-
gni hujus Sacramenti status , conditio ,
obligatio , quæ conjugales leges , quam-
vis hoc loco facillè potuissent recenferi ;
tamen quia cuncta hæc , usu tot scripto-
rum trita , & apud eos obvia ubique ha-
bes ; ideò meritò hic , ubi compendio
studemus , omittenda .

*Sed blā-
da, ut in
compa-
rem .*

*Quod
docebunt
Matri-
monii le-
ges .*

Sequitur verò pars altera Naturalis
Potestatis , nempe in Prolem , quam ea-
dem natura propter beneficium geni-
turæ ,

*Potestas
Parentis
in pro-
lem .*

turæ , nutritionis , educationis parentibus confert ; & ob authoritatem ætatis , ac senii conciliat ; Deus verò , sub poena immaturæ mortis præcipit : Jus denique humanum ubique gentium retinet ; Legibus verò olim Romanis severissimè , & ultra morem aliorum populorum , Emancipatione ad libitum Parentum data ; & ante eam , non minore eorum in prolem , quàm in servos potestate .

*Officium
filii im-
puberis .*

Sed si ad examen rectæ rationis reduci res debet ; commodè ex Aristotele tria liberorum tempora , vir distinxit eruditus . Primum tempus est imperfecti judicii , quo planè sunt sub herili potestate ; dum hæres , quoadusque parvulus est , nihil differt à servo . Æquum autem , ut qui se regere nequit , regatur aliunde : convenientiùs verò

Adulti .

non potest , quàm à Parente . Secundum tempus Liberorum , cùm jam judicium illis ætate maturuit , non tamen sunt extra familiam . Tum subesse debent arbitrio parentum non aliæ eorum actiones , quàm quæ ad familiam momentum habent : Convenire enim debet pars cum ratione integri . Tertium

rium tempus, cum jam extra familiam exeunt; tum enim jam plenè sui juris sunt, manente tamen semper honoris & observantiæ debito, cujus causa perpetua est. Hæc ille.

*Emanci-
pati.*

Itaque Parentes debent liberis educationem; nempe quod susceperere, tollant; (nam exponere, aut perimere nefas: quia non toti ab illis sumus, alienum autem non licet perdere;) alimenta præbeant; nam frustra tollerent, nisi sustentarent. Et denique; quæ ad benè rectèque vivendum sunt, procurent, ac prospiciant; memores, non sibi illos tantum, sed Deo, Familiæ, Patriæ genuisse. Parentibus verò debetur primum obsequium, & semper honor.

*Officium
Parentis
erga fi-
lium.*

Ubi verò iis orbatur proles, eaque immatura, & quæ per ætatem tueri se nequeat; Et rationis ipsius ductu, & gentium omnium instituto, locum obtinent Tutores: id est (ut Jurisconsulti derivant) pupilli Tutores. Hi aut testamento dantur, aut proximiori agnatione obveniunt, aut à supremo Magistratu assignantur; cum potestate, quam apud Jurisconsultos, unà cum officio descriptam habes. Est professio

*Officium
Tuto-
rum.*

functio , cum exactè impletur eximii ,
sed admodum rari meriti .

*Potestas
in servos
ingenio .*

Pars tertia Naturalis potestatis est in
eos , quos Aristoteles vocat natura Ser-
vos; nempe tali ingenio præditos , ut re-
gi ac gubernari necessariò indigeant ; &
(ut cuidam dictum) Domino opus ha-
bent . Talibus ergo ita præesse oportet ,
ut prosis .

De Potestate Acquisita .

*Potestas
servitu-
tis acqui-
sitæ .*

Potestas Acquisita fit , prout dixi , vi
majore . Quæ triplex esse potest .
Prima propriæ miseræ ejus , qui necessi-
tatibus vitæ adeò est destitutus , ut co-
gatur se tradere alteri ad perpetuam
operam , pro alimento & tegumento .
Altera est Pœnæ ob delictum capitalis ,
quæ commutari potest in servitutem .
Tertia justî belli , dum hostis victus hac
conditione servatur , ut serviat .

*Ostendi-
tur eam
juri na-
ture non
repugna-
re .*

Ejusmodi verò violentæ potestati re-
pugnat quidem natura , si per se spectetur ;
nam per illam omnes sumus liberi ;
sed post introductum jus illud , quod faciendæ
societati dixi esse necessarium ,
non repugnat . Nam non vetat naturalis
ju-

justitia pacisci obsequio victum ab eo,
qui ejus copiam, & dominium habet.

Nec iniquum, ut egestatem evites, præ-
stabilem navare operam. Deinde cum
tam ex judicio; unde pæna: quàm ex
bello; unde captivitas: cum inquam
utrobique necis summa potestas sit lici-
ta; (prout id ostendam infra, & demon-
strabo,) utique licita erit minor, quæ
est, herum esse ejus, cui vitam concesseris.

Unde patet, non refragari legem na-
turæ violentæ potestati. Lex verò divi-
na, dum illam non vetat, permittit. Jus
autem humanum eam auxit, ac longius

*Nec à
Deo ve-
tari.*

produxit; dum ex servo natos, non me-
lioris conditionis voluit, & venundari
eos permisit: & quidquid acquirant,

*Constitu-
tione hu-
mana au-
ctam esse.*

Dominis acquirere decrevit. Isque ri-
gor excusabilis exinde; quia & nece

minor, & commodior utiliorque, tam
ei, qui jure ejus habet, quàm qui ei sub-
est: Cohibetque, & avocat à crebra
cæde. Unde & à Christianis diu reten-

tus, nunc tamen remisit: vitæ ac necis
jure ad supremam potestatem revoca-

*Idque
non ini-
quum.*

to; & venundatione ferè sublata. Ita
ut priscae illius servitutis pauca super-
sint vestigia, nisi fortè in Ethnicis ca-

ptivis, & adscripticiis colonis, quos cum terræ possessione vendere licet.

*Officio
Dominos
teneri er-
ga ser-
vos.*

In tanta verò Dominorum in Servos potestate, aut licentia, est nihilominus, quod illis Domini debeant. Et primum, ex admonitione Apostoli; quod justum & æquum est, illis præstare tenemur. Memores, (ut idem ibidem dixit,) & nos esse sub Domino: apud quem non est acceptio personarum, & cui reddenda erit ratio debitæ, velut in conservos Charitatis; quæ nulla in-

*In pœna
irrogan-
da.*

æqualitate exui debet: Cùm magis fortuna nos impares faciat, quàm natura. Itaque etsi Jus pænæ in eos habeamus; tamen non immeritæ, sed ad præscriptum, regulamque justitiæ in privata, & domestica jurisdictione exercendæ.

*Opera im-
ponenda.*

Etsi nobis operam debeant; tamen non ultra modum exigendam: nec ejus oneris, cui non sint ferendo. Denique etsi, quidquid acquirunt, nostra esse possint; tamen quod sua industria ac diligentia, sine fraude, peculii paravere; durum & inhumanum est, eripere.

*Peculio
exigen-
do.*

*In his ta-
libus, nil
sit inhu-
manum.*

In his talibus cogitandum: cùm Dominis in Servos multa non vetentur; tamen ut homini in hominem omnia

liceant,

liceant, naturam communem vetare. Ideoque meritò Domini, olim Patres familiæ; Servi, familiares vocati. Partim ut illis invidia, & his contumelia tolleretur; partim, ut iis nominibus moneremur, cibum eis & vestem, & quæ sunt non modò sustentandæ vitæ, sed etiam tuendæ sanitatis, præstare.

Servorum in Dominos officia, ex-
acto compendio, dixit & docuit Apo-
stolus: dum per omnia obedire Domi-
nis iussit, & non ad oculum servire, ve-
lut hominibus, sed ut Deo; quem nemo
fallit. Ut nempe, quidquid faciunt, ex
animo faciant, securi retributionis.

*Officia
servorum
erga Do-
minos.*

De Potestate Concessa.

POtestas Concessa, nempe summi Imperii, explicanda restat: quam ad societatem retinendam necessariam esse certum est. Etenim quemadmodum singulos homines in Familiam natura, & Jus redegit; ita singulas familias in Civitatem coalescere, ratio necessariò persuasit. Singulæ namque Familiæ, cùm & ob infirmitatem majori consociatione indigerent; & ob

*Causa po-
testatis
concessæ,
seu civi-
lis.*

Religio
-all. sap
-ad. int
-moy

Quā ipsa
ratio de-
monstrat.

& ob inæqualitatem introductam, sine contentione & diffidio agere non possent: fieri omnino debuit, ut pactione certa, unum veluti Civitatis corpus efficerent. Ratio inquam hoc persuasit. Per illam namque patet, quòd ea, quæ plura sunt, diversa sint; inter multa autem diversa, necessario quædam contraria sunt; quæ autem contraria, sibi adversantur, & se vicissim oppugnant; quæ se autem oppugnant, se mutuo consumunt; & tandem pereunt. Salus itaque multitudinis est, uniri. Id verò non fit nisi aut Charitate, aut Imperio. Illa bonitate quadam consensum efficit; istud verò, eundem metu exigit, continetque. Sed quia Charitas Primitiva, qualis hic necessaria esset, non potuit (prout ostensum) in statu corrupto haberi; ideo imperio opus fuit.

Et DEI
sancitum
firmavit.

Hanc à ratione ductam imperii necessitatem, non solum nobis iniecit; sed etiam effatu suo, vel suorum, firmam reddidit Deus: dum omnem potestatem à se esse; & illi omnem animam subiectam esse debere; & reddenda imperanti, quæ ei debentur, edixit, præcepitque.

Pa.

Paruit ergo & rationi, & duci ejus Deo, genus humanum: dum imperium detulit vel uni, vel Concilio, vel Comitibus. In primo statu, unius jussa valent. In altero, paucorum consultatio ac decisio. In tertio, per suffragia omnium, majoris partis consensus. In singulis verò horum, æquè Jus summi imperii residet. Unde triplex forma Civitatis, quæ vulgo solet assignari: Monarchia, nempe, Aristocratia, Democratia.

*Triplex
ejus sta-
tus, seu
forma.*

Nec prolixè disputare attinet, quæ illarum sit præstantior. Apertum est illam præferri, quæ facilius efficit, ac præstat unitatem. Hæc enim, ut ostensum, causa est imperii, multitudinis subsistentia, & Spiritus vitalis Civitatis. Ut sit igitur unum reipublicæ corpus, unius animo regendum censeo. Nam plures ut in unum consentiant, iterum egebunt Charitate; quam sublatam, aut imminutam dixi.

*Maximè
probat ur
Monar-
chia.*

Sed non est hujus, quod instituo argumenti, hæc disceptatio. Quæcunque forma Civitatis bona; modò probè, ac constanter Jus, Vim, & Facultatem summi imperii agnoscat, retineat, atque

*Tria per-
fectum
reddunt
imperium.*

atque exerceat. Hæc tria, inquam, illam consummant, ac perficiunt: paucis à me explicanda.

*Primum
Jus in
Cives.*

Jus summi imperii, est arbitrium in personas, res, & actiones Civium: cui nunquam fas est refragari. Societas enim Civilis, uti dictum est, imperio continetur: summum autem imperium in eo situm; ut qui semel se atque sua ei subdidere, semper pareant, & nusquam resistent. Quod enim resistere jure potest, majus; aut certè par

*Cui nefas
resistere.*

*Quod ra-
tione pro-
batur.*

est: summum autem, si habet par; non est summum. Ergo non erit imperium, id est suprema potestas, si ei resistere fas; sed sequetur Æqualitas, & ἀνισότης: quæ non potest extincta, vel imminuta Charitate, prout demonstratum est, haberi. Agnoscant igitur; nec obliviscantur unquam, supremi hujusce Juris, tam potestates summæ; quàm qui illis subsunt. Illæ; ne quidpiam ejus per incuriam amittant: hi; ne quid per proterviam imminuant.

*Impia
jubeare.*

Sed si quid (inquies) palàm iniquum, aut impium jubeat; parebo? Primum vide, & cave; ne sinistrè tale esse opineris. Deinde, si verè sit, non facies qui-

quidem ; sed tamen pœnam potiùs subibis , quam oppugnare , aut evertere imperium coneris . Mors enim non est tanti , ut ejus vitandæ causa aut tollatur Princeps ; aut quæratur mutatio : quæ semper ingentium malorum causa est . Tolerare igitur , est viri boni ; medelam verò Deo permittere : qui cum dominantibus , etiam discolis parere jussit ; jussi sui rationem facillè reddet expeditam : & quæ videntur mala , ad finem bonum rediget .

*Pœnam
potius su-
beas .*

*Quã im-
perium e-
veritas .*

Vis , seu , ut ita dicam , vigor quidam imperii , sequitur ; qui illud vegetum , & robustum reddit ; isque in consensu obedientium situs est . Consensus verò hic , etsi jure debetur summæ potestati ; tamen quia non in arbitrio imperantium , sed subditorum residet ; animus verò mortalium natura & origine liber , facillè regimen odit , aversatur , contemnit : ideo arte quadam imperiandi opus est ; ut lubeat , profit , & denique necesse sit parere .

*Vis , seu
vigor im-
perii in
consensu
obedien-
tium .*

Lubentia parendi paratur : si temperes , & moderere Jus illud suminum , in personas , res , & actiones Civium . Cujus , ut nunquam (prout monui) obli-
visci

*Obtinetur
si lubeat
parere .*

visci oportet: ita non nimium meminisse, ne eo abutaris. Id est, ne cum nihil tibi vetari posse videas; omnia facere, fas esse putes. Abusus enim talis, odiosum reddit imperium: Dum sævities personis, seu vitæ; avaritia rebus, & fortunis; austeritas agendi, libertati infidiatur. Quæ quatenus lenitate, beneficentia, indulgentia, temperanda; ut benevolentiam Civium conservent: & tamen necessaria supplicia, tributa, censuram retineant; sanè accurratè Lipsius explicavit. Lubebit ergo parere: & odium noxium summo imperio minuetur, si id observes: Sciasque illud demum firmum imperium esse, quo obedientes gaudent.

*Nō sevo,
non avaro,
non auctero
imperio.*

*Deinde si
prosit parere.*

Proderit verò etiam, si imperii instituti finis, qui est bonum & commodum subditorum, rectè expendatur; & ad eum cuncta referantur: sciantque qui eo potiuntur, se non suam rem agere, sed populi. Atque ita Rempub. administrent; ut agnoscant omnes, suam omnino salutem curari. Ita, quæ onerosa erunt, levia, si proficua videbuntur. Et ut æger medico, sic populus

pulus parēbit imperanti : utroque salutem , etsi per dura , quandoque & aspera , procurante .

Sed etsi hæc summo imperio admodum proficua sunt ; non tamen continent totam vim ejus : nisi adsit vis alia , & vera , quæ invitis etiam necessitatem parendi afferat ; & obedientiæ patientiam in animis efficit subditorum . Id

partim interna quadam ratione efficitur ; partim exteriori modo . Interna velut Vis est , Æstimatio & Admiratio imperantium : quæ duo , dum imprimuntur mentibus subditorum ; velut cogunt illos obsequi : nempe præstantioribus meliorioribusque . Hinc fata

Majestas ; & ei debita veneratio : id est , vita , & anima Principatus . Externa autem , propriaque vis est , à metu : qui faciendus omnino ; aut , cum interitu potestatis , habendus est . Timeant itaque potius quàm temnant . Quod efficiet , ac præstabit , saluberrima severitas ; quæ pravum , ac corruptum , quod sanari non potest , secat , ac urit . Hanc , ut securè ac tutè exerceat , profectò armatis viribus opus est . Opus tamen & moderatione : ut quamvis metuant ,

non

Denique
si necesse
sit parere

Quod efficit
æstimatio
imperantis .

Et metus ab imperante .

non

non oderint tamen ; sed potiùs ament .

Restat pars tertia summi imperii :
nempe *Facultas gubernandi triplex .* *Facultas* Civitatis gubernandæ ; seu administrationis publicæ exercitium . Istud autem triplex est : nempe consulere Patriæ , & consulta effecta reddere ; deinde Magistratus legere , & præmia largiri ; Denique Judicia sine provocatione exercere , & pænas infligere .

Primum, consultatio, in qua edicta promulgantur . In consultatione vel edicta temporaria promulgantur , vel perpetuæ sanciantur leges . Per edicta ordinatur , & constituitur , quid sit è re Reipublicæ , quod providere , ac procurare supremæ incumbit Potestati ; & huic fini rebus

Leges sanciantur . uti potest privatorum . Legum condendarum facultas , itidem summo imperio inest . Non posset enim illud suo munere fungi , nisi corrigendis Civium moribus , & in officio retinendis , necessaria quædam sanciat , pro ingenio populorum , vel temporum exigentia : Et nisi jis , quæ sanciverit , Cives teneantur . Uti autem potestas suprema à Deo ; ita Leges ejus à Lege Divina & ortum ducere , & ei congruere , aut certe non adversari debent .

Multa decernuntur .

In

In decernendo maximè eminet Belli susceptio, indictioque. Bellum autem est: inter eos, qui non sunt unius Civitatis; nec, Jus requisiti, reddere volunt; certatio per vim, arbitrio supremæ potestatis suscepta: defendens, repetens, vindicans, quod juris est. Hæc est definitio exacta, puta belli publici, ac solennis; quale ad Concessionem, de qua nunc agimus, pertinet. Cæterum bellum publicum à privato, uti exordium, ita & fas sumit. Nam cuique ante constitutum Imperium; imò & post constitutum, ubi aut non habetur, aut fera est per Jurisdictionem tuitio; naturæ se conservantis instinctu, propriis viribus datum, tueri membra primùm, & vitam; deinde quæ his subserviunt, nostraque sunt. Qui ergo ea vi eripere vult; eum, ut te defendas, vi repellere; vel ut ablata repetas, vi impetere; vel ut facinus vindices, vi affligere licet. Concessis verò ejusmodi finibus, concedi & media necesse est, quæ ducunt ad finem. Media verò belli sunt: trucidare: rapere: captivare. Quæ dictu ipso fera, & immania, penitusque

*Præcipue
de bello
suscipien-
do.*

*Ejus fas
deduci-
tur.*

*Et gerē-
di media
non ini-
qua.*

L adver-

adversa Charitati, permittuntur quidem; quæ Juri obtinendo subserviunt; sed profectò Christianæ professionis erit, quàm maxima integritate, cautione, moderatione, ea exercere. In-

Sed cum integritate summa.

Cautione.

Moderatione.

Alia consultationum genera.

tegritatis est; causam expendere: quæ non modò justa esse debet; sed etiam gravis; imò necessaria, idque ad pacem obtinendam. Cautionis; temeritatem & spem vanam cohibere: quam cum avaritia, & ambitus sæpe incitet; anceps eventus, & inevitabilis calamitas belli dissuadet. Postremò, Moderationis; temperare furori in cæde, spolio, servitute. Hæc de bello.

Ad eandem verò Consultationis facultatem, pertinet tributū indictio. Cui jus, ab eminenti summi imperii in res Civium, dominio. Licitè igitur exigitur, & debitè redditur; ut sumptus, & necessitates publicæ sustineri possint. Ejusdem Consultationis est; fædera sancire; rem nummariam constituere; edicta de rebus variis promulgare: deniq; quidquid ad curationem Reipub: pertinet, ordinare. In hisce omnibus summum imperium bono publico provideat; subditi parere non graventur.

Fa-

Facultas altera gubernandæ Civita-
tis est, Magistratus, munerisque distri-
butio: quæ nec favore cæco, fortuito-
vè, ut plerumque solet, sed prout quis
par dignusque est, deferenda; nec per
ambitum, sed meritis quærenda. Non
inquam lucrum, quod illis adhæret,
captandum; sed munus potius, offi-
ciumque quod requirunt, implendum.
Quæ talia uberiùs explicant, qui tra-
ctant civilem doctrinam.

*Facultas
altera,
nempe le-
gèdi ma-
gistratus.*

Tertia demum facultas administra-
tionis publicæ est, Jus dicere; & red-
dere. Cùm etenim nec privata vi Jus
repetere, nisi cessante jurisdictione, li-
citurum esse, demonstratum sit; Nec
rerum nostrarum studium, amorque
permittat rectè statuere; quid vel no-
bis debeat, vel Nos teneamur: Ideo
Tertio, qui id decerneret, necessario
deferenda fuit jurisdictio. Nulli au-
tem convenientiùs, quàm supremæ po-
testati: cujus est arbitrium in personas,
res, & actiones Civium: prout osten-
sum supra est.

*Facultas
tertia jus
dicendi.*

*Cur soli
competat
imperio.*

Jurisdictio hæc igitur, imperio de-
bita, partim reddit, & constituit suum
cuique; partim punit. Utriusque mo-
dus,

*Ea. par-
tim red-
dit uni-
cuique; suū.*

dus, est lex: quæ præscribit Magistratui decernendi regulam, & formam. Unde benè Magistratus, lex loquens dicitur: lex verò mutus Magistratus. Et actiones quidem, quæ suum repetunt restitui, dari, vel reparari; immensum patent. Sub potestatis tamen, de qua nunc egimus; & Domini, & obligationis, de quibus deinceps agemus, titulos, facilè redigi possent; nisi alterius id esset argumenti: nempe Jurisprudentiæ, quæ hoc ex professo agit.

*Partim
punit.*

*Finis pœ-
næ.*

*Commodū
societatis.*

De Pœnis verò hoc primùm dicam: quòd etsi videantur Charitati admodum contrariæ, non sunt tamen; si finis, modusque earum rectè servetur. Finis enim pœnæ, non est dulcedo, & oblectatio redditæ per vindictam & ultionem doloris: (quod vitium iræ, & sævitiei esse; cùm de affectibus agerem, demonstravi:) sed est commodum societatis humanæ: cui tam interest, neminem peccare, & delinquere; quam toti corpori, singula membra sana esse. Porro, non tam benè est generi humano, ut sublata pœna, peccandi licentiam non assumat: Metu ejus,

ut

ut plurimum à malo arcetur . Itaque
 necessariò adhibenda erit . Et primùm , *Id est se-*
 securitatis causa . Nam , ut tritum illud *curitas .*

afferam : qui malis parcit , bonis nocet .
 Impunita enim malitia , vires & auda-
 ciam sumit ; eadem , vel majora patran-
 di . Deinde , causa Exempli : per quod , *Exemplū.*
 dum pœna ad paucos , metus pervenit
 ad omnes ; qui à peccando deterret .

Postremò , causa ipsiusmet , qui pecca-
 vit : qui pœna aut corrigitur , aut si *Ipsius fines*
 corrigi nequit , tollitur ; ne pejor fiat . *puniti bon-*
 Tum , inquam , ei puniri expedit : & *num .*
 sæpe pereuntis interest , perire . Hi tres
 fines , seu causæ pœnæ sunt .

Ratio verò , & Differentia ejusdem , *Fir aut*
 itidem triplex . Aut enim compescit , *multa .*

vires demendo ad nocendum ; quam
 vocabo mulctam : Aut resipiscentiam , *Aut ca-*
 & emendationem procurat ; quæ vo- *stigatione .*

cabitur castigatio : Aut denique insa-
 nabiles & deploratos tollit ; quæ Capita-
 lis dicitur . Quæ verò cuique delicto ir-

roganda sit ; lex prout dixi , tum verò *Aut Pe-*
 Æquitas & *ἐπιμέτρεται* definiet : ut adsit re- *na capi-*
 gula , peccatis quæ pœnas irroget æquas . *tali .*

Quod à multis fusè tractatum , meritò
 hic omitti potest .

*Clemen-
tie tamē
suis lo-
cus.*

*Quæ ju-
stitie non
adversa-
tur.*

*Pœna Ca-
pitalis nō
competit
naturali*

Præsertim cū ad Officiū, de quo hic agimus, non animadversio solum, sed & clementia pertineat: quæ lenitate sæpe præcipuum finem pœnæ assequitur, nempe emendationem; dum verecundiam faciens peccandi, suffundit potius sanguinem, quàm effundit. Et profectò in tanta generis humani ad peccandum proclivitate, temperare severitati; sapiùsque pœnitentia, quam pœna contentum esse; non solum decet: sed etiam necesse est. Præsertim cū ita sint ingenia nostra, ut multos, citiùs ignoscens benignitas faciat meliores. Neque id repugnat Justitiæ: quæ pœnam exigit, non quā pœna est; sed quā ad dictos fines servit. Unde si illi obtineri aliter possunt, hæc condonari licitè potest. Idque etiam post leges institutas: sed à summo imperio, quod est supra leges. Jus enim, seu potius fas, tam Clementiæ, quàm pœnæ extremæ, est penes supremam, seu, quam Concessam vocavi, Potestatem: huic enim soli, vitæ necisque delatum arbitrium. Nam etsi quidam putent; ubi deest imperium; fas idem naturali, & acquisitæ esse potestati: tamen propria, magis-

gisque competens iis, est poena compescens tantum, & castigans: quæ illis integra manet, etiam imperio constituto.

*poteſtati,
nec ac-
quiſitæ.*

Pars Capitis Altera.

De Dominio, Juris altera ſpecie.

HActenus de Potestate. Sequitur verò species altera Juris, nempe *Quod ſit
plenum
Dominium.*

Dominium. Quod plenum, perfectumque tum demum est; cum habetur ad rem, possessio rei, & denique usus: minus plenum; dum aliquid ex istis deest. Porro ostensum est supra, sat puto evidenter: communitatem rerum, etsi Charitati apprimè convenientem, non potuisse tamen, corrupto statu generis humani, commodè retineri; necessariumque fuisse, proprietatem inducere. Etsi enim hæc communionem societatis distrahere facillè potest; admittenda tamen fuit, ob insufficienciam rerum; cui cura, & industria subvenire, necesse erat: ea verò nunquam diligens, nisi propriæ utilitatis causa, fuisset. Nisi itaque Dominium, & pro-

*Ejus ne-
cessitas.*

*Ratione
introdu-
cta.*

prietas sibi consulens foret; indigentia,

& insufficientia major existeret; exinde
verò occasio discordiæ, per vim sibi
necessaria, & pauca, quæ suapte prove-
niunt, rapiensis. Ita ratio ipsa natura-
lis suavit; & exegit proprietatem. Ean-
dem verò adeò Deus approbavit; ut
non modò surripere, sed concupiscere
etiam rem alienam vetuerit. Quidquid
verò proprietati inest, ad Charitatem,
seu societatem retinendam incommo-
di; id reparat, corrigitque Jus: præscri-
bens modum quo Acquirantur, Ha-
beantur, & demum Desinant Domi-
nia. De tribus ergo hisce dicendum
est singillatim.

*Jus ei
modum
prescri-
bit.* Acquiritur Dominium, primùm oc-
cupatione eorum, quæ non sunt occu-
pata. Estque licita talis occupatio, ob
datum nobis à Deo Jus in res omnes
inferioris hujus mundi, quas subjecit
potestati nostræ. Quisque igitur eas
occupare, & ad usum suum convertere,
licitè & jure potest. Si autem, quæ pri-
mus quispiam occupavit, jure acqui-
sivit, & possedit; profectò ea illi eripe-
re alter, nisi injuria, non poterit. Illi-
cita ergo erit acquisitio rei semel oc-
cupatæ, ac possessæ. Occupationis ve-

rò ejusmodi ratio, & modus est; ut *Quod fit
contactu,
seu ap-
prehensionē.*
quod acquirere velis, corpore contin-
gas. Res quidem, quæ loco moveri
possunt, manu apprehendendo; ter-
ram verò pedibus adeundo, vel limite
signando. Unde patet: solo animi
actu, aut verbis, occupationem non
fieri. Sed infrequens jam est modus hic
acquirendi: cùm vix *ἀδίσποτα* inveni-
antur. Nam & loca, si quæ sint non ha-
bitata, ut montes, sylvæ, campi, à terri-
toriis aditis ut plurimum usurpantur:
& captura ferarum, legibus sæpe, us-
que non illicitis vetatur: & thesaurus,
ab immemorabili tempore defossus, sæ-
piùs per leges non inventori cedit, sed
Domino loci.

Domino
carentia.

Sequitur igitur alter acquirendi *Alter mo-
dus ac-
quiren-
di, heredi-
tatis.*
modus, nempe successio, seu hæredi-
tas. Quam natura, seu recta ratio, mos
gentium, & paginæ sacræ autoritas,
assignat soboli, post fata parentum.
Convenientissimum enim est, ut à quo-
rum propagatione, & genitura, cor-
pus nacti sumus; ab iis etiam, quæ ei
sunt sustentando, nempe Dominium
rerum nanciscamur. Ubi autem pro-
les deest, eadem ratione, citima quo-
que

que adgnatio, cognatioque loco ejus erit. Cæterum de successione ejus, qui & prole, & cognatis certis, notisque careat, intestatusque decedat; infra dicam.

Tertius, translatione Domini.

Tertius modus acquirendi est, à translatione Domini, ab eo, qui plenum ejus jus, & à nullo dependens habet. Inest enim facultas alienandi pleno dominio: adeò, ut hæc potissima sit nota proprietatis; posse, quod meum sit, jure transferre in alium.

Id est; donatio, venditione, commutatione.

Translatio verò ista Juris, aut gratuita est; in donatione: aut accepto rei pretio; in venditione: aut re, vel officio; in commutatione. In omnibus istis, dantis & acceptantis voluntas exprimi debet externis; & quò magis irrevocabilis sit, manentibus signis. Et compos rationis sit oportet, qui Dominium transfert; suæque spontis ac potestatis.

Acquisitio per testamentum, & legatum.

Sed adeò hominibus rerum suarum libera placuit dispositio; ut eam ultra vitam quoque extendere voluerint: concessio nempe, & condito testamento. Quod ita potest describi: ut sit ultimæ voluntatis, de rebus morte derelictis, dispo-

dispositio, ac testimonium; post mortem demum valiturum, ante eam verò possessionem, & usum rei legatæ non eripiens: & testandi aliter, liberam relinquens potestatem. Datum hoc videtur consensu gentium, velut remedio mortalitatis: cum (ut Lipsius dixit bene) solatium fati sit, voluntas ultra fatum. Consensu, inquam, gentium valuit: ut prout quisque rem suam legasset; ita jus esset. Alioqui natura dicit, nos nihil ultra mortem posse.

Itaque miror, id inter acquisitiones, quæ jure gentium fiunt, non poni primo loco. Cum magis ad illud referri possit, quàm acquisitio; quæ fit Jure belli. Ea enim naturali etiam nuncitur æquitate. Nam dum damnum, vel injuriam repeto, aut vindico justo bello; facio id non modò magna rerum jactura, sed etiam vitæ periculo: quod inæstimabile est. Qui igitur ad tam extrema me adegit; is profectò obnoxium se fecit gravissimæ, quæ potest esse, vindicationis. Præsertim, si audita sit, post facto, & progressu belli, injuria. Tum inquam, Jus mihi confert victoria, in ipsam vitam hostis;

non

Ex jure gentium.

Acquisitio jure belli.

Que non iniqua offenditur.

non modò in resejus , quæ sanè vita longè sunt minores . Licitè ergo illas acquirere possum justo bello : quòd ut naturali non repugnat juri ; ita & ejus moderati effectus .

*Modus
habendi
Dominii.*

Habendi Dominii modus , & Jus sequitur . In hoc primum est ; securitas possidendi : quæ nisi omni ratione cautata esset ; non posset constare proprietatis , infirmum foret dominium , gravis ejus custodia . Ergo talis videtur fuisse consensus , proprietatem incipientium ; tale , ut dixi , præceptum divinum : ut non modò nefas esset , rem alienam concupiscere , surripere , retinere ; sed etiam non indicare surreptam ; & non efficere , quoad fieri potest , ut in ejus , cujus est , perveniat potestatem .

*Possessionis
securitas .*

Eòdem quoque pertinet : restitutio fructus , & commodi accepti , ex usu rei alienæ . Eòdem refertur reparatio , & refusio damni culpa dati , per quam Jus habendi violatur , dum possessor per eam , minus suo habet .

*Ejus violatæ
restitutio ,
ac refusio .*

*Libere
utendi
facultas.*

Alterum Jus habendi Dominii , est Facultas utendi . Idque partim rem consumendo , partim fructum ex ea capiendo . Uterque usus pleno competit

tit Dominio; ita tamen, ut abusus societati noxii meritò vetentur. Inter quos eminet usura, seu potius fœnus: *Sed non abutendi in usura.* quod ex illicito fructu pecuniæ percipitur; si nempe illa infructifera, seu ociosa sit; id est, si neque negotiationi, neque emptioni bonorum fructificantium, neque ulli industriæ serviat; sed deposita tantum servetur. Talis si mutuò datur; non est cur fructum adferat: imò iniquum; ut cum ipsa sit sterilis, ex indigentia proximi lucrum extorqueat. Nisi fortè ratione periculi, *Ejus iniquitas.* aliquid sit licitum exposcere. Ad abusum quoque pertinet rerum, quæ præfertim ad victum, avara detentio; idque ut ingravescat annona. Deinde, iniqua venditio, pretium ex penuria nimium augens, & avidè lucrum captans. Denique quidquid est inhonesti, & sordidi quæstus. Tertiò ad jus habendi refertur alienationis potestas: sed de hac dictum supra est.

Porro etsi tam accuratè cautum sit Proprietati, & Dominio: tamen non penitus extinctam communitatem, *Ut vitam servet.* eamque certis casibus redire, Primum exinde apparet; quod in extrema necessi-

cessitate, ut vitam conservem, uti re
 aliena, extra controversiam liceat.
 Cum hac tamen cautione; ne plus su-
 mam, quam necesse sit: nec, si pari ne-
 cessitate Dominus tenetur; & denique,
 cum onere refusionis damni, vel resti-
 tutionis, dum fieri poterit. Deinde,
 Civitati uti licet rebus privatorum, ob
 eminens Dominium, & salutis commu-
 nis causa. Quanquam & hic à Concivi-
 bus debetur refusio, ut æqualitas one-
 rum sustinendorum servetur. Postre-
 mò, & ea communia esse debent, quæ
 sine damno, onere, & molestia sunt
 dantis, aut permittentis, accipienti
 verò necessaria. Ut ignem, aquam pro-
 fluentem, non prohibere: permittere
 transeundi, inò & morandi, inno-
 xiam facultatem; emendi rem necessa-
 riam ab eo, qui ejus copiam exuberan-
 tem habeat. Et quæ talia solent af-
 ferri.

Restat explicandum, quomodo de-
 sinat Dominium. Desinit autem aut
 sublato Domino, aut præscriptione
 rei derelictæ. Domino è vivis sublato,
 qui nullam prolem reliquit; nec ul-
 lam Cognationem, nec ulli debet quid-
 piam,

piam, aut tenetur; nec denique con-
didit testamentum: naturaliter res re-
deunt in eum statum, ac si non essent
occupatæ. Nisi igitur lex Civilis aliter
constituerit; erunt primò occupantis.
Cæterum adeò stabilita rerum suarum
dispositione, ut etiam ultra fata pro-
tendatur; conveniens admodum erit;
exquirere conjecturas ultimæ volunta-
tis, easque prout æquitas suadet, ad-
implere. Si verò improlis quidem, &
sine Consanguineis, & intestatus dece-
dat; relinquat tamen familiam, & de-
beat, ac teneatur; tum Creditoribus,
& obligationi imprimiserit satisfaci-
endum: servi ad libertatem redibunt; ope-
ris merces danda erit. Et sunt, qui
inter familiares dividendam Hæredi-
tatem censent, cum famuli sterilibus
ἀγενεαγοντοῖς esse loco liberorum pu-
tentur.

*Prolem
non ha-
bente, &
intesta-
to.*

*Heredi-
tas ta-
lium vel
occupan-
tis.*

*Vel ere-
ditorum.*

*Vel fa-
mularii.*

*Qui ge-
nealogia
carent.*

Alter modus Dominii Desinentis, *Desinunt*
est à præscriptione, & re derelicta. *deinde*
prescrip-
tionem,
& re de-
relicta.
Derelictio fit, dum quis professus est, se
rem nolle habere in censu rerum sua-
rum; dum eam facto abjecit; dum uti
noluit; & utentem non interpellavit;
dum sciens, præsens, nulla vi, aut me-

tu adactus , tacuit ; denique amissam recuperare contempsit , spem abiecit , vel ut recuperaretur , periculo graviori , utpote vitæ , se obicere noluit ; quod alter studio acquirendi fecit . Præscriptio verò , dum tempus longum intervenit , & Circumstantias Derelictionis , ac incuriæ palam comprobavit . Hæc Dominium transfert , & rei ab alio acquisitionem firmam reddit . Tempus autem Præscriptionis , pro instituto , varium . Longissimum censetur , quod memoriam excedit . Interest verò societati tranquillæ , Præscriptionem introduci esse : idque ad certa reddenda Domina , ad lites & contentiones minuendas , ad stimulandam denique rerum suarum curam , atque diligentiam .

*Tempus
præscri-
ptionis
pro insti-
tuto .
Ejusque
necessi-
tas .*

Pars Capitis Tertia .

De Obligatione , Tertia Juris Specie .

*Obliga-
tionis in-
ter homi-
nes ne-
cessitas .* **J**uris ultima species explicanda superest , nempe Obligatio . Cujus , inter homines necessitatem , non minus quàm Potestatis , atque Domini ,

nii, invexit defectus Charitatis. Si hæc enim potuisset integra manere: alter alterum officio sine ulla flagitatione præveniret; nihil tamquam debitum à se mutuò exigent; non obligatio, sed mutua esset Dilectio. Ex illa verò spontanea, & benevola manasset beneficentia: præsertim cum minimè onerosa fuisset; imò vix fuisset, in abundantia rerum suapte provenientium. Sed diluto hocce Charitatis, ut ita dicam, glutino; quærendum fuit aliud: quo, cum amore aut nollemus, aut non possemus adstringi; saltem ex debito ad invicem teneremur. Orta ergo est obligatio, non modò illa; quæ ex potestate & Dominio manat, sed varia insuper Promissorum, Juramentorum, Contractuum: quibus velut vinculis vincimur mutuò, & illigamur. Horum omnium fundamentum, & basis est Fides: de qua primùm dicam, & postea tres obligationum species explicabo.

*Ut quos
Charitas
non vin-
ciat.*

*Promis-
sa, Fu-
ramenta,
Contra-
ctus ad-
stringat.*

Fides, est Concordia mentis & verbi, vera, constans, & efficax. Triplex ex definitione ejus apparent requisita. Nempe Veritas in primis; non tam ea, quæ est Intellectus rectè cognitæ

*Horum
funda-
mentum
Fides.
Que de-
finitur.*

M rei;

rei; sed potius in locutione veracitas :
 id est, sermo congruens menti, seu In-
 tellectui; cui oppositum mendacium,
 seu contra mentem dictio. Exigit verò,
 non modo natura verbi; ut cum sit ani-
 mi imago, verè eum repræsentet : sed
 etiam commodum Societatis; ita clau-
 sum pectus oratione aperire, ut tutò
 credere possimus; nec timeamus falli.
 Aliud requisitum fidei, est dicti Con-
 stantia; ut, quod semel locutus sis, fa-
 tearis semper te dixisse; & religio sit,
 declaratam inficiari voluntatem. Ter-
 tiò; ut dictum, effectum reddas : ut, in-
 quam, pondus insit verbis, & vocem
 facta sequantur. Hæ sunt partes Fidei,
 quam natura ipsa, nescio quomodo
 nobis unicè commendat; exososque
 prorsus reddit ejus temeratores. Pue-
 ros vide; (inquit Lipsius) mendacium
 inter prima probra objiciunt: & quan-
 quam levitate quadam assumunt, ta-
 men judicii rectitudine damnant. Ad-
 miranda profectò Dei providentia :
 virtutem hanc, sine qua vita & socie-
 tas staræ ægrè possit, animo inferen-
 tis; & contrarium ipsi vitium, nempe
 perfidiam, evidenter ut plurimùm pu-
 nien-

*Ejus ve-
ritas.*

*Constan-
tia.*

Effectus.

*Et mira
in nos
vis.*

*Societati
unicè pro-
ficua.*

nientis. Itaque firmiter retinenda est, *Itaque Sanctissimum humani pectoris bonum.* *Sanctissimum habenda.*

Retinenda autem primò in Promissis. Promissum verò est; declaratio Voluntatis de futuro, certitudinem faciens adimplendi. Si gratuitum est; peccat quidem, qui ei non satisfacit, nempe mentiando; non tamen facit injuriam, nec reposci potest tale promissum; nisi sit solennis verborum obligatio, aut testibus firmata stipulatio, aut manentibus signis, nempe literis, expressa. Talis enim demùm Jus conferre videtur, quia deliberatæ est voluntatis; & cujus convinci promissor facile potest. Promissa verò non gratuita, & quibus inest *συνάλλαγμα*, quin obligent, indubitatum est. Sed talia, jam Contractus erunt, de quibus mox dicam. Cæterùm, ut Promissum valeat, requiritur usus rationis in promittente. Deinde, nulla injusta per vim & metum adactio, facta ab eo, cui promittitur. Injusta inquam: nam quæ justo bello fit, obligat; quæ à latrone, invasore, sædisfrago, periuro; minimè. Tertiò, ut materia fit (ut ita dicam)

Et primum in promissis.

Que quatenus obligent.

Communitatio.

Eorumque requisita ostenduntur.

promissibilis; nempe non illicita: nam in tali scelus esset fides. Tum verò in nostra Potestate sita: nam ultra eam non tenemur. Et demum obtenta, non per imposturam, aut falsa causa: ea enim deprehensa, & cessante, meritò mutatur Promissum. Nam fraude, & dolo inducti, nihil promittunt.

*Jurisju-
randi ob-
ligatio.*

Jurisjurandi sequitur obligatio, definiturque; Assertio, Deum testem constituens, & si sciens fallit, vindicem. Magna profectò ejus Auctoritas, quæ Divinitatem, & providentiam adstruit; estque testimonium animæ, naturaliter, Deum punientem mala, agnoscens. Unde religio ejus meritò maxima esse debet; & temeratio non proximo tantum, sed Deo etiam, quem testem cupis, injuria. Cavendum ergo, ne assumatur, non modò in re falsa; sed ne in levi quidem, & non penitus necessaria. Dupliciter autem juratur; nempe, vel asserendo, vel promittendo. Assertivum Juramentum, ut culpatus facti mei, vel proximi, testimonium juridicè perhibeam; necessarium & inevitabile esse debet. Minus, ut rem vindicem, & præsertim

*Ejus re-
ligio.*

*Aur est
asserti-
vum.*

tim exigui pretii. Tum inquam, pro-
fecto justius est abstinere. Promisso-
rium, nisi jure exigatur ab eo, cu-
jus summè interest non decipi; ut
plurimum vitandum, studendumque
vitæ probitate mereri, ut nec juratis
credatur; & sit sermo noster, est, est:
non, non: nam quod ultra hoc est, à
vitio est. Ut verò validum sit Juramen-
tum, & obligans; eadem ferè, quæ cir-
ca promissa dicta sunt, requiruntur.
Nempe, ut Jurans mentis sit compos,
& non fraude inductus; & ne res illicita,
aut impossibilis esse, post præstitum
Juramentum, deprehendatur. Præter
hæc, inquam, impendimenta; & Juran-
dum est, prout ille, cui jure ac debite
juratur, requirit, ac intelligit; & quod
juraveris, adimplendum. Sed si ab ini-
quo hoste, invasore, prædone, vi &
terrore mortis, compelleris ad juran-
dum; quòd tum fas sit verbis ambiguis
eludere, & arte aliqua jurisjurandi for-
mulam immutare; probabiliter certè
concedi potest. Quanquam laudati ma-
gis illi, qui se putarunt teneri, etiam me-
tu extorto juramento, (in re tamen non
illicita:) Non causa obligationis erga

*Aut pro-
missoriū.*

*Si adsint
requisita
validi
juramen-
ti.*

*Jurandū
sincerè,
& quod
jurave-
ris, ad-
implen-
dum.*

*Extortū
juramen-
tum elu-
dere fas.*

*Laudati,
qui illud
in re lici-
ta adim-
plent.*

iniquum Exactorem : (per injuriam enim nihil sibi ille juris acquirere potuit :) sed advocati testimonii religione .

*Definitur
contra-
ctus .*

Tertium genus obligationis est , Contractus . Definitur : Conventio duorum aut plurium , quid pro quo sibi tribuens , reciprocae utilitatis causa .

*Qui tri-
plex .*

Contractuum genera triplicia sunt , quæ in tribus illis formulis : do ut des , do ut facias , facio ut facias , continentur ; Nempe dum res pro re ; vel pro re , opera : vel pro opera , opera itidem rependitur . Ad hæc ; omnes species Conventionum , tam privatarum quam publicarum , commodè referri possunt .

*Ejus va-
liditas .*

Ut verò valida sint , eadem ferè requiruntur , quæ de promissis ac Juramentis dicta sunt . Hæc tamen addi solent : primùm in Contractu do ut des ; ut indicium fiat occulti vitii , rei furtivæ , malo vel incerto Jure possessæ ; servi fugitivi : Tum ut iniquum pretium , ob indigentiam proximi , avarè non exigatur . Quanquam per hoc peccari quidem potest , sed vix Jus vindicationis competere . Nam modus licitationis , uti & æstimatio , ab affectu in rem ,

*Et requi-
sitæ .*

à tem-

à tempore , à copia pendet , & conti-
nuò variabilis est . Inde Conventio
Æqualitatem rei , cum pretio decernit :
& si culpa , fraus , dolus abest ; jure re-
scindi non potest . Eadem ratio est ,
dum intercedit do ut facias ; vel facio
ut facias . Merces enim , & mutua ope-
ra , aut officium , itidem ex Conventio-
ne , & consensu partium pendet . Et si er-
go Æqualitas , aut certè Proportio , vi-
detur requiri in Contractibus ; attamen
profectò standum est , prout convenit ,
& pactum intercessit ; modò absque do-
lo malo , & ex fide bona .

*A licita-
tione, &
conven-
tione
mutua
pendet.*

*Et stan-
dum pro-
ut con-
venit.*

Habes nova hætenus , sed puto non
incōmoda partitione , explicatum com-
pendium , & synopsis Juris . Accuratio-
verò ejus tractatio , etsi ex hisce fontibus ,
facilè deduci posset ; tamen non est ar-
gumenti à me instituti . Et sunt , qui hæc
abundè , & plus satis præstiterunt . Mi-
hi verò mens fuit ostendere , quatenus
Jus constitutum , temperet iis , quæ po-
tuisent penitus Charitatem inter ho-
mines extinguere ; si prout necessariò
introducenda fuerunt , ita ad libitum re-
tentæ , vel exercita fuissent . Quoniam
autem illud ipsum Jus , si strictè nimis

*Hæc est
nova sy-
nopsis Ju-
ris .*

*Consultò
paucis
explica-
ta .*

sumatur, exigaturque; longè potest à Charitate abducere; ideò hujus Traditionis merito ponendum est.

C A P U T III.

In quo ostenditur temperamentum summi Juris per Charitatem. Idque Admonitione, Consilio, & Exemplo Christi.

*Summū
Jus sum-
ma crux.*

*Et causa
dicti ex-
ponitur.*

VEtusenim illud, & tritum sermone proverbium: summum Jus, summam esse injuriam. Causa dicti: Quod tria illa; nempe, Potestas, Dominium, & Obligatio, tam largè & copiosè, jure concedantur; ut facillimè eorum specie ac obtentu, extrema multa contra Charitatem committi possint, citra pœnam, & vindictam. Pro-
num autem est genus humanum indulgere sibi; & quæ permittuntur, velut laudata ampliare. Hinc leges iniquæ sæpè conditæ, quæ licentiam potius augerent, quàm Jus constituerent. Hinc earum Interpretatio prava; hinc consuetudines quæcunque modò inveteratæ pro legibus.

Exempla hujus licentiæ passim sunt

sunt. Nam Potestas primùm, tam se-
verè, avarè, arroganter, & superbè
exercetur; ut qui parent, vix putentur
hominum vice. Gemit genus humanum
sub onere iniquæ dominationis: & rari
sunt admodum, qui in illa cogitent,
quid debeant; sed tantùm, quid possint.
posse autem existimant, quidquid hic
per leges impunitum ipsis est. Nam de
Deo vindice, non est qui cogitet cor-
de. Cùm verò tantum citra metum
pœnæ Potestas obtineat; quid mi-
rum, si dominatus & imperia credan-
tur humanis majora bonis? si per vim
& bella quærantur? si obsequi & jube-
ri, inter miserrima censeatur? Si
denique Jus, Potestatis præsertim, ita
auctum, injuria putatur? Illudque ve-
lut jugum excutere, & libertatem
ferro quærere, illustre censetur, &
gloriosum?

*Potestatis
abusus o-
stenditur.*

*Unde avi-
ditas ini-
perandi.*

*Et parè-
di detre-
ctatio.*

Rerum Dominium Avaritia corru-
pit: quæ summo Jure exerceri extreme
potest, nullo pœnæ legum auxilio, quæ
adeò proprietatem, jusque habendi fir-
marunt; ut beneficentiæ, quam Cha-
ritas suadet, non sit locus. Ita occu-
patio, ac possessio rerum, avidè ac te-
naci-

*Dominii
avarum.*

Furta *provocat.* naciter exercita, furta & rapinas pro-
vocat, & alienum appetere jubet.

Obligatio *stricta ni-* *mis.* Postremo, Obligatio tantum legi-
bus concessa invaluit; ut ejus velut in-
dagine clausi teneamur. Laquei ubique
& vincula Contractuum, aut captionum:
è quibus vitilitigium; & vafra, ac perdi-
ta causidicina. Adest enim Creditor,
aut Fænerator potius; tum manceps
& sector, qui in Jus rapiunt, & nulla re-
missione miserè enecant. Ita acerbè, &
acriter flagitata obligatio; subdola ef-

Effugia *curat sub-* *dola.* fugia, perfidiam, ac perjuria creat.
Quæ cuncta, quin longè remota sint ab
illa, quà invicem teneri deberemus,
charitate; nemo est, qui negare possit.

Hæc cun- *cta lex* *Christi* *temperat.* Merito itaque nova lex, & Institutio
Christi; quæ non venit solvere hæc Ju-
ris vincula; sed perficere: Merito in-
quam exigit, præcipitque ut omnia fiant
in Charitate. Et primum docet, Mode-
rationem adhibendam esse; ne, quæ li-
cita sunt, putentur omnia expedire.
Deinde suadet, decedere quandoque
de jure suo, aut se eo penitus privare,
ut exactius Charitas impleatur. In pri-
mo est Admonitio; in altero Consilium.
Illud ab omnibus requirit nominis

Chri-

Christiani professio, hoc à paucis perfectio . Utrumque per singulas Juris partes explicabo ; & officia , quæ hinc emanant , deducam .

Pars Capitis Prima .

De Temperamento Potestatis .

Osten sum est libri hujus initio , defectum Charitatis causam juris extitisse . Cum hæc ergo gratia Christi reparatur ; profectò necesse est, ut renovet dotes sibi proprias : jisque , quantum fieri potest , Jus constitutum moderetur , ac temperet . Dotum autem harum prima est *Æqualitas* : hanc itaque Potestati in memoriam meritò revocat . Meritò , inquam , nam ratio dictat ipsa , quòd ea , quæ sunt ejusdem speciei , æqualia sunt ad invicem , & *opposita* : quæ potissima , & suprema *Æqualitas* est . Ut igitur aurum auro , ita homo homini natura par est . Par verò etiam , non modò ab eodem ortu , & fatu primi Parentis ; sed quod longè majus est , ab æquali Regeneratione per Christum . Si enim Propheeta dixit : nunquid non Pater unus omnium

Gratia Christi revocat dotes Charitatis . Et primam Æqualitatem .

Consustantialia . Quæ plures ob causas debita nobis .

Sed precipue ob

*regenera-
tionē per
Christum.*

nium nostrum ? nunquid non Deus creavit nos ? quare ergo despicit unusquisque fratrem suum ? Quantò magis nobis unus Dominus, unus Deus, qui dixit : Patrem nolite vobis vocare super terram ; unus enim est Pater vester, qui in cœlis est ; vos autem fratres estis. Unum corpus nempe, unus spiritus ; sicut vocati sumus in una spe vocationis nostræ. Unde illa recentis Ecclesiæ fraternitas, & communio ; per quam erant pariter omnes conjuncti, imò & uniti ; cùm illis esset cor unum, & anima una.

*Unde fra-
ternitas
primiti-
ve Eccle-
siæ.*

*Cujus de-
cet memi-
nisse.*

*Prolis a-
mantes.
Ab illa e-
nim tem-
peramen-
tū omnis
potestatis.*

Hujus itaque novæ æqualitatis, in omni Potestate oportet meminisse : si prout sumus nomine ; ita & re ipsa, esse volumus Christiani. Hæc nos docebit : supportare invicem in Charitate. Hæc monstrabit officia, tam his, qui regunt, quàm qui reguntur. Hæc naturalem Potestatem perficiet : dum & quos Deus conjunxit, vetabit separari : & Parentes *ἐποπύσῃ* efficiet. Hæc, Potestatem in servos ; juxta monita, quæ ad eam dicta sunt, exercebit. Hæc denique Imperium temperabit, exactè adimplendo, quæ ad illud spectant. Ita ;
mode-

moderatio constabit omnis Potestatis,
ab æqualitate per Charitatem : quæ est
æqui & boni consummatissima regula.

Ea verò ut tantò melius exerceri
possit ; prætulit Christus obedientiam
Gubernationi , famulatum dominatui ,
obsequium imperio . Prætulit autem
causa primum , & ratione . Nam dum
omnem animam Potestati subdidit ;
hoc ipso facillimum officii compendi-
um , securam recti normam , unicum
erroris effugium dedit : nempe obsequi
libenter ; & parere , cui subjectus jure
sis . Reddat rationem rectè an se-
cus facti , cui Jus delatum jubendi :
sic obsequii meritum , securum &
ασφαλτος manet . Prætulit deinde idem ,
& exemplo . Nam etsi illi data esset Po-
testas omnis in cœlo , & in terra ; tamen
noluit ministrari , sed ministrare : re-
gnum fugit : formam servi assumpsit ,
factus obediens : & quod ipse fecit ; fa-
ciendum monstravit . Reges inquit
gentium , & qui Jus aliud Potestatis ha-
bent , dominantur : Vos autem non
sic : Sed si & Consilium meum , &
Exemplum placet ; qui major est ve-
strum , fiat sicut minor .

*Cui præ-
tulit
Christus
obsequiū.*

*Idque ra-
tione .*

*Erroris
expers .
Et exem-
plo .*

Istud

*Quod perfectiori-
bus propo-
suit.*

*Merito ab
omnibus
spectan-
dum.*

*Ut imple-
atur offi-
cium gu-
bernandi.*

Illud verò re ipsa implere ; id est sub-
jici velle , & defugere omnem Potesta-
tem ; etsi tantum est perfectiora se-
ctantium ; jisque hoc suaderetur : Atta-
men ad omnes certè , qui præsunt , per-
tinet ; meminisse hujusce exemplaris :
illud identidem respicere , illi aptare
actiones , & hinc consummata officia
petere cujuscunque potestatis . Non
est enim ut rectè gubernet ; nisi qui pa-
ratus sit gubernari . Talis enim sciet :
officium esse , Regere ; non præmium :
Dominationi definitam esse à Deo , &
natura legem : Summam potestatem
manasse ab instituto ; hoc verò bono
parentitum , non commodogubernan-
tium ortum : Onus esse hocce munus .
Omne , sub Regno graviore , Regnum
esse . Reddendam ejus rationem . Ita-
que habendum Jus Potestatis tempe-
ranter ; Nec homini homine abuten-
dum . Deinde , idem docebit ; parendum
etiam Potestati . Hoc utile ; hoc tu-
tum ; hoc , vel non onerosum volenti ;
vel si sit , majoris meriti . Hoc demum
errori non adeò obnoxium , & in red-
denda ratione minùs grave .

Pars Capitis Secunda.

De Temperamento Dominii rerum.

PRout ad Temperamentum Po-
testatis, Charitas utitur Æquali-
tate; & hac ejus velut mensura, æ-
quum Jus gubernandi constituit: Ita
ad moderationem Dominii dotem al-
teram adfert, nempe Communita-
tem: eamque, quantum fieri po-
test, suadet revocare. Idque jureme-
rito. Nam quemadmodum in cor-
pore humano, si membra singula,
ad se valetudinem membri proximi
traducerent: exempli causa; si hepar,
aut lien, plus attraheret succi, quàm
necesse sit; debilitaretur totius corporis
valetudo: ita si unusquisque nostrum
avidè rapiat ad se, quæcunque jure non
vetante potest, commoda; nec ea cum
proximo communicet; societas huma-
na multum turbetur necesse est. Utile
ergo generi humano Proprietatem,
quoad fieri potest, temperare Com-
munitate.

Cum autem hoc suadeat ratio, quam
adduxi; suadet certè multò magis Chri-
sti

Gratia
Christi
cōmuni-
tate sua
det.

Ostendi-
tur id ex
ratione.

Tum ex
consilio,

*exemplo-
que Chri-
sti.* **sti** Consilium, Exemplumque. Nihil enim ipse, ut proprium possedit: possidere suis intimis vetuit: Abdicare, & dispertiri cuncta suasit: Præmium pollicitus id facientibus ingens: Pænam comminatus gravem avaris: Impedimenta maxima dixit esse divitibus: quæ omnia uberius, dum de Abrenuntiatione agam, explicabo.

*Omnes
habuerunt
omnia
cōmunia.
Quod se-
culi primi
Christia-
norum.* Secuti verò sunt id primi illi, & recentes à Magistri schola discipuli: cū nempe in primitiva illa Ecclesia *πᾶντες ἔχον ἑπ' αὐτὰ νοῦν*, cū possessiones vendebant & dividebant, prout cuique opuserat: Cū nullus eorum, quæ possidebant, aliquid suum esse diceret: Cū denique ita communibus facultatibus uterentur; ut nec quisquam egens inter ipsos esset. O vitam felicem! quietam! Sanctam! curæ, sollicitudinis, diffidii expertem! Securi autem ac moderati usus rerum compotem! O vitam inquam sublimem! & quam non omnibus suasam, nec in hac depravatione morum præstandam; tamen meritò à cunctis suspiciendam! & velut speculum quoddam proponendam! Ad hoc etenim si nos componamus

mus, manabunt exacta officia, rerum
dominii rectè exercendi.

Et primum, acquisitio ejus tempera- *Hinc enim*
ta erit: non nimia, non avida, nec *moderata*
plus concupiscens, quàm capere pos- *acquisitio*
sit: nec omnia sibi rapiens, sed quæ ul- *dominii.*
tra veram necessitatem sunt, proximo
relinquens. Deinde in habendo tena- *Et usus.*
citas, & avara parcitas cessabit: benefi-
ca verò & prudens erogatio, non pa-
tietur quenquam inopia perire. Deni- *Et quan-*
que amissio Domini non te plus æquo *do; dere-*
anget, nec torquet: & quæ non in- *lictio.*
hiant animo possederis, securus, cùm
fortuna volet, dimittes; aut potiùs
reddes. Violatio verò Domini nulla *Nulla ve-*
prorsus erit. Nec Charitas jus suum *ro viola-*
cuique integrum relinquens, & severè *tio.*
abstinentiam alieni imperans, permit-
tet, aut patietur; ut damno aliorum, res
& facultates nostras augeamus.

Pars Capitis Tertia.

De Temperamento Obligationis.

AD moderandam inter homines *Immuni-*
onerosam, odiosamque obli- *tatem re-*
gationem; Charitas advocat ter- *struit.*
N tiam,

Charitas per Christi gratiā. tiam, quam posueram, dotem suam; nempe Immunitatem. Ut scilicet homines solo tantum vinculo mutui amoris nexi, cætera liberi, quantumque fieri potest, soluti sint ad invicem. Ut sit nempe Obligatio, quam non externa necessitas flagitet; sed ultro benevolentia sibi imponat, & præstet.

Hæc obligationi sponte satisfacit. Hac tantum Apostolus omnium se debitorem fuisse ultro professus est: sequitur exemplum Magistri; qui se impendit nobis, non quod teneretur, sed quia ipse voluit. Nemini ergo quidquam (inquit Apostolus) debeamus, nisi ut invicem diligamus. Hæc est lex

Hæc cunctis adimplet. officii apud bonos; omnia vincula juris, omnem nexum promissi, juramenti, ac Conventionis longè superans, fortiusque adstringens. Hæc eximia Charitas Christi, urget optimum quemque, proximo benè velle; & officia erga eum implere fide bona. Hæc jubet, nil acerbè exigere; nil flagitare molestius; nil etiam velut coactè præstare: sed dictum, effectum; sponte, ac libenter reddere: probitatem ὅρα πικρότεραν ha-

Juramento certiorē. Furamenta. bere; certitudine satisfactionis superfluas facere cautiones, sponsiones, chi-
rogra-

rographa; aliaque, quibus res anxie
constitui, inter sibi dissidentes, solet.

*Contra-
tus.*

Hæc, (ut cum Cicerone dicam) in om-
ni re contrahenda, vendendo, emen-
do, conducendo, locando, in vicinita-
tibus & confiniis, æquum & facilem;

*Hæc liti-
gio absti-
net.*

aliquid de suo jure concedentem; à li-
tibus verò, quantum licet, & paulò
plus etiam quàm licet, abhorrentem

*Ut redeat
innocen-
tia.*

esse jubet. Hæc denique in omnibus,
quæ summi juris sunt, suadet tempera-
re. Ut nempe redeat, quantum potest,
prima illa Charitas, quam status inno-
cens, & incorruptus habuisset.

Ut verò redire possit; quoniam ma-
xima perturbatio officiorum esse solet
ab eo, quod utilitatis, & voluptatis

*Honesti
voluptas
vera, uti-
litasque
agnoscen-
da.*

specie blanditur nobis, & imponit:
statuendum omnino semel, firmiterque
decernendum est; nil homini utile, ac
jucundum esse, quod non honestum:

nec honestum, quod non utile ac ju-
cundum sit. Nulla enim major, & per-
niciosior pestis vitam hominum inva-
dere potuit, quàm nescio cujus falsæ
utilitatis, voluptatisque æstimatio; &
ab honesto utriusque separatio. Hinc
ambitus, & avaritia, hinc flagitia, frau-

des, perjuriam, insidiarum, rapinarum, furta. Hinc quidquid est violandi juris, & societatis humanarum detrahendarum.

Atqui vel ratio ipsa docet, commodum ac volupe non posse ab honestate fecerni. Nam si id homini honestum, quod naturarum ejus rationali unice congruit; idem profecto & bonum ejus necessario erit: Si autem bonum; certe & utile, jucundumque erit. Idem ergo est honestum, & verè utile, ac jucundum. Deinde, si nihil magis contra naturam, quàm turpitudine; nihil autem magis secundum naturam, quàm vera utilitas, & vera Voluptas; profecto idem verè utile, verèque jucundum, simul & turpe esse non poterit.

Id maxime decet Christianos profiteri. Hæc autem sic à Cicerone disceptata; & à veteri Philosophia, sine certitudine immortalitatis, sine spe futuri præmii, sine metu extremarum pænarum, ex sola consideratione veri, ac decentia virtutis agnita, ac præcepta: quanto magis nos concernunt Christianos! vitæ æternæ securos, & aut mercedis, aut supplicii magnitudine meritò excitandos, terrendosvè? Quanto, inquam, magis nos decet, fucatam hanc, falsamque
uti-

utilitatem, ac voluptatem aspernari; & spe futuræ, veræque felicitatis contemnere! Quid enim prodest homini mundum lucrari, & animæ detrimentum facere? aut quæ commutatio falsæ brevisque voluptatis, cum jactura illius, quæ nos olim vera & immutabilis manet?

Itaque non flagitia modò viro bono fugienda; etsi illa emolumentum, aut oblectatio apparens commendet; sed etiam illa deliberatio: an levi saltem; vel, quæ dubia videatur, culpa, deserendum sit officium, sectandi commodi, aut voluptatis causa? In tali enim deliberatione facinus inest: nec unquam ea sunt deliberanda, in quibus ipsa deliberatio turpis est. Ut ergo dubitare, quid rectum sit, virum bonum non decet; (id enim natura apparet:) ita multò magis quæ dubitet, nefas committere.

Denique cum pauci sint, qui delicti ignoratione, ac impunitate proposita, abstinere velint injuria; pluresque famam & pœnam, quàm Conscientiam vereantur: Ideò, ad firmandum animum hic murus sit aheneus; hæc lex interna vitæ innocentis: nil conscire sibi; & non ullo respectu, imò nō necessitate, nō ele-

Deliberari in electione recti turpe.

Uti & famæ tātū, aut pœnæ causa illud retinere.

atione; sed omnino natura, usu, & consuetudine bonum esse. Ita enim demum ulterò & facilè implebimus officium quod Charitas dictat.

*Ostēditur
charitatis
officia ex-
actè tra-
ctata esse.*

Jam verò ut ostendam, quæ dicenda de Charitate proposueram, cuncta me absolvisse; revocanda est definitio ejus, & dictis applicanda. Cum ergo definiverim

*Nēpe be-
nignitatē
potestati.*

Charitatem; esse Propensionem animi erga proximum benignam, benevolam, beneficam: ita eam partitioni Libri hujus attribuo. Propensio benigna, propriè pertinet ad Potestatem; cui annexæ virtutes: Clementia, Modestia, Comitas,

*Conversa-
tivas.*

aliæque quas ὁμιλῆμας Aristoteles vocat: & quæ æquant, qua possunt, inter se homines, etiam si jure Potestatis impares,

*Benevolē-
tiam obli-
gationi.*

& inæquales. Propensio benevola danda est Obligationi; quæ sponte omne debi- tum supplet, prævenit, superat; & vir- tutes huic fini proprias habet: nempe

*Eximiam
probitatē.*

Fidem, & καλονόμιαν seu libenter se cō- municantem bonitatem, non curantem quæ sua sunt, modò satisfaciat illi, quod

*Beneficen-
tiā Domi-
nio attri-
butam.*

sibi ipsa imponit, officio. Propensio de- nique benefica ad Dominium rerū spe- ctat; quæ efficit ut sint τὰ τῶν φίλων κοινά:

*Omnia a-
micorum
cōmunia.*

utiturq; virtutibus eò pertinentibus, &

ava-

avaritiæ adversis. Quæ omnia partim in dotibus primitivæ Charitatis; partim in juris constituti effectu; partim deniq; in tēperamēto ejusdē, tribus prout promissi Capitibus, ostensa sunt, atq; demonstrata.

Appendix Libri Secundi.

De Amicitia.

Post deductum, explicatumque Charitatis munus, supervacaneus forsitan hic Tractatus de Amicitia videri poterit; eò quòd per illam, (inquit Cicerò) adeò contracta est res, & adducta in angustum; ut omnis Charitas aut inter duos existat, aut inter paucos: Dilectio verò Christiana diffusa (ut Apostolus ait) in cordibus nostris, angustias istas minimè patitur, & se extendit ad omnes. Attamen cùm hæc tam universalis, præter conatum & bonam voluntatem, vix ferè aliud præstare possit; Ea verò quæ cum paucis intercedit, faciliùs frequentiusque implet officium: Ideò non abs re erit, celebre hoc amicitiae munus, & nomen, non præterire; &, Appendicis saltem loco attexere, quæ de illa præcepta traduntur. Ita &

*Explicata
ta uni-
versali
charitate*

*Amicitia
etiā, quæ
inter pau-
cos, meri-
tò tractā-
da.*

Christiana illa eximia Charitate, (quæ omnibus omnia :) imbutus animus, voto & studio dilatabit viscera sua ; quotiesque fuerit modus, factis exeret : Et per amicitiam, ex tota, quam amare tenemur societate, generis humani, discernet sibi quosdam conjunctione, ac Consuetudine magis intima. Ut fructū nempe mutuæ dilectionis, quem nec facile præstare cunctis, nec ab omnibus habere exactè potest; à paucis saltem plenè capiat, iisdemque vicissim rependat.

*Definitio
ejus.*

Amicitiam itaque definitio : ut sit mutua, ac benevola animorum sibi similium in bono consensio. Ex definitione hac & origo, & proprietates ejus vera patet.

*Origo ex
similitu-
dine.*

Origo enim ; est similitudo animorum : cum nempe ingenio, judiciis, moribus denique congruimus ; tum facile suam quisque naturam in alio diligit, & ut cō-
pari gaudet, fruiturque. Nil verò est hac cōsensione jucundius; nil quod illicit, quod ad se attrahat, imò quod rapiat magis.

*Conserva-
tio ex vir-
tute.*

Conciliatrix itaque amicitiae est similitudo : sed haud firma ac diuturna, nisi accedat proprietates in definitione posita ; ut nempe, sit in bono. Ut enim similitudo gignit amicitiam ; ita profectò

Atò virtus sola eam educat , continet ,
conservatque . Unde certum est , non
posse eam veram esse , nisi inter bonos .

Si enim ex similitudine vitiorum, aut *Non po-
test esse
interma-
los.*
criminum oriatur ; ea non amicitia erit,
sed factio , conspiratio , sceleris societas :
& exinde brevis tantum , temporis , &
necessitatis causa , inita conjunctio ; per
quam cupiditatum vicissim ministri , &
adjutores fieri possunt ; verè amici nul-
lo modo possunt . Quin imò , infida
hæc improborum consensio , quam non
amor , sed facinus jungit & æquat , in
acrem discordiam facilè mutatur . Nem-
pe , dum scelus admittunt , superest con-
stantia ; eo peracto , incipiunt invicem
abhorrere , & se mutuò odisse .

Si deinde amicitia proveniant ex uti- *Nec uti-
litate so-
la con-
stat.*
litate tantum , commodo , rebusque ex-
ternis ; & si eatenus colantur , quantum
profunt : Ejusmodi primum instabiles
sunt, & infirmæ : dum ; quod utilitas con-
glutinat , eadem commutata , ac cessans ,
dissolvit . Deinde , subdola simulatione
tectæ , & fiduciam mutuæ benevolentia
non habent ; & omnia semper iis suspen-
dita, & suspensa : denique vel in occultam
invidiam , vel æmulationem ac conten-
tio-

tionem apertam; ac demum in diffidium
vertuntur. Tales plerumque sunt foren-
ses illæ, ac fucatæ familiaritates.

*Nec le-
nocinio
consuetu-
dinis.*

Si denique ex vano lenocinio Con-
suetudinis; ac consecratione, commu-
nitioneque eorundem, sed levium inani-
umque studiorum ineantur; Fastidium
mox sui, nullo firmo nixæ fundamento
adferunt; & amicitia nomen non me-
rentur; sed sodalitiū levis, solā conver-
satione, non autem amore vero sociati.

*Denique
non est
nisi inter
bonos.*

Necessariò itaque consequitur, ut in-
ter bonos tantum sit Amicitia. Pri-
mum; quia Amor amicitia parens est,
Amoris autem causa, bonitas vera. De-
inde; quia dotes Charitatis, quas hoc li-
bro deduxi, bonis tantum insunt. Deni-
que, quia viri boni causas dissolutionis,
ac dissidii non habent; quas vitia, & po-
tissimum Avaritia & Ambitio adferunt,
pestis utraque amicitia. Ideoque soli eam
colere summa Fide, Charitate, Constan-

*Verè ta-
les præ-
ceptis nõ
egerent.*

tia, Justitiaque possunt. Atque ita præ-
ceptis opus non esset, si inter verè bo-
nos amicitia esset. Sed cum vita hæc
communis, in qua versamur; & Con-
ditio humana, adeò non habet verè &
perfectè bonos; ut optimus ferè censendus

dus sit, qui minimè malus: Ideo viros
eximiè bonos voto expetere; quales
verò fors communis fert, oportet reci-
pere. Itaque constituendæ, colendæ, re-
tinendæ; & (si ita aliquando vera ne-
cessitas tulerit;) deponendæ amicitia
præcepta proponam.

*Sed in
vita
communi
egent.*

In constituenda Amicitia Judicium
exactum requiritur. Illud enim dicta-
bit. Primum; amicorum delectum; ut
capias nempe probos, similes tui, seu
pares; tum verò opportunos. Moram
deinde; ut ingrediaris, non irruas in
Amicitiam. Crescat lenta consuetudine
benevolentia. Et, quod proverbio tri-
tum est; multum salis consumas, ante-
quam arctè contrahas. Firmum denique
Propositum; ut amicitiam, quam studio
perspecto, & consuetudine adjuncta su-
sceperis, constanter conservare statuas.

*Præcepta
Consti-
tuende
amicitiæ.
Primum,
judiciū.*

*Mora de-
inde.*

*Firmum
demum
proposi-
tum.*

Ad colendam Amicitiam, primum
facit vicissitudo officiorum. Quæ mu-
tuò, & libenter sunt impendenda, iisque
se vincire decet, & arctius adstringere;
sed cum hoc monito; ut officium sit, ut
dicitur, ad aras tantum. Et hæc lex in
amicitia sanciat: ut neque rogemus
res malas, inhonestas, iniquas; neque
faci-

*Præcepta
Colende
amici-
tiæ.*

faciamus rogati. Virtutum enim schola,
ac Palæstra esse debet amicitia, non vi-
tiorum officina; Mater & Nutrix Pro-
bitatis, non Cupiditatum ministra. Al-
ter amicitiae cultus, est Beneficentia;
Et bene-
ficientia. quæ opitulatur, & rem confert. Eam
verò nec flagitare decet; nec ut flagi-
teris, expectare. Promptè & ultro de-
ferri debet: Et propensiores esse debe-
mus ad largiendum, quàm ad repo-
scendum; ut hæc inter bonos honesta
sit certatio, uter alterum benefacien-
Ex con-
sensione
volunta-
tum. do superet. Tertiò coluntur Amicitiae,
consensione voluntatum, ac Judiciorum.
Nam cum Amicitiae vis sit in eo, ut è
duobus unusquasi animus fiat; id ob-
tineri profectò non potest, nisi omni
dissensione inter amicos sublata. Ea
verò ut tollatur; aperire sibi mutuò a-
mici debent pectus purum, candidum,
simplex: & ut judiciis consentiant, so-
ciare vitæ consilia; eaque fidenter, &
dare, & expetere. Cæterum cavendum
Sed sine
assenta-
tione. est, ne ex assentiendi consuetudine, as-
sentatio, quæ vitiiorum adjutrix est,
subrepat, imponatque nobis. Et, ne cen-
sura locum suum in amicitia amittat;
quem profectò obtinere debet. Nam
mone-

monere, & moneri; proprium amicitiae. *Et cum*
 Alterum ingenua quadam, non acer- *cenfura*
 ba, nec aspera facere decet libertate: *pruden-*
 alterum, non repugnanter, fed beni- *ti.*
 gnè acceptare; & non aliter, quàm dum
 feipfam mens admonet, atque redar-
 guit. Itaque ficut rigor nihil indulgens; *Que de-*
 ita adulatio, procul fit ab Amicitia: quæ *fcribitur.*
 confans, & una femper, nil patitur va-
 rium, & fictum. Nihil verò potest effe
 tam flexibile, tam devium; quàm ani-
 mus ejus, qui ad alterius non modò
 fenfum & voluntatem, fed etiam vul-
 tum, nutumque convertitur.

Superfunt præcepta retinendæ, ac *Præcepta*
 confervandæ conftanter amicitiae. Dif- *retinen-*
 ficillimum enim eft, eam ad extremum *dæ ami-*
 ufque diem perducere; & tam multa *citiae.*
 ei impendent, ut ea fubterfugere, non
 modò fapientiae, fed etiam felicitatis
 res effe videatur. Retinetur tamen, pri- *Connive-*
 mum conniventia, & diffimulatione *re ad le-*
 levium vitiorum. Dum, quemadmodum *via vitia*
 Parentes liberis modica ignofcunt; næ- *oportet.*
 vos eorum vel ipfi non vident; vel co-
 ram aliis tegunt; non acriter de inge-
 niis eorum judicant, fed fæpe aberrant
 ex amore: Ita & nos, vellem, in ami-
 citia

Et bona interpretatione lenire. citia sic erraremus ; & isti Errori nomen virtus posuisset honestum . Non dammare , inquam , amici mores oportet ; sed quandoque benigna interpretatione lenire . Exempli causa . Parcius hic vivit ; frugi dicatur . Plus æquò liber ; reatus , fortisque habeatur . Iracundior est paulò ; acres inter numeretur . Profectò hæc res & jungit , & junctos servat Amicos . At nos virtutes ipsas invertimus . Probus quis nobis cum est ; multum demissus , & abjectus dicitur ; pro bene sano , ac non incauto , fictum astutumque vocamus ; simplicior quis ? Comuni sensu planè caret , inquit . Eheu ! quàm temerè in nosmet Legem sancimus iniquam . Nam vitiis sine , nemo nascitur ; optimus ille est , qui minimis urgetur . Vitia , inquam , erunt , donec homines . Sed neque hæc continua : & sufficit , si meliorum interventu pensantur . Statuenda itaque est , & appendenda velut libra , ac statera quædam ; in qua , si vitiis amici , bona præponderant ; affectu erga eum inclinemus , idem & Nos ab eo habituri . Atque ita librat , & toleratis utrinque moribus , facile amicitia retinebitur . Eòdem facit ; tempestivè

pestivè prævidere alia, quæ amicitia evenire solent, incommoda. Dirimit enim eas sæpe ingenii humani, morumque mutatio, quam ut plurimum fortunæ vel prosperæ, vel adversæ adfert varietas. Tum verò etiam; cùm incidit tempus, ut non idem utrique amicorum expediat. Denique aliquando satietas quædam capit: cùm omnia inter se profudere; & nihil est reliquum, quod à se vicissim expectent, requirantve. Hæc talia, inquam, maturè sunt prævidenda; & contra ea, paranda in animo præsidia constantis benevolentia. Quam ipsi ultro, primique adferamus; securi mutua vicis. Nam hoc profectò phil-
trum amicitia: ut si velis amari, primus ames. Contra quam faciunt plerique; qui perversè, ne dicam impudenter, amicum habere volunt, quales ipsi non sunt.

*Provide-
re tem-
pestivè
opus a-
micitiæ
incom-
moda.*

*Quæ re-
censentur.*

*Amoris
illicium
amor.*

Quod si tale quid evenierit, ut necessario continuatio, ac velut cursus amicitia sistendus sit; Tum verò danda est opera, ne in odia discordiamque desinat. Consuetudo potius conjunctioque, quam benevolentia cesset. Dissuendæ amicitia magis, quàm discindendæ; extinguen-

*Præcepta
Deponen-
dæ ami-
citia.*


tinguendæ, non opprimendæ: & denique familiaritates sint depositæ, non inimicitia susceptæ.

Concluditur hic locus.

Cum ad hortationem.

Hæc ferè sunt, quæ ex Cicerone potissimum, sed in ordinem certum redacta, de amicitia dicenda habui. Cæterum, cum ea sit amicorum raritas, quam perhibet autoritas veterum, vix aliquot paria veræ amicitiaè numerantium: Ea verò sit ejusdem, non utilitas necessitasque tantum, sed suavitas etiam ac dulcedo; ut verè eam, hujus vitæ unicum condimentum ac delictum, vocare possis: Profectò tanto majori cura studioque procuranda, colendaque est; & censendum, miserrimam omnino vitam ejus esse, qui nec diligat quenquam, nec ab ullo diligatur: Contra verò, beatam ejus, qui habet, cum quo fruatur prosperis rebus, & adversas mutua ope ferat.





LIBER OFFICIORUM TERTIUS.

De Pietate.



Artes duas Officiorum, quoniam puto me sat luculenter (pro captu quidem meo) libris superioribus absolvisse; restat ut explicem tertiam de Pietate.

Hæc verò tantò major, sublimiorque est duabus primis, quantò altius habet argumentum, id est Deum. Hactenus enim Officia ferè ducta sunt, quæ vel Natura ipsa, seu recta ratio (quanquam & hæc dum talis est, à Deo est;) dictaret, monstraretque: nunc verò explicanda restant, quæ Naturæ ratiocinantis captum longè superant; & sicut præcepto, ita auxilio Dei propriè nituntur.

Meritò itaque illum, qui se nosci, coli,
O amari

Pars tertia Officiorum Pietas.

Major duabus primis.

Quia directe Deum petit.

amari à nobis exigit, invoco: ut ea, quæ generi humano de hoc debito sibi officio edixit, inspiravitque; quamvis à multis ubertim, & copiosè dicta, ego quoque methodo, & nova, & brevi explicem ad gloriam ejus. Illustra ergo mentem meam, ò lux vera; ut aliquid te dignum & videam ipse, & aliis aperiam.

Definitur Pietas.

Et dividitur.

Sed ne longiori Præfatione te moret; prout soleo, ordior à definitione. Pietas, est Officium, quod genus humanum tenetur præstare Deo. Id autem in tribus consistit. Primum: Deum, quæ potest, & debet, nosse. Deinde, eundem certo, & congruenti cultu venerari. Postremò: eum solum amare. Hæc tria explicanda mihi deinceps; totidem Capitibus propono.

CAPUT I.

Περὶ θεογνωσίας, id est, De Notitia Dei.

Latè patet Dei notitia.

A Deò quidem latè patet hæc de Notitia Dei dissertatio; ut vel totam Theologiæ scientiam posset occupare. Sed cùm non tam Contempla-

templatio, quàm actio, ad Officia Pietatis, de quibus hic agemus, pertineat: ideo relictis τοῖς θεολογούμενοις, plena tanti argumenti tractatione; quæ ex usu de illo scire sit, in compendium redigam.

Sed ad officii modum redigetur. Theologis.

Est verò notitia hæc prorsus generi humano necessaria; est animorum salus, fidei mutæ præcipuum vinculum, lex vitæ; & quid in illa agendum, vitandumque sit, suprema regula. Cuncta enim hæc constare non possunt; & perturbatio officiorum sequeretur, Dei ignoratione: quando profani etiam Poetæ dicto, primæ scelerum causæ mortalibus ægris (Naturam) nescire Deum. Mens etenim humana, nisi arbitrum sui agnosceret, facilè prava intra se foret: & affectu, ac voluntate laboretur; invalido ab externo motu auxilio, cui actus interni non subsunt. Noscendus itaque Deus est: non quòd curiosè nimis inquiramus, scrutemurque; sed ut admirationem cum æstimatione, venerationem cum timore, amorem denique cum fiducia, in nobis erga eum concitemus.

Est homini necessaria.

Ut vitam ejus temperet.

Trifariam declaranda.

Hoc itaque fine, dicam hoc Capitula. Nempe, de Natura Divina, ut in

O 2 se est:

se est : deinde , ut erga nos est : Postremo , ut à nobis nosci vult ; idque totum ex constituto religionis dogmate , & Ecclesiæ sensu .

Pars Capitis Prima .

*De Natura Dei , & quid in se sit ;
ubi novo modo , ac ratione , dogma
Trinitatis accuratè explicatur .*

*Deū esse ,
dīstū su-
praest .* **D**Eum esse demonstravi in Prolegomenis ; in ipso enim Scripti initio , id velut fundamentum poni oportuit ; quo structura libri surgere posset . Nunc qualis sit ; quā possum , explicabo . Quā possum , inquam ; plenè enim Naturam ejus assequi , non est virium humanarum ; ut infra , parte Capitis altera , cū de gloriæ donis agam , demonstrabo .

*Sepe no-
scitur ne-
sciendo .* Sed est etiam cognitio , & comprehensio quædam ; ut id , quod certa ratiocinatione agnoveris ita esse ; id fatearis , quomodo ita sit , comprehendi non posse . Hoc genus cognitionis Dei nobis convenit maximè ; hoc est ; non capiendo eum , capere .

Et quid Itaque magis convenit de illo dicere ,

re, quid non sit, quàm quid sit. Ut; non
 esse multiplicem essentia, partibus;
 compositione, numero; sed omnino, &
 undique unum simplicemque. Esse
 enim, inquit D. Augustinus; nihil aliud
 est, quàm unum, esse: & in quantum
 unitatem assequitur; in tantum est. Un-
 de simplicia ideò magis sunt, quia una
 sunt: quæ autem composita, concor-
 dia partium imitantur unitatem; & in
 tantum sunt, in quantum eam asse-
 quuntur; & nisi eam haberent, non
 essent. Quæ enim constant partibus,
 sunt unum in suo toto; quæ ex acci-
 dentibus, unum subiecto; quæ plura
 numero, sunt una Specie; quæ specie
 varia, genere uniuntur; quæ demum
 productione multa, unum sunt princi-
 pio. Sequitur itaq; ut idem sit esse, quod
 unum esse. Deus verò, cum sit *αὐτὸ τὸ ὄν*,
 & ejusmodi esse; ut nisi illud esset, ni-
 hil esset; ideò longè perfectiori quadam
 ratione, & *παντελῶς* unum sit, necesse
 est; & id est illi esse, quod unum esse.
 Unum, inquam, non modò simpli-
 citate; sed etiam numero. Nam si plu-
 res essent Dii, essent differentes; atque
 adeò omnes imperfecti: nam in ea no-

*non sit di-
 cendo .
 Non est
 multi-
 plex, sed
 unus .
 Esse enī ,
 est unum
 esse .*

*Quod
 probatur.*

*Etiā
 exemplis.*

*Est ergo
 unus na-
 tura .
 Ens à se .*

*Omnimo-
 dè .*

*Et nume-
 ro .
 Alioqñ
 imperfe-
 ctus .*

ta, in qua differrent ab invicem, deficerent.

*Summè
autè per-
fectum
esse demò-
stratur.*

Imperfectum autem Deum nemo dixerit; cum absurdum sit eum, qui est à se, non perfectum omni ex parte esse. Aut enim sibi dare, quod summum, perfectissimumque est, non potest; aut nescit; aut non vult. Non primum; quia qui à se esse potest, omnia potest: Non alterum; nam qui se plenè scit, scit etiam quod sibi optimum sit: Non demum tertium; quis enim, cum summè potest, & novit, non quod perfectum est, voluerit, prehenderitque? Est ergo Unus, perfectusque Deus.

*Si solus
est Deus,
nō est Bo-
num.*

Sed iterum oritur maxima difficultas. Nempe; quòd dum unus duntaxat Deus est; si solus est, non est bonus; seu potius, non est bonum. Boni enim

*Quia non
se plenè
communi-
cat.*

maxima, intimaque proprietas est communicatio: solitudo autem communicationem impedit, aut potius tollit: Tollit ergo & Boni Naturam. Ergo non summum, si solum est, non est bonum. At quomodo, cum ab illo cuncta, quæ bona sunt; non ipsum magis tale?

Ens.

Creaturis

Quod si dicas; explevisse Naturam suam,

suam, cū se impertivit Creaturis; falsum est. Non potest enim finita, & circumscripta communicatione bonum infinitum expleri. *enim imperfectè.*

Deinde, non est perfectè beatus Deus, si solus est. *ἀπλῶς* enim esset; & careret consortio, ac Communicatione sibi adæquata: in qua suavitas, ac fructio beatæ vitæ sita est; dum nempe bonum, se alterum habet, cum quo ex æquo se communicat, fruicurque. *Nec beatus est sine consortio felicitatis.*

Terriò: si solus Deus est, summè efficax, ideoque summè simplex non est. *Nec summè simplex.*

Quod sic deduco. Quo magis quidpiam simplex, magis efficax est: ut, inter elementa, ignis. Efficacitas verò in Natura Creata, maxima est in eo; ut id quod efficit, sibi quam maximè par, & simile efficiat; majus enim se efficere non potest: nam operatio non excedit essentiam. Natura autem increata, ut sit summè simplex, & summè efficax; necesse est profectò, ut non modò simile producat; (par enim alioqui esset viribus creatis) sed prorsus alterum idem: *Nisi se alterū producat.* tum enim demum efficacissimum simplex, cū producit alterum se; atque ita solum non est.

*Unum,
Verum,
Bonum.*

*Tria hæc
habent
Unū esse.*

*Suntque
Pater, &
Filius,
& Spir. S.
Substan-
tivè.*

*Nunquā
Deus sine
actione.*

*Actio ejus
contem-
platio.*

Quartò : cū ostensum supra sit ; quòd esse nihil sit aliud , quam unum esse ; consequitur , ut id quod est , unum sit : atque ideò , propriè unum est , quod est . Sed quia verum etiam est , quod est ; (Falsum enim non est) & denique Bonum etiam est , quod est : (nam malum non est ;) ideò Unū , Verum , Bonum est , quod est . Cū autem esse , sit Unū esse ; ideò tria hæc , habent unum esse ; & quamvis distincta sunt , coessentialia tamen sunt . Porro Unū ; est Pater , id est Principium . Verum ; est Filius : imago Patris ; eum & vi- vè repræsentans . Bonum denique , est Spiritus Sanctus ; nectens amore ac fruitione , commune ac consors Trium esse .

Quintò : Deum ab æternitate tota , nunquam sine actione fuisse ; nec torpidam , similemque sopori vitam egisse , manifestum est . Summa enim , æterna- que mens , quæ sola per se vivit , viget- que ; quomodo potuit esse actionis aliquando expers ? cū ne nostra qui- dem , illa careat unquam . Actio verò ejus intima , propriaque ; quia interna est , ideò contemplatio est . Quid autem con-

contemplatur? non aliquid seipso ma-
 jus, perfectiusque; nihil enim ipso ma-
 jus, aut perfectius est. Non etiam tan-
 tum aliquid se inferius; nam sola con-
 templatio ejusmodi, non esset ipso di-
 gna; nec ejus menti par: nec sufficiens,
 ut ei per omnem æternitatem immora-
 retur, seque ea oblectaret. Necesse ergo
 est, ut sui ipsius contemplationem sem-
 per habuerit. Hæc verò sui ipsius Con-
 templatio; perfecta, consummataque, ut
 sit; necesse est, ut Deo repræsentet to-
 tam ejus substantiam. Quod autem re-
 præsentatur, cernitur, aspiciturque; id
 oppositum sit, necesse est. Et quod op-
 positum est, alterum est. Est ergo Deo
 semper opposita, vivens, subsistensque
 sui ipsius Cognitio, seu imago; atque
 adeò Persona altera, coæterna, & con-
 substantialis. Ab utraque verò hac ma-
 nat, seu procedit & tertia; nempe Spi-
 ritus Sanctus. Nam, ut sine contempla-
 tione, & cognitione sui esse Deus non
 potest; ita hæc cognitio amorem sui, &
 fruitionem producat; necesse est. Qui
 amor consubstantialis itidem, & æquæ
 æternus, & subsistens, atque extans
 semper; & omnino Persona est.

*Contem-
plari se
maius
nequit.*

*Nec tan-
tum se
minus.*

*Se ergo
contem-
platur.*

*Et totā
suam es-
sentiam.*

*Quā op-
positam
sibi.*

*Ideoq; se
alterum
habet.*

*Hinc pro-
cedit A-
mor.*

*Sub ter-
tia Per-
sona.*

Sed

Deus est unus, & non solus. Sed dum sic in Dei natura solitudo vitatur; cavendum maximè est, ne pluralitas, & ex illa diversitas accersatur. Hæc enim utraque, & Unitatem tollit, & disjungit, separatque: unde à perfectissima natura Dei, hoc incommodum oportet amoliri: & statuere; ut Deus, & unum sit, & non solus. Itemque, ut, dum est non solus; non sit diversus. Quod aliter non potest consistere, quam dogmate Christiano: quod est essentia unum idemque; & Personis trinus: Pater, & Filius, & Spiritus Sanctus: nam hi tres, unum sunt.

Quia in una essentia tres Personæ. Est inquam Trinus, & Unum: tum enim optimè sua ipsi constat Natura. Nam Essentia, ejusque attributis, unum idemque est: (una nempe tribus, & coessentialis Potentia, Sapientia, Bonitas; una, eademque numero, compos unius Essentiæ, Deitas: ideoque nulla prorsus in illis diversitas.) Solus autem non est, quia ipsummet Bonum est; se infinitè sibi communicans. Perfectum quoque, beatumque est, unitissimi confortii dulcedine; qua gaudet Deus, verè, & propriè alter; & alter ipse. Summè simplex, quia summè efficax est; dum

gene-

generat , ac producit , non modo sibi simile ; sed *8016d0s* idem secum . Nempe in mira emanatione illa , Deitati interna , neque illius Unam Entitatem egressa , ab æterno Pater , visione sui , gignit Filium ; & uterque ex sui boni agnitione producit Amorem : id est , unum , eundemque Entitate secum , Spiritum .

Substanti-
vè .
Uterque
producit
Spiritus
Sæctum ,

Quis autem comprehendat , aut effe-
rat , quæ dulcedo sit istius fruitionis ?
qua una Divinitas , in tota æternitate
se novit , atque amat ; & in pari , & æ-
quali communione , se sibi indulget ,
se mutuò oblectat , bono contenta suo :
ideoque læta , gaudens , & beata
semper .

Mira hinc
Divinita-
tis felici-
tas .

Esse itaque in Trinitate Persona-
rum , unum natura Deum , ex ratio-
cinatione jam dicta colligimus : & quod
majus est , remque continet , ac confi-
cit ; fide Catholica docemur . Sed quo-
niam id , quod asseritur esse , cupi-
mus etiam scire , quomodo sit : ideò
ad muniendum hunc locum , qui
profectò est Cristianæ professionis ,
seu Religionis unicum fundamen-
tum ; ex ista ipsa sciendi natura ,
sumpto

Modus
hujus ar-
cani accu-
ratiùs ex
novo mo-
do dedu-
citur .

sumpto principio, ibimus in amorem; ducemusque aliquam velut umbram Sanctissimæ Triadis. Id verò ex erudita lucubratione Patris Laurentii Piskarscii, è Societate JESU eximii Theologi; quam mihi in suo dedit manuscripto, & quam ex ejus permisso, opportunè hic (sed compendio) inferam; explanabo.

*Scientia
directa
scit.
Reflexa,
scit se
scire.*

*Primam
altera cõ-
sequitur.*

*Suntque
mutuò re-
lativæ.*

*Sunt in-
ter se æ-*

Scientia, (inquit ille;) creata naturæ rationalis, ut sit exacta, seu vera; duplex omnino esse deberet. Prima; qua scimus aliquid: vocaturque Directa. Altera; qua, id quod scimus, nos scire agnoscimus: quæ Reflexa dicitur. Hanc utramque, & se consequi, & ad se mutuò referri, omnino est fatendum. Nemo enim scit, nisi sciat se scire id quod scit: exinde verò necessaria consecutio cernitur. Deinde; si scit; scit se scire: & si scit se scire; scit etiam. Unde evidenter mutua Relatio patet: ideoque ambæ istæ scientiæ, & se consequentur, & relativæ mutuò erunt. Quo concessio, ampliùs sequentur ista.

Primum: utramque hanc scientiam, necessariò similem, & æqualem omni-

no

no inter se esse: Quod enim, & quantum quisque scit; id, & tantumdem *quales, & pares.* scit se scire. Non aliud; quia aberraret. Non plus minusve; quia revera nesciret. Similis ergo necessario, & par per omnia esse debet scientia directæ scientiæ reflexæ.

Alterum consequitur: utramque hanc scientiam & Naturam, & Tempore simul esse. Natura enim prius est; quod potest esse sine altero, alterum verò sine illo esse non potest: quæ autem sunt Relativa ad invicem, non possunt esse sine altero. Scientiæ verò dictæ sunt relativæ, Ergo non possunt esse, una sine altera: Ergo simul sunt Natura. Tempore deinde erunt simul: nam ut primum quispiam scit; statim, & simul scit se scire: Ergo utraque scientia erit simul, & natura, & tempore. *Simul natura, & tempore.*

Tertiò: quoniam ostensum evidenter est; scientiæ directæ, scientiam reflexam, consequentem omnino esse: atque adeò ab illa velut suo principio prodire: & (quod infertur) secundam ab illa esse: deductum verò etiam; prioritatem nihilominus naturæ, & temporis nullam, inter utramque inveniri: sequi- *Originis tantum prioritatem habent.*

sequitur: origine tantum, scientiam directam primam esse: Reflexam verò conjunctione, ac communicatione ejus, alteram. Sed cum ibidem demonstratum sit; utramque similem omnino, paremque inter se esse: ideò evidenter constabit, originatione hac, nullam illarum dissimilitudinem, nullamque imparitatem effici. Et si enim una ab altera originem habet: tamen ubi Origo, & derivatio; ita sunt juncta sibi, ut altera primæ non sit accidens; sed natura, & ipsummet esse: ibi Ordo erit inter sese consequentia; inæqualitas verò, imparitas, prioritas, naturæ aut temporis, nulla erit. Atqui ex dictis facile patet; scientias, Directam & Reflexam, eo modo conjunctas esse; nempe necessaria consecutione, & ipsa natura: ideò Ordinem habebunt; & nihilominus undequaque pares sibi erunt.

*Sed hinc
nulla im-
paritas.*

*Quod cō-
probatur.*

*Ostendi-
tur crea-
ta scientia,
impar in-
creata.*

Hæ sunt notiones, quæ ex consideratione scientiæ creatæ verè deducuntur. Cæterum, quòd scientia creata, longè inferior sit scientia Divina; etsi per se est evidens, ac manifestum: tamen ad pleniorum eorum, quæ dicuntur,

centur, notitiam; non abs re erit, cur sit inferior, causam proponere. Quæ in hoc potissimum sita est: quod Creatura Natura nesciat suum esse; scire enim rem aliquam, est eam mente videre: ut autem seipsum oculus corporis non intuetur; idque ideò, quia sibi non opponitur: ita & mens Creatura non potest habere sui ipsius objectum terminatum; alioqui cognitio illi esset ipsa ejus Essentia. Cum autem Scientia Naturæ Creatæ non sit ejus essentia; (ut patebit infra,) ideò non habet scientiam sui esse.

Deinde: quomodo se scire poterit esse Creatum; cum vix sit, & vix existat? Nunquam enim stat in suo esse: sed semper, (ut inquit D. Augustinus) desinit esse, quod erat; & incipit esse, quod non erat: atque adeò propriè non existit. Imò propriè non est: quidquid enim ex eo, quod non erat, ortum; non cessat tendere in id quod erit; linquens semper quod jam fuit: hoc, (ait Bernardus) transitū sanè habet per Est, sed propriè non est; quia nunquam in eodem statu permanet. Si autem verè non est; quomodo sciet verè suum esse?

Nec propriè est, existitq;

Tertiò:

Denique ab alio est. Tertiò : esse ejus est ab alio ; ideoque alienum : & ipsi soli notum , qui dedit .

Hiscæ de causis , imò præter omnes hasce causas , certum est : inferiorem infinita ratione esse Scientiam Creatam Scientia Divina ; ideoque memoratas dotes vix , vel certè imperfectè retinere , & exercere .

*Naturæ
Increatæ
perfectior
scientia
idèd .*

Ex his verò , quæ de scientia Creatâ dicta sunt facilè est gradum ad Divinam promovere , ac struere . Dotes enim , quæ ostensæ sunt inesse debere Scientiæ Creatæ ; insunt verè , propriè , ac perfectè Naturæ Increatæ . Insunt inquam , sed longè excellentiùs , præstantiùsque , hoc præsertim discrimine :

*Quia idèd
est illi sci-
re , quod
esse .*

quòd Naturæ Creatæ scire , ut dixi , distinctum , ac disparatum sit ab ejus esse : non est enim ejus Substantia , sed accidens : unde non est illi , sicut Deo consubstantiale , & coessentialiale ; sed est agentis actio ad extra . Ideoque actionis solum Naturam expendimus , cum scire creatum consideravimus . In Deo verò , simul & junctim , Natura seu Essentialia ejus , & scire ejus considerandum est . Etenim in Deo idem est agere , quod esse : nam , si actio ei accidens esset ;

com-

compositus esset: id verò cùm absurdum sit omnino Divinitati; ideò, id ei est actio, quod essentia; id scire, quod esse. Atque ita hoc, idemque est Deus, quod est sciens.

Sciens hic, quia verè solus est; ideò solus se scit. Et hoc ipso quod se scit; totum quod scire potest, scit. Non autem se aliquid majus; neque id tantum, quod ipso inferiùs. Nam si sciret, aliquid se majus; illud majus, Deus esset; ipse verò, Deus non esset. Si verò id tantum sciret, quod ipso minus est; imperfectam valde haberet Scientiam: etenim seipsum nesciret. Consequitur itaque: ut Deus & nihil se majus, & non tantum inferiora se sciat; sed seipsum sciat, quod est. Est autem ille solus; ideò & solus scit se esse: id est; propriè, & consummatè scit se scire; seu scit suum scire; seu (quod idem est) scit suum esse: in Deo namque idem est scire, quod esse.

Hæc scientia sui, quia Scienti est reciproce consequens; ideò est relativa. Similis quoque, & par per omnia: quia sciens id scit, quod est. Unde non modò similitudo & paritas, sed eadem e-

Simul natura, & tempore. rit Entitas Scientis, & scientiæ suæ. Natura præterea, & tempore Sciens simul est, & Scire suum: seu Dicens, & Verbum. Dum autem simul sunt Natura, & tempore, nulla intercedit prioritas conditionis, etiam ex ratione principii: nam semper, in principio, erat Verbum.

Origine tantum altera. Origine ergo tantum, Scire à Sciens, Verbum à dicente, Verum ab Uno; alterum erit. Alterum propriè; non verò aliud: eadem est enim Entitas, seu esse utriusque. Secundum, inquam est; non verò propriè posterius, aut inferius: Originatio enim hic, ordinem tantum facit; non verò differentiam æqualitatis. Nam collocatio, & numeratio in recensendo, quam requirit Relatio, non adfert disparitatem; ut primum secundo excellentius faciat: sed ordinem constituit Relationis æquiparatae: Naturæ dignitatem non immutans; præsertim cum Communis eadem, & una est.

Scientia creata nō est substantia. Sed quia Scientia Naturæ Creatæ est mutabilis; sicut & Natura, quæ illam producit; & quod maximum, non est scientis esse, sed actio; nec substantia

tia ejus, sed accidens; estque velut imago in speculo, quæ viventem hominem utcumque repræsentat; cum ipsa non vivat: ideo non est res subsistens; nec *ὑποστάσις* suam habet. Scientia verò Dei, quia est immutabilis, una semper, similis, & par per omnia Scienti, Viventis viva imago, & coæterna, coessentialis, consubstantialis: ideo subsistit, & extat; extititque semper. Est nēpe Deo oppositus sui ipsius terminus; cognitione productus: &, ut proprie dicam; Idem alterum. Idem, non partita, sed eadem unitate Essentiæ; Alterum verò exigentia Relationis: nam scientis, ad scire suum relatio est (uti ostendi) Relatio verò est, ad alterum.

Subsistentiam.

Increata Subsistens.

Et Alterum idem.

Porro, Alterum hoc, quòd sit *ἑκαστόν* Deo; patet ex ante dictis. Si enim aliquid in Deo esset, quod non ejus Essentia & Substantia esset; aliquid non Divinum, & externum Divinitati inesset. Quod cum sit absurdum; ideo Alterum hoc, Substantia Dei est; & est res verè subsistens: ita ut possit, ut hæc, monstrari; ideoque facit Substantiam terminatam, ac individuum: &, quod consequitur, Personam. Intellectualis

Alterum hoc factum Personam.

enim, terminata, & individua substantia, Persona est.

*Persona
hec, est
Filius,
quia geni-
ta.*

Persona hæc verè, & propriè dicitur Filius: idque, quia generatione procedit. Si enim Personæ istius non esset generatio; esset aut efficientia ejus, aut Creatio: (processione namque excipio; quæ Spiritui Sancto propria, à generatione quomodo differat, paulò post dicam:) Quod verò efficitur, ex alio est; quod creatur, ex nihilo est: atque ita neutrum ex Substantia efficientis, & Creantis. Id autem productioni Divinæ inconveniens prorsus, & absurdum esse, ex his, quæ dicta sunt, patet evidenter. Est ergo generatio hæc vera: præsertim cum exactè, unicè, & sola generationis proprietates retineat, impleatque.

*Genera-
tionis pro-
prietate
implet.
Est enim
vivens ex
vivente.*

*Est ex ge-
nerantis
substantia.*

Cum enim sit ea generationis prima proprietas, ut sit viventis à vivente; Deus, qui Vita est, non potest producere nisi Vitam. Deinde: cum altera proprietas sit; ut sit ex generantis substantia; Generatio Divina, non participationem Substantiæ (ut creata) habet cum suo principio; sed identitatem: id est, non fluxum ejus, sectionem,

nem, partem; sed totius, ejusdemque communicationem. Denique, cum tertium generationis requisitum sit: ut in similitudinem producatui sui principii; in generatione Verbi id consummatissimè impletur: quod mentis, à qua generatur, est imago perfectissimæ similitudinis. Deus nempe, (inquit Augustinus,) genuit quod est: qui cæteris dedit gignere, in similitudinem ejus, quod sunt. Est itaque Sciens, & Scire suum; Dicens, & Verbum; Unum, & Verum: idem quod Pater, & Filius. Quæ nomina postrema, toties in Scripturis, verè, & propria significatione repetuntur.

Propria significatione, inquam. Nam Paternitas vera in cælo, seu Deo tantum est: & quod consequitur; Filiatio (ut sic dicam) vera. Homines enim, & patres, respectu filiorum sunt; & filii respectu patrum: at in Divinitate tantum, nunquam Pater Filius, & nunquam Filius Pater. Deinde; cum sint Deo filii, quos sua gratia effecit; necesse est, ut sit & Filius, quem sua Natura genuit. Nā imitatio, oportet ut habeat suum exemplar, & archetypum.

Est in similitudine principii.

Ergo Filius Patri.

Paternitas vera in cælo tantum.

Si est filiatio adoptiva, est & naturalis.

tatio autem veræ generationis , est adoptio : Ergo si est , ut ita dicam , Filiatio adoptiva , est & Naturalis .

Ad professionem S. Spiritus, transitus.
Cum ejus invocatione. Sic generatione Filii deducta ; Professionem quoque à Patre, & Filio, Spiritus Sancti iterum videamus . Sed non sine debita ejus invocatione . Veni ergo Sancte Spiritus, mentes nostras visita, & te nobis aperi : Nam sine tuo lumine , nihil est in homine .

Recapitulatio dilatorum de generatione Filii. Patet ex his, quæ hætenus dicta sunt; quòd Divinitas & est; & scit suum esse; seu Est τό οὖν : unum; & verum . Esse enim, est Unum esse: se scire, est Verum esse . Ostensum id, inquam, & pro captu mentis humanæ demonstratum, hac quæ sequitur anacephalæosi . Primò : Quòd in DEO idem est Esse, quod scire . Secundò : Quòd solus Deus se scit . Tertiò : Quòd hæc scientia sit consequens reciprocè . Quartò : Quòd sit relativa . Quintò : Quòd sit cum suo principio simul natura, & tempore . Sextò : Quòd Originis tantum ordinem habeat, sed sine imparitate . Septimò : Quòd subsistat, & suam hypostasim habeat . Octavò : Quòd sit Persona . Nonò : Quòd sit Filius . Hoc

Omnia hæc cōve-

totum

totum inquam, supra deductum sat esse puto evidenter. Nunc verò deducendum restat, eadem omnia tertiæ, *nisse Spir. S. demonstrabitur.* *Entis.* *Præter unū, quod nō sit Filius.* convenire hypostasi; seu Bono, seu Amori; id est Spiritui Sancto: præter unum ultimum. Nempe, quod non sit, & cur non sit Filius; sed Spiritus ab utroque, nempe à Patre & Filio, non genitus, sed procedens. Et hoc mihi demonstrandum propono.

Quod ut jisdem gradibus deducam, quibus ad secundam deveni hypostasim; ita ordiar.

Amor Creatæ naturæ, ut sit perfectus, duplex esse deberet. Primus; quo amamus simpliciter; id est, in rem amatam propendimus, ferimur, eamqueprehendimus; qui vocatur Directus: Alter; quo amatæ rei compotes facti, ea gaudemus, oblectamur, fruimur, & in fruitione conquiescimus; id est, amamus hoc nostrum amare: qui Amor est Reflexus. *Amor creatus directus, & Reflexus*

Hunc utrumque amorem se consecuturi, & ad se mutuò referri; evidens est: nemo enim amat, nisi gaudeat; seu amet se amare. Unde patet consecutio. Deinde si amat; gaudet eo amore: & si amo-

fi amore gaudet; amat. Unde Relatio.
Uterque ergo amor, & se consequens,
& relativus mutuò erit.

*Uterque
par, & si-
mul na-
tura, &
tempore.*

Hoc concesso: adfateri necesse est,
utrumque hunc Amorem, parem sibi
esse: simul natura, & tempore esse:
Origine tantum, alterum à primò
prodire: nullam tamen exinde impa-
ritatem effici. Cuncta enim hæc, cum
Scientiæ Directæ ac Reflexæ insint, ut
evidenter demonstratum est, Amori
itidem Directo ac Reflexo inerunt ne-
cessariò.

*Ex origi-
natione
nulla dif-
paritas.*

*Cur Amor
creatus
non equi-
paretur
increato.*

Non minùs & istud consequitur:
quòd Amor Creatus Amori Divino
nullo modo æquiparandus sit. Amor
enim creatus non debet esse ad se:
nam creatura per se non est; ideo &
bona per se non est: ideo amare se; ut
se, nisi perperam, & pravè non potest:
Amaret enim non bonum; quod est
contra naturam amoris: Ideoque in
φίλαυτον ἐπιτίμωσιν laberetur; nec Amor
hic, sed concupiscentia esset.

*Si imet-
ipsum
cultum.*

*Amor in-
creatus
non est ac-
cidens,
sed essen-
tia.*

Jam verò, ut ex consideratione A-
moris Creati ad Increatum ascenda-
mus: Inprimis agnoscendum est; do-
tes Amoris Creati recensitas, hoc dif-
ferre

ferre ab increata natura, quòd Amor
Creatus sit actio ad extra; Divinus
verò sit ipsummet suum esse: nam Deo
idem est amare, quod esse: Et idem
est Deus, quod amans.

Amans hic, quia solus verè est, ideo
& solus bonus est, seu solus bonum est:
ideoque & solus non potest non se ama-
re; & solus se amat meritò. Quòd non

*Deus se
solum, &
necessariò
amat.*

possit non se amare, patet; quia boni
proprietas est, amari: ipse ergo cum sit
summum, totum, solumque bonum; se
summè amet, necesse est. Ab alio enim,
summè, & adæquatè amari non potest.

Privaretur itaque summum bonum de-
bito sibi amore, si à se non amaretur.

Quòd verò id meritò faciat, patet etiam:

*Et meri-
tò.*

Non enim potest amare se aliquid me-
lius, perfectiusque: quia istud melius,
perfectiusque, Deus esset; ipse verò
Deus non esset. Non potest etiam ama-
re se quid imperfectius: quia contra
Naturam veri amoris est, imperfectum
amare; quod enim est imperfectum, bo-
num non est. Si itaque imperfectum
amaret, non bonum amaret. Quòd verò
amat propter se; eo ipso verè, & pro-
priè amat tantum se.

*Creatu-
ras pro-
pter se.*

Hic

*Increati
amoris
dotes ead-
em, quæ
scientiæ
increatæ.*

Hic Increatus Amor sui, amanti est
reciprocè consequens, ac Relativus:
Nam id amat, quod est; & id est, quod
amat. Similis quoque, & par per om-
nia; quia nec amplius, nec minus se-
ipso amat. Natura demum, & tempore
simul; quia ut est, statim se amat.

*Quod o-
stenditur.*

Origine ergo tantum Amans & A-
mor, ordinem habet; sed ita, ut ordo
hic, in Natura eadem, non faciat im-
paritatem ullam.

*Est idem
alterum.*

Ordinis hujus terminus, quia est Es-
sentia ipsa Divina; ideo Deo est coes-
sentialis, & consubstantialis; subsistit-
que, & extat; Nempe fruitione resultans
alterum idem. Idem, non multiplica-
ta, sed eadem entitate; Alterum, exi-
gentia Relationis: Est enim Amantis
ad Amare suum Relatio; Relatio verò
est ad Alterum.

*Alterum
hoc, est
Persona.*

Alterum hoc, quia totam plenitudi-
nem habet substantiæ Divinæ; ideo res
est ita extans, ut possit monstrari ut
hæc: Ideoque facit Personam.

*Persona
hec, non
est Filius.*

Persona hæc non potest dici Filius;
quia non generatione, sed processione
est. Etsi enim habet processio ista hanc
proprietaem generationis, quod sit
vivens

vivens ex vivente; alteramque, quòd
 sit ex substantia: attamen tertiam,
 nempe similitudinem, non ex vi suæ
 productionis habet, sed ex vi consub- *Quia non
 habet si-
 militu-
 dinem ex
 vi sue
 processio-
 nis.*
 stantialitatis. Mentis enim tantum, seu
 intellectus, est hæc intima, & peculia-
 ris proprietas; ut producat sibi simi-
 le. Unde fætus ejus Verbum, seu Ve-
 rum est ejus perfectissima imago. Vo-
 luntatis verò actus, cui Bonum pro ob- *Voluntas
 nō refert
 imaginē,
 sed ei
 unit.*
 jecto est; non in id Natura sua fertur,
 ut repræsentet; sed ut uniat, potia-
 tur, fruaturque. Cum itaque volunta-
 tis non sit hic finis, ut producat sibi si-
 mile; ideo non potest ejus dici genera-
 tio. Atque ita (quod demonstrandum
 sumpsi;) Spiritus Sanctus non est geni-
 tus, & non est Filius.

Sed obiici potest. Quod Amoris *Obiicitur
 quod non
 uniantur
 nisi simi-
 lia.*
 proprium est, unire; non uniantur au-
 tem, nisi similia: Ergo necesse est, ut
 Amor, dum vult unire, feratur in simi-
 le; atque ita in similitudinem producat,
 seu generet.

Respondendum huic objectioni: Ve- *Respon-
 detur,
 quod a-
 mor se
 mutat in
 amatum.*
 rum quidem esse, quòd Amor uniat; &
 quòd nequeant uniri, nisi similia: sed ex
 hoc non sequitur, quòd amans sibi si-
 mile

*Intellectus
non potest
rem
intellectam
sibi
similem
efficit.*

*Unde ejus
est gene-
ratio.*

*Volunta-
tis non est.*

*Nec effi-
cientia.*

*Nec crea-
tio.*

*Ostendi-
tur ejus
productio.*

mile producat: sed potius, quod concetur, studio Unionis, se in id quod appetit transmutare; & se similem rei Amatae efficere. Intellectus non transit in rem intellectam, sed potius eam sibi conformem, similemque efficit. Voluntas verò, seu amor id efficitur, quod amat. Unde qui intelligit, quid sit probum esse; non statim probus fit: qui autem vult esse probus; quod verè vult, est. Exinde verò patet; quod cum generatio sit, sibi simile alterum producere; non verò se in alterius similitudinem convertere: ideo, intellectus generatio propriè dici potest, non potest voluntatis. Itaque Persona, quam voluntas producit, non est Filius: quia non generatione procedit. Nullo etiam modo Efficientia, aut Creatione: quia (ut supra dixi;) quod efficitur, ex alio est; quod Creatur, ex nihilo est; neutrum ex substantia Divina. Atqui consubstantialem esse Personam tertiam Divinitati, supra demonstratum est; ideo nec Efficientia, nec Creatione producitur.

Videndum jam ergo est, quid sit tandem hæc Productio; & quem Ordinem

Ori-

Originis habeat . Quod ut deducam ;
 Hoc imprimis est Notandum . Eorum ,
 quæ ad se referuntur , tria esse genera .
 Primum Equiparentiæ , ut vocant :
 ubi est Relatorum paritas ; ut amici ad
 amicum . Disquiparentiæ alterum : ubi
 eorum disparitas ; ut Domini ad ser-
 vum . Tertium adhuc genus est Natu-
 rale , insitum , necessariò consequens :
 in quo Originis ordo est , sed inæqua-
 litas nulla est . Hujus postremi gene-
 ris , in Natura Creatâ , exemplar maxi-
 mè perfectum ego censeo in poten-
 tiis , seu facultatibus animæ : Memoria ,
 Intellectu , Voluntate . A Memoria ete-
 nim ; quam ego visionem animæ , in
 uno fixam voco ; oritur Agnitio Veri ,
 quæ Intellectus est : ab utroque autem
 Amor , seu fruitio boni ; quæ est Na-
 tura voluntatis . Et si verò tres istæ fa-
 cultates talem Ordinem Originis ha-
 bent ; attamen inter se pares , & similes
 sunt : ideo ; quia sibi consubstantiales ,
 & in unitate Naturæ sunt .

Multò autem , imò infinitè perfectiùs ,
 id totum Divinitati inest . Verum , in-
 quam , Naturalem , immutabilem , Ori-
 ginis ordinem habet . Ostensum enim
 est ,

*Referū-
tur ad se
equipa-
rata , ut
amici .
Disqui-
parata ,
ut servus
& Do-
minus .
Se conse-
quentia .*

*Quorum
exemplar
in tribus
animæ
potētiis .*

*Multo
magis
hec con-
sequētia
ordinis
est in Di-
vinitate .*

*Origo non
recipro-
catur.*

est, à Patre, ut principio, Filium pro-
cedere, & oriri. Origo autem, & Prin-
cipium, Ordinem ideo facit; quia non
potest mutuo, & vicissim reciprocari.
Unde rectè voco, Cæsaris imaginem:
non rectè verò, Imaginis Cæsarem. Sic
à Patre Filius, non Pater à Filio. Est er-
go in Divinitate Originis ordo.

*Ordo in
Divinis
est, Pa-
tris, Fi-
lii, &
Spiritus
Sancti.*

Qualis autem? Ille certè, quem for-
mula baptismi, id est, tessera fidei no-
stræ ostendit, ac comprobat. Dum
(ut ait Basilus) Oportet nos baptiza-
ri, prout accepimus; credere verò,
prout baptizamur. Nempe, in Nomi-
ne Patris, & Filii, & Spiritus Sancti.
Sub his tribus (inquit Tertullianus) &
testatio Fidei, & sponsio salutis pigno-
ratur.

*Quod
verbis
scripturae
probat.*

Hic ordo est Naturalis, & insitus.
Scriptum enim est: quòd quidquid
habet Pater, dederit Filio; & Filius di-
cit: quòd Spiritus de suo accipiat. Ad-
ditque: Omnia quæ habet Pater, mea
sunt; propterea dixi, de meo accipit.
Ex his inquam, verbis pater: Et com-
municata à Patre omnia esse Filio, quæ
servato Ordine Originis, & salva Pa-
ternitate, communicari poterant: Et

ab

ab eodem, simul cum Filio, itidem communicata Spiritui Sancto.

Nempe Amorem directum (ut supra ostensum est) habet Pater: & quia omnia, quæ Ordini Originis non repugnant, dat Filio; ideo dat ei eundem Amorem Directum. Dum verò uterque etiam habet eundem Amorem Directum; uterque etiam habet eundem Amorem Reflexum; id est Spiritum Sanctum: ab utroque, sed junctim, & ut ab uno principio procedentem, seu spiratum. Non enim participatio est hic, sed communio ejusdem Naturæ. Et ideo rectè vocatur Processio; quia à duobus, eadem amborum emanatione, est. Quæ emanatio in tertio subsistit; nec tendere ultra potest. Quia cum est Deus; cum se scit esse; & cum se amat esse: hoc ipso tota inclusa in se, se habens, seque fruens est Divinitas. Et omnia Patris habet Filius; & Patris Filiique omnia, Spiritus Sanctus.

Hæc ferè sunt, quæ mihi de Trinitate dicenda proposui. Cæterùm varias similitudines è rebus Creatis Sacra Scriptura; & ex illa, Ecclesia deducere solet, Personarum Sanctissimæ Triadis:

quas

Amorem directum dat Pater Filio.

Ex uno duorum amore directo, procedit unus utriusque Amor reflexus: qui est Spiritus Sanctus.

Nec ultra procedit Divinitas.

Varie imagines Personarum Trinitatis.

*Earum-
que Ex-
pla.*

*Et si im-
perfecta.*

*A nobis
proponi-
tur ex
forma
Trianguli.*

*Fluxu
puncti fit
linea re-
cta.*

*Quæ ut
ambiat.*

quas Patres Sancti explicant, compa-
rantque; quin imò suas quandoque ad-
dunt. Unde Filius; lux vera, lumen de
lumine, splendor, speculum, imago Pa-
tris: Spiritus Sanctus; spiratio, Ha-
litus, odor, unguentum, Sigillum, Digi-
tus, passim vocatur. Sed in omnibus
istis, semper aliquid dispar sit, necesse
est: creata enim non possunt aliter, id
quod increatum est, referre; nisi im-
perfecta imagine. Hæc præfatus; au-
debo ne & ego aliquam Trinitatis mo-
liri similitudinem? Audebo: cum, ut
dixi, habeam, qui præivere exemplo.
Ducam itaque in clausula hujus loci,
tenues quasdam tanti Mysterii lineas,
ex Trianguli consideratione, ac For-
ma.

Punctum fluxu suo facit lineam, est-
que ejus Principium; Linea verò dum
directè tendit à puncto in punctum,
recta dicitur. Sed Linea recta non am-
bit, non amplectitur; ut contineat, in-
cludatque: quia tantum in directum
fertur. Si verò supponamus, quòd re-
cta hæc linea velit complecti, ac conti-
nere; necesse illi foret, figuram Recti-
lineam quærere; & assumere.

Nullam

Nullam autem, dubio procul citius, *Necessè*
 potiùsque sumeret, quàm Triangulum: *ut appe-*
 namque inter Rectilineas figuras, pri- *tat Fi-*
 mum est, ideoque figuram appetenti *guram.*
 statim obvium. Deinde; omnium fi- *Nullam*
 gurarum simplicissimum, facillimum- *potiùs*
 que. Nam ex utroque puncto, fluxu Li- *quàm*
 neæ in unum definit; & concursu late- *Triangu-*
 rum efficitur; & seipsum quodam modo *lum.*
 definit. Quadrangulum verò non con- *Quia pri-*
 currit, non se claudit, non à se defini- *mius &*
 tur; sed ab externa & quarta Linea: *obvium.*
 ideoque magis est compositum, & diffi- *Quia fa-*
 cilius. Multò verò magis alia Poligo- *cillimū.*
 na. Linea ergo recta, prout dixi; non
 aliam figuram citius, potiùsque appe-
 teret, quàm Triangulum.

Illud autem non modò *Æquicrurum* *Appeter*
 sed etiam *Æquilaterum*. Et *Æquicru-* *non modò*
 rum quidem ideo; quia æqualiter utrin- *æquicru-*
 que fluere, donec conveniret. Deinde; *rum.*
 quia tum demum par utriusque lateris
 (ut ita dicam) via esset, ad se quanto-
 citius uniendum: contra quàm Scale-
 no, ubi inæqualia latera inæqualiter *Sed etiā*
 concurrerent. *Æquilaterum* verò ideo; *Æquila-*
 quia Linea, modum laterum Triangu- *terum.*
 li, naturaliter electura videretur ad
 Q men-

*Quia in-
variabile.*

mensuram sui. Deinde; quia inter la-
tera, non aliter de conjunctione cer-
tius convenire posset, quàm si eam su-
meret rationem, quæ una semper est,
& invariabilis; ea verò in *Æquilatero*
Triangulo tantùm est: Nam *Isofcelum*
potest esse multiplex; *Æquilateri* ve-
rò modus unus tantùm, & immuta-
bilis.

*Hæc Tri-
nitati a-
stantur.*

Sic deducta *Trianguli Natura*, apte-
mus eam *Divinitati*; manca equidem
similitudine; sed si benè expenderis,
profectò inter illas, quæ adferri solent,
non postrema.

*Unum à
se ens.*

Cogito itaque αὐτὸ τὸ ἐν ἐν nempe
Deum Patrem, & Principium *Natura*
ferri, & tendere directè in terminum
agnitionis sui, seu ad τὸ ἀληθές. Directè

*Pater
Principiū*

Verum.

inquam: Nam id fit visione; quæ non
potest esse, nisi recta. Est igitur hæc
quædam recta *Divinitatis Linea*, ter-
minos oppositos habens: sed ita; ut
quod in linea creata, est à puncto ad
punctum directæ protensio; id in in-
creata, sit unius termini ad alterum,
Naturæ ejusdem, itidem directæ com-
municatio.

*Visione
directa
fertur in
unum.*

*Efficitq;
rectam.*

*Æterna
hæc linea,*

Hæc æterna, & recta *Linea*, dum ex

vi Naturæ suæ in directum est ; non
amplectitur, non ambit, non continet.

*quia rea-
cta ; non
includit.*

Divinitatis autem Natura, necesse est,
ut se plenè habeat, definiat, includat-
que ; & quodammodo figuram appetat :

*Appetit
autē in-
cludere.*

id est ; in tertio terminetur, claudatur-
que. Nempe ab utroque termino, à Pa-
tre & Filio, seu ab Uno, & Vero, ejus-
dem Substantiæ Processione, velut com-

*Ideoq; in
Trigonū.*

munis Lineæ fluxu, definit in τὸ ἀγὰδόν : Bonum
completque Sanctissimum hoc Patris,
Filii, & Spiritus Sancti Trigonum.

Bonum

Non enim Quadratum, aut Poligo-
num : quia tunc, non se ipsam Divini-
tas clauderet ; sed aliunde, & ab extra,
Composita esset ; & , ut ita dicam su-
perflua.

*Non ve-
rò qua-
dratum
forma-
tur.*

Trigona itaque (fas sit dicere ;) est :
Atque, ut insistam similitudini ; non
Æquicrura modò, sed etiam Æquilate-
ra. Etenim non duo tantum latera, ob
æqualem terminorum ad se conjun-
gendum vim, habet ; sed tria, omnino
paria inter se ; imò & eadem prorsus.

*Illudque
Æquicru-
rum, &
Æquila-
terum.*

Nempe ; sicut, si in uno Triangulo sint
duo ejus latera, radii ejusdem perife-
riæ ; deinde duo iterum ejusdem late-
ra, itidem sint ejusdem periferiæ ra-

*Quod de-
monstra-
tur geo-
metricè.*

dii; dum duo, tertio conveniunt, pariaque sunt; & inter se quoque conveniant, pariaque sint, necesse est. Sic, quia eadem Substantia (velut periferia) est Patris, & Filii; eademque etiam Patris, & Spiritus Sancti: ideo consubstantiales, id est pares inter se, & æquales sunt, Pater, & Filius, & Spiritus Sanctus.

Ad mensuram sui est.

Et invariabilis.

Quod verò de Triangulo Creato dixi; quòd eum Linea ad mensuram sui productura videretur: Id, Natura ipsa Divinitati insitum necessario est; ut æquales per omnia, & pares Personas, velut latera, producat. Cùm ut Trianguli æquilateri; ita & hujus productionis certissima, invariabilis, & unica tantùm hæc Forma est; ut sit ad mensuram sui, per omnia par, & æqualis.

Ex eadē imagine patet Ordo Originis.

Ex eadem similitudine, monstrari potest Ordo Originis in Divinitate. Cùm, ut à fluxu puncti, Linea; sic à generatione Patris, Filius. Sicut autem à fluxu Lineæ, junctæ duobus terminis, procedit tertius terminus Trianguli; sic à Patre, Filioque, velut ab uno conjunctoque principio, Spiritus Sanctus.

Hæc

Hæc est similitudo, à me non pro-
sus, puto, ineptè prolata; ita tamen,
ut ab ea, id quod rebus creatis imper-
fecti adhæret, semper secernamus, se-
paremusque: Nempe protensionem,
fluxum, spatium, compositionem, alia-
que hujusmodi; quæ indivisibili, & sim-
plicissimæ Naturæ nullo modo conve-
niunt.

*Sed ab
hac simi-
litudine
secernen-
da im-
perfecta.*

Sed quid ego, & quousque ista? quid,
inquam, vel digito tangere, vel palmo
metiri cælum, vel certè mare in scro-
bem satago effundere? Desino: nec ir-
rito conatu fatigo ultra mentem, tantæ
imparem Majestati; quæ fide, & silentio
adoranda est.

*Conatus
ultra
scrutandū
reprimi-
tur.*

Adoro te ergo toto animo, Trinomi-
nis Divinitas: & quia posuisti tenebras,
latibulum tuum; in adyta tua absconsa,
& tibi soli nota, non ultra penetro. Sed
cum Sanctis, qui tibi assistunt, faciem
velo: & oculos mentis meæ, debiles ad
hunc solem, obtego; & unà, cum loco
hoc, claudio.

*Et debi-
ta adora-
tione lo-
cus clau-
ditur.*

Pars Capitis Altera.

Ut erga nos est Deus : Ubi Creationis primum, & post Missionis ad nos Divinarum Personarum ineffabile beneficium expenditur : ex quo manarunt Triplicia dona, Naturæ, Gratiæ, & Gloriæ.

Deus ipse sibi sufficit.

Apparet evidenter ex superiori Tractatione, Deum unum Naturæ, & trinum Personis, sibi abundè sufficientem esse; nullius rei, quæ extra illum est, indigum; ante omnem Creaturam æquè beatum; & post illam productam, nulla re auctum. Nullius ergo sui commodi causa esse voluit, & existere universum hoc: & se impertiri decrevit rebus creatis ideo tantum, ut benè illis esset. Elucet verò, & eminet maxime, & præcipuè, hæc omnipotens & omniscia bonitas, seu voluntas ejus, in Creatione Naturæ rationalis. Etsi enim cuncta, quæ produxit; vidit, quòd essent valde bona; ideoque & bene omnia fecit; & omnibus benefecit: non tamen æquè illi Naturæ, quæ se esse nescit; ut illi, quæ se esse, cum tot dotibus miratur,

Nec ullà creaturà eget.

Produxit illà, quia bene ei voluit.

Præcipuè rationalē.

tur, agnoscit, gaudet. Natura verò hæc, *Quæ sola se esse agnoscit.*
 Angelorum est, & Hominum. De Angelis non est nostri argumenti. Homo autem, quæ ab illo tulerit bona, Naturæ, Gratiæ, & Gloriæ; pro modulo Scripti, paucis videamus: cum cura tamē, & attentē; exinde enim manat cultus & amor, quo erga Deum, lege *Et agnoscere debet, triplicia sibi data dona.*
 gratitudinis, immensum tenemur.

DONA NATURÆ.

ORdior meritò à Donis Naturæ, *In donis Naturæ.*
 & Origine ipsa nostri: quando prima hæc est gratia, primumque Dei beneficium, quod nos voluerit esse, & existere. Tria hic perpendam: statum nempe Naturæ nostræ; Deinde corpus; Postremò Animam.

Status, seu Conditio humana, quod *Cōditiōnem humanam.*
 omnibus, quæ Deus sex Dierum spatio produxit, antecellat; patet evidenter. Hominem etenim velut summam, & culmen operum, ultimò produxit. Præparata primùm ornataque mundi mansionem, velut hospitem eum, imò Patrem familias, ac Dominum in hanc Orbis *Quæ sublimis, & eximia.*
 machinam introduxit: Paradisi volu-

præparatis habitatorem illum fecit : Quæ ante eum facta sunt, ejus usus addixit : præesse, ac dominari jussit omnibus : Compendium denique in illo Naturæ Creaturæ inclusit. Nam est corpus, ut Elementa : vivit, ut arbores : sentit, ut animalia :

*Et compendium
creaturæ.*

Ratione gaudet, ut Spiritus. Præterea ^{clut oēs oiv} eum fecit ; id est sui arbitrii, suæ spontis ac potestatis ; ac denique immortalitate dotavit. Eximius itaque status ejus est. Unde non malè hominem, parvum mundum ; Mundum, Magnum hominem vocare : sed profectò superat hoc elogium ; & Mundo visibili potior, & præstantior est.

*Corpus ei
par.*

*A Deo
velut e-
laboratū.*

Ad Statum autem tantæ dignitatis, aptavit illi par corpus, aut potius (ut loquitur Scriptura) formavit. Nam alia, jussu tantum & imperio, velut fundit productione : hoc dum formasse dicitur ; elaborasse videtur cum diligentia, elegantia, venustate ; idque seorsim ab anima, & separata functione. Deinde, de aliis dixit, & facta sunt : hic ; faciamus, ait : quod consultatio- nis est, & destinati cum cura operis ; ut nempe Dominus omnium esse possit, qui

qui propriè factus à Domino, inquit
Tertullianus.

Refert verò, ac repræsentat hanc cu- *Magna*
ram, Opus ipsum: ejusque forma, & *venustate.*
statura erecta, ad cœlum vergens; libe-
rum nescio quid spirans; speciem na-
tam ad imperium, & dominationem
præferens; contra quàm animalia cæ-
tera; quæ prona ad terram, statum fer-
vilem, submissum, & ad humum hu-
mitem, abjectumque habent.

Jam, quæ aptitudo, quæ symmetria, *Symme-*
quæ compositio membrorum? Nullum *tria, &*
est, quod non & eximiæ necessitatis *aptitudo*
causam habeat, & decoris. Vel solius *membro-*
tum.

certè manus, quæ homini tantum data, *Et præci-*
varium usum, quis satis explicet? Hæc *pue ma-*
est instrumentum omnium operum, *nus.*

quæcunque mens humana vult moliri:
hæc sustentationis ministra: hæc tutela
vitæ: hæc experimentum virium huma-
narum; quibus regit, ac domat se infe-
riora: hæc cultura artium, ac elegan-
tiæ omnis fabra, & opifex: hæc deni-
que est; cujus admiratio, nescio cui, ad
testimonium Divinitatis suffecit.

Quid verò abdita illa corporis scru- *Sensuum*
ter? sensus nempe, miri artificii organa: *organa.*

& præ-

& præsertim oculorum, qui vigiles, velut in specula, constituti sunt animi indices, & mentis quidam prodromi.

Quid facultatum; naturalis, (ut vocant;) vitalis, animalis, in hepate, corde, cerebro, admirandas officinas? quid sexcenta alia, nunquam satis cognita laudataque? in quibus, nec pro modo Scripti, nec pro argumento, sit prolixa, & diffusa dissertatio.

Facultatum naturalis, vitalis, animalis, officine.

Anime præstaria.

In illa imago divinitatis.

Et in memoria, intellectu, voluntate;

Ad Animam ergo potius transeo; ubi propria imago, & similitudo Dei spectatur, ac elucet: ad quam, se fecisse hominem, Deus ipse professus est. Hanc similitudinem variè proponunt Sancti Patres; sed inter illos Ambrosius, & Augustinus præcipuè; ad tres Divinitatis Personas Memoriam, Intellectum, Voluntatem aptant; etsi non eo similitudinis modo, cuius ego aliquoties memini in hoc Scripto; & quem puto, ex adyto ipso Naturæ depromptum.

Tres enim hæ facultates, una anima sunt. Et quia insitæ ejus essentiæ, & naturales; ideò coessentialiales, atque adeò pares sunt: & Ordinem tantum,

ut

ut supra dixi, Originis habent; eum-
que talem. Fixa Memoria in uno; (a-
lioqui nisi in uno consisteret, non con-
staret sibi; & non Memoria una, sed
phantasma multiplex esset:) fixa in-
quam in uno, Originem præbet confi-
derationi istius Unius; id est Intelle-
ctum producit Veri; ex utroque autem
Voluntas procedit, seu quies in Bono.
Quid enim aliud videat, noscat, appe-
tatvè Anima; quàm Unum, Verum,
Bonum? Deinde, quomodo plenè vi-
deat, noscat, appetatvè, si non tota?
quomodo autem tota; si non simul, &
æquè per Memoriam, Intellectum,
Voluntatem?

Patet itaque: hisce tribus, tres Per-
sonas Unius Divinitatis repræsentari.
Patet, Animam humanam, hac simili-
tudinis prærogativa, ad Divinam assur-
gere Naturam; ejusque capacem debe-
re fieri; ideoque meritò, tam amplis
dotibus ornatam, dum nempe cogita-
tione mente, affectu, momento uno,
tot res adit, noscit, amplectitur: &
hoc ipso temporis, loci, imò universi
metas excedit, seque cunctis rebus ma-
jorem ostendit, nec posse ab ulla ea-
rum

*Trinita-
tis speci-
men.*

*Exinde
ad Divi-
nam as-
surgit
naturam.*

*Et in illa
conquie-
scit.*

rum contineri ; nec in ulla nisi in solo Deo plenè conquiescere , apertè testatur .

*Sic orna-
ta vide-
tur ob fu-
turam In-
carnatio-
nem .*

Ultra hoc , nihil est quod addam , præter unum : nempe ; non mirum tot , & tantis ornatam , in primo Parente dotibus , esse humanam Naturam : quæ in consortium Divinitatis , & unitio- nem Personæ , assumpta à Christo ; & cœlo illata esse debuit : ut statim osten- dam .

DONA GRATIÆ.

Per Missionem Divinarum Personarum .

*Non con-
tentus
Deus ho-
mini de-
disse , quæ
extra
ipsum .*

MAgnum itaque , & vastum pro- fectò est , quòd in Naturæ do- nis , humano generi impertiit Deus : & si spectas conditionem nostram ; abundè , sat , superque : sed si ejus bonitatem , & beneficentiam ; pa- rum . Infinitum enim bonum , haud po- tuit beneficam suam vim explere , lar- gitione eorum , quæ extra illud sunt .

*Se ipsum
dedit .*

Itaque , ut satisfaceret bonitati suæ , se dedit .

*Votum : ut
ex merito .*

Utinam verò genus humanum , non ut solet , sed ut par est , expendat : quid hoc ,

hoc, quantumque est; quod Deus, in *expende.*
 ejus bonum est molitus; cum in terra *refert.*
 visus, & cum hominibus conversatus
 est, & habitavit in nobis; & vidimus
 gloriam ejus: nempe Deum manife- *Missio Fi-*
 stum in carne; qui visitavit nos Oriens *lis.*
 ex alto: Missionem hanc, inquam, pri-
 mam; quæ est per *σπρονσιντας λόγος*,
 seu per Verbum carnem factum: Alte-
 ram deinde; quæ per adventum Para-
 cleti Spiritus Sancti; agnoscamus: & *Missio*
 ab utroque mare immensum gratiæ Di- *Spiritus*
 vinæ expendamus. *Sancti.*

Quod ut probè fiat; inprimis, quid *Utraque*
 sit in Divinis Missio, necessarium est *non est de*
 noscere. Non enim est, ne quis erret, *loco mi-*
 de loco in locum migratio: (hoc enim *gratio.*
 Deo, qui ubique est, non convenit.)
 sed est ejusdem semper, immoti, & im-
 mutabilis Dei, facta hominibus in tem-
 pore; sui manifestatio. Id ergo est Mis-
 sus, quod visus; id Missio, quod appa- *Sed ap-*
 ritio. *paritio.*

Porrò temporalis hujus Missionis ra- *Modus*
 tio, & modus, manat ex Origine, ac *Missionis*
 Processione illa æterna, quam, cum de *manat.*
 Trinitate agerem, deduxi.

Sicut enim Pater genuit, & Filius ge- *Ex gene-*
 nitus

*ratione
& proces-
sione æ-
terna.*

nitusest; ita Pater mittit, & Filius mis-
sus est: & sicut à Patre, Filioque proce-
dit Spiritus Sanctus; ita ab utroque
Missus est. Interim, hæc Missio non est
(inquit Divus Augustinus) inæquali-
tas substantiæ, sed Ordo Naturæ: quam-
vis enim utraque Persona se nobis ma-
nifestavit; utraque tamen immota
mansit; in una cum Patre Divinitate,
& essentia.

*Oecono-
mia In-
carnatio-
nis.*

Hujus Missionis in Christo Oecono-
miam, seu modum, dispositionemque,
Ecclesia Catholica ejusmodi profite-
tur. Nempe; Secunda Divinitatis Per-
sona, quæ est Filius, æqualis & Coæ-
ternus Patri; cum venisset plenitudo
temporis; illi soli nota, qui novit, &
constituit tempora; nasci ex Virgine
voluit: & assumpsit Naturam huma-
nam, totam & integram, ex anima &
corpore constitutam; eamque Naturæ
Divinæ univit: ita, ut duæ Naturæ, &
una Persona, esset Christus; Verus
Deus, Verus Homo.

*Christus
verus De-
us, verus
Homo.*

*Duæ na-
turæ, una
Persona.*

Duæ inquam in Christo sunt Natu-
ræ. Si enim una tantum statueretur; ea
vel Divina, vel humana esset. Si Divi-
na tantum; non esset homo: si humana

tan-

tantum; non esset Deus. Quem tamen,
Deum & Hominem, Sacra Scriptura,
& gesta ejus loquuntur evidenter: par-
tim enim Divina prorsus, partim verò
humana tantum, operatus est.

Si verò dicas unam Naturam, ex
duabus compositam, conflataque;
Id fieri nequit, sine alterutrius vel in-
teritu, vel imminutione: & necesse, ut
vel Divina degeneret in humanam; vel
hæc ab illa absorpta, & absumpta sit:
Atque ita neutra integra; sed nescio
quæ nova, mixta, & imperfecta.

Duæ ergo sunt Naturæ: & ideò di-
spares, & cuique propriæ, ac peculia-
res sunt affectiones; atque functiones. *Dispar-
naturarum
functiones.*
Unde nasci, lacte ac cibo ali, carnis
necessitates sustinere, ac sustentare; pa-
ti denique ac mori, humanum. Mira
verò vi propria facere: morbis, morti,
mari, ac ventis imperare; dæmonis re-
gnum evertere; non peccasse unquam
nec peccare posse; peccata verò alijs
dimittere; cogitationes nosse; animis
nostris (nempe ut in illum credamus)
imperare; Divinum.

Et si verò functiones istæ, utrique
Naturæ separatim peculiare; attamen
*Tamen
tandem
de una*
ob

prædicari possunt. Impatibilibus. ob unitatem Personæ, tanquam de una Persona meritò prædicantur. Inde est: quòd etsi Deus *ἑπ' αὐτῆς, ὅτι ἡ ἀσωμάτος*: tamen quia Corpus sibi, ut proprium assumpsit; ideò Deus passus dicitur. Unde Petrus, Christum in carne passum, & Paulus Dominum gloriæ Crucifixum, dixere. Et Maria *Θεοτόκος*; & Nativitas Christi, vel Apparitio, *Θεοφανεία* rectè dicitur: ex prærogativa nempe Personæ, cui Divinitas inseparabilis est.

Causæ Incarnationis. Sic explicata Oeconomia Incarnationis; Causas, cur Deus mirum hoc voluerit, effeceritque; non pigebit recensere, cum piis, Sanctisque Patribus: quorum pulcherrima utriusque linguæ loca Dionysius Petavius, mira profectò peritia, industria, ac diligentia collegit. Videamus ergo, depromamusque ex hac penu inprimis Finem, quem sibi proposuit Deus: Convenientiam deinde, qua eum est executus: denique Necessitatem ejus.

Finis est gloria Dei. Finis omnium Dei operum, etsi passim, & verè assignatur Gloria ejus: cum præter hanc, nihil aliud ad eum, ob collata creaturis beneficia, redundet,

ac redeat : attamen cum hæc ipsa Glo-
ria , quæ est laudantium consentiens
vox , & nihil in se solidi fructus habeat ;
& etiamsi haberet , tamen Deo sibi suf-
ficienti addere nihil posset : Ideò di-
cendum est ; quòd etsi Gloria necessa-
riò comitetur opera ejus ; tamen fi-
nem eorum non esse aliquod ex illa
emolumentum ; sed solum Naturæ be-
neficæ , ut ita dicam , gustum : dum be-
ne fecisse , & amat unicè , & gaudet ;
& fructum ex se , & facto suo capit . In-
finitæ inquam Bonitatis ejus , in bene-
faciendo (ut ita dixerim) satietas , fi-
nis est : quòd apparuerit benignitas ,
& humanitas Salvatoris nostri Dei ;
ut tam diffitam , & conditione , &
culpa , naturam assumere , & reparare
voluerit .

Hæc eum impulit Primùm ; ad sui
Conjunctionem : quæ major esse non
potest , quàm in hoc Incarnationis My-
sterio ; cum Deus Homo factus est , ut
Homo fieret Deus . Deinde ad opitu-
lationem : quæ tantò major est , quantò
magis miseris subvenit , nec sese juvare
valentibus . Denique , ad profligan-
dam mali Dæmonis sævitiam ; qua ex-

*Aut que-
dam Be-
nitatis ,
& benefi-
centie sa-
tietas.*

*Et hinc
maxima ,
que possit
esse , com-
munica-
tio .*

*Opitula-
tio .*

*Vindica-
tio à Dæ-
mone .*

R.

erce-

ercebat regnum, fraudulenter victi, in primo Parente, generis humani.

Convenientia Authoris. Hic ergo finis est admirandi hujusce Operis. Convenientia sequitur: quæ ostendit; à nullo; (præter Deum ipsum) convenientius hominem vindicari debuisse. Magis enim obligaretur homo Creaturæ id sibi præstanti, quam Deo. Cui itaque debemus (inquit Divus Augustinus) quod sumus; meritò illi convenit debere, quod post lapsum, justificati sumus.

Nempe nullius, præterquam Dei. Si autem Divinitati competiit nos vindicare: conveniebat; ut id secunda ejus Persona, id est Filius, exequeretur. Ab illo enim nos decebat refici; per quem nos, & omnia facta sunt. Deinde, Filius est propriè imago Patris, & figura substantiæ ejus: per hunc itaque, amissa in nobis imago Dei, restitui debuit. Qui cum assumpserit hominem, non in unitatem Essentiæ, sed in unitatem Personæ: sequitur; quod etsi Trinitatis una sit actio; Personæ tamen Filii, propria hæc sit assumptio.

Modi Convenientia. Post Convenientiam Authoris, non minus elucet Convenientia Modi. Expediebat enim apparere, & manifestari homi-

hominibus Deum : apparere verò non potuit , nisi velo corporis contextus ; quando ne Moysis quidem faciem mortales oculi sustinere potuerint , recenter à Deo venientis . Si autem corpore tegi debuit ; nullo convenientius , quàm humano . Decuit deinde , in hac Natura Dæmonem vincere , quæ à Dæmone victa est : Major enim exinde certaminis , ac victoriæ , & æquitas , & gloria .

Ut in carne nostra.

De sœmina etiam nasci , itidem consentaneum fuit ; Nam ut per mulierem primam mors ; ita salus per alteram . Et ut Eva culpæ Mater ; ita gratiæ , *Maria* . Ex Virgine autem : quia noviter nasci debuit novæ Nativitatis dedicator ; per quem homo nascitur in Deum , quia Deus in hominem natus est . Deinde ; Virgo adhuc erat terra , nec ullo attrectata opere , ex qua formatus Adam : ideò alter , & novus Adam , itidem ex Virgine . Et , sicut æterna generatio sine Matre ; ita quæ in tempore Nativitas , sine Patre : ut nempe una Persona , & binos tantum , & convenientes Naturis , haberet Parentes .

Ut de sœmina.

Et q; Virgine n. sceretur .

Neg; verò indecorum , Deum assumpsisse carnem . Nam qui de limo fecit

Nō indecorū, quod

carne
assumpsit. hominem; quis arguat, quòd per car-
nem refecit? attrectavit primum, cur
non susceperet alterum? si enim non
verè suscepisset, quis eum verum ho-
minem dixisset? si autem verus homo
non fuisset, quæ causa simulatæ Natu-
ræ? quorsum, inquam, homo, non
tamen homo?

Et quòd
infirmi-
tas nostras
portavit. Nec dedecet, quòd infirmitates no-
stras ipse portavit. Sustinuit enim
non impositas, sed assumptas: sustinu-
it; non succubuit: hoc enim imbecil-
litis esset; illud Fortitudinis, & Vir-
tutis. Subiit ergo dolorem & mortem:
quia & in dolore tolerando, & in mor-
te subeunda, Virtutum officia versan-
tur: quæ Magister, & Præceptor per-
ferre debuit; ut ostenderet perferri pos-
se: nec repugnare id mortali, fragili-
que Naturæ; quod, eam indutus, fe-
cit ipse.

Tertia
Convenien-
tia tem-
poris. Tertia Convenientia est Temporis:
quæ etsi illi soli cognita, qui cuncta
fecit in tempore opportuno: attamen
post correctum genus humanum, lege
promulgata; post præmissa de se Pro-
phetarum testimonia; & mira opera
adstruendæ sui notitiæ facta; dum me-
dium

dium silentium tenerent omnia, & pacatus per Augustum Orbis esset; dum ultima Monarchiarum Roma, ad summum perducta fastigium, & arx omnis superstitionis est facta; dum Hierosolyma in mores gentium paulatim transiret; dum Synagoga in sectas scissa philosopharetur, & Platonem aut Zenonem potius, quàm Mosem saperet; dum per idololatriam toti Orbi princeps mundi hujus imperaret; ut tandem eiiceretur foras, & regnum peccati destrueretur; nasci in hominem Deus commodum, opportunum, & conveniens judicavit.

*Ejus
idonea
causa re-
censetur.*

Convenientia monstrata; jam, (ut promisi,) Necessitas Incarnationis ostendenda est. Quæ nulla equidem absoluta, antecedens, & cogens Deum, dari potest; dari tamen potest congrua, & consequens: Nam Deus semper vult fieri, quæcunque verè convenit fieri. Et sicut, quantumlibet parvum inconveniens, est illi impossibilitas; ita justa ratio, est illi consequens necessitas. Has itaque consequentes necessitates ex sensu Sanctorum Patrum recensebo.

Necessitas Incarnationis.

Non absoluta.

Sed consequens.

Prima est, quia peccatorem redimere non potuit, nisi peccato non obnoxius. Prima autem est. Quod non potuerit genus humanum in Peccatum lapsum, reparari, nisi ab eo, qui & peccati, tam Originalis, quam commissi, seu (ut vocant) Actualis expers, & ἀνυπόκριντος omnino, id est, ut ita dicam, impeccabilis esset. Non enim subvenire peccato potuit simili peccato semel nexus, & semper obnoxius: nec intervenire pro sceleratis servis complex, & adstrictus iugo servitutis: nec satisfaciens gratus, acceptusque esse potuit, odium meritis, nec immunis à peccato. In quo igitur non erat, nec esse potuit peccatum, ipse venit auferre peccatum. Nam si in ipso quoque fuisset, aut esse potuisset peccatum; auferendum illi foret, non ipse auferret.

Altera, quia satisfactio plena esse non potuit, nisi ab Homine Deo. Altera consequens Necessitas Incarnationis est. Quod offensa, ac injuria Dei, à genere humano placari, ac compensari debuit iusta satisfactione; satisfactio autem iusta, ac perfecta est, quæ totum quod tenetur, liquidò & planè exolvit, sine ulla condonatione. Talem autem nec homo, nec Angelus præstare Deo potest: nihil enim uterque habet, quod de suo, in solutionem

ei imputet . Qui itaque eam præstaret ; necesse est , ut communi , & pura Creatura major esset : Nihil autem tali Creatura majus, nisi Deus homo factus.

Tertia Consequens Necessitas petitur ex magnitudine , & atrocitate peccati . Quod est ideò infinitè malum , quia adversum , & ex opposito contrarium infinito bono . Tolli itaque non potuit , nisi ab infinitè digna , id est , una cum Deo, imo ipsamet Divina Persona : quæ & texit, quâ sine labe homo, infinitâ vilitatem offendentis ; & æquavit , quâ Deus, infinitam Majestatem offensi : condignus inquam Mediator , & sequester pacis Christus ; imis summa conjungens , & faciens utraque unum . Interventu nempe suo , velut ponte quodam , terrena cælestibus , humana conjunxit Divinis ; quæ absque illo conjungi nullo modo poterant .

*Tertia :
quia infinita culpa infinitis erat meritis præfanda .*

Quartò adstruitur Consequens Necessitas exinde . Quod si ne in pristinum quidem statum redire per se potuit genus humanum ; quantò minus æternam felicitatem mereri , & obtinere ? eam verò cum homini destinasset , & præparasset Deus ; necesse fuit , ut

*Quarta :
quia si homo veniam non potuit mereri , quantò minus præmium .*

præstitisset : præstari verò prævaricatori justè non potuit , nisi & post satisfactionem ; & ob meritum : solvere autem , ne dum mereri , non erat virium humanarum . Itaque ipsum , humanitate assumpta , & abolere culpam , & præmium hoc ingens mereri , oportuit ; per quod Filii Dei nominamur , & sumus : si autem filii ; & hæredes gloriæ ejus : hæredes inquam Dei , cohæredes autem Christi .

Necessitates hæc approbavit succensus .

Hæc necessitates videtur Deus eo ipso ostendere voluisse ; quòd etsi magna , & eximia multa , reparandi hominis causa , consultò præmisisset ; frustra tamen omnia , nisi hoc Incarnationis mysterio completa , fuissent . Non quòd non essent Dei simul , & statim , perfecta opera ; sed ut manifestius , & morbi , & remedii magnitudo pateret .

Qui non securus ex lege Naturæ .

Gradus verò hujus operis hi fuere . Primum ; videns Deus , quòd multa malitia esset hominum in terra , ad malum omni tempore : ut mederetur tam gravi morbo ; Legem Naturæ , insculptam semel in cordibus nostris , & nunquam deleri penitus passus est ; & semper reintegravit : manifestatione sui , allocutio-

cutione, admonitione, præceptis, sô-
niis, signis, præmiis, ac pænis: quæ
cuncta in Patriarcharum, & Propheta-
rum gestis spectantur.

Deinde; cùm hæc non sufficere vi-
derentur; Legem scriptam promulga-
vit: ea Majestate, quæ talem, tantum-
que legislatorem deceret: qua de re
in tertia parte capitis hujus dicitur
uberius.

*Nec ex
lege scri-
pta.*

Tertiò; addi forsan potest: non jam
Israelitæ tantum datum; sed per gen-
tes sparsum, & optimis quibusque
ingeniis insitum, sapientiæ studium:
per quod impressas, innatasque men-
tibus nostris Veri notiones, ad artis
& scientiæ modum perducere conati
sunt multi: idque sæpe haud irritè;
ut testantur non pauca, quæ vetus
Philosophia prodidit, arcanæ profe-
ctò, & abditæ veritatis. Id verò, etsi
absque adminiculo apertæ revelatio-
nis; non tamen certè sine Divino
instinctu, & occulta quadam men-
tium, velut manuductione. Non enim
alius, sapientiæ has scintillas sparge-
re potuit, nisi Sapientia ipsa; id est
Deus.

*Nec ex
diffami-
ne Philo-
sophiæ.*

*Tria hæc
non juve-
runt cor-
ruptum,
genus hu-
manum.*

Tria verò hæc, etiamsi eximia, non attulere tamen plenam generi humano medelam. Nam Lege Naturæ, & Scripta, nunquam ita cultus Veri Dei obtinuit, ut πολυθεΐα, & idololatria tolleretur; nec Judaismus Dei Veri notitiam ad gentes transmisit. Unde, Deus Israelis vocatus, qui omnium esse debuit: & ignoratus ubique; & tantum notus in Judæa Deus. Philosophia verò multò minùs id præstitit: dum aut non firmiter unum authorem, & rectorem universi docuit; aut si docuit; (ut forsitan secta Stoica:) nullo tamen fructu ad cultum eius: imò adeò eum insuper habuit; ut ei Sapientem suum vel æquaret, vel præferret. Immortalitatem autem animorum nulla prorsus professæ est, aut firmiter asseruit. Neque id mirum: sicut enim (inquit Augustinus;) oculus absentia, id est à sensu remota non videt; ita mens humana, invisibilia & æterna, quæ ultra caput ejus sunt, non agnoscit. Uti verò, quæ scire, quæ videre non possumus; illis credimus, qui sciunt, qui viderunt: ita Divina & æterna, à Deo æterno tantum didicisse oportuit.

Itaque:

Itaque : ut ultima tandem manus imponeretur tanto operi ; postquam Deus multifariam , multisque modis olim locutus esset Patribus , in Prophetis ; novissimè loquutus est nobis in Filio : & docuit nos omnem veritatem ; per eum , qui est Via, Veritas, & Vita . Ita ut jam totum genus humanum, Deum Verum ; ejus Providentiam ; & demum vitam æternam agnoverit, credideritque ; eaque obtinuerit salutis subsidia , quæ recensui compendio, cum de Gratia tractarem ; & quæ dicam infra uberius : ad quæ loca , ne tautalogus sim , meritò Lectorem remitto .

*Itaq; ult.
tina im-
posita
manus .*

*Incarnat-
ione Dei.*

*Cujus
fructus
ante re-
censiti .*

*De altera , nempe Spiritus
Sancti Missione .*

Sequitur jam altera manifestata nobis Missio Tertiæ Divinitatis Personæ , nempe Spiritus Sancti ; pari compendio, eodemque ordine tractationis explicanda .

Oeconomiam ejus Ecclesia Catholica profitetur talem . Post perfectum, consummatumque redemptionis nostræ opus, quod Filii Persona implendum

*Oecono-
mia mis-
sionis
Spiritus
Sancti .*

dum suscepit; cum idem Redemptor
rogaret Patrem, ut alium Paraclitum
daret nobis, qui maneret nobiscum in
æternum: & rogatu ejus, & meritis,
venit Paraclitus Spiritus Sanctus; quem
misit Pater in nomine ejus. In nomine,
inquam, ejus: sicut enim in æterna illa
Processione, à Patre Filioque origi-
nem habet; ita & ab utroque tempora-
lem missionem. Quæ tum primum ma-
nifestata nobis; cum Filius opus con-
summasset, quod illi dedit Pater ut fa-
ceret: ante enim non erat plenè Spiri-
tus Sanctus datus, quia Jesus nondum
erat glorificatus.

*Narratio
hujus
Missionis.* Acceperunt ergo credentes, virtu-
tem Supervenientis Spiritus Sancti in
eos, tum primum; cum compleren-
tur dies Pentecostes, & essent omnes
discipuli pariter in eodem loco. Factus
enim tum repentè de cælo sonus, tan-
quam advenientis Spiritus vehementis;
& replevit totam domum, ubi erant
sedentes. Et apparuerunt illis dispersitæ
linguæ, tanquam ignis; seditque supra
singuloseorum.

*Per quã
sigillum
sanctifica-
tis.* Miro tum, inquam, modo commu-
nicationis, per infusionem quandam,
& il-

& illapsum Substantiæ suæ, impressit Spiritus Sanctus velut sigillum, ac formam sanctificationis animabus creditum. Ante hunc diem Patriarchis, & Prophetis, quin imò & Apostolis, per Operationem tantum, & effectum charismata sua largitus est: tum verò demum personaliter, & substantialiter, non dona tantum sua, sed seipsum infudit; ut Scripturæ loca evincunt, cum eum nobiscum manere, in nobis habitare, nos templa ejus esse, & denique ut pignus, & arrhabonem, eum habere testantur. Quæ cuncta substantivam, & personalem in sessionem declarant; factam non tantum per gratiam Operationis (inquit Augustinus;) sed per ipsam Divinitatis ejus præsentiam: ita, ut in vasa cordium, animarumque (inquit idem;) non jam odor balsami, sed ipsa substantia sacri defluerit unguenti. Cujus conjunctionis peti similitudo potest à mixture metallorum, vel olei cum cera; vel cum aquæ vinum infunditur.

Non est tamen ea unio, quæ ex duabus Naturis in Christo. Ibi enim à Deo in unitatem Personæ assumpta Humanitas;

*Tum pri-
mū per-
sonaliter
descendit
ac sub-
stantivè
insedit
animas
Spiritus
Sanctus.*

*Cujus
rei exem-
pla crea-
ta.*

*Communi-
catio
hæc dif-
fert ab
unione
hypostas-
tica.*

nitas ; hic Humanitati communicata
Divinitas : ibi uni , & individuo homi-
ni propria ; hic pluribus æquè imperti-
ta : per illam Homo verus , Deus verus ;
per hanc in filios Dei hominum ad-
optio ; non Spirituum , sed Spiritua-
lium . Unde ibi naturalis unio ; hic
habitualis tantum .

*Causa hu-
jus Mis-
sionis bo-
nitas Dei*

Causam Missionis istius , Divinitas
non aliam , quàm in Incarnatione ha-
buit : nempe beneficæ Naturæ suæ vim,
& se communicandi insitum appeti-
tum . Per hunc , ut à Filio facta copio-
sa redemptio ; ita à Spiritu Sancto San-
ctificatio nostra .

*Et san-
ctificatio
nostra .*

*Que non
potuit ef-
se nisi à
Deo, unde
Auroris
convenien-
tia .*

*Nā crea-
tura non
potest
quid su-
pernatu-
rale pro-
ducere .*

Non enim hæc ab alio esse potuit ,
quàm à Deo . Nam Sanctificatio , est
animi humani , supra ejus vires natura-
les , gratis effecta capacitas ; quæ Deo
plenos , ejusque consortes naturæ effi-
ciat . Creatura itaque non potest san-
ctificare Creaturam ; quia quod Na-
turale tantum est , Supernaturalem ef-
fectum non producit . Deinde ; nulla
res potest animum , ejusque recessum
ingredi , præter Deum . Ille solus scru-
tans corda , alioqui imperscrutabilia .
Illi uniri ; in illum tantum possu-

mus

mus transmutari, (ut supra cum amoris vim demonstrarem, explicavi.) *Nec animi ingredi.*
 Ille denique solus est, dominus & arbitri mentis nostræ; quam semper adire intimè potest, ejus facultates ingredi, *Quod solius Dei est.*
 & quodcunque vult, movere, ac ducere. Itaque largitio sanctificationis, est munificentia Divinitatis.

In Divinitate autem proprium, & peculiare id tertiæ Personæ, id est Spiritui Sancto. Causa est, quia illius æterna Processio à voluntate ortum ducit; voluntati autem ita Sanctitas annexa, ut intellectui Veritas. Unde Personalis hic character Spiritui Sancto; ut sit Author Sanctificationis. *Sanctificatio propria tertiæ Personæ.*

Deinde; ille non natus nobis est, sed datus; idque ideo; quia amor, origo & causa doni. Spiritus Sanctus ergo propriè Donum, quia amor: Donum autem non aliud; nisi Sanctificationis: nam præter illam, à Deo amante donari nobis minus non decuit; majus non potuit. Hoc accepto; contingit summum homini bonum: hoc dato; impletur summus Dei amor. *Quia à Deo amante orra.*

Tertiò; cum se generi humano ita profudit Divinitas in Incarnatione Fi- *Cui velut adiutum fuit Incarnatio.*

lii; quidni faceret idem in tertia Spiritus Sancti Persona, cujus proprietas, Bonitas, & Charitas est? Cum Filius non modò reparasset, & in integrum restituisset naturam humanam; sed etiam hypostasi sua ornasset, & velut aptam amorì infinito reddidisset: quomodo non rueret ille in communicationem? non aliter, ac ignis admotus in Materiam accendi, & ardere promptam. Si Sapiencia æterna eò se demisit; ut non Spirituales Substantias, & Angelos, sed carnem, & semen Abrahæ apprehenderet: quidni delaberetur Bonitas infinita, & effunderetur itidem super omnem carnem, jam Divinitatis consortio, & unione nobilitatam, & ut in Spiritum verteretur, facilem paratamque? Meritò itaque, hisce de causis, æterna Charitas diffusa est in cordibus nostris per Spiritum Sanctum, qui datus est nobis: ut Bonus bonos, ut Sanctus sanctos efficiat.

Et Sapiencie exemplū, Bonitas subsequens.

Post Convenientias Authoris, sequitur Modi congrua, & consummata præstantia. In igneis enim linguis Spiritus Sancti Missio apparuit: convenienti profectò, æstui illi æterni amoris, & vim

Convenientia modi. In igne apparuit, quia amor est.

vim ac efficaciam ejus repræsentante
 Forma. Quid enim amor, igne simili-
 lius? utriusque natura ardens, & fla-
 grans est. Misit itaque Pater, & Filius,
 sacrum hunc ignem in terram: hoc uti-
 que fine, ut accenderetur, & arderet;
 ut fervens in nobis desiderium sui face-
 ret, & cum flamma sursum elevarer; *Ut accē-
 deret,
 purgaret
 exureres.*
 ut scoriam animorum purgaret, vitia-
 que exureret; ut denique mentes, affe-
 ctibus terrenis facillè cæcas, illustraret;
 ac lucis suæ radio illuminaret.

In linguis etiam apparuit, & statim *In linguis
 apparuit.*
 post descensum suum largitus est ea-
 rum notitiam; cum admiratione enim
 omnium maxima, rudes, ignari, indo-
 cti, imperiti, cæperunt loqui variis lin-
 guis, prout Spiritus Sanctus dabat elo-
 qui illis: ut nempe, quemadmodum *Quia lar-
 gitus im-
 peritis
 earum
 notitiam*
 conatus superbiæ, & vanus elatusque
 Spiritus, confudit linguas; ita Spi-
 ritus Sanctus eas uniret, & hoc necessa-
 rio instrumento Apostolos ad prædi-
 cationem Veritatis redderet idoneos.

Præterea, impleti Spiritu Sancto *Quia nos
 docet lo-
 qui in
 Psalmis
 Spiritualibus.*
 variis linguis loquimur; dum in Psal-
 mis, & Hymnis, & Canticis spirituali-
 bus puras manus levamus; laudes &
 gratias

gratias agimus, prædicantes magnalia Dei. Denique, Verbum æternum nobis manifestatum est, dum Verbum Caro factum est. Compotes ergo Verbi, ut illud loqueremur; Spiritus Sanctus, qui suggereret nobis omnia; & cuius unctio doceret nos omnia; in linguis igneis venit: Ut quia pollutis adhuc labiis loqui abbreviatum hoc Verbum non potuimus; velut candente illa (ex Isaja) pruna, seu calculo, labia nostra pura, & munda redderet; & linguas nostras, humana tantum balbutescentes, & ad Divina mutas, novo calore ac spiritu ita animaret; instrueretque; ut loqueremur rectè.

Convenientia Temporis.

Nempe post redemptionem sanctificatio.

Tertia est Convenientia Temporis: sed ea jam in ipsa Oeconomia Missionis explicata est. Nempe, post Redemptionem impletam, convenienter Sanctificatio perfici debuit; & cum ascendit, qui descenderat; misit, quod promiserat; & dedit dona hominibus. Nisi enim ascendisset, prius consummato opere; meritis ejus obtentus Paraclitus non venisset ad nos. Ergo commodè Redemptionem Sanctificatio secuta est.

Necessitas hujus

Necessitas demum Missionis ipsius expen-

expendenda restat : Ea autem est nostræ miseriæ : etsi enim redempti à Christo ; non tamen relictī sine hoste : cum quodum vivimus , continuè nobis pugna . Voluit nempe certamen nobis esse ; ut esset meritum , victoria , & corona . Hostis primus Caro est : quæ adversatur ita Spiritui ; ut ille olim , in homine non mansurum se dixerit , quia caro esset . Contra hunc ergo continuum , & domesticum hostem ; præsidium unicum , intima Spiritus Sancti in nobis mansio . Quam & promissit Deus , cum dixit ; Effundam Spiritum meum super omnem carnem : & præstitit ; cum Spiritus Sanctus supervenit in nos . Ita , ut quod ex carne natum , caro erat ; id nunc natum ex Spiritu , unus cum illo Spiritus efficiatur .

*Missio
primum
ex nostrā
indigen-
tia .*

*Contra
carnem ,
quæ spi-
ritui cō-
staria .*

Necessitas ejusdem Miseriæ altera est , ab hoste altero , nempe Dæmone : cum quo etiam major multò , quàm cum carne colluctatio . Adversarius enim hic noster , non modò tanquam leo ferox inhiat nobis ; sed etiam , ut callidus serpens insidiatur calcaneo nostro . Porro , cum ille spiritus ; ideo

*Altera ,
contra
spiritua-
lia nequi-
tie .*

*Nobis e-
nim in-
hians , &
insidian-
s .*

necesse fuit firmari nos , & tutari Spiritu Sancto : qui ab ejus potestate , & servitute eriperet ; & in libertatem Filiorum Dei vindicaret : nam ubi Spiritus Dei , ibi libertas.

*Tertia ,
quia eramus or-
phani post
Christum.*

Ultima Necessitas est : quia orbat per Ascensum Christi , indigebamus Paraclito , seu Consolatore animarum nostrarum . Qui igitur dixit , non relinquam vos orphanos ; providit hunc Tutorem : & suis meritis obtinuit , & unâ cum Patre præstitit , ac misit . Et ; sicut æternus Pater ita dilexit mundum , ut ei Filium suum unigenitum daret ; ita ille cum Patre , dilexit quoque eum usque in finem : dum ambo , à se utroque procedentem donarunt Spiritum Sanctum , semper nobiscum mansurum ; & assiduum nostri Rectorem , & Protectorem .

*Utriusq;
Missionis
ingens ev-
ganor di-
gnatio .*

Hæc sunt , quæ strictè recensui , utriusque Missionis immensa prorsus , & infinita Dona Gratiae ; quæ non modò fando complecti nemo dignè potest ; sed ne cogitatione quidem , ac mente assequi . Ad quæ stupent Angeli , & mirantur tantam dignationem generis humani ; dum se tota illi infudit Divini-

vinitas. Quin imò, si tangi possent invidia; quererentur homini, velut minori, & prodigo filio, præ se, & Natura sua, talia ac tanta data, concessaque.

*Angelis
penè in-
videnda.*

Itaque exinde, quid sit muneris, officique nostri, dignè æstimemus: magna quippe accepimus, & naturæ nostræ modum longè supergressa; quæ ut dantis magnitudinem testantur, ita confessio- nem nostræ indignitatis inprimis requirunt. Prosteamur ergò verè nos indignos, ut tanto magis crescat gloria beneficæ Divinitatis. Deinde exaltemus Dominum; & exultet spiritus noster in Deo salutari, ac sanctificatore nostro. Postremo, parem curam, studiumque, tot ejus auxiliis sumamus, impendamusque, & cooperemur gratiæ, ut compotes esse possimus (quam explicatum eo) Gloriæ.

*Infinite
æstimanda.*

*Cum confessione
nostræ indignita-
tis.*

*Laude
Dei.
Et cooperatione
gratiæ.*

DONA GLORIÆ.

AD hæc enim explicanda, expendendaque, Ordo me promissæ translationis deducit. Quorum basis, ac fundamentum duplex est: nempe Immortalitas animorum, & Resurrectio Corporum.

*Eorum
basis Immortalitas,
& Resurrectio.*

*Prima
asserta in
prolego-
menis.*

De utroque non est opus longa dis-
sertatione evagari; Christianis namque
scribuntur ista, utrumque firma fide
credentibus. Et in Prolegomenis jacta
jam sunt, etsi velut per transennam, so-
lida tamen argumenta adstruendæ im-
mortalitatis. Vitamque æternam no-
bis Deus promisit, commendavit, ap-
petere suasit; & hanc præsentem, tran-
situm tantum ad illam, nunquam fi-
niendam esse asseruit, docuitque; &
quidem tam certò, tam crebrò, ut non
sit amplius dubitandi locus.

*Alteræ
certa itõ,
& aper-
ta, Deoq;
facilli-
ma.*

Resurrectionem item Corporum,
ipse Resurgens, & docuit, & monstra-
vit utique, omnipotenti Deo minimè
difficilem. Nam qui potuit hominem
Creare; quomodo non posset mor-
tuum suscitare? Cùm (ut Augustinus
ait) majus miraculum sit, novos semper
homines nasci; quàm mortuos resur-
gere. Difficilius namque est, (ait Minu-
tius Felix:) id quod non sit, incipere;
quàm id quod fuerit, iterare. Quod
itaque Deus præstare facilè potest; id &
præstitit ipse, & deinceps præstiturum
se promisit. Credo itaque, & cum Jobo
scio, ac dico: quòd Redemptor meus
vivit,

*Credenda
igitur fir-
mior.*

vivit, & in novissimo die de terra surrecturus sum, & rursum circumdabor pelle mea, & in carne mea videbo Deum meum; quem visurus sum ego ipse, & oculi mei conspecturi sunt, & non alius; reposita hæc est spes in sinu meo.

Vivemus inquam, vivemus in æternitate, cum anima & corpore vitam alteram: &, si hanc præsentem rectè egerimus; felicem omnino, ac beatam. Quam difficile est verbis explicare, cum notum sit illud; auris, & oculi sensum, ac experimentum; quin & captum mentis humanæ, longè superare ea, quæ præparavit se diligentibus Deus. Attamen dicenda sunt, prout in umbra tantum, & tenui imagine tradita habemus.

*Es visa
altera
certò expectanda*

*Cujus
Beate
ineffabilis gloria.*

Ea verò partim ad animum pertinent: partim referuntur ad corpus. De Animo jure merito præmittam; ille enim propriè solus capax est veræ felicitatis. Huic igitur visionem Dei tribuunt; & hoc compendio totum designant, quod hominem reddere beatum potest. Neque ego diffiteor; quin imò prorsus agnosco: sed id paulò ali-

*Que pri-
mum ad
animum
pertinet.*

*Vulgò in
visione
ponitur.*

ter, quàm vulgò solet, explicare contendam.

Sed id accuratius ad facultates anime aptatur.

Primum igitur; tota Anima Deum recipi, Dico. Cujus facultates, seu Potentiæ cum sint tres: nempe Memoria, Intellectus, Voluntas; ideo omnes hæc à Deo repleti, & omnes plenè & pariter compotes illius debere fieri, firmiter statuo; atque id ita deduco.

Memoriæ visio tribuitur.

Memoriæ visionem attribuo: Non ex sensu, fateor, nuperæ scholæ; sed nec cujusquam veterum, quod sciam; sed, si inspicias, profectò ex Natura ipsa rei. Memoria namque mihi: est Potentia animi, & internus ejus sensus; species & imagines, seu ideas rerum apprehendens, ac retinens. Obtinuit vulgò, ut pro Recordatione tantum, & reminiscencia accipiatur; sed imperitè profectò: hæc enim, pars ejus tantum est; nempe, quæ præterita revocat. Altera verò est, quæ in futura extenditur, & fertur; quam vocabo Cogitationem. Tertia denique, quæ præsentia aspicit; quæ Admiratio rectè vocabitur.

Recordatio præteritorum est visio.

Tria hæc visionem, & intuitum animi referunt omninò, ac repræsentant. Nam Reminiscencia præteritorum, quid

quid aliud est, nisi sub aspectum animi,
 revocatio quædam, & reductio? Futu-
 rorum deinde Cogitatio, (cogito au-
 tem à cogo, quod est veluti conago, *Cogitatio*
 seu conduco, & concito) est eorum, *futurorū.*
 quæ ante nos, sub animi inspectionem
 collectio. Unde qui illa colligit, con-
 jicitque; prospicere, & providere di-
 citur. Admiratio, præsentium est in-
 ruitus, & visio mera; (unde miro, olim *Admiratio præse-*
 idem quod video) quæ dum exacta est; *tium.*
 illicium statim præbet agnitioni. Phan-
 tasma igitur, seu visum propriè ad *Phantasma,*
 memoriam pertinet: & id, quod *Co*
 prima apprehensio intellectus vocatur; *prima ap-*
 non intellectus pars, sed memoria ipsa *prehensio,*
 est. Confundi hæc faciliè possunt, ob *Memoriæ*
 magnam facultatū Animæ inter se con- *tribuēda.*
 nexionem; sed profectò non debent, & *Que par*
 secernenda sunt. Nec Memoria ex inti- *alijs ani-*
 ma actione, & operatione Animæ ex- *mæ facul-*
 pungenda; quæ primas in illa partes ob- *tatibus.*
 tinet. Estque Potentia, non modò par
 aliis duabus, quia illis coessentialis; sed,
 ut supra memini, Ordine Originis pri- *Imò ordi-*
 ma. Meritò itaque in beato illo statu *ne Origi-*
 animorum primam partem habere de- *nis prima*
 bet; eamque non aliam, nisi Visionem.
 Visio

*Visio ejus
est Divina
essentia.* Visio hæc memoriæ, est inspectio, & intuitus quidam Essentiæ Divinæ, intimæque Naturæ ejus. Inquit enim Paulus, nos Deum visuros sicuti est: & non ut nunc, per speculum, & in ænigmate; sed facie ad faciem. Videre autem sicuti est, profectò videre est Essentiam. Et facies Dei, (inquit Augustinus) manifestatio ejus est. Videbimus ergo Memoria Essentiam Dei; & defixi erimus immota, & immobili, unius Divinitatis, & in illa totius quod est, Admiratione.

Eam sequitur cognitio Intellectui propria. Eam verò statim consequitur altera facultas Animæ, nempe Intellectus. Cujus est, id quod memoria visu apprehendit, cognoscere, & comprehendere. Visam itaque à Memoria Divinitatem, statim ille noscere contendet, & infinitos illos thesauros scientiæ Dei ingressus, perfectissimam omni ex parte Naturam considerabit, agnoscet, confitebitur. Tunc cognoscam (inquit Apostolus) sicut & cognitus sum: cognitus autem plenè; ideo pro illa plenitudine & cognoscens.

Hæc denique voluntatem Agnitionem denique ejus, quòd Bonum per se, pulchrum, proficuum, oblectans,

lectans, & denique omni parte perfectum est; quod consequatur Amor, & fruitio, & quies, & gaudium; manifestum omnino est: Ruit enim in hæc *rapit in amorem.*
 Voluntas sponte sua, & intrat in gaudium Domini sui, & gaudium ejus nemo ab ea tollet; quod plenum in omnem æternitatem possidebit; & sine fastidio satiabitur cum apparuerit ei gloria: & tamen sine indigentia, sine siti, sine fame, semper appetens, & semper fruens erit.

Sed in his difficultates binæ sunt; *Queritur, quomodo videbitur invisibilis?*
 quæ non explicatæ dubios, & perplexos reddere possent. Cum enim Deus *ἀόρατος*, id est, invisibilis sit; nemo vidit Deum unquam, ut ait Apostolus: & ille de se; Non videbit me homo, inquit, & vivet; *Quæritur, quomodo à Natura Creatura videri poterit? Respondetur, quòd animo.*
 Quæritur; quomodo à Natura Creatura videri poterit? Respondetur: quemadmodum videntur invisibilia. Nempe animo. Hoc inquam, eum videbimus; sed (ut inquit Apostolus) cum apparuerit. In nostra enim potestate (inquit Augustinus) non est eum videre; sed in ejus potestate est, apparere. Nisi igitur copiam sui fecerit; nisi Naturales vires nostras juve- *Ex manifestatione Dei,*
 rit;

rit ; non erimus capaces istius visionis :
quæ est facultas supernaturalis , Divi-
no auxilio data animæ humanæ , alio-
qui ad intuitum Divinitatis debili , &
infirmæ .

*Quod in-
compre-
hensus sit
Deus .*

Deinde ἀναπόλητος , id est incom-
prehensus Deus est ; quomodo eum
comprehendemus ? Comprehendere
enim , est totum , & simul complecti ,
continere , & capere . Porro , ut in illis ,
quæ quantitate & mole constant , con-
tinens contento majus est : ita in No-
scibilibus (ut sic τα νοήματα vocem) par es-
se debet , notum & noscens ; sciens , & sci-
tum : quia alterū alterius imago est vera .
Si itaque quantitatem spectes , major ; si
qualitatem , par esset homo Divinitati ,
si eam totam plenè comprehenderet .

*Quomodo
tamē pos-
sit com-
prehendi
docetur .*

Dicendum itaque : non ita eam com-
prehendi , ut hac comprehensione to-
ta exhauriatur Essentia ; & , ut ista No-
ritia , sit idem cum ejus Substantia ; ta-
liter enim solus Deus seipsum novit ; ut
supra demonstratum : sed ita , prout
capax reddi potest natura humana ; &
infra Divinitatis , (quæ in Triade tan-
tū est ;) mensuram & modum , quem
nulla Natura Creata attingere potest .

Ne-

Neque Opponas : simplicissimam Naturam non posse comprehendi ; nisi aut totam , aut nihil ex ea : ita ut aut plenè debeat agnosci Deus ; aut prorsus non agnosci . Non hoc inquam Opponas . Quia etsi indivisibilis , & *ἀμερὴς* , seu (ut ita dicam ;) impartibilis est Deus ; tamen ut nos eum , quodammodò nunc partimur , & dividimus ; dum attributa ejus singillatim recensemus ; sine ulla tamen ejus noxa : ita & in vita æterna etsi agnosceretur plenè , pro captu , & modulo cujusque animæ ; non ideo tamen divideretur , secabiturque in partes ; sed totus , & simplex sufficiet omnibus , sine sui extensione , & partitione . Quodsi petas : quomodò id fieri possit ? Hoc unum respondebo : id fieri ad mensuram capacitatis , quæ illum recipit . Quemadmodum autem debiliores oculi , non minuunt rem aspectam , etsi illam minùs videant ; idem quoque & hic censendum est .

Locum hunc concludo : Necessarium asserens Divinum hic auxilium ; & , quod vocant Scholæ , Lumen Gloriæ . Illud enim defigit Memoriã ad miratione , illustrat Intellectum agnitione ,

Sine divisione, partitione, ac extensione.

Sine partibus.

Sufficit omnibus.

Ad mensuram cujusque capacitatis.

Sed necessarium hic est lumen gloriæ.

occu-

occupat denique fruitionem voluntatis: ita ut tria hæc conjunctim, simul, & pariter, Unum, Verum, Bonum videant, noscant, ament: idque tanta claritate, certitudine, ac dulcedine; quæ Dei, se communicare volentis, vim explere dignè, & ut par est; & Naturæ Creatæ modum supereffluenter (ut ita dicam,) implere possit.

Post animi felicitatē corporis felicitas.

Felicitate animi sic recensita; Corporis glorificati dotes enarrandæ restant. Quæ amplæ profectò, & splendidæ, & autoritate Divinâ, ac Scripturæ Verbis, & Patrum sententia memorantur; si dicta uberrimè ab aliis, repetere luberet. Quin & illa, eadem autoritate, addi solent; quæ ad ipsam Naturam, ac sensus Corporis oblectandos, (semoto eo, quod impurum, imperfectum, statumque tam altum dedecens) videntur pertinere. Ut sunt illa: cum Deus Regnum, Mansiones, & dilecta sua tabernacula, thronum, mensam, & cibum; & quod profectò mirandum, se præcinctū & ministrantem promittit. Cum ibidem Cantum, & harmoniam, suffitum & odoramenta Scriptura memorat: cum splendor Civitatis

Quæ scribunt de-

vitatis illius Sanctæ, tot ornamentis
describitur; cum hæc omnia admiran-
da, supra visum, supra votum, prædi-
cantur. Quæ cum propriè pertineant
ad Corpus; quin ejus oblectamentis
præparata sint; nullo modo potest du-
bitari. Frustra enim illud resurgeret,
si boni sui expers esset. Non quod ista
terreno prorsus, humano, ac hujus vi-
tæ modo censenda sint: sed ratione
quadam, ut nobis ignota; ita statui
immortali congrua, & convenienti.
Immorari his, & oratione provehi per
vestigia, quæ sacri scriptores relique-
re, facile esset: sed non est pro mensura
Scripti, quam mihi præfixi.

Potius itaque subjungo necessaria;
quæ hinc manant monita. Ut quem-
admodum Dona Gratiae expendimus;
ita paria eis, hæc Gloriæ agnoscamus.
&, ut in illis magna accepisse gaude-
mus; ita in his non minora acceptu-
ros speremus. Utrobique enim Divini-
tatis quædam possessio est, ultra quam
nihil magni est: sed in hoc res differt;
quod Gratia, & potest nostra culpa
non accipi, & potest amitti; Gloria
cum obvenit, amitti non poterit: se-
cun-

*Eiq; pro-
pria asse-
gnatur.*

*Quia ne-
cesse est,
ut celo
receptum
gaudeat.*

*Adhorta-
tio ad ex-
pendenda
dignè do-
na gloriæ.*

*Quæ dif-
ferunt a
gratia,
immuta-
bilitate.*

cūritas enim, comes ejus perpetua est.

*Per hanc
toti non
morimur.*

Agnoscamus ergo, ut par est, felicem hunc, beatumque statum. Si Poeta spe famæ posthumæ dixit; Non totus moriar: Christianus immortalitatis, & resurrectionis certitudine dicat; Totus non moriar. Et anima namque vivemus, &

*Mors enī
somnia.*

corpore. Mors enim nostra, verè somnus tantum, & dormitio est; & phase, seu transitus ad vitam meliorem. Hoc meruit, qui mortem moriendo triūpha-

*Toto ita-
que ani-
mo eter-
na appe-
tenda.*

vit: idq; victoriæ pretiū, præmiumq; & ipse tulit; & nobis reliquit. Anhelemus eò igitur: Deum, in quo omne bonum, appetamus; in eum toto animo, & Natura feramur: & sic trāseamus per bona hæc tēporalia, ut illis æterna lucremur.

Pars Capitis Tertia.

Ut à nobis nosci voluit Deus. Ubi Religionis veræ triplex, per tria tempora status: ejusque ultimæ, id est, Christianæ fundamenta; ac Signa, per quæ Hæreses ab illa facile dignosci, vitarique possunt.

*Deus se
autore co-
gnoscitur.*

DEus non nisi se Autore cognoscitur; inquit verè Hilarius. Ita-
que

que illi soli de se credendum est : & jis,
quæ cognitioni nostræ tribuit , assen-
tiendum . Hinc enim religio manat : *Hinc ma-
nat reli-
gio vera .*
id est ; de rebus Divinis secura , immu-
tabilis , & necessaria , à Deo hausta ve-
ritas . Videamus igitur ; quoties , & quo-
modò eam generi humano aperuit ; seu,
ut à nobis nosci voluit Deus .

LEX NATURÆ .

VEra Dei cognitio , ac Religio , ad *Prima in
lege na-
turæ .*
tria tempora reducitur . Primum
enim innotuit statim Deus homini
creato . Nam recens à Dei manu , & *Innotuit
enim A-
damo De-
us .*
opere , factorem suum conditoremque ,
quin cognoverit , dubitari non potest .
Manifestavit enim se illi ; allocutus
eum est : & dum mentem ejus cogni-
tione rerum creatarum illustravit :
(quod nomenclatura illa animalium te-
statur ; & addictum usui ejus univer-
sum :) dum , inquam , hæc usu ipso co-
gnovit ; necesse est , ut Authorem quo-
que eorum cognoverit .

Sed hæc notitia , ut sufficiens , & con-
veniens rectæ illi ac simplici innocen-
tiæ erat ; ita procul à curiosa nimis ,
*Sufficiēti
ad statū
innocētiæ
notitia .*

T acri,

acti, & inquieta indagatione; in quam, esu vetiti fructus, lapsa est natura humana: & loco sapientiæ, scientiam tantum consecuta; quæ eam anxiam magis reddidit, & turbatam. Quippe, quam non dono Dei, sed transgressione mandati, & prava concupiscentia, adepta est.

*Quæ post
culpam non
cessavit:*

Post culpam verò, & pœnam primi Parentis: nihilominus & ipsius, & posterorum ejus eam curam habuit Deus; ut noluerit eos oblivione Divinitatis, ignoratione recti, & neglectu

*Firmata,
salubri
redargu-
tione, &
admoni-
tione Cæi.*

probitatis perire. Ipsum quinimò Cain odio fratris, ac invidia incensum, jamque cædem ejus cogitantem, blandè admonuit: Bene, aut secus facta, præmium vel pœnam manere: Moderandum ratione affectum; & posse eum domari. Nonnè si bene egeris, (inquit) recipies: sin autem malè; statim in foribus peccatum aderit? sed sub te erit appetitus tuus, & tu dominaberis illius. Quo ipso; peccatum contra naturam esse, vitarique posse, ostendit: Conscientiæ interdum dictamen firmavit: & denique in posterum, vitæ emandatæ statuit præceptum.

Post

Post necem Abelis natus est Adamo Seth: huic verò filius Enos: qui (ait Scriptura) cæpit invocare nomen Domini: Cultusque Dei, ac Religio vera, apud illius posteros mansit: Scissumque genus humanum in filios Dei, in Sethi posteris; & filios hominum, in generatione Cain.

Apud Sethi progeniem cultus Dei verus.

Sed cum filii Dei accepissent sibi in uxores filias hominum; corrupissetque omnis caro viam suam: Noe tantum, (inquit Scriptura;) Vir iustus, atque perfectus fuit, in generationibus suis, & cum Deo ambulavit; ideoque solus diluvio servatus est.

Quem corrupto genere humano, solus Noe propagavit.

Ex ejus tamen posteris potissima pars, in *Ἰδοπλανήσαν πολυείδεαν*, & idololatriam lapsa. Sem tantum generatio ad Abraham, & deinceps per Israelitas, usque ad promulgationem scriptæ legis, propagavit acceptum Deo cultum. Qui paucotum constabat ritu; eoque usu potius, quam per institutum recepto, ac introducto: Præter circumcisionem, quam Abraham expresso jussu Dei orsus; sanguine pactum, cum Deo sanxit: eoque

Cujus posterii lapsi. Multitugum in divinis errorum.

Præter Sem, & Abraham.

Cui circumcisio imperata.

suam posteritatem obstrinxit. Huc usque vocatur lex naturæ.

LEX SCRIPTA.

Deus tandem Religionem scripto præcepit.

Sed cum nullo hætenus certo instituto illigasset Religionem Deus; tandem ejus statum definivit, promulgatione legis, digito suo in tabulis lapideis exarata; & jussæ, imperataque per Moysen interpretem.

Et promulgat legem propria allocatione. Et magna maiestate.

Promulgationis istius ingens prorsus autoritas: quippe factæ, authore ipso met Deo. Quod ipse, utpote magnum, signanter expressit; dum Moyse loquens: veniam (ait) ad te in caligine nubis; ut audiat me populus loquentem. Et cum hoc magna præstitisset maiestate: vidistis, (inquit,) quod de cælo locutus sum vobis. Nempe; postquam toties privatim affatus Patriarchas esset; tandem etiam totum, ex eorum progenie populum, triduo ante præmonitum, constitutoque die. Hanc allocutionem Moyses ingeminans: Accessistis (ait) ad radicem montis, qui ardebat usque ad cælum: locutus est Dominus ad vos, de medio ignis: vocem verborum ejus audi-

Quod merito exag-gerat Moyses.

divistis . Et passim hæc meritò in sacris
 repetuntur : eximia enim , & prorsus
 summa fuere , ad conciliandam legi au- *Magnum*
 thoritatem ; & quæ assensum ei , obse- *quippe, &*
 quiumque exigèrent necessariò . Non *ad autho-*
 enim populus Israel , (inquit Augusti- *ritatem.*
 nus ;) auctori legis Deo , & ejus inter-
 preti Moyse , sic credidit ; quemadmodû
 suo Lycurgo Lacedæmonii ; quòd ab
 Jove, sive Apolline, leges quas condidit,
 se dixit accepisse . Cùm lex dabatur po-
 pulo, qua unus coli jubebatur Deus; mi-
 rabilibus signis, prodigiis, & motibus
 apparebat, creaturam servire debere
 Creatori : & timor incussus est Dei ; *Et ad in-*
 terribilis super omnes Deos : & frænium *cutiendû*
 exinde peccati . Hanc enim causam, sic *terrorem.*
 promulgatæ legis , adfert Moyses ; ut
 terror illius esset , (inquit) in vobis , &
 non peccaretis .

Lex ista & Religionem continet , & *Lex hæc*
 Politiam . De hac non est hic sermo . *partim*
 Religio verò , de qua nunc res est , ha- *Moralis.*
 bet præcepta ; partim ad vitam , & mo-
 res : partim ad ritus , ceremonias , cul-
 tumque Dei . Prima pars , Moralis di-
 citur ; quæ aut vetat peccare , dum , *Quæ ve-*
 non occides , inquit ; non furtum fa- *rat pec-*
care.
 T 3 cies ;

cies; aliaque: sed inter illa altum profectò, perfectumque illud: non concupisces; quo omne peccatum penitus arcetur, excluditurque. Aut jubet bene agere, imperatque virtutes; quarum officia ad duo capita redigit: nempe ad Dei, & proximi dilectionem. In his enim duobus universa lex, & Prophetæ. Hoc mandatum magnū in lege. Hoc compendium pietatis, charitatisque; in quo tota sanctitas, & justitia.

Parsim Ceremonialis, in ritibus.

Pars altera ejusce Religionis, Ceremonialis erat. Ubi accuratè cultus sacrorum descriptus: ut ritus phase; esus agni, & azimorum, requies Sabbathi, neomeniæ, altare, victimæ, holocausta, expiationes, thymiamata, aliaque complura, quæ sigillatim, minutatimque recensentur.

Sancta e- quidē, sed ad ingenium Populi facta.

Lex itaque Domini Sancta, sed tamen pro ingenio populi constituta. Hinc enim est, quòd præmia illi fuere vitæ præsentis, & bonorum temporalium; quorum promissio, & largitione, ad observantiam invitatus: non aliter, quàm pueris olim. dant crustula blandi Doctores, elementa velint ut discere prima. Deinde, cùm idem populus

Premia hujus vite assignans.

pulus duræ admodum esset cervicis ;
panis repentinis, & suppliciorum servili
terrore, sæpius compescendus fuit. Uti *Penis pu-
niens re-
pentinis.*
enim, olim futura præmia, illos non il-
lexissent; ita nec pænæ deterruissent post-
humæ. Omnino itaque ingenio tantum
populi illius, accommodata lex fuit.

Atque vel hinc patet cessaturam il- *Unde pa-
tet cessa-
turâ su-
isse.*
lam fuisse, & locum daturam perfe-
ctiori; quæ omnes gentes concerneret,
converteret, & comprehenderet. Pro- *Prout
prædictâ,
impletâ-
que.*
ut id Jacob Patriarcha, David sæpius,
tum Isaias, Jeremias, Daniel, Mala-
chias, aliique locis notis prædixere; im-
pletumque videmus.

Nec sine causa est, quod decem tan- *Ipsemet
scribere.*
tum præcepta *ἀποτοπράξειν* voluerit Deus.
Nempe ut majorem auctoritatem adde-
ret illis, quæ totum genus humanum
in perpetuum obligant; ideoque immu-
tabilia sunt.

LEX GRATIÆ.

Post legem itaque naturæ, quæ *Tertium
Religionia
verè tē-
pus à
Christo.*
ad Moysem; post legem scriptam,
quæ ad Christum; tandem ab illo, in-
cipit consummata Religionis tempus

tertium, ultimumque; quod est Lex nova; Lex Gratiae.

*Qui auxit
moralia
præcepta,
ac perfecit.*

Quæ licet figuram (inquit Leo;) in veritatem; prophetiam, in manifestationem; legem denique in Evangelium vertit: tamen non modò nihil de Moralibus, ac Decalogi præceptis dempsit; sed potius longè illa auxit, perfecitque: ut vel ipso hoc Scripto, quo præcipua Christianæ sanctitatis explicantur; patet evidenter. Ceremonialia verò, quæ in figura olim erant, re ipsa complevit; ita ut pro carnibus animalium, & sanguine hircorum, jam (ex prædicatione Malachiæ) in gentibus, & in omni loco sacrificetur, & offeratur nomini ejus: Nempe, oblatio munda; novum, & incruentum Sacrificium: de quo infra dicendi erit locus.

*Premia
æterna cō-
stituit.*

Præmium verò legis istius, æternum constitutum; & non in carne, sed spiritu beatitas: cùm Christus suis meritis, dedit nobis potestatem filios Dei fieri; his, qui non ex carne nati, credunt in nomine ejus; & exinde hæreditatem capiunt æternæ felicitatis: in qua summum, & naturam etiam supergressum hominis, bonum.

Quod

Quod attinet novæ hujus legis promulgationem; hæc non eo, quo vetus, modo facta. Non enim illo apparatu, Majestate, & pompa: quia hic modus ad ingenium humanum, sese quodammodo attemperantis Dei, ultra non placuit. Non etiam cum terrore, & minis: quia videretur non posse ferri Deo, nisi ex metu, & coactè. Alia itaque placuit ratio: ut patet ex his, quæ de Incarnatione dicta sunt. Nempe; per mansuetam charitatem, & per infirma ac contemptibilia, victor, ac triumphator animorum, multo mirabilior esse voluit Deus: majoremque hinc vim, & efficaciam suam ostendere.

Promulgatio hujus legis dispar à veteri.

Quia sine pompa sine terrore.

Per infirma victor animorum Deus.

Unde est, quòd doctrina ejus humilis visa, prima fronte, & abjecta. Et prædicatio Evangelii, (inquit Hieronymus, ad parabolam grani sinapis;) minima omnibus disciplinis videtur: hominem Deum, Christum mortuum, & scandalum Crucis prædicans. Confer, (inquit) ejusmodi doctrinam dogmatibus Philosophorum, splendori eloquentiæ, compositioni sermonum: certè prima specie minor videbitur cæte.

Prædicatio Evangelii prima frõre humilis.

*Attamen
vicit su-
perbam
Philoso-
phiam.*

*Dominā-
tia dog-
mata.*

*Et nunc
sola re-
gnat.*

*Non ser-
pro tradi-
sa.*

cæteris feminibus, sementis Evangelii. Attamen hæc talis; non in sublimitate sermonum, nec in persuasibilibus humanæ sapientiæ verbis; per homines sine litteris, (ut vocantur in Actibus Apostolorum) per viles, & imperitos idiotas, *κρυπταί* illas *διδασκαλίας* evertit: vanas esse, ac inanes ostendit: natas de ingenio, & sapientia sæculi; quam Dominus, stultitiam vocans, stulta mundi in confusionem superbæ Philosophiæ elegit. Ita ut & illa, & literæ; & scientia quæ inflat; omnisque mentium fastus; tandem colla ei doctrinæ submiserit, quæ irrita, ac illusa olim, nunc sola regnat, & animis imperitat nostris. Nempe; vicit, suis viribus nixa veritas; & stupendo prorsus modo peregit tranquilla potestas; quod violenta, vetusilla, non fecit.

Altera promulgationis legis novæ diversitas: quod non scripto, nec per literam facta sit. Nihil enim scripsit, nihil dictavit Christus. Nec doctrinæ suæ, quam mundo intulit, formulam autographam reliquit. Ita; ut Evangelium, seu bonum nuntium; non sit propriè narratio illa dictorum, gestorum.

storumque Christi, quam quatuor, ab Ecclesia approbati, Historiæ istius Sancti Scriptores, edidere: sed potius hoc nomine vocari debet *κρυπτα* ipsum; id est, legitima prædicatio, facta per Apostolos, id est Missos. Ideo prudenter certè, ut omnia, adnotavit Maldonatus: non vocari in Scripturis Evangelistas, qui Evangelicam scripsere Historiam; sed potius qui prædicarunt Evangelium. Quod testatur locus ille notus satis Isajæ, cùm inquit: Quàm pulchri sunt super montes, pedes Evangelizantis; & prædicantis pacem; annuntiantis bonum; prædicantis Salutem: dicentis; Sion: regnabit Deus tuus. Quæ non de scriptoribus, sed prædicatoribus Evangelii, & Apostolis dici; & verba clara testantur, & vel ipso Paulo interprete, manifestè constat.

Qui ipsi Apostoli, non ex scripto prælegendam, sed ex auditu prædicandam fidei formulam accepere. Ostenduntque id solemnia illa oretenus data, legationis velut instrumenta, quæ ab Evangelistis referuntur. Ut à Matthæo: qui post recensita Apostolorum

Sed prædicatio.

Evangelista proprie prædicatores.

Ex loco Isajæ.

Et interpretatione Pauli.

Apostoli oretenus missi, non scripto instructi.

Testimonio Matthæi.

lorum nomina, datamque illis tam amplam potestatem; Hos, (inquit) duodecim misit JESUS, præcepitque eis, dicens: Euntes prædicate, dicentes. &c. Et apud eundem; post Resurrectionem suam repetiit Dominus: Euntes ergo, (inquit) docete omnes gentes. Marcus quoque: vocavit (inquit,) duodecim; & cepit eos mittere binos: & exeuntes prædicabant. Lucas; convocatis (ait) duodecim, dedit eis virtutem: & misit illos prædicare. Apud Joannem; Illud: sicut misit me Pater, & ego mitto vos. Et paulò post; ad declarandam potestatem: quorum remiseritis peccata, remittentur. &c. Paulus quoque: Legatione (inquit) fungimur pro Christo, tanquam Deo per nos exhortante. Qui nos (ait alio loco) fecit ministros novi testamenti, non litera, sed spiritu. Sed omnium optimè Marcus: claudens Christi Historiam, describit sic modum prædicationis. Et Dominus (inquit) quidem JESUS, postquam locutus est eis, assumptus est in cælum: & sedet à dextris Dei. Illi autem profecti, prædicaverunt ubique, Domino cooperante, & sermonem con-

Marci.

Luce.

Joannis.

Pauli.

Modus
prædicationis.

confirmante, sequentibus signis. Nul-
libi itaque, ut vides, mentio, scripto
exaratae legis: sed cum promisso assi-
stentiae, datae potestatis, & virtutis;
missionis, & praedicationis; jurisque li-
gandi, & solvendi.

Cur autem Christus non tradidit
scripto doctrinam suam? Primum, ea
causa adferri potest: quod semper ele-
gerit mundo, & expectationi huma-
nae contraria. Itaque illiteratus po-
tius haberi, quam literis uti voluit. In
parabolis tantum aperuit os suum; &
quia cum simplicibus sermocinatio ejus;
ideo, scriptis operosis non est usus.
Deinde cum professus esset, se non
venisse legem scriptam solvere; ut id
re ipsa ostenderet, nullum ei scriptum
opposuit. Sed praecipua, & vera causa,
ea omnino est: quod voluerit Eccle-
siam suam, supra fundamentum Apo-
stolorum stabilire; id est, tantum su-
pra potestatem a se datam: quam nun-
quam cessaturam, neque erraturam,
& magna asseveratione promisit; at-
quere ipsa adimplevit.

Lex ergo nova nihil aliud est; nisi
doctrinae fidei, à Christo ore tenus da-
tae,

*Nusquam
scripto le-
ge exara-
tam pro-
mulgans.*

*Noluit
nempe
Christia-
nos lite-
ris uti.*

*Nec scri-
ptum le-
gi scriptae
opponere.*

*Sed Ec-
clesiam
supra fun-
damentum
Apostolo-
rum stru-
xit.*

*Et in po-
testate
Ecclesia-
stica, sua
assistencia
continua-
ta.*

tæ, & scriptæ (ut Paulus ait) non atramento, sed Spiritu Dei vivi; non in tabulis Lapideis, sed in tabulis cordis: talis inquam doctrinæ; ejus ope, auxilio, assistentia, per legitimam Ecclesiasticam potestatem, continuatio, & successio. Quæ definitio constituit unam, Sanctam, Catholicam Ecclesiam Christi.

Scripturæ novi Testamenti ad consolationem fidem credentium. Sed inquires; quorsum ergo Scripturæ novi testamenti? Respondeo: ad consolationem fidelium, & jam credentium. Habet nempe Ecclesia depositum hoc ingens, quod custodit: quo

Non ut inquirant novam fidem. gaudet, quo utitur, non ut hinc, de sancita credendi regula, dubitet; disceptet; aliamvè (ut hæretici solent) inquirat: (Etenim eam; conformem Scripturis, decisam à Conciliis, defensam Patrum sententia; &, quod summum: acceptam à Christo, per Apostolos traditam, per eorum successores continuatam habuit, habet, habebitque semper.) Sed, ut fidam narrationem præcipuorum, quæ Christus fecit, aut dixit, habens; refricet magna consolatione memoriam primæ prædicationis, & doctrinæ semel constitutæ.

Sed ut memoriam prædicationis refricent.

Hinc

Hinc verò manifestum est: aut fallere, aut certè falli eos, qui scripta hæc sacra ita jactant, & præferunt; ut regulam unicam fidei constituent, non tam illa; quam potius sensum ex illis, sua interpretatione depromptum. Atqui, nec Evangelica narratio, nec Apostolorum gesta, aut Epistolæ, omnia habent, quæ per continuatam doctrinam tradita accepimus: nec modo, ac sine legis, sunt exarata; ut dogmata nempe omnia fidei, præceptaque rituum, figillatim dicent, recenseant, sanciantque, prout lex vetus, & scripta fecit. Et satis constat prædicationem, & Ecclesiam, plures per annos, sine ullo scripto extitisse; nullamque ejus in Actibus Apostolorum mentionem esse: cùm tamen essent omnes perseverantes in eorum doctrina.

Quod verò Evangelistæ Historiam Christi scripserunt; gravibus equidem causis; nempe instinctu Spiritus Sancti, & magno Ecclesiæ, ac posteritatis commodo, adducti sunt: sed non certè, ut conderent Scriptam legem, formulamque fidei, & canonem constituerent credendi. Quod alia forma, modoque

*Ex earum
privata
interpretatione
non est fidei
Regula.*

*Non omnia
continent.*

*Non modo, ac sine
legis scriptis.*

*Caruit illis aliquandiu
Ecclesia.*

*Instinctu
Spiritus
Sancti
exarata.*

*Posteritatis
commodo.*

Sed non forma canonis. doque fieri oportuisset : & quod reservatum videtur, donec dubitationibus, & quæstionibus variis, (ut est ingenium humanum;) & post, hæresibus (quas futuras prædixit Dominus) ortis ; necesse foret dogmata verbis certis ponere, canonem ferre, & scripto sancire : Prout factum ab Apostolis in quæstione illa prima, de circumcisione gentium.

Conclusio hujus loci. Scripturæ itaque Novi testamenti, non sunt propriè lex ; data, sancitaque cuncta, complectentes . Nec, prout dixi ; sine, modo, ac forma præcepti sunt exaratae. Nec licet illis, nisi sensu Ecclesiæ, cujus depositum sunt, uti : Nec fas interpretari aliter, quàm constituta semel fidei doctrina permittit. Ita, ut qui illas solas, pro unica fidei regula jactant ; profectò earum specioso obtentu, licentiam disceptandi quærant ; potestatem verò, & obsequium tollant.

Contra heterodoxos præscriptio- nes. Hisce verò ita deductis ; etsi non fuit mihi animus hoc Scripto contra heterodoxos dicere ; nec argumentum, quod mihi proposui, id requirat : (nam *Ad domesticos fidei.* πρὸς τοὺς οἰκείους τῆς πίστεως scribo .) Attamen

men, quoniam ordine deveni ad hunc locum; *ὡς, ἐν παρέργῳ*, non disputabo, sed præscribam pauca; quæ tamen probè pensitata, & ad opinionem tollendam, & ad agnitionem veri, sufficere possunt.

Velut
præter
opus.

Prima itaque præscriptio sit: esse inter Christianos Religionem veram. Hoc nemo diffitebitur, nisi qui aut ejus, quam præferebat incertus; aut novæ alicujus author; aut cujuscunque contemptor est.

1. *Esse
veram
Religio-
nem.*

Alteræ præscriptio: Religionem veram unam tantum esse. Nam verum; unum. Dissensus ex uno, plura facit; & contradictoria: quæ in re una, vera esse nequeunt.

2. *Unam
tantum
esse.*

Tertia: Religionem veram, & unam; necessariam esse. Nisi enim necessaria esset, quorsum vera? quorsum una? quorsum ulla?

3. *Neces-
sariam
esse.*

Quarta: Religionem veram, unam, necessariam, à cætu legitimo retineri: seu, non unius, alteriusque privata, & singulari opinione consistere; sed multorum consensu, & velut consociatione. Alioqui singularis, & cujusque privata Religio, multiplex esset; ideoque ne-

4. *A cætu
legitimo
retineri.*

que vera, neque una, imò nulla esset: quia cultus, ritusque debitus exerceri, nisi in cætu non potest; sine ritu autem, nulla Religio est.

5. *Eum
potestate,
& lege
constare.*

Quinta: Cætum hunc potestate, & lege contineri. Hoc enim tantum vinculo coalescit omnis multitudo: Alioqui non esset legitimus Cætus; sed turba, non consentiens in potestatis, & legis obsequium.

6. *Potestatem à
missione
esse.*

Sexta: Potestatem manasse à missione. Hanc à Christo Apostoli, ab illis Ecclesia accepit. Hæc est (ut evidenter ostendi, ac demonstravi) primum fidei, & doctrinæ Christianæ fundamentum; cui superædificata Ecclesia.

7. *Missio-
nis notā,
successio-
nem.*

Septima: Missionis veræ, ac legitimæ notam esse, Successionem. Hæc aut nulla est, aut una est. Nulla esse non potest; quia non interituram promisit Christus. Una igitur tantum est. Eam autem alia Ecclesia, præter Catholicam, non modò docere non potest, sed ne profiteri quidem audeat.

8. *Hinc
regula fi-
dei.*

Octava: Per hanc unam, missione continuatam potestatem, lex declarata est, Regula, inquam, & formula fidei.

dei. Quæ constituta, non mutatur. Semel enim Ecclesia jubet; semper paret.

Nona: Uti potestatem, quæ legem declaravit; ita & legem infallibilem esse. In utroque enim est Divinum *9. Quæ toti & potestas, infallibilis.* *αὐτός ἐστι;* quod non fallit. Et tollitur Ipse dixit omnis religio, si aliqua indubitata non statuitur.

Decima: Potestas hæc, est Hierarchica; gradus habens, & ordinem. Ubi autem gradus, devenitur ad summum; ubi ordo, ad unum. Et nimis liquido constat, non popularem regendæ Ecclesiæ suæ formam elegisse Christum; sed Principatum. *10. Potestas est Hierarchica, gradus, & ordinem, habens.*

Undecima: Ex prædictis, sic describitur Ecclesia; ut sit; in vera, una, necessaria Religione, Congregatio fidelium, sub potestate, ac lege constituta; Missionem, ac Successionem habens; certam fidei Regulam retinens; Infallibilis; & sub uno, summoque Capite. *11. Ex his notis definitio vera Ecclesiæ.*

Positis autem his, quæ sese ratione consequuntur: Convenio Ecclesias (omnes equidem, præter unam, falsas) & exquiro: num acceptent præscriptiones hæc, admittantque? Quæ non; sua confessione arguentur, non *Hanc qui non acceptant, manifeste induunt ultro erroribus.*

habere religionem veram, unam, necessariam, potestate & lege devinctam. Non item potestatem à Missione; nec missionis successionem: Nec ab illa, formulam fidei unam infallibilem: nec in optima regiminis forma, quæ est Principatus: Sed potius ἀνεφελὴν ἀναρχίαν; & nullam denique Ecclesiam. Istis, inquam, Erroribus, & absurdis, se ultrò induerent, non admittendo hæc, quæ præscripsi. Admittent igitur potius cuncta; & dicent, eorum professioni quadrare, ac omnino convenire. Itaque fidenter præscribam cætera, & persequar.

Sine capite licentiam.

Acceptabunt igitur potius.

x2. A tali Ecclesia desciscere, Hæreticum.

Quia Divina auctoritas, & potestas, violatur.

Duodecima ergo sit præscriptio: A tali, quam definivi, Ecclesia desciscere; eam erroris arguere; condemnare; Hæreticum prorsus esse. Causa præscriptionis in aperto. Divinam enim auctoritatem, qualem hic ponimus, quis licitè deferat, arguatve erroris? Deinde; cum ex antedictis pateat, Ecclesiam habere jus Potestatis summæ; demonstratum autem, libro secundo, jus ejusmodi in eo situm, ut ei pareatur semper; & nunquàm licitè resistatur: Ideo, parendum semper erit Ecclesiæ,

clesiæ; & tantò magis, quòd aliæ quidam potestates à Deo, hæc verò prorsus ipsiusmet Dei; quam *recupariæ* rectè vocaveris.

Decima tertia: Desciscunt ab hac potestate, & hæretici sunt, qui Ecclesiæ sancita, & dogmata corrigunt; vel interpretatione Scripturarum, vel ratiocinatione humana, vel pravo studio curiosæ indagationis. Hoc enim non permittit constituta semel fidei Regula; quæ jubet credere, non quærere.

Decima quarta: Multò magis Hæretici sunt; qui novum cætum, separatamque faciunt Ecclesiam. Nam, si fuit semper, ut ostensum est, aliqua, & una; dum inducitur altera, falsa sit oportet. Est verò hæc nota vera, & proprius character Hæreseos: facere Schisma, & secessionem. Non tam enim erronea opinio hæresim efficit; (nam hæc ab innocenti ignorantia oriri potest) quàm pertinacia, authoritati resistens.

Decima quinta: Prima fides retinenda: quæ verò, prætextu correctionis posterior inducitur; vitanda semper, ac fugienda. Nam id Dominicum, (inquit Tertullianus) & verum; quod

13. *Dea*
sciscunt,
qui eam
corrige
præsu-
muunt.

14. *Mul-*
tò magis,
qui novū
cætum
faciunt.

Nū schis-
ma hæ-
resis cha-
racter.

15. *Prima*
fides re-
tinenda.

Nam posterior zizania. primò traditum : posterius falsum. Quod vel illa parabola docet , quæ triticum seminatum ; ait , à Patrefamilias ; post verò ab inimico , Zizania . Additque Tertullianus ; memoranda profectò , notandaque verba : Ea sententia , (inquit) manebit adversùs posteriores quasque hæreses . Ubi non præscriptio tantum ejus ; sed prudens sanè prædictio , & præmonitio est .

16. Quæ doctrina citò placet suspecta. Decima sexta : Suspecta doctrina esse debet , quæ citò placet ; & arridet mentibus humanis . Talis , non jubet credere , quod non capias ; quæ supra , aut præter captum sunt , reiicit : Inquirere in regulam permittit , licentiam fovet , obsequium tollit , multa superflua esse , & non necessaria , asserit , & denique laxat disciplinam , patentemque nimis viam aperit : cùm angusta sit , quæ ducit ad cælum . Assentitur verò his facilè animus : quippe sui juris amans , adstringi præceptis nolens ; & ut plurimum prava arripiens sponte , recta sequens invitus . Quia illa , fronte blandiuntur , & statim alliciunt ; hæc aspectu aspera , ideoque absterrent : sed tractu , ac mora ; illa exitu tandem misera , hæc fine beata .

Quæ nō humana arripit .

De.

Decima septima : Hac ratione , sed
obtentu recti , hæresis sese insinuare
solet . Frustra tamen . Nam eventu
tot sæculorum compertum habemus ;
omnes istos correctores , re ipsa semper
fuisse seductores . Id ostendunt tot , quæ
recensentur nomina sectarum ; quæ ideo
non ex Deo erant , quia periere .

17. Expe-
rimento
docemur
Novato-
res sem-
per fuisse
iniposto-
res .

Decima octava : Quæcunque do-
ctrina præfert authoris nomen , osten-
dit hoc ipso secessionem , & Schisma .
Vetat Apostolus dicere : ego Pauli , ego
Apollo , ego Cephæ ; idque ideo , ut
non sint , inquit , Schismata ; sed sint
omnes in eodem sensu , & in eadem
Sententia . Argumentum enim est dis-
sensus , & innovatæ doctrinæ , hæc ab
authore denominatio ; quam semper
sectæ habuere , nunquam Ecclesia
Vera .

18. Here-
ses novo
nomine
semper
insignite .

Decima nona præscriptio , manat
ab eo , quod opponi solet . Nempe : si
manifestus Ecclesiæ error sit , (inquiunt)
quomodo assensum merebitur , & exi-
get ? Ad hoc , ut respondeam , præscri-
bo : Hypothesim falsam esse . Nunquam
enim regula fidei , quam sanxit legitima
veræ Ecclesiæ potestas ; nunquam dico ,

19. Falsi
errores
Ecclesiæ
veræ ad-
scribi .

erravit : nec errare , ex promissione Christi , potest .

*Perperam
privato
judicio
corrigi.*

Sed fac errasse . Tu ne es , qui corrigas ? quo jure ? qua potestate ? quo argumento ? scilicet te expectabat veritas liberanda . Interim perperam prædicabatur , perperam credebatur ; tot millia millium perperam operata , tot officia perperam functa ; ut hunc locum , more suo , fortiter premit Terullianus .

*Quod nova
missio-
ne Divi-
na fieri
oporteret.*

Certè si errare posset Ecclesia ; oportet Deum primam missionem , novam evertere ; eamque signis , prout primam firmare : tum demum , forsan , fas esset desciscere . Sed fortasse ne tum quidem : quando nec Angelo aliud annuncianti , credere jubemur . Hæc sunt , quæ meritò præscripsi ; vera nempè Religionis Christianæ fundamenta , & signa .

*Hæreticis
hæc fun-
damenta
Religio-
nis non
quadrant*

Excutiant se verò heterodoxi , & attentè expendant , qua ratione hæresis nomen effugere queant : seu hæc , tam ipsis non convenientia , simulatè admittant , nec ad Ecclesiam redeant ; seu impudenter reiiciant . Reiiciant autem necesse est ; quia tueri nequeunt : & , ut jactent ;

jactent ; tamen verba rebus contraria sunt , & quod dicunt , factis negant .

Quod ut breviter demonstrarem ; operæ pretium est , ponere in primis Regulam credendi , quam illi præseferunt . Ea autem est : Solum , & purum (inquirunt) verbum Dei ; seu Autoritas Sacrae Scripturae , sanè intellectæ . Hoc est , quod passim jactant , quod speciosè ostentant . Et verum quidem est , veram regulam fidei necessario Sacrae Scripturae convenire ; nec posse ab ea diversam esse : attamen , si bene inspicis , agnosces profectò Scripturam hic obtentui esse ; revera autem pro regula haberi cujusque interpretationem . Quam variam esse posse , dissidium sectarum ostendit , nunquam sine auctoritate sopiendum .

Hac tali regula fidei constituta , manifestum est , & ruere omnia fundamenta religionis , quæ recensitis præscriptionibus stabilivi ; & sectis minimè congruere . Primum enim ; veram apud se nec possunt , nec audent religionem profiteri . Non possunt ; quia inquirendam in Scripturis , & scrutandam docent ; qui autem quærit , non tenet .

Non

Quod ex regula fidei , quæ præseferunt demonstrantur .

Ea enim est privata scripture interpretatio .

Per quæ ruunt Religionis fundamenta .

*Nec veri-
tas ejus
certo con-
stare po-
test.* Non audent; quia dum scire volunt;
non credere; infallibilis certitudinis
hostes sunt: quam non ratio humana,
sed fides facit.

*Nec uni-
tas.* Deinde, si certitudinem veritatis
non profitentur; profectò nec unita-
tem habent: nec semel constitutam fi-
dem; sed opinionem, ac persuasionem,
prout interpretati fuerint Scripturam.

*Nec ne-
cessitas.* Tertiò: neque necessitatem unius
Religionis agnoscent: quia ex regula
credendi, quam præferunt, sequitur
quemque posse credere prout Scriptu-
ram intelligit. Unde multorum asser-
tio: omnes in sua religione posse salva-
ri; quod necessitatem veræ, & unius,
prorsus tollit.

*Nec cætus
legitimus.* Quartò: nec legitimum cætum: quia
(ut mox ostendam;) nec potestate, nec
lege constitutum; id est, non socie-
tatem cum certo ordine regendi, & pa-
rendi, sed licentiosa conspiratione se-
cessionem.

*Nec Po-
testas.* Quod etiam Quintam, & deinceps,
Nonam usque præscriptionem, contra
illos esse evincit. Etenim omnes istæ
potestatem omnino exigunt, & legem.
Potestatem verò illi adeò non habent;
ut

ut Scriptura contenti, oppugnent etiam, ac defugiant. Neque sanè miror; cum hæc constet successionem, quæ apud illos nulla. Dicunt etenim Ecclesiam veram, mille ampliùs annis, aut non fuisse; aut, quod idem est, occultam. Quod utrumque successionem (tanto præsertim intervallo) vel ruptam, vel ignotam, atque ideo falsam, nullamque facit.

Legem verò etiam habere nequeunt. *Nec Lex.* Quia etiamsi sanciant dogmata; tamen eatenus eis assentiuntur, quæ agnoscunt Scripturæ congruere. Peto verò: possuntne agnoscere contrarium? Si possunt; quorsum fidei formula? si non; quorsum inquisitio? aut itaque desinant inquirere, si asserunt se habere semel constitutam credendi rationem; aut si inquirunt, fateantur se illam non habere.

Decimò: Hierarchicos ordines aspersionantur; & Monarchiæ professi hostes sunt. *Nec Hierarchia.*

Undecimò: Ecclesiæ definitionem quam posui, potiùs (desperatione causæ) diffitebuntur veram, quàm ut eam sibi accommodent. Idque ideo, quia necesse

*Quā ta-
men reti-
nent.*

*Sed ma-
gis neces-
sitate,
quā ap-
probatio-
ne.*

*Dū enim
vitant
obsequiū,
Tollunt
ejus im-
perium.*

*Ideo con-
vincun-
tur schif-
matis.*

esse quidem Ecclesiam aliquam firmi-
ter volunt, asseruntque. Et si enim so-
lemnia quædam ejus retineant, ac usur-
pent; ut Cathéchismum, instituta cir-
ca ritus, Festorum dierum indictio-
nem, ministros certo gradu, synodos,
excommunicationes, aliaque; tamen
cuncta hæc, necessitate potius, (aliter
enim Religio constare non posset)
quàm approbatione. Nam ut omnia
sibi libera, & integra relinquant; ne
illegitimi cætus, & nullo jure congre-
gatæ Ecclesiæ arguantur; ne illigari
confessione, dogmati adstringi, ac po-
testati subiici possint: nulli se ajunt
credere, nisi Sacræ Scripturæ. Quo ipso,
nihil Ecclesiæ debitæ authoritatis ad-
tribuunt, sed ei proprio dominantur
judicio; & tantum vanam ejus for-
mam, ac velut larvam habent. Hinc
est, quod passim scripta vulgant: Nul-
lum sacrum ordinem, nulla officiis po-
testatisque discrimina; atque adeò nul-
lam Ecclesiam, velut Civitatem bene
ordinatam, esse.

Ista autem, quæ undecies præscripsi,
dum non conveniunt sectis; dum eis
nequeunt aptari; hoc ipso facilè, &
ma-

manifestò eas convincent omnium eorum, quæ à duodecima præscriptione deinceps sequuntur.

Descivere enim sectæ, (ut quæ præ-
scripsi, comprehendi faciã,) ab Ecclesia; corrigere eam voluerunt: Novum instituerunt cætum, separatamque Ecclesiam: Primam fidem, habentes exinde damnationem, reliquerunt; latam aperuere viam; Autores earum, non correctores, sed corruptores meritò jam audiunt; sectis denique nomina de suo nomine imposuerunt. Etsi enim hoc postremum negetur; & nemo se Lutheranum, aut Calvinianum libenter dici velit: sed tamen profectò sunt; neque aliter dignoscuntur. Quod si Evangelicos, seu reformatæ Religionis sese nominent; hæc ipsa nomina novitia, & veteri Ecclesiæ ignota prorsus esse, nemo nescit; quæ, præter Christianos, & Catholicos non novit.

Sed sat evagatus sum, & ultra finem forsan, modumque propositi. Itaque pauca tantùm ad Sectarios. Non puto omnes velle errare: si quos tamen ambitio, avaritia, æmulatio prava, studium præcellendi, obsequii detrectatio, arro-

*Quod stric-
tim ostē-
ditur.*

*Secessio.
nem vel
nomine
testantur.*

*Adhorratio
ad il-
los qui
videntur
velle er-
rare.*

*Videant
quanto
sint in pe-
riculo.*

*Attendāt
conscien-
tiæ redar-
guenti.*

*Non eru-
bescant, à
veritate
vinci.*

*Qui igno-
ratione
peccant.*

arrogantia denique mentis, adeò trans-
versos egit, ut illis peccare lubeat : Vi-
deant quæso ; quàm periculosæ plenum
opus aleæ, levi causa tractent ; quan-
to in periculo versentur ; quo damno,
quo discrimine ludant . Attendant de-
inde ad internum testem inquietæ
mentis . Nemo enim suam conscien-
tiam decipit, qui fallit alienam . Clamat
animus interior, & arguit, vel dereli-
ctæ, vel non inventæ, vel (quod pessi-
mum) spretæ veritatis . Quisquis ergo
ejusmodi es, redi tecum in gratiam .
Quid prodest, te pertinaciter esse, quod
esse non prodest ? Num pudet à verita-
te vinci ? Nonne si illa victrix tui ; tu
triumphator erroris ? Cur illo suffun-
daris, quo gaudebis caruisse ? Certè
deserta opinio prava, Confessio aber-
rationis, malè asserti dogmatis dam-
natio, Transfugium denique ad bonos,
solido, ac vero, immò necessario fructu
pensabit abundè, inane, quod hinc ori-
ri possit, levitatis improprium .

Vos verò, qui ignorance peccatis ;
nolite dogmatis pertinaciam, nimium
studium sectæ, & denique odium ad-
versæ partis induere . Non est enim vo-
bis

his Religio, etiam post sancitum dogma, inquirere; & scrutari: permittit hoc, aut potius exigit regula fidei, quam profiteri. Quærite ergo fide bona: nihil enim absurdum magis, quàm aut testari dubitationem, nec tamen inquirere; aut tueri, ac defendere, quæ dixeras quærenda. Deinde; non vos secta, & societas opinionis retineat: absolvit enim vos hoc vinculo, datum cuique hac in re arbitrium, nullo adstrictum obsequio. Deinde; nolite odio abripi. Tum enim demum spondeo, agnoscetis: & ignorare vos, cum odistis; & iniquè odisse, cum ignoratis. Nos certè non vobis irascimur. Pœnam errantibus assignamus, veri agnitionem; victoriæ nobis pretium, salus Vestra. Pro hac decertamus, pro hac pugnamus: Et cum Apostolo, testis est nobis Deus, quomodo omnes vos cupiamus, in visceribus Domini nostri JESU Christi.

Denique voto locum hunc concludo; & te, Deus, invoco: ut (quod tu solus potes) mentes opinione corruptas, veritati restituas; & aberrantes oves in Ecclesiæ causam reducas: ut
sic

*Inquirat
verum si
de bona.*

*Non retineantur
sectæ studio.*

*Ne odierint nos
gratis.*

*Qui illis
bene cupimus.*

*Voto ad
Deū Locustæ clauditur.*

fit , prout promisisti , unum ovile , & unus Pastor .

C A P U T II.

Περί Θεοσεβείας :

S E U

De Cultu Dei .

*Notitiam
Dei , cul-
tus conse-
quitur .*

*Et ab illa
necessariò
manat .*

Notitiam Veram , & agnitionem Divinitatis , necessariò veneratio & cultus consequitur . Quis enim , cum cognoverit summū illud bonum , intra se infinitè perfectum , beatumque , in omnia summè potens ; erga nos mirè , & supra modum beneficum : quis , inquam , non colat ? non adoret ? Debemus id primū , admiratione majestatis : Tenemur deinde officio gratitudinis : suademur ingenti præmio : jubemur denique gravi , & extrema pœna .

*Imple-
mus , prout
se coli
Deus præ-
cipit .*

*Modumq;
imperat ,*

Porro , sicut Vera notitia Dei , non est nisi à Deo ; ita & acceptus ei cultus esse non potest , nisi ab ipso met expetitus , imperatusque . Ergo , ita eum colere oportet ; quemadmodum sese colendum præcepit . Quod præceptum ,
partim

partim imperat modum certum sacrorum rituum, & cæremoniarum; partim imprimit mentibus nostris religiosum quendam metum, qui nos Divinæ mancipet servituti; sed voluntariæ, & paratæ; quippe simul erga Dominum, & Patrem.

Sed ut dignè hoc impleamus officium, scire oportet; oriri cultum ab honore. Honor autem, est internum iudicium debitæ existimationis, testimonio & signo externo expressum. Hinc, inquam, manat cultus; & Adoratio: Quæ, est submissio quædam animi; quippe erga excellentiorem. Unde quò major æstimatio, eò major submissio.

Deus verò, cùm sit infinitæ dignitatis: ideo & nunquam sibi parem honorem à creatura obtinere potest; & sibi soli eum, meritissimè vindicat. Quia solus propriam, à nullo acceptam dignitatem habet: cùm omnis alia sit ab ipso, & propter ipsum; imò ipsius omnino.

Patet verò etiam, quòd Adoratio Dei, animo potissimum fiat: Dum ille se humiliat, & abijcit coram Deo: & summa,

*reli-
gionem
facis.*

*Oritur ab
honore,
qui defini-
tur.*

*Uti & a-
doratio.*

*Utrumq;
soli Deo
proprie
debetur.*

*Animo fit
potissimu.*

Tamē & corporis ministerio. summa, qua potest æstimatione, adoratur eum in Spiritu, & Veritate. In hac, inquam, actione mentis, præcipuè sita Veneratio; sed tamen ad consortium hujus officii, corpus etiam accersitur: cujus conformatio, ac compositio, externo signo; & gestu exprimit internum mentis sensum: ut mox explicabo. Utroque verò, id est, animo & corpore, testamur soli Deo debitum illum cultum, quem τὴς λατρείας nominare solemus.

Cultus partim privatus. Adorandus ergo, & venerandus solus Deus. Idque triplici cultu. Primus, est proprius cuique, ac privatus; qui vulgò Devotio dicitur. Alter, religiosus seu Mysticus; qui est in observatione instituti, & rituum sacrorum: Tertius, relativus; qui per honorem alterius, ad Deum transit; eique propriè defertur. Itaque hinc manabunt tres hujusce capitis partes, singillatim explicandæ.

Pars Capitis Prima.

De Cultu Dei privato, seu De
votione.

PRivaturn Dei cultum, devotionem *Definitur*
voco; non latino, sed Ecclesiæ *devotio*
sensu. Est enim, quam hic intelli- *privata.*
go, Devotio: puri, & innocentis
animi in Deum ascensus; & elevatio;
actione certa, allocutione, & cogita-
tione.

Actionem primùm pono; id est, ut *Actio ejus*
dixi; certam corporis compositionem, *fit gestu*
qua submissam venerationem testa- *certo cor-*
mur. Ea, partim est usu recepta, & *poris.*
introduc-ta; partim imperata à potesta-
te Ecclesiæ. Prima, fit inclinatione *Consuetu-*
cervicis capitisque, adgeniculatione, *dine pio-*
cernua corporis demissione, prociden- *tum in-*
tia, manuum elevatione, percussione *troduc-ta.*
pectoris, alijsque modis, quos consue-
tudo piorum, & usus, potissimùm ab
exemplo Christi acceptos retinet ex-
ercetque. Hæc talia, etsi mente ani- *Mover*
mantur, & ab illa vim accipiunt; ta- *animum.*
men & ipsa valent; faciuntque ad ani-
mi motum. Et constanter, ac fixè exer-

cita, & excitant eum sæpe; & ne eva-
getur, quodammodo firmant.

*Sed fiat
ostentatio-
ne procul.*

Sed bina hic cautio. Primum: ut
fiant, ostentatione omni procul. Ideo-
que vix in publico, & spectantibus co-

*Et sine
anxia ni-
mis cura.*

ram; aut certè parcè. Deinde, ut non
anxia & sollicita cura; & tanquam sine
illis esse non posset Oratio. Sunt enim
adjumenta potius ad cultum, quàm
ipsa ejus opera. Cùm, ut notum est ve-
tus illud: Bonus animus; præcipuus,
pulcherrimusque Dei cultus sit.

*Eadem a-
ctio ex
præcepto
Ecclesiæ.*

Illà verò, quæ sanxit Ecclesiæ regu-
la; ut actione certa, seu ministerio cor-
poris, circa institutos ritus impleantur;
ad mysticum cultum pertinent: de
quo infra.

*Altera
pars De-
votionis,
Oratio.*

Allocutio Dei, seu Oratio sequitur:
privati cultus; seu verbis, seu cogitatio-
ne fiat; pars (ut ex officiis ejus, quæ mox
recensebo, patebit;) longè præstantis-
sima: Præsertim, si debita cura, & at-
tentione peragitur. Quod ut fiat; præ-

*Cui præ-
mittitur
Præpara-
tio.*

mitti debet Præparatio. Hæc verò re-
linquere jubet, & velut seponere ad
tempus curas omnes, sollicitudines,
negotia; & dicere illis: manete hic,
donec vadam illuc, & orem. Hæc, in-
quam,

quam, jubet: Unum porro necessari- *Que hoc*
um, accurata attentione, ac diligen- *unum e-*
tia agere: Memoriam defigere: & phan- *gere.*
tasmatum copiam submovere. Deinde, *DEUM*
magnitudinem majestatis, quam allo- *profunde*
queris, ut par est, expendere, præsen- *venerari.*
temque intueri: vilitatem tuam agno-
scere; & humiliari quantum potes, in
conspectu Dei. Tertiò, petere auxi- *Et auxi-*
lium, & bene orandi modum; ut diri- *liu petere*
gatur, & assurgat oratio tua, velut in- *jubet.*
censum in odorem suavitatis; & ad
gloriam ejus.

Officia, quibus oratio fungitur; plu- *Officia O-*
ra sunt, & varia. Primum est laudis: ut *rationis.*
nempe benedicat, & magnificet anima *Primum*
tua Dominum: & exultet Spiritus *laudis.*
tuus; & omnia quæ intrate sunt, in
Deo salutari tuo. Hoc ei à nobis debi-
tum: & hoc tantum possumus deferre. *Eam Di-*
Cum verò ne id quidem, ut par est; *vinitas*
ideo, opus erit de alieno divitem, & li- *ex se ple-*
beralem esse. Offer ergo ei eam; qua si- *nā habet.*
bi ipse sufficit, gloriam. Gratulare; gau-
de, & exulta: quòd Divinitas se di-
gnam à se capiat, habeatque lau-
dem. Offer ei deinde naturam huma-
nam, à Chitllo in consortium divini-

Offerenda
ab huma-
nitate
Christi.

tatis assumptam ; ineffabili modo se
coram ea humiliantem ; eam adoran-
tem, & laudantem. Cui laudi, junge
Canticum Sanctissimæ Virginis ; quo
magnificatus est Deus vehementer .
His , etsi nihil par addi possit ; tamen tu
adde millia illa millium Spirituum ei
ministrantium ; & turbam, quam dinu-
merare nemo possit, Sanctorum ; pro-
cidentium coram Sedente in throno ;
adorantium eum , & dicentium : Salus,
benedictio , & claritas , & sapientia , &
gratiarum actio , honor , virtus , & for-
titudo Deo nostro . Adjunge deinde
militantis Ecclesiæ officia ; laudes ,
& sacrificia ; & phialas illas aureas ,
plenas odoramentorum ; quæ sunt o-
rationes Sanctorum ; Acceptos nempe
suffitus Deo . Denique, exemplo Davi-
dis , inanima quoque ad hoc officium
advoca ; supple elinguem eorum lau-
dem : Et per te benedicant omnia
opera Domini Dominum . Multa sunt,
quæ hac de re tradita à Viris pijs ha-
bere potes , & debes petere in exem-
plum .

*Alterum
officium
Oblatio
sui.*

Alterum Orationis officium est, vera
Oblatio sui ; ad agenda , & sustinenda
omnia ,

omnia, quæ Deus iusserit, volueritque: *Ad agen-*
 consecrando ei memoriam, intelle- *da & su-*
 ctum, voluntatem; cogitationes, ver- *stinenda,*
 ba, opera; corpus, & cuncta externa; *omnia*
 & animam denique, velut in holocau-
 stum immolando: Nihil ex hac obla- *Solo ref-*
 tione sibi retinendo, nullum captando *pectu Di-*
 commodum, præter puram gloriam, *vine glo-*
 placitumque ejus. Desideria, & vota *ria.*
 hujus officii plurima, & ardentissima
 esse possunt, itidem à pijs Scriptoribus,
 ad quos te remitto, ubertim tradita.
 Grata verò Deo sint, necesse est; quip-
 pe qui unicè complacet in hominibus
 bonæ voluntatis.

Tertium Officium: Confessio vilita- *Tertium*
 tis suæ, & malitiæ; non modò se in suo *Confessio*
 nihilo collocando, sed etiam confiten- *proprie*
 do malum. Delictum, inquam, tuum *vilitatis,*
 cognitum illi fac; & injustitiam tuam *Et mali-*
 non abscondas. Confitere adversum *tia.*
 te Domino, & ille remittet impieta-
 tem peccati tui. Fatere, te nihil aliud
 esse, nisi molestam quodammodo cu-
 ram Dei, & jacturam ejus gratiæ; & ve-
 niam precare.

Quartum officium est: Gratiarum *Quartū,*
 actio. Quæ enim, ò Deus, à te; & quan- *Gratiarū*
actio.

Pro donis ta accepimus ! quæ promissa acceptu-
naturæ, ros speramus ! quis unquam satis dona,
gratiæ, quæ supra recensui ; naturæ, gratiæ, glo-
gloriæ. riæ, agnoscat, expendatve ? Immen-
 sum ergo tibi tenemur, nec unquam
 ex meritò dependendum . Sed est ali-
 qua gratitudo, postquam omnia fece-
 ris, ingenuè imparitatem fateri .

Quintum, Quintum est ; *Petitio.* Petitio : Utile, Uni-
Que ut cum, præsens, & certum miseræ no-
fit rata, stræ remedium ; Firmatum toties in-
& profi- geminato impetrationis promisso . *ena.* Pe-
 tite enim, inquit ; pulsate, quærite ; &
 quidquid petieritis, fiet vobis . Securi
 ergo simus de eventu : certi donationis,
 & gratiæ ; modò & bona, & benè pe-
 tamus . Cum enim sit infinitè bonus,
 malum dare nec vult ; nec potest . Ca-
 rior est illi homo, quàm ut ei malefa-
 ciat ; etiamsi petenti . Sed pauci sunt,
 qui sciant, quid petant ; & pauci digno-
 scere possint vera bona, & verè mala :
Petenda Quid enim ratione timemus, aut cupi-
voluntas mus ? Quid tam dextrè concipis, ut
Dei. te conatus non pœniteat ; votique
 peracti ? Itaque optimum est, ejus ex-
 petere voluntatem ; & dicere : Domine,
 fac mecum non secundùm mea pecca-
 ta,

ta, quæ multa sunt; non secundum vo-
ta, quæ stulta sunt, non secundum me-
rita, quæ nulla sunt: Sed secundum
tuam misericordiam, & meam mise-
riam.

Deinde, nec minus petere; nec
aliud, nisi ipsum. Pudeat minuta,
viliana, abjecta, à tanto Domino
mendicare; cum ille seipsum; id
est omne bonum offerat ultro, &
elargiri promittat. Alia potius, quàm
sumum hoc consecrari, non mo-
dò pusillanimitas, & stultitia est;
sed impietas, & vilipendium offe-
rentis. Vastum ergo sit, quod pete-
mus; & dignum tanto datore: &
quod non privatas tantum necessita-
tes; sed generis humani, & præcipuè
Ecclesiæ bonum, ad gloriam Dei com-
plectatur.

*Petendus
ipsemet
Deus.*

*Et in om-
nibus eo-
jus glo-
ria.*

Titulus petendi, & fiducia impe-
trandi sumitur: quia dum omnipotens
est, omniscius, summè bonus; & quia
promisit: propter gloriam nominis
sui, non potest non facere. Operi ma-
nuum suarum dexteram porrigat, ne-
cesse est; nihil enim odit eorum, quæ
fecit. Itaque fidenter titulum allegare;
& di-

*Titulus
petendi
& fidu-
cia: quia
potest,
vult,
scit, ac
promisit.*

& dicere possum: Tuus sum ego; sal-
vum me fac, propter nomen tuum.

*Hæc offi-
cia sunt
primùm
oratione
vocali.*

*Ex Da-
vidis
Psalmo-
dia.*

Hæc ferè sunt officia orationis; qui-
bus partim sermone, partim cogitatio-
ne, & mente fungimur. Vocalis, ut
vocatur, oratio, ab Ecclesia variè ad-
hibetur; & descripta est, tam publica,
quàm privata. Utraque potissimum
desumpta ex his, quæ dixit, cecinitque
David, egregius psalter Israel; quo
elogio eum Scriptura ornavit. Addit-
que ibidem ipsum dicentem: Spiritus
Domini locutus est per me; sermo ejus
per linguam meam. Itaque meritò di-
vinam hanc ejus psalmodiam adscivit
Ecclesia; eamque quotidie, publicè &
privatim decantat, aut recitat: ple-
nam quippè admirandi Spiritus, fervo-
ris; & ardentis, inflammaticque affectus.

*Ex con-
stitutis
pro tem-
pore Ec-
clesiæ pre-
cibus.*

Addit verò eadem & alias Orationes,
statis temporibus congruas, & solem-
nes; prout annum partita est, & Fastos
Christianos condidit: autoritate, cui
parent etiam, qui ab ea secessere; & in-
signitos nominibus festorum, & San-
ctorum dies, retinent vel inviti. Ibi
verò illa loquitur in canticis, & hymnis
spiritualibus; & officium (ut vocant)

con-

constituit, cuique tempori & festo proprium, è Prophetarum, & Sacrae Scripturae verbis, magna fidelium consolatione, atque fructu. Ejusmodi enim totius Ecclesiae Orationes, Communio Sanctorum, & unanimis clamantium toto Orbe Vox, valde commendat; efficacesque promittit. Si namque duorum aut trium, in nomine suo consensum, Deus se magni facere professus est; quanto magis totius Ecclesiae consonas, conjunctasque preces?

*Per quas
communio
Sancto-
rum.*

Sed inter hæc omnia vocalis Orationis exempla, relucet, velut inter ignes luna minores, Oratio Domini-
ca; idque, & propter majestatem Authoris; & ob miram suam vim, & energiam. Petentibus enim à Christo Discipulis, ut eos doceret orare; postquam Βασιλειαν, & Ethnicos imitari vetuit: Sic ergo Vos, inquit, Orabit. Et tum Orationis formulam subjunxit: profecto plenam rei magnæ; & pura, candida, simplici enuntiatione, brevi ac miro compendio, exactè complectentem cuncta Orationis officia. Quæ supra recensui.

*Oratio
Domini-
ca præ-
cellit om-
nibus.*

*Multa
inaniter
loqui.*

Operæ

De qua paraphra. sticè pau. ca. Operæ pretium est, videre; quæ Viri sancti & eruditi, in ejus sensa eximiè multa commentati sunt. Nos pauca dicemus, hac, quæ sequitur, paraphrasi.

Deus vocatur Pater ob fiduciam. Fiduciæ conciliandæ, quæ orationis basis est; Deum, jubet Christus, vocare Patrem; eumque communem omnium nostrum: ut ortus, & fraternitatis admoneret. In cælis autem eum esse: ut nos à terrenis edelevaret, ubi verè Pater & Patria.

Petitio- nes septē. Subjungit deinde Septem petitiones. Petendum enim totum est; quia nostrum nihil est. Tres primæ ad Deum pertinent; & videntur in ejus commodum cedere: sed profectò in nos recidunt. Ille enim bonorum nostrorum non eget: Et materiam tantum meriti, & præmii nostri quærit; cùm sibi deferri aliquid jubet.

Ut sanctificetur nomen ejus. Nostra ergo propriè interest; petere primum, ut sanctificetur nomen ejus. Non per nos tantum: quantulum enim hoc esset! sed omni meliori, ipsi noto modo.

Ut adveniat regnū ejus. Deinde petimus; ut adveniat regnum ejus. Non quod illo carere, aut privari ipse possit; sed quia nos. Itaque propriè petimus, ut non habeamus Regem, nisi Deum; qui imperitet

men-

mentibus, rebusque nostris. Tertiò; ut Regni istius suprema lex sit, & fiat voluntas ejus: nempe omnis justì, æqui, boni regula; tam in cœlo, quàm in terra. Hæc ad Deum, & vitam alteram.

Ut fiat voluntas ejus.

Præsentis verò necessitates sequuntur: quas brevi voto complecti jubemur.

Ut largiatur panem.

Id est; panem nostrum tantum petere: quotidianum, non extraordinarium;

modicum, & qui hodie sufficiat; nam de crastino vetat esse sollicitos. Hoc

compendio, circa externa properè, & sine magna cura functi; magis petimus,

Ut dimittat debita.

ut dimittat nobis debita nostra. Adeò enim gravia sunt, ut reddi non possint,

nec exolui. Itaque, quod magnificen-

tiam, & munificentiam ejus decet; non solutionis moram, & patientiam, sed

condonationem jubet petere. O benignum creditorem! Lætetur; quamvis

ære ejus oppressi debitores. Non modò usuras, sed nec sortem repetit. Pæ-

nam non urget: Rogari se tantum; Fateri & debitum, & insufficientiam

jubet; & condonat. Sed justà tamen cum cautione. Nempe si & nos dimi-

Sed si & nos dimiserimus.

ramus debitoribus nostris. Quid æ-

quiùs! Abominatio, & horror est Ser-

vus

vus ille nequam; qui omnis debiti remissione obtenta, vix digressus à Domino, suffocabat pauca sibi debentem conservum. Ita ut meritò contubernales contristati, eum deferrent nequitiae: ut Dominus remissionem revocaret. Non itaque dimittetur nobis, nisi dimittamus. Nam illicium est misericordiae Divinae, misericordia in proximum. Quam etsi promittere, & profiteri jubemur; tamen consciis, pro ni in malum animi, petendum adhuc nobis est: Ne nos inducat in tentationem. Seu, ut alibi dixit; orandum, ne intremus in tentationem. Memoria enim infirmitatis nostrae, non modò victoriæ non sumus securi; sed certamen etiam meritò detrectamus. Sed quia tamen vita hominis tentatio est super terram; Ideò ultimò petimus, ut nos liberet à malo; nempe dæmone: (hic enim proprius Character ejus est) ne nos in tentatione superet; sed potius faciamus ex illa proventum. Ita peccata, & præterita dimitti petimus; & futura caveri, ac averti.

*Oratio
hec brevium
Evangelii.*

Hæc est brevis paraphrasis Divinae istius Orationis: quam Breviarium

Eyan-

Evangelii Tertullianus vocavit; & quæ accepta ut sit Deo, & efficax; necesse est: quia prout iussit; & de suo (ut loquitur Ciprianus) rogatur. Agnoscat facile Pater Filii sui verba; & quicquid petierimus in nomine ejus, institutione, & sermone ejus, dabit nobis.

Post Orationem Vocalem, sequitur mentis & cogitationis; quam tertiam partem privati cultus feci. Hæc non lingua, sed animo Deum alloquitur. Id est, considerat & ipsum, & creationis, redemptionis, sanctificationis admiranda ejus opera; mysteriorum arcana inspicit; agnoscit dogmata fidei; & exinde, miro affectu, recensita officia Orationis exercet.

Id verò fit partim Meditatione, partim Contemplatione. Meditatio est, exlectione sacra, & fidei dogmate, de Deo, & rebus Divinis, intenta consideratio. Quæ fit, cum in memoria formatur rei meditandæ imago; Intellectu de ea instituitur ratiocinatio; per voluntatem sequitur ejus fruitio. Contemplatio verò; est animi præparati ante, & jam apti, motus quidam, quo in Deum, velut natura, & pondere, fertur.

*Meditatio est cū
ratiocinatione
consideratio.*

*Contemplatio fit
beneficio
Dei illa-
tentis.*

fertur. Ibi memoria sine phantasma-
tum adminiculo illum admiratur : In-
tellectus sine ratiocinatione noscit ; vo-
luntas sine ullo illicio proprii Commo-
di ita eo fruitur ; ut non tam sibi illum ,
quàm se illi largiatur , & impendat .

*Illa Deū
querit ,
hæc ha-
bet .*

Meditatio itaque fit quodammodo
opera , cura , & industria nostra : Con-
templatio solo impulsu , & illapsu Dei .
Illa Deum quærit , hæc habet . Illa agit ,
hæc patitur tantum . Illa in actione
mentis ; hæc in quiete ejus , otio , silen-
tio , solitudine , immò morte : Quia se-
ipsa vacua , vacat Deo ; & ab ipso im-
pletur . Prodeunt verò hinc in viris
sanctis sæpe extases , & raptus ; sive ex-
tra corpus (ait Apostolus) seu in cor-
pore , nescio : sed hæc nec sectanda , nec
appetenda ; immò , quantum per nos
potest , vitanda ; alioqui periculosa , &
illusioni opportuna .

*Præcepta
utriusque
apud
Scripto-
res sacros*

Præcepta tam meditationis , quàm
contemplationis , habes apud Scripto-
res Asceticos . Sed præcipuum est : ha-
bere animum ab omni labe purum , do-
mitum in commotionibus , virtutum
officiis exercitum . Talis facilè , & Me-
ditationi incumbit , & Contemplatio-
nem

nem recipit : alioqui in malevolam animam non intrabit Divina hæc Sapientia.

Pars Capitis Altera.

De Cultu Mystico, quem Religio præcipit, exigitque.

CULTUM explicavi privatum; qui etsi eximius, tamen à mystico longè, & præstantia, & utilitate superatur. Præstantiam sumit ab Authore Deo: à cujus voluntate est, non ab Electione nostra. Et deinde à Gratia, operi semper adhærente. Utilitatem exinde; quia tutior, & securior; ob meritum obsequii, & deceptionis effugium. Privata enim devotio, ex suavitate, dulcedine, & teneritudine quadam affectus, facile in complacentiam, opinionem de se falsam, nimiamque sui fiduciam labitur. Facit hoc instabilitas animi humani; qui sibi relictus, vix est securus. Deinde, idem provenit ex gaudio inconsulto Spiritus, quod facile evanescit. Tertiò, ex astutia Dæmonis, qui subdolè, rebus etiam bonis, vanam gloriam fover.

*Cultus
Mysticus
prior.*

*Quia te-
rus à
Deo.*

*Et quia
anxiam
habet
gratiam.*

*Denique
securior.*

*Nec illu-
sioni pa-
tes.*

*Per illum
animus
fungitur
præcepto.*

Ab hoc periculo abest longius Cul-
tus mysticus ; ubi animus illigatus
præcepto, se ei subdit. Captivat assen-
sum, etsi ratiocinationi suæ, & captui
non convenientem : Hoc verò, non
permittet evagari, sibi applaudere, &
se frui ; sed tantum operi jubet insiste-
re, hoc agere, & gratiam certò comi-
tantem opperiri.

*Deus enī
prescri-
psit, ra-
tioni hu-
mane
contrariū*

Voluit autem Deus cultum hunc
collocare sæpe in rebus, & actionibus,
quas mens humana nunquam existi-
masset fore ei gratas ; & quæ non para-
doxa solum videntur, sed profectò pa-
raloga. Quis enim (exempli causa) pu-
tasset, acceptum Deo cultum fore, ex
mactatione, aut exustione animalium ?
Certè nulla hic apparet idonea ratio,
congruentis erga Deum adorationis.
*Ut appa-
ret ex ri-
tu vete-
ri, & no-
vo.* Atqui ille ; hoc genus sacrificii, olim
elegerat : hoc præstari sibi mandaverat,
& suaviter odoratus est. Par ratio in ple-
risque ritibus, cæremoniis, Sacramentis
tam veteris legis, quàm novæ.

*Causa ;
quia non
servit ra-
tioni no-
stre, sed
domina-
tur.*

Si autem fas est inquirere : cur ita
Deus voluerit, feceritque ? Causas pu-
to inveniemus istas : Primum, quia me-
retur assensum, & obsequium ; etiam
sine

sine reddita mandati sui ratione. Fidem enim à nobis exigit, non cognitionem, aut scientiam. Tota demonstratio veri, est iussum ejus. Sufficit ad certitudinem, autoritas dicentis. Et verbum ejus, summa ratio est. Non ergo illum de-
cui, ad sensum captumque nostrum se,
& omnia componere.

Altera causa est: ut curiosam, & pra-
vam illam cupiditatem sciendi, quæ peccato originem dedit; & qua prurit
semper mens nostra, satagit, & variè effertur: confunderet, deprimeretque.
Nempe imperans, ac jubens credere, quæ stulta videntur; assensum in illis
requirens; nec noscenda aperiens, aut suavitate condiens; nisi prius credan-
tur: & nisi credantur, pœnam assignans extremam. Hac inquam ratione vo-
luit Deus frangere superbiam nostri ju-
dicii, ut posset flecti arrogans animus
ad obsequium fidei.

Tertia causa est Religio: quæ non
est ars, aut scientia demonstratione constans; sed lex, & præceptum; quod
jubet, non disputat. Imperium igitur
ejus in animos nostros ut maneret
integrum; exemptumque esset à ra-
tio-

*Quia cu-
piditate
sciendi,
obsequio
fidei sub-
dit.*

*Quia re-
ligio non
est ars,
sed præ-
ceptum.*

tiocinatione, & disquisitione: non modò reddere rationem noluit Deus præceptorum suorum, sed etiam consultò multa, & supra, & præter captum nostrum constituit. Cùm tamen sint omnia mandata ejus veritas. Ita ut, quod profanis mentibus videtur scandalum, & stultitia; id fideles cognoscant esse Dei virtutem, & Dei Sapientiam.

*Cujus
mandata
veritas.*

*Inest illis
ratio, sed
occulta.*

*Docibiles
Dei.*

*Mysterio-
rum vene-
randa.*

*Quæ cre-
dentibus
demum
manife-
stat.*

*Cultus
mysticus.*

Inest enim, inest profectò omnibus ratio; sed non intelligenda, nisi priùs credantur, & exerceantur. Tum demum mentibus sibi obsequentibus manifestat hæc arcana Deus: Θεοῦ ἰδαν-
τος facit; τὰ τῶν Μυστηρίων σφραγῖς aper-
rit; gustum illorum largitur, & suavi-
tate commendat. Ita, ut admiratione mens attonita, veneratione prostrata, amore accensa, agnoscat tandem: quomodò in parvis, & specie vilibus, tam mira, tam magna inclusit Deus; & qua ratione, dum bonitati suæ indulget; seque homini, quem dilexit, largitur; sub velo usitatæ rei, & specie signi ob-
vii, velut in sanctiori quodam recessu, Majestas tanta deliruit.

Hæc meritò præfatus; divido cul-
tum mysticum in Cæremonias, Ritus,
Sa-

Sacramenta. Cæremonias intelligo; Ordinationem certam actionis, & ministerii, in peragendis sacris. Consistit hæc; dum aut præcipitur varius gestus corporis; nempe genu flectendo, assurgendo, gradiendo, aliisque modis, quos vel mystæ, vel assistens sacris populus, exercere jubetur. Aut varia adjunguntur opera; ut lucernas, & lampades accendere; thus adolere; vasa, vestes, ornatum varium, ad comptum altaris, & mundum templi adhibere. Quæ talia, indifferentia quidem per se sunt; sed pondus capiunt ab autoritate potestatis Ecclesiasticæ; cujus præscripta, Spiritus Sancti assistentia, & dictamine animantur. Itaque decenter, graviter, & splendidè exerceri debent. Movetur enim talibus animus; ad devotionem componitur, & mitescit. Contra; contemptus istorum efferratos, superbos, & denique Dei contemptores facit. Servabit ergo accuratè hæc Christianus, ut Deo grata; quia per potestatem ab eo institutam, iussa.

Ritus Sacri sequuntur: qui itidem ordinatione certa actionis consistunt; sed hoc à Cæremonia nuda differunt,

*primitiæ
in cære-
moniis*

*Hæc consi-
stunt in
certo mi-
nisterio*

*Spiritus
S. dicta-
mine ani-
mantur*

*Si ritè
fiat, mo-
vent ani-
mum*

*Altera
pars Cul-
tus My-
stici: Ri-
tus.*

Adjuncti
habent
exorcis-
mum, &
benedi-
ctionem.

Effectum
habent
non infal-
libilem.

Sed vim
bamen
magnam.

Peruntur
ex meri-
tis Chri-
sti.

Potesta-
tes, & vir-
tutes.
Et data
potestate.

exer.

exercendis, modum certum actionis, & ministerii, usu potius, quam scripto ab Apostolis traditum, præcepto definit, ac præscripsit.

Sed vis præcipua Cultus Mystici, immò tota est in Sacramentis. Definitur verò Sacramentum; signum visibile invisibilis gratiæ; seu; Dei instituto, in materia certa, & certa verborum formula consistens gestum quoddam, seu factum; quo ritè adimpleto, homo gratiam accipit, & consecratur.

In Sacramentis præcipuus cultus mysticus

Eorum definitio.

Est, inquam, signaculum sacra-
ti Deo hominis; mancipatio, & stigma Divinæ servitutis; tessera ejus militiæ; Signum Dei Viventis; Fœdus Pacis, & reconciliationis; Peccati ablutio, & abolitio; Armatura fidei; scutum adversus ignita tela inimici; vestis ad Agni nuptias; Amictus, & ornamentum gratiæ; Antidotum incorruptionis; Arrhabo immortalitatis; Pignus præmii; Jus hæreditatis æternæ; Denique bonitatis Divinæ ingens flumen, & gratiarum immensum pelagus. Hæc, inquam, omnia mysticis istis actionibus insunt; & ex opere (ut loquuntur) operato proveniunt.

Et varia descriptio.

Numerus Septenarius. Septem autem sunt Sacramenta. Baptismus, Confirmatio, Eucharistia, Pœnitentia, Ordo, Matrimonium, Extrema Unctio. Quæ ubertim, & fusè à multis explicata, nobis libasse sufficiet. Baptismus; est regeneratio Spiritualis, per quam homo mortuus peccato, vivit Deo. Impletur per aquæ puræ affusionem largiorem, quæ est materia hujus Sacramenti; & per verba solemnia illa: Ego te Baptizo, in nomine Patris, & Filii, & Spiritus Sancti: quæ animo conferendi prolata, formam ei imponunt. Est primum medium salutis; & ad eam obtinendam necessarium prorsus: Characterem habet indelebilem; ideoque semel tantum usurpatur: fidem illo profiteamur; & Satanæ renunciamus.

Confirmatio item. Confirmatio, est Sacramentum, quo Spiritualis gratia in Baptismo accepta, stabilitur, & augetur, per Episcopum; Chrismatis unctione, & certa verborum formula. Materia ergo Sacramenti; est Oleum cum balsamo, ritè consecratum. Forma in verbis, quæ hic proferri ex instituto solent. Non potest repeti. Non est necessitate medii ad

ad salutem necessarium . Potestque non
exerceri ; modò non accedat contem-
ptus , aut negligens incuria .

Hoc utroque Sacramento initia- *Loti à*
mur Deo . Nempe : Loti à peccato, un- *peccato*
cti gratia ; amissam in culpa originis *& uncti*
redintegramus innocentiam . Sed non *gratia .*
ideo tamen à lapsu securi . Itaque aliis ,
majoribusque firmandi præsiidiis : nem-
pe Eucharistia ; ne tam facillè peccemus :
Pænitentia ; ut à lapsu surgamus .

Eucharistia , est SACRAMEN- *Tamen*
TUM Corporis , & Sanguinis Christi , *egemus*
sub speciebus Panis & Vini : cujus sum- *Euchari-*
ptione in anima spiritualiter nutrimur , *stia .*
& concorporei Christo efficimur . Unde
vocatur Communio ; per quam in ipso
manemus , & ipse in nobis ; Multi
unum sumus corpus in Christo ; &
membra unius capitis : Firmati hac
spirituali alimonia contra concupiscen-
tiæ fomitem , & dæmonis fraudem .

Materia hujus Sacramenti , ex insti- *Materia*
tutione , & usu tradito , receptoque ; est *ejus, Pa-*
Panis , isque azymus : & purum putum *nis , &*
Vinum , cum modica aquæ admistione . *vinum .*
Forma in verbis hisce : Hoc est Corpus
meum : Hic est Calix Sanguinis , &c. Vir-
tute

*Forma in
consecra-
tione.*

tute horum verborum, à potestate ad id ordinata, sit vera & substantiva conversio Panis & Vini, in Carnem & Sanguinem Christi. Hæc mirabilia, inquam, fecit misericors, & miserator Dominus, ut daret escam timentibus se.

*Frustra
hic cali-
gat mens
humana.*

Caligat verò ad tantum miraculum mens humana; in assensu titubat, & cum Judæis quærit: quomodo hic potest nobis carnem suam dare ad manducandum? Sed profectò, fateatur necesse est: non esse impossibile apud De-

*Omnipo-
tenti cun-
cta possi-
bilia.*

um omne verbum: cum omnipotentia suæ, supremum quod esse potuit, argumentum dederit; nempe nos, & omnia ex nihilo producendo. Certè enim, majus est novas condere, quam immutare naturas. Deinde, Ambrosius ait: frustra quærendum esse ordinem naturæ in Christi Corpore; cum eum mutarit in Nativitate. Et qui convertit, inquit, aquam in vinum; cur non Vinum in Sanguinem? Quid magni est, Deum mira facere; cum illa genii patrent? immò cum humana æmuletur industria? Quis enim non admiretur ex lino chartam, ex ligno vitrum?

*Etiam ho-
mines ar-
te mira
efficiunt.*

trum? Si talia creaturæ, & homo artifex potest; quantum Creator posse putandus est? Credamus igitur hæc in Eucharistia; mira quamvis: quia ipse dixit, & facta sunt.

Firmati autem hac constanti fide, tantum Sacramentum veneremur cerui: & ita nos præparemus ad Sumptionem, & usum ejus; prout tanti mysterii dignitas requirit. Qui enim indignè accedit, & manducat; reus erit Corporis, & Sanguinis Domini. Et judicium, atque unâ pœnam sibi manducabit, & bibet, non dijudicans verè; nec, ut oportuit, agnoscens Corpus Domini. Examinet ergo seipsum homo, & sæpius dijudicet: & tum, cum timore Sancto, pariterque & amore; in vera humiliatione cordis, frequenter accedat ad hoc Sacrum Convivium: in quo Christus sumitur, recolitur memoria Passionis ejus, mens impletur gratia, & futuræ Gloriæ nobis pignus datur.

Etenim *τελειον*, & Sanctum hoc, quædam Incarnationis continuatio, & nobiscum communicatio est. Ut enim per illam Deus uni, & individue humanæ naturæ,

*Debetur
huic Sa-
cramento
venera-
tio.*

*Et in sū-
ptione di-
ligens
examen.*

*Perfectū.
Est hic
velut re-
perita
Incarna-
tio.*

naturæ, se hypostaticè univit; ita per hoc Sacramentum, assumptam humanitatem, cum annexa semper Divinitate, participat cum omnibus, ritè & dignè Corpus ejus sumentibus. Nasce-
 tur itaque, & sumptione ista formatur in nobis Christus: Non natura quidem; sed tamen substantivo habitu, & energica virtute, quæ nos in illum convertit; & quantum possibile est, transmutat. Unde admirandum hoc arcanum, & absconditum manna, quanta adoratione, & affectu sit prosequendum, facilis æstimatio est.

Nascitur enim in nobis Christus.

Huc pertinet Missæ Sacrificium.

Adhæret verò huic mysterio Missa; seu functio illa, quam Ecclesia peragit inruenti Sacrificii: ubi sacerdotum ministerio offertur idem Christus; qui semetipsum in Cruce obtulit Deo: hostiam Sanctam, & beneplacentem: & imperavit; ut hoc faceremus in sui commemorationem. Hujus Sacrificii, omnia veteris legis Sacrificia, fuere umbra, imago, & figura. Hoc est verè propitiatorium pro peccatis vivorum, & mortuorum. Hoc est velut pactum quoddam: ut nempe ritè peracto hoc opere, talis sequatur effectus. Id pepigit

Pro vivis, & defunctis.

git Filius cum Patre; & sanxit (in quo nos acquisivit) sanguine suo. Itaque utamur dignè tanto munere, ac dono. Offeramus, cum hac oblatione, ex merito, ac debito acceptabili, Spiritum & cor contritum: veniam peccatorum, augmentum gratiæ, & præmium gloriæ petamus; securi impetrationis.

Ex debito acceptabili.

Quartum Sacramentum, vocatur Pœnitentia. Quæ genericè definitur: animi motus, dolentis se quidpiam perperam commisisse, vel omisisse. Tum, inquam, sic doleo; dum me pœnitet: & factò torqueor ipse meo. Sed ut Pœnitentia nomen Sacramenti obtineat, impleatque; requiritur imprimis: ut sit dolor ex abominatione, & detestatione peccati; quatenus est injuria, & offensa Dei. Talis dolor vocatur, verbo in Ecclesia recepto, Contritio; primamque Pœnitentiæ partem obtinet.

Pœnitentia definitur.

Prima ejus pars Contritio.

Altera est Confessio; seu, sui coram delegato iudice accusatio. Iudex hic Sacerdos est, ob acceptam Ordinis potestatem: de qua mox dicam. Et si enim apud Prophetam dixerat Deus;

Altera, Confessio.

Ego

*In qua po-
restas
peccata
remitten-
di.*

*Magno
nostro so-
latio.*

*Sed recē-
senda
prius de-
lecta.*

Ego sum, ego sum, qui deleo iniquitates tuas, propter me. Tamen, velut decessit de hoc, sibi soli proprio jure ; & primū Christo, ut Filio hominis, dedit potestatem dimittendi peccata : Deinde, eandem ille in Apostolos, eorumque successores transtulit, dum insufflavit, & dixit : Accipite Spiritum Sanctum : quorum remiseritis peccata, remittentur eis ; & quorum retinueritis, retenta sunt. O Magnum verè infirmitatis nostræ solatium ! Cum judicem habemus ex hominibus assumptum ; qui compati possit miseræ nostræ, cum & ipse eadem circumdatus sit : Qui jubetur condonare, non tantum septies, sed septuagies septies ; immò quoties opus fuerit, & quoties rogabitur.

Sed, ut condonet ; opus est, ut prius cognoscat. Id verò fieri nequit, nisi habeat accusatum, convictum ; seu potius, confitentem reum. Itaque sacra exomologesis accedat necesse est : in qua exercetur dolor peccati ; obedientia, resipiscentiæ promissum, & humilitas : virtutes conciliandæ clementiæ. Recenset, inquam, pœnitens delecta

liſta omnia; ſe candidè aperit; ſecre-
ta ſua dicit: ideoque fidem ſecreti me-
retur; quod ſigillum confeſſionis voca-
mus. Nam revelare nefas. Primum:
quia id debetur ingenuæ ſui ipſius ac-
cuſationi; deinde, ut ſcandalum vite-
tur; poſtremò, ne ab hoc facili, &
clementi deterreamur foro. Jure me-
rito ergo cautum, & vetitum eſt acri-
ter, ne Confeſſio reveletur.

*Sub ſigil-
lo ſecreti*

Par tertia Pænitentiae ſequitur, Sa-
tisfactio. Hæc nunquam ex condi-
gno reddi Deo poteſt. Quid enim in-
finito par? quid ſummo æquale? Ita-
que modica illa, quæ à Confeſſario in-
jungitur pœna, argumentum potiùs
Divinæ clementiæ eſt, quàm ſatisfa-
ctio. Adimplenda tamen accuratè:
cùm gratiarum actione obtentæ veniæ,
& impetratæ gratiæ.

*Tertia
pars Pæ-
nitentiæ,
Satisfa-
ctio.*

Hæ ſunt partes, ac officia iſtius
Sacramenti; quæ Materiam ejus faci-
unt, Formam autem inprimit abſolu-
tio, ſolemnibus illis verbis: Ego te ab-
ſolvo, &c. Eſt medium ſalutis: ex ſup-
poſitione actualis (ut loquuntur) pec-
cati (cujus vix quiſquam expers eſt)
neceſſarium. Per hoc detrimenta re-
para-

*Forma
Sacramē-
ti in abſo-
lutione.*

paramus, & lucra nova gratiæ acquiri-
mus; A lapsu validiores surgimus; ve-
recundiam peccandi, & pacem animi
consequimur.

*Quintum Sacramen-
tum Ordo.* Quintum Sacramentum est, Ordo;
seu Presbyterorum Ordinatio, sine
qua vel esse, vel ritè dispensari ne-
queunt Sacramenta. Est enim Ordo,

Definitur. gradus divinitus concessæ potestatis,
ad sacras & mysticas functiones, vali-
dè & ritè peragendas. Quæ potestas,
per χειροτονίαν, seu impositionem ma-
nuum, & Spiritus Sancti ad id munus
acceptionem consecratur, & à Chri-
sto, & Apostolis, successionē continua-

*In hoc su-
pernatu-
ralis pote-
stas.* tur. Vocatur hic status κληρὸς: id est,
sors, hæreditas, successio Domini. Per
hunc, jus Dominationis, & supernatu-
ralis potestatis, in mentes nostras exer-
cet: cui non opus hic immorari, quia
nec omnibus injunctus, imperatusque;
& eo initiatis, copiosè ab aliis, ex sensu
Ecclesiæ descriptus est.

*Sextum Sacramen-
tum Ma-
trimonii.* Itaque nec Matrimonio insistam;
quod sextum Sacramentum est, sed li-
beræ itidem voluntatis: cùm verò ini-
tur; Magnum in Christo, & in Eccle-
sia. Undè præcepit Apostolus: ut viri
dili-

diligant uxores, sicut Christus dilexit Ecclesiam: quam ex latere suo ædificavit, novus Adam; sicut vetus, Evam. Per hoc Sacramentum naturalis copula sponſione prius firmatur, & tum ſacratur benedictione; ut non corporum tantum conjunctio ſit, ſed etiam animorum. Qua de re ſupra meminimus; & ubertim ab aliis tradita, facile petere potes.

Naturalis copula ſacratur benedictione.

Epilogus eſt Sacramentorum, & ſæpè vitæ; Extrema Unctio: quæ ſit periclitantibus ægrotis, ad ſalutem mentis, & corporis. Cujus luculenta eſt mentio in Epistoſa Jacobi: qua rem uſu receptam, traditamque imperat. Materia hujus Sacramenti eſt, Olei unctio; Forma in verbis, quæ in libro Rituali.

Ultimum Sacramentorum, & vitæ, Extrema Unctio.

Porro cùm demonſtratum ſupra ſit; Licet Eccleſiæ, legitimam, & veram poteſtatem Eccleſiæ, ſancitaque ejus, velut manuſductione Spiritus Sancti dirigi: Ideo conſequitur; juſ & fas illi, quædam circa uſum Sacramentorum ſtatuerè, ac ordinare; præcepta ejus rei ponere; quædam in Cæremoniis addere, vel detrachere; & pro moribus, temporibusque, in melius commutare: Citra tamen eſſentia-

Licet Eccleſiæ quædã in ritu Sacramentorum commutare.

sentialium immutationem. Ita ut frustra sint Sectarii : dum multa dicunt præter usum, moremque veterem inventa esse ; ideoque Ecclesiam arguunt novitatis.

Cultus hic et est eximius.

Absolvi de cultu mystico, quo religio potissimum constat : qui apprimè Deo gratus sit oportet ; quia totus ab eo, quia plenus rei arcanæ, & sacræ ; quia infinitis gratiis affluens, & immensa præmia promittens : sed qui (pro pudor !) rarò dignè impletur ; nec nisi à paucis animabus puris, Sanctisque, & ut ita dicam, à Deo infessis.

Magis de moni creditur.

O Humanam malitiam ! assentitur facile dæmoni, falsò magna promittenti ; Pactum cum eo init ; sperat quod paciscitur ; præstat ei imperatum obsequium ; *ἀλυσ* multa ejus jussu facit ;

Absurda.

Quam Deo.

ut magiam, præstigias, & maleficia exerceat : Asserenti autem, ac affirmanti Deo non credit ; Ludibrio habet jussa, sancitaque ejus ; Non fidit promissis ; Pauca, quæ in sui cultum, & nostrum commodum certa, nec difficili functione facere, & gestum aliquod, modo ac ordine præscripto implere præcepit ; fructum exinde ingentem

tem

tem promittens ; ægrè , & dubitans
exequitur .

Hoc nempe est , quod Philosophus *Aspernā-
tur hæc
profani .*
erubuit ; quod profanus quisque con-
tempnit , ac derisit ; quod Hæresis , va-
næ superstitionis crimine damnavit ;
Ceremonias , inquam , & Ritus asper-
nata : & Sacramentorum numerum
primùm tollens ; mox naturam ipsam ,
& vim totam . Nam quamvis victa evi-
denti Scriptura , & veteris Ecclesiæ usu
quædam usurpat ; tamen eorum virtu-
tem non agnoscit , & simiæ instar , ge-
stu potiùs , quàm re , & fide expri-
mit .

Cum his verò omnibus , quos vel *Infideli-
tas .*
ἀπιστία , vel *κακὴ πίστις* occupavit ; Quid *Prava fi-
des .*
contendam ? quì reprobis talia appro-
bem ? Olim in liturgia veteri accla-
matum ; Foriscanes : Et ego certè odi *Ideoq; ab
his sacris
abiguntur .*
profanum vulgus , & arceo . Absistant,
& abscedant infideles ab his sacris . Et ,
(ut Tertullianus dixit :) avolent , quan-
tum volent , paleæ levis fidei ; tantò pu-
rior massa frumenti in horrea Domini
reponetur .

Adeste verò vos , mentes dicatæ *Advocā-
tur verò
sancti .*
Deo ; quibus datum est nosse mysteria

ejus : vobis ista apponuntur . Sanctis
nempe sancta . Haurite ergo de fontibus
Salvatoris , ut sit vobis fons saliens
in vitam æternam . Venite ; comedite
Panem , & bibite Vinum ; quod Æterna
Sapientia , id est Christus , miscuit
vobis : & saturabimini ab ubertate
domus , & Ecclesiæ ejus ; & invenietis
requiem animabus vestris .

Pars Capitis Tertia .

*De cultu Dei Schetico , seu Relativo ;
qui creaturis tribuitur , sed propter
Deum : ad eumque totus redit .*

*Cultus re-
lativus
erga Deo
chara .*

Dixi paucis , quæ ad Duplicem
Dei cultum . Tertia pars ejus
restat : quæ ἀρετικὴ λατρεία vocatur :
Id est ; veneratio , & cultus relati-
vus . Talis est erga illos , & illa ; quæ
Deo creduntur esse chara , & ad eum
referuntur .

*Dens so-
lus debite
colitur .*

*Secundū
excellen-
tiam .
Secundū
propor-
tio nem .*

Et si enim , ut dixi , soli Deo debita
κατ' ἐξοχὴν veneratio ; tamen κατ' ἀνά-
λογίαν etiam tribuitur creaturis : quate-
nus nempe impertitam à Deo habent
ejus dignitatem . Ille colitur proprie ,
per

per se, & natura; homines participatione, & dono: Honorati enim sunt amici Dei; ideo meritò honorabuntur, quos Deus honorat. Et dum hæc est gloria omnibus Sanctis ejus; ipsius est. Cultus namque illis exhibitus, propriè censetur cultus Dei: quia ab illo causam, & originem sumit; propter eum est, & ad eum redit.

Hic tripliciter ab Ecclesia Catholica, firmo & constanti usu, (quidquid blaterent hæreses;) exercetur: & triplex est. Nempe erga Sanctos: erga Reliquias: & erga Imagines. Singulos exactè edisseram: atque hoc ipso & à calumnia, & à contemptu vindicabo; & ut dignè impleantur, accendam.

Ordior à cultu Sanctorum: id est; partim Angelorum, qui desertoribus ejectis, in officio persistere: partim hominum; quos vita sanctos, habet. Utrosque (uti sæpè & ipsum Deum) ablegant à nobis, & remouent illi; qui vitæ præsentis immersi, putant eos, qui supra nos, nihil ad nos: & affectu extorres à vera patria, obliuiscuntur olim conturbentalium; & nunc quoque concivium.

*Triplex
hic Cul-
tus.*

*Primus
erga vi-
uentem
naturam.
Inter Di-
vos rela-
tio.
Angelorū,
& homi-
num de-
functorū.*

*Cū utrif-
que nobis
confūctio.*

*Omnia
unum.
Nam om-
nia unum*

*Christo
nos confū-
gente.*

*Universū
una Civi-
tas.*

*Ergo om-
nes vivē-
tes Conci-
ves.*

Atqui non est putandum ; cum istis
terræ filiis , (ut sic vocem , qui terrena
tantum sapiunt ;) non est , inquam ,
putandum ; nos longo nimis intervallo
diffitos à Cælestibus , & Divinis esse .
Περὰ τὸ ἐν , dixit quidam è Philosophis .
Nescio equidem quo ille sensu : sed
profectò tali verum est ; ut omnia in
quendam circulum , & compendium
unitatis redigamus , & coarctemus ;
Cælestia , inquam , & Terrestria : præ-
fertim cū Christus , Alpha , & Ome-
ga , imis summa conjunxerit ; fecerit-
que utraque unum . Itaque , sicut ne-
fas cum impiis dicere , Deum longè ab-
esse ; nec considerare nostra : Ita & San-
ctos ejus relegare . Uti enim Dominus
propè , imò intra nos est ; ita & San-
cti ejus cum illo , quia in illo .

Totum hoc universum , una Civitas
est . Ejus summus Princeps Deus : An-
geli verò & Homines , seu vita hac fun-
cti , seu hinc superstites ; sumus concives :
statu , gradu , & habitatione dispares ,
& disjuncti ; sed tamen uno ambitu
communis patriæ comprehensi . Ergo
consociatio nobis , & commercium cum
illis . Et si enim corpore gravati , sensi-
bus

bus non communicamus ; tamen animis in Deo conjungimur . Vident nostra : quia vident & intuentur Deum , in quo omnia nostra . Nec commere , nec magna spatia emetiri opus ; ut nobis adsint , & succurrant . Intuitus , quo fruuntur , Divinitatis ubique præsens , ad hæc cuncta sufficit .

De Angelis primum dicam : Quorum *Angelos esse ex revelatione scimus .*
 ψυχικὴν , ὑπερῶς , καὶ πνευματικὴν οὐσίαν , id est ; animatam , intelligentem , & Spiritualem substantiam ; Deum , mediam inter se , humanamque naturam creasse ; non modò nullus Christianorum , ex revelationis certitudine , dubitare potest ; sed etiam omnes ferè ethnici , & præcipuè sapientiam professi , constanter asseruere . Adeoque hæc firma , & communis est notio ; ut simul cum agnitione divinitatis innata , impressaque mentibus humanis esse videatur . Neque id mirum : nam ut animorum nostrorum arbiter Deus , illos liberè , & cum potestate adit , ac ingreditur ; Ita ei proximi spiritus , subtili sua natura , faciliè quoque sese nobis insinuant , ac innotescunt , *Et è consensu humani generis .*
Nā ei innotuere .

Produxit eos Deus testandæ Bonitatis causa. Produxit verò eos Deus; primū Bonitatis suæ testandæ causa; & purissimas Sanctissimasq; hæc substantias, compotes summæ felicitatis fecit ideo; quia bonus, & benè illis voluit. Deinde produxit; ut eorum ministerio, & famulatu

Et magnificentiæ. uteretur. Non quò egeret; qui sine ullius ope, vi sua movet, regit, & continet universa: sed ut magnificentiam ostenderet; tot myriadas sibi ministrantium, & tantæ dignitatis procreando.

Pars eorum lapsa. Eorum pars magna, dum se miratur, & sibi complacet; in superbiam primum, mox in interitum gloriæ lapsa.

Pars mansere in novem Choros distincti. Qui in officio mansere; firmati gratia, Hierarchiam Cælestem, in novem Choros, seu ordines distinctam, (ut Gregorius testimonio Scripturæ numerat, & comprobat;) obtinent: omnes cum adjuncto sibi proprio munere: ac officio. Angeli sunt, qui minora; Archangeli, qui summa annunciant. Throni

Deum ferentes. *Θεοφ'ροι*; quibus insidet quodammodo Deus: & hæc infessio, tranquillitas est. Dominationes; qui Sabaoth, seu exercitus; quibus imperatoria, & bellicavis in hostes Dei. Principatus; quibus cura gentium. Potestates; quibus regi-

men

meu animorum . Virtutes ; per quos
miracula . Cherubin ; quibus plenu-
do scientiæ . Seraphin denique , seu ar-
dentes ; quorum flamma amor est .
Hæc ferè illis ex vi nominis , aut con-
jectura , à sacris Scriptoribus assignan-
tur . Et certum est , quòd primoge-
niam hanc , perfectissimamque natu-
ram , admirando ordine , & distinxerit ,
& sociaverit Deus .

*Ex vi no-
minis, &
sententia
Sanctorū*

Omnes autem hosce , esse Spiritus
administratorios , in ministerium mis-
sos , propter eos qui hæreditatem ca-
perent salutis ; in confesso est . Man-
davit enim Deus , ut nos custodiant in
omnibus viis nostris ; ut nos manibus
suis portent ; ut comitentur nobiscum .
Adeò , ut pusillorum etiam Angeli , assi-
stant illis ; & simul in cœlis videant fa-
ciem Patris nostri . Magna verò hæc
(ait Hieronymus) dignitas animarum ;
ut unaquæque habeat , ab ortu nativi-
tatis , in custodiam suā , Angelum dele-
gatum . Qui varium erga nos implet
officium ; & jussu Dei , & sua natura .
Amant enim genus humanum . Et non
solum illis (inquit Bernardus) digni-
tas est admirabilis ; sed etiam dignatio
ama-

*Omnes
sunt ad-
ministra-
torii .*

*Et sin-
gulis ho-
minibus
custodes .*

amabilis. Gaudium est illis, & profectum nostro; & contra, si tristiari possent, amare flerent Angeli pacis, in ruina iustorum.

*Magna
nobis pre-
stant.*

Hinc manant proluxa, & luculenta, quæ nobis testantur, officia. Hinc est illa, à Dionysio verè asserta, & beneficio eorum adjuncta animorum καὶ ἀπορίσ, φωτισμός, τελείωσις: id est; purgatio, Illuminatio, Perfectio, quam in mentibus nostris procurant; & qua, in suam nos vertere satagunt naturam: ut nempe ætherei, spirituales; id est, à corruptione hac terrena, & carnali liberi simus. Hinc ortus, educationis, vitæ totius curam gerunt; Dæmonis insidias detegunt, insultus arcent, vim reprimunt; opportuna consilia, & monita suggerunt; orantibus assistunt; preces Deo offerunt; in ultimo vitæ agone tutantur; Functos vita hac, excipiunt; & ad Beatorum societatem transferunt. Sed nec singulis tantum opitulantur: Regnorum etiam, ac Populorum protectores sunt; ut patet ex certamine illo apud Danielem, Angelorum pro Persis, Græcis, ac Judæis. Quo strenuè funguntur, donec illis vo-

*Regnorū,
ac populo-
rum sunt
protectores.*

lun-

luntas innotescat Dei. Quin imò, non modò quæ ad æternam, sed etiam quæ ad præsentem vitam faciunt; eorum ope sæpe obtinemus. Nam, ut maligni spiritus, permissu Dei, corporibus (ut in Jobo apparet) valetudines infligunt; & maleficia, & acerbos casus: Ita illi morbos corporis (ut Raphael cæcitatem Tobix) curant; iis medentur, & pericula arcent. Deinde in adiaphoris, verè ἀνδρώπων διδασκαλοὶ (ut eos Athanasius vocat) industriam humanam juvant; Artes, & artificia occultè docent; Naturam, & vim abditam rerum suggerunt. Hæc inquam cuncta, & multò plura, eorum habemus beneficio: Non ut divina dona suppleant; sed ut ministerio injuncto studiosè fungantur.

*Etiam res
vite præ
sentis
procurat.*

*Homi-
num Ma-
gistri.
Et res a-
diapho-
ras.*

Cùm autem jussu Dei talia, ac tanta, & possint; & sciant; & velint, nostri causa: Deinde, cùm tot ab illo dotibus præditi, ornatique sint; nobisque longè præstantiores effecti: Ideo cultum illis sui generis deberi, & invocationem, nemo sanus dubitaverit. Id meritum eorum, id gratitudo, id nostra requirit necessitas: id denique non

*Ideo me-
ritur co-
li, certo
modo.*

mo.

*Ad Dei
gloriam.*

*Cultus
Beatorum.*

*Eorum
Hierar-
chia de-
scribitur.*

*Inter om-
nes emi-
net Virgo
Sanctissi-
ma.*

modò nihil detrahit Divino cultui; sed potius eum auget: ceditque in honorem Domini, honor famulitii ejus.

Jam verò transeo ad cultum Beatorum, qui in Domino moriuntur; quorum animæ in manu, & conspectu ejus; visi sunt oculis insipientium mori, illi autem sunt in pace, & vita Beata fruantur. Horum quoque Hierarchiam, & ordinem agnoscit Ecclesia; eum nempe, quem hic tenuere. Primum Patriarchæ ponuntur; Patrumque cætus, Agmina canora vatum: &, quo non surrexit major, Baptista Christi prævius; summique cæli claviger, cum cæteris Apostolis; Evangelistæ, & Discipuli Domini: cohors triumphans Martyrum: tum candidati præmio Confessionis Pontifices, & almus Sacerdotum chorus: Monasticam professi; & quos Eremus incolas transmisit astris: Choreæ casta Virginum, cum alio famineo cætu.

Sed inter istos omnes immensum eminet, ideoque seorsim dicenda est, Sanctissima Dei Genitrix Maria; non homines tantum, sed etiam Angelos, plenitudine gratiæ supergressa: & tan-

rò melior illis effecta ; quantò excellentius præ illis nomen obtinuit ; cùm Filium Altissimi genuit : meritoque vocata Mater Dei. Cùm enim humanita-

*Quia Dei
genitrix.*

ti Christi, in unitate personæ annexa, & inseparabilis sit Divinitas ; ideo carnem ex Carne Mariæ sumpsit, natusque ex illa est Homo Deus. Prærogativa hæc, & electio in Matrem, causa est : cur compos sit totius, quidquid infra Deum, magni est. Et quòd (ut ipsa Magnificans Deum cecinit) fecit illi magna, qui potense est : & Sanctum nomen ejus. Hinc est : quod etsi humillima coram Deo esset ; tamen victa beneficii magnitudine, in Domino gloriatur. Ecce enim, (inquit) ex hoc, beatam me dicent omnes generationes. Hinc ab Archangelo plena gratiæ, Deo conjuncta, & benedicta salutatur. Hinc ab Elisabeth, Mater Domini ; & beata, quòd credidisset, dicitur. Hinc, est decus supremum, unicum ornamentum, apex, & Princeps rationalis creaturæ ; Generis humani gloria ; Naturæ nostræ, in unitatem & consortium Deitatis sublimatæ, instrumentum, Cooperatrix Redemptionis ;

*Et exinde im-
mensum
dotata.*

*Quod ip-
sa confi-
tetur.*

*Archangelus te-
statur.*

*Ejus de-
bita elo-
gia.*

nis ; quia Incarnationis ministra : & quia , ut ex Spiritu Sancto conciperet , pareretque ; assensum præbuit , expetita .

Ornavit eū Deus causa impositi muneris .

Si solemne Deo est , ad munus quod nobis injungit , parem præstare gratiam ; ideoque idoneos fecit (inquit Apostolus ,) ministros novi testamenti ; & cumulavit eos potestate varia , ac virtute : Quid non fecisse censendus est in electa hac , ad Matris munus dignè sustinendum ? Si honorare Parentes præcipit ; quomodo non ipse honoraverit hanc , quæ illi quæ homo est , Parentis utriusque implevit officium ? Si gloria filiorum , (inquit Salomon) Patres eorum ; quomodo non gloriosam fecerit , quam sibi in Matrem elegit , nasciturus in hominem Deus ? Immensa profectò est hæc dignitas ; & infinitis ornata dotibus ; ideoque nullis dignè explicanda verbis .

Causa sue in parentem pietatis .

Et sue ex illa gloriæ .

Meritò igitur Regina hæc Sanctorum omnium , ab Ecclesia cultum hyperdulæ (ut vocant) obtinet . Meritò Sanctorum Patrum pænè innumeris celebratur encomiis , & ab optimo quoque studiosissimè colitur . Denique meritò

Est post Christum Media-rix .

ritò secunda post Christum est media-
trix; post illam verò, & Sancti cæteri.
Etsi enim solus mediator Christus; ta-
men & huic, & reliquis, sui generis
mercedem tribuitur: & est, non modò ci-
tra Mediatoris supremi injuriam; sed
ad ejus gloriam potiùs. Totam enim
vim, & pondus ab illo accipit; & ea-
tenus efficax, quatenus, qui illa fun-
guntur, Deo grati, & chari sunt.

Mediatio

*Post illi
alii Celi-
tes.*

Colimus ergo eos cultu dilectionis;
(inquit Augustinus) & societatis; quo
in hac vita coluntur Sancti Dei homi-
nes: Et sicut horum preces expetimus;
ita & illorum, qui in illa regione sunt
viventium. Et quidem tantò devotiùs;
quantò post certamina superata, &
propter charitatem, quæ in illis non
modò non cessavit, sed aucta est, secu-
riùs. Colimus, inquam, publicè pri-
mum; dum sacrificia offerimus non il-
lis, sed, Deo, in eorum memoriam:
Templa, & aras, in eorum nomine,
Deo struimus, & dedicamus; dies festos
illis assignamus, & læti peragimus. Hæc
publico instituto:

*Ideoque
colendi
omnes.*

*Publico
instituto.*

Privata verò officia, quibus illos de-
vincimus, potissima sunt: vera, ac de-
bita

*Privata
devotio-
ne.*

bita æstimatio, & dignitatis agnitio. Revocando in memoriam vitæ, ac mortis eorum narrationem; quo munere functi, quanta gessere, quanta meruerunt: Idque non censoria nota, diiudicatione; sed debita reverentia. Celebrare, inquam, illos; Gratias illis agere; gratulari; & Deum pro gratia illis impertita, & præmio reddito laudare. Deinde; inire, quodam modo, cum illis amicitia pactum; & arctiori vinculo mutua charitatis adstringi; se eorum cultui devovere: Velle quæ illis grata sint; In eorum honorem curam, & operam impendere: Cum illis tanquam præsentibus agere: vel conari; ut cum illis, in cœlis sit conversatio nostra: Et denique, quia amicitia non est nisi inter similes, imitationem eorum animo proponere, eique magno studio conformari. Tertiò; cum fiducia eos precari; ut suo interventu impetrent, quæ sciunt necessaria nobis esse. Et præcipuè, ut cum illis dignè laudemus Deum: nunc per gratiam; olim in gloria.

*Memoriã
auct. eorũ
vite reco-
lendo.*

*Amicitia
ineundo
arctiorem*

*Opem im-
plorando.*

*Huic cul-
tui adhe-*

Cæterum, cum inter sanctos vita, pars fruatur gloria, de quibus jam diximus;

mus; pars damnati sint, cum quibus
 nulla nobis amplius societas; pars deni-
 que nondum felicitatis compotes, sed
 ejus tamen post expiatis culpas se-
 curi, quibus nos charitas conjungit,
 opemque nostram exigit: Ideo meritò,
 & opportunè cultui Sanctorum at-
 tendendum est id Catholicæ pietatis offi-
 cium, quo defunctos prosequimur.
 Meritò, inquam: nam in lacu miseriæ
 gravissimis afflicti pœnis, post elapsum
 merendi tempus ipsi se juvare non pos-
 sunt, sed nostris possunt suffragiis, va-
 riisque bonis operibus, quibus Deus
 placatur: ut in hoc sæculo non remissa,
 in futuro remittantur. Hoc officio
 functi, & Charitatem Deo gratam im-
 plemus, & de illis ita meremur; ut li-
 berati abundè rependant. Ergo, cum
 Juda illo Machabæo, salubris est cogi-
 ratio, pro defunctis orare; ut à pecca-
 tis solvantur, & salventur.

Sequitur cultus Reliquiarum; qui
 manat à debita æstimatione Sancto-
 rum: quorum cum pars melior, id est
 anima, jam juncta Deo sit; altera verò
 (proprie non mortua, sed data somno;) *Qui ju-
vandi à
nobis.*
 nempe corpus, hic felicem resurrectio-

A a nem

*Gratus
Deo, &
Sanctis
ejus.*

*Usitatus
semper.*

*Cultus
Imaginū
ad proto-
typum
transit.*

nem expectet: Meretur certè & hæc; eum honorem, quem ei Ecclesia deferre solet; dum, inquam, sacra hæc corpora, quæ membra Christi fuere, & templa Spiritus Sancti, convenienti cultu veneratur. Qui & gratus sit Deo, quia amicis ejus exhibitus, necesse est; & puras illas, perfectasque animas, facile ad vicem gratitudinis obstringit. Itaque ab Apostolicis usque temporibus, usu continuo Ecclesiæ retentus; Dum Martyrum præcipue corpora, ossa, cineres, sepultura primùm digniori, & accurata; post etiam strutura templorum venerata est: Eorumque adire monumenta; propè ea sepeliri; supplicationes & sacrificium supra aras, in quibus reconditæ reliquiæ essent, offerre; festos dies in eorum memoriam agere; usitatum, religiosum, ac solemne fuisse; passim, apud vetustissimos Ecclesiæ Scriptores, reperies.

Tertius denique cultus, est Imaginum: non minùs prisco ritu ab Ecclesia receptus, retentusque. Sed horum totus honor transit ad prototypum: Estque relativus alia ratione, quàm cultus

cultus Sanctorum . Nam , quæ exhibentur Sanctis , etsi primariò Deum respiciant , ad eumque referantur ; tamen & illos quoque contingunt , & quodammodò etiam iis adhærescunt . Quia nempe vivens , & rationalis natura , talis officii non est incapax . At honor erga inanima , purè relativus est ; totusque transit ad alium : nec manet in reali honorata , nec manere potest . Nichilominùs , quòd meritò deferatur ; idque propter eum , cuius memoriam repræsentat ; Arcæ veneratio ; & in illa tabularum legis , ac virgæ Mosaicæ ; tum efficacia fimbriæ Christi , immò umbra Petri sat evincit , comprobatur . Et frustra hic idololatriam crepant heterodoxi . Ea enim est in honore , & cultu cacodæmonum , eorumque Divina in Idolis adoratione .

Estque purè relativus.

Meritò exercetur .

Cæterùm totus hic scheticus , de quo hætenus egi , cultus ; præter Scripturæ testimonia , quæ suis locis attulimus ; vel certè , tanquam intento digito monstravimus : Tribus præcipuè nititur fundamentis . Primùm ; aperta convenientia , ac merito rei : Deinde , usu continuo , & approbatione Ecclesiæ :

Cultus scheticus fundatur .

Convenientia rei .

Usu continuo .

*Effectu
admiran-
do.*

Tertiò, (quod omnem dubitationem amovet) ipso Effectu admirando. Clara enim, & manifesta miracula, tot frequentia signa, apparitiones denique Sanctorum, fide testium omni exceptione majorum factæ, satis superque rem firmant, comprobantque. Adeò, ut talibus non assentiri, sed inficiari; & contra tot sæculorum testes negare; profectò, & pravè pervicacis sit, & graviter impudentis.

*Meritò
itaque eū
profitemur
Catholica
Ecclesia.*

Profitemur ergo constanter ejusmodi cultum: & innumera exinde, quotidie capimus solatia: apertaque habemus argumenta, & audiri nos, & juvari à Beatis illis, Sanctisque mentibus. Experimur, inquam, & gaudemus; imò gloriamur, societatem nobis esse Civium æternorum; nec avelli ab ea, morte ipsa. Itaque fidenter eorum opem imploramus: & ut pro nobis interveniant, petimus lubentes, & meritò.

*Clauditur
locus
oratione
ad Virgi-
nem San-
ctissimā.*

Adsis verò, tu inprimis, Regina Cælorum, Deipara Virgo: & ex illa tua plenitudine gratiæ, in nos guttas ejus, vel scintillas emitte. Potes certè. Quid enim Filius omnipotens negaverit Opti-

Optimæ Matri? Voles etiam: quia Mater
es omnium: & quidem testamento Joani-
ni, & in illo nobis data. Effice ergo tuis
precibus animas nostras, quodammodò
Marias; id est, sc̃etas Deo: ut formetur
in illis Christus; & fiat nobis sicut tibi,
secundum Verbum Dei: quod in te Ca-
ro factum, in nobis maneat in æternum.

Adelte deinde vos, Beatorum Spirituum Ordines. Et ut in Spiritum versi, *Ad An-
gelos.*
Deum vobiscum laudemus; orate, &
juvate. Deinde, vos Cœlites, apud Dô-
minum subvenite laborantibus in via *Ad Celi-
tes.*
hac, quam emensi feliciter estis. Ut
quod infirmitate nostra non valemus,
vestro interventu assequamur. Per Chri-
stum Dominum Nostrum. Fiat, Fiat.

C A P U T III.

Περὶ Θεοφιλίας:

S E U

De Amore Dei.

Tertium libri hujus, ultimum. *Ultimum*
que tandem totius operis Ca- *Caput de*
put, mihi superest explicandum; quod *Amore*
pari cura, studioque exequar: imò, *Dei.*

quia metæ jam proximus, fortè an majori? Postquam enim de notitia, cultuque Dei dixi; de Amore demum ejus restat dicendum; & hic terminus, ac

Ad quem natura rationalis fertur.

finis statuendus, ad quem non officia tantùm omnia referuntur, sed tota rationalis natura propendet. Nam pondus ejus, amor est; amoris autem terminus, bonum; boni verò fons, immò ipsummet bonum, Deus.

Alioqui frustra sunt alia officia.

Ad hunc ergo finem veniendum. Et frustra Probus, Charitatisque cultor; si non verè Pius, id est, Dei amans sis. Frustra deinde eum noveris, & colas; si non ames. Nec potiri ac frui potes; si non appetieris; nec appetere, nisi per Amorem. Quem ei soli debitum, cum de $\mu\epsilon\tau\rho\iota\tau\alpha\delta\epsilon\iota\alpha$ agerem, demonstravi.

Moderatione affectuum.

Amor transmutat.

Ibidem deduxi; summam energiam ejusdem esse, in transmutatione. Transmutatio autem hæc, non fit (ut item supra dictum) amatum in se convertendo; sed se in amatum. Nam voluntas transire conatur in id, quod appetit; Id fit, quod amat; Ita ut amare; sit, se relinquere; à se exire, & in amatum transire.

Quin immò, si rectè expenderis; agno-

agnosces: quòd ne id quidem propriè
 agat, ac moliatur verus, & ad verum
 bonum amor, ut transeat in amatum,
 id est, ut quodam ambitu illud invadat,
 & occupet: sed agit in se; ut se evacuet,
 expropriet, perimat, & annihilet, quò
 pateat, & vacet amato; illudque reci-
 piat, patiatur, ac induat.

Hoc verò fit, & impletur tribus gra-
 dibus: nempe Mortificatione; Abrenun-
 ciatione; & Abnegatione. (Utar enim
 fidenter verbis, quæ Christiana Sapien-
 tia fecit nova.) In his tribus, inquam,
 situm rationalis naturæ, veri erga De-
 um amoris officium, meritum, & præ-
 mium. Cujus rei ipsemet Christus dedit
 nobis documentum, & exemplar. Cui
 insistendo, tres hasce partes, Capite isto,
 explicabo. Et ex illis fundamenta
 Stoicorum ostendam.

*Seipsum
 perimen-
 do.*

*Quod fit
 tribus
 gradibus*

*Unde
 tres ca-
 pitis par-
 tes.
 Amoris
 Dei.*

Pars Capitis Prima.

*De Mortificatione; cujus natura,
 & ratio explicatur.*

INter complura dicta reconditi sensus,
 & veritatis Philosophorum veterum

*Philoso-
 phia,
 mortis
 medita-
 tio.*

æstimavi, & admiratus sum semper; quod Plato, aut quisquis ille, definiverit Philosophiam, μελέτην θανάτου: vertere id solent, mortis meditationem; & explicant, ut novissima cogitemus, vivamusque memores lethi. Sed altior paulò mens, opinor, est istius definitionis; quam explicat alibi Cicero: dum à corpore animum avocare, & abducere docet Sapientem; & quodammodò consuescere mori. Ita ut Philosophia, ex definitione ista, propriè sit, cura mortis: per quam animus corpus abdicat, ac linquit, seque ab illo secernit. Quare hoc commentemur; (inquit Cicero,) disjungamusque nos à corporibus; id est, consueamus mori. Hoc; & cum hic in terris sumus, erit cælesti illi vitæ simile: & cum illuc ex his vinculis emissi feremur; minùs tardabitur cursus animorù. Quod cum venerimus, tunc denique vivemus. Nam hæc quidem vita, mors est.

*Quod impletur
primum
Mortificatione.
Non sine
Deo.*

Præclara profectò verba; sensusque in illis eximius, & altus; qui sanè ἑκ ἀδελφῶν, etsi profanis illis mentibus infundit. Hoc est enim, quod Christiana proficetur, & agit Mortificatio; Abrenunciatio; & Abnegatio. Mor.

Mortificatio inprimis , quæ mihi est ,
Mors carnis . Ut nempe eam cum
suis concupiscentiis , exemplo Christi ,
& admonitione Apostoli , crucifiga-
mus .

Seu morte corporis.

Porro cùm de *ἐνυπαρξίᾳ* agerem ; Impecca-
triplicia concupiscentiæ carnis vitia de-
dixi . Mollitiem nempe , Gulam , & *Et ejus*
Libidinem : ijsque post , in *ἐν πρᾶξι* , *necessita-*
præceptis , Virtutem Temperantiæ op-
posui : cujus partes , Abstinencia , Fru-
galitas , & Castitas ; præscriberent pru-
dentem usum eorum , quæ debentur
carni . Nunc verò Mortificatio , de
qua agimus , hunc ipsum quamvis tem-
peratum usum arctat magis ; & penè
tollere nititur : dum , quantum potest ,
minuit ejus necessitates .

Exercitii virtutum.

Quantulum enim hoc esset , carnis *Ac penè*
supervacanea sprevisse ? hoc bruta etiam *odio.*
faciunt , præscribente natura . Chri-
stianus , qui verè æterna , & Deum ap-
petit ; tum se profecisse putet ; cùm car-
nis necessaria incipiet aspernari , &
penè odisse .

Et contrariorè optione.

Sed non tantùm necessaria detrahe-
re ; sed etiam eis contraria docet usur-
pare Mortificatio : ut nempe hac ra-
tione

tionē animus plenē vincat, & perimat
adversantem semper, & inimicam hanc
sui partem; & à concrezione mortali
sefe vindicet, homo animalis esse desi-
nat, & in Spiritum se convertat.

*Contra
mollitiem
asperita-
te.*

Itaque, contra Mollitiem: vel dura
eligit, & aspera, accersitque ultrò dolo-
rem; & variè affligit, castigat, & in ser-
vitutem redigit corpus; vel oblatas,
impositasvè aliunde ejus molestias
acceptat; & constanter, ac patienter
tolerat. Defricta autem hoc acri sale
caro, non faciliè corrumpitur; & disci-
plinæ patientior, & studiosior fit virtu-
tis.

*Contra
Gulam je-
junio.*

Contra Glulam jejunium adhibet,
& inediam; quam, cibum virtutis, vo-
cavit Leo; & quam, mira prorsus con-
tinentia Sancti illi, & præsertim Ana-
choretæ exercuerunt: ita ut vix eguisse

*Contra li-
bidinem
virginita-
te.*

amplius esu, visi sunt. Tertiò; contra
Libidinem, virginitatem amplectitur;
eamque in vitam totam, voto etiam ob-
stringit, devincitque. Hac ratione mi-
nuitur primùm, mox planè interit caro;
& per afflictiones, concupiscentiis mo-
ritur; & molesta esse animo desinit.

*Præcepta
ejus, &
monita.*

Modum hujus saluberrimæ exercita-
tionis; & præcepta, monitaque ad eam
necessa-

necessaria, habes apud Scriptores Asceticos. Præcipua sunt; ut ratione fiat; non anxie; placide, sobrie intra mensuram; ut hypocrisis, ostentatio, faciei exterminatio, & complacentia denique vitetur. Ideoque Mortificatio testata, & occulta; optima. Deinde; ab alio imposita, imperataque; nempe à potestate Ecclesiastica, cui parere tenemur; & si libenter facimus, atque cum cura; meritum augemus. Ejusmodi, inquam, Mortificatio, dictis vitiis, non facile obnoxia est.

*Dum te-
gitur, o-
prima.*

Cæterum totum hoc, ab una causa oriri, & ad finem unum referri debet; nempe ad amorem Dei: qui, cum non mansurum se in homine dixit, eò, quod caro sit; Ideo, hunc primum obicem carnis amovere oportet; ut nobiscum manere velit. Hunc, inquam, primum gradum scandere opus; ad Divinum amorem, ascendere conanti. Id Christus, vita sua nos docuit: & exemplo. Ad hunc agonem invitans; si quis, inquit, vult venire post me, tollat crucem suam, & sequatur me. Et iterum; qui non tollit crucem suam, non est me dignus. Hoc est auctoramentum ejus mili.

*Ex amo-
re causâ
habeat,
& finem.*

*Id Chri-
stus docu-
it & mō-
stravit.*

militiæ, cui dedere nomen omnes, qui ei olim compassi, nunc corregnant.

Pars Capitis Altera.

*De Abrenunciatione ; cuius vis , atque
modus declaratur .*

*Abrenun-
ciatio est
Mors cu-
piditatis.*

ALter potiundi amati, ejusque in se derivandi gradus, seu modus est, Abrenunciatio ; quam voco Mortem cupiditatis : ut nempe rerum eternarum, omnis appetentiæ prorsus vacui, toti vacare amorì Divino possimus.

*Et abdi-
catio ex-
ternorum.*

Quod ut impleamus ; non modò concupiscentiæ oculorum, seu avaritiæ opponere justitiam, ejusque recensitas partes ; quibus rectus usus eorum, quæ extra nos, præcipitur, oportet : sed omnem affectum, & penè usum etiam ipsum, ac sæpè possessionem abdicare. Hoc enim & ratio requirit, & exemplum ; & demum edictum Christi.

*Quibus nō
potest jun-
gi amor
Dei.*

Ratio primùm : quia infinitum rectè amari non potest, nisi toto amore. Si eum, ad finita deflectis, & partiris, ac dividis ; jam fornicaris, & adulteras. Amor enim Divinus, ob dignitatem solidam,

lidam, & indivisam, non fert rivalem.
Impatiens consortis est, quia solus est.
Totum totus requirit. Ignoratio itaque, oblivio, vel contemptus veri boni est; alia præter illud consecrari: & tam vilia, & abjecta ei fociare; injuria, & offensa. *Exemplo Christi abdicada.*
Christus: nil externum appetere, nil possidere; se solum contentum esse. Denique edixit: omnis, inquit, ex vobis, qui non renunciat omnibus, quæ possidet, non potest meus esse discipulus.

Id fit partim affectu, partim re ipsa. *Affectu*
Quoad affectum: hunc ut valde moderatum, aut pœnè nullū, ad externa omnia habeamus; firmare imprimis oportet animum vera eorum æstimatione. *Non modo indifferentia censenda.*
Ea nempe; quam schola Christi aliter, quam olim Philosophia docet. Et si enim Stoici, magno animo, sola bona, quæ honesta; mala tantum, quæ turpia, vocavere; alia verò *ἀδιάφορα*, & *ἰδιάφορα*; id est indifferentia, & neutra: Attamen hæc *εὐχρηστά, λυπηρά, ἀξία ἐχρηστῶν*, id est commoda, acceptanda, æstimationem habentia, docuere; & si optio daretur, eligenda; ac anteposenda. *Sed etiam non eligenda.*
Christiana verò sapientia longè ulterius

Nō acce-
ptanda,
nec eli-
genda.
*Et illis
contraria
preferen-
da.*

terius in vilipendio, & aspernatione ta-
lium progressa est: Non modò ea
non bona, & adiphora dixit; sed ἀν-
τα etiam; & ἐν ἀπειρᾷ eo ipso ostendit;
quòd his contraria, & opposita; Pau-
pertatem nempe; uti & dolorem, ac
luctum vocavit non modò non mala,
sed etiam beata. Quòd æterna nobis
assignavit; ea, contemptu mundi huius,
parare docuit; eorum spe, hæc aspernari
iussit; non hic thesaurizare, sed in cœlo.

*Hoc veri
Christiani
secuti.*

Manifestum ergo est: mundum in
æstimatione talium aberrare: cùm Chri-
stus, æterna Sapientia, qui nec fallere,
nec falli potest, contraria anteposuerit.
Meritòque imitatur eum; qui sunt ejus.
Unde Apostolus omnia externa, &
detrimenta vocavit, & retrimenta: si-
bique mundum dixit crucifixum, & se
mundo. Talem animum, similemque
mentem, omnibus habere oportet, qui
Christiano nomine censentur: & non
affectu hæc possidere; sed usu.

*Approbā-
re Chri-
sto.*

Quantò autem altius non possidere!
& re ipsa abjicere! Hoc est demum,
pressè insistere vestigiis Christi: hoc
obtemperare consiliis ejus. Suasit enim
ille: si vis perfectus esse; vade, & vende
omnia,

omnia, quæ habes, & da pauperibus. *Et eo invitante.*
 Habuitque tot sibi obsequentes, qui relictis omnibus secuti sunt eum. Adeoque hæc derelictio ei placuit; ut cui-dam de hæreditate herciscunda sollicito, & ut divideretur ab eo petenti, detrectaverit; subjunxeritque: videte, & cavete ab omni avaritia; quia non in abundantia cujusquam vita ejus est, ex his quæ possidet. Ante verò discipulis edixerat: Nolite possidere. Ne verò egestatem timerent; vario exemplo Divinæ providentiæ commonuit: &, qui dedit animam, & corpus; daturum certò alimenta, & vestem promisit.

Meritò itaque Abrenunciatio acceptanda: non modò quia iussa, aut suasa; sed quia ad amorem divinum necessaria; & hoc potissimùm fine, si non re ipsa, saltem animo & affectu implenda. Magni enim obicem curæ hujus seculi ponunt Deo; prohibentque, ne animos nostros invadat, & intret. Non potest esse hospes sollicitæ mentis, & turbatæ circa plurima; sed quietæ, vacuæ; & illi soli vacantis.

Pars Capitis Tertia.

De Abnegatione : quæ describitur ; ostenditurque , quomodo tandem Θεωσις proveniat .

Indivina-
tio , Vel
Deifica-
tio .

*Abnega-
tio neces-
saria .*

Non satis verò est , ut Deo vivas , carne , & cupiditate mori : non potes eum sequi , nisi non modò ista , quæ tibi adhærent ; sed etiam te ipsum deseras . Non potes verè eum amare ; nisi non modò tua , sed te etiam oderis . Denique ; Deus in homine non erit ; (inquit verè Bernardus ;) si de homine , in homine , quidpiam supererit . Necessaria itaque post Mortificationem , & Abrenunciationem , Abnegatio : estque hic tertius , ultimusque gradus ad amorem Dei . Per hunc enim , dum animam vacuum prorsus invenit Deus ; eam ingreditur : inhabitat , replet , compotem sui facit , & amantem vera fruitione dignatur , Definitur , sui ipsius mors .

*Ad amo-
rem Dei .*

*Ejus mē-
tio supra .*

Modum ejus , & rationem jam attuli in parte ; cùm tertium , supremumque Fortitudinis gradum explicarem . Ibi enim deduxi : in victoria proprii Spiritus ,

tus, & quādam animi morte, culmen virtutis consistere. Huc ergo id pertinet; & uberius explicandum est. Humilitatis enim, de qua ibi actum, consummatio est in ea Abnegatione, quam Deus veram videat.

Fit verò illa; quādam abdicatione animi facultatum; earumque Deo mancipatione. Nempe, memoriam ad omnium imaginum, & Phantasmatum copiam, clausam, & Deo obsegnatam habendo; & continuò hunc unum cogitatione respiciendo. In intellectu, proceres, & (ut ille ait) rabidè furentes ratiocinationes frænando; & ad jussu Dei, præscriptū, præceptumq; fidei, ac regulam credendi, firmiter alligando. Deniq; propriam relinquendo voluntatem; libertatemque datam arbitrii, velut restituendo Deo: & ut fiat voluntas ejus sincerè petendo, curando, implendo.

Fit, memoriam Deo obsegnando.

Frænando intellectū

Voluntatē mancipando.

Hinc prodibit exigua, aut potius nulla virium suarum fiducia. Hinc subsistet quisque in se; ne rapiatur supra se. Hinc ad omnia, quæ nos attollere possint, respondebimus illud Joannis: Non sum. Hoc enim nobis propriè convenit; Nam, qui est; solus DEUS est.

Suū Nichil agnoscendo.

Quicumque autem existimat se aliquid esse, cum nihil sit; ipse se seducit.

*Hec est
Christi do-
ctrina, &
exemplū.*

Id Christus & docuit, & monstravit; cum beatos pauperes Spiritu dixit: id est; non externorum modò, sed sui etiā vacuos. Cum discere à se iussit; non mundum fabricare; (inquit Augustinus) non mirabilia facere; nec mortuos suscitare: sed se abnegare; id est; humiles corde esse: Cum semetipsum exinanivit; formam servi accepit; se totum obtulit; posuit animam, aut perdidit, propter Deum. Et denique edixit: qui vult venire post me, abneget semetipsum, & sequatur me.

*Quod exi-
miæ osten-
dit Cru-
cifixus.*

Sed uti priores duas partes, Mortificationem nempe, & Abrenunciationem; ita potissimum Abnegationem implevit exactissimè, in theatro illo miri exempli; & eximiæ virtutis; In throno veræ, ac solidæ constantiæ; In nova cathedra mundo ignotæ doctrinæ; In arbore abditæ, & cælestis scientiæ: in Cruce, inquam; quæ ex hinc facta est virtus Dei, & sapientia vera. In hac, inquam, factus gratum Deo, & necessarium hominibus spectaculum: quæ tota vita docuit, & egit; illustri confirmavit, & testa-

restatus est Epilogo. Ibi dolorem, egestatem, contemptum, ferenda ostendit; meriti; imò debiti causa. Ibi fixus manus, pedesque; & ut figeretur, factus obediens, immolavit sui arbitrium: & corpore, fortuna, animo oblatus est; quia ipse voluit. Ibi, (quod maximum) in tanta corporis afflictione, omni consolationi internæ renunciâns; angorem summum, tædiumque, ac derelictionem Dei, ad animum admittens; sola se sustentans in se collecta, ac invicta patientia; nec succumbens; hominem exiit, triumphavit, Deo impendit: & hoc ipso infinitum meruit, præstititque. Ibi denique, postquam elevatus est, traxit omnes ad se. Ibi, monuit per Apostolum: ut nihil scire velimus, nisi JESUM, & hunc crucifixum. Invitavit per eundem: ut Christo simus confixi cruci; mortificationem ejus in corporibus portantes, pauperes Spiritu, ac improperii ejus libenter consortes.

Quòd verò ea ratione exactissimè Dei amor acquiratur, impleaturque manifestum exinde est: quia sui ipsius amor occiditur. Qui verò amat animam suam, perdet eam; & qui eam perdit propter De-

*Quod fuerit
se describitur.*

*Et ratio
ne imple-
tur Dei
amor.*

um, eam invenit, etiam si non quærat. Non, inquam, verus Dei amans, eam quærit: nec hoc agit; ut ex officio amoris divini, bene ei sit; id enim jam esset amoris proprii: sed omnis præmii oblitus amat Deum primum, quia meretur; imò debet amari: cum sit unicum & totum naturæ rationalis bonum. Deinde, quia ipse prior dilexit nos: & ex hac dilectione se immensum communicavit, in bonis naturæ, gratiæ, gloriæ. Communicavit, inquam, peculiariter humanæ naturæ; etiam supra Angelos: idque in Incarnatione, & Eucharistia. Postrema demum causa amoris Divini est: quia eum amare volupe est; & expedit. Volupe in primis; quoniam suavis est Dominus: & quicquid hic pulchrum, delectabile, jucundum; ab ipso originem habet; scaturigo ejus parva; gutta, & umbra est boni illius infiniti. Expedit deinde; quia benignus, summè beneficus, & ipsa felicitas: qua adepti; segura ac beata quies, unaq; pax animo. Diliges itaque ob præceptum, meritum, debitum; & ultimò, præmium. Diliges inquam, Dominum Deum tuum ex toto corde tuo, ex tota anima, ex tota vir-

Qui debitus Deo.

Qui prior dilexit nos.

Suavis est Dominus.

Et beneficus.

Ideo toto corde amandus.

virtute, ex omnibus viribus, & ex tota mente.

Ab hoc amore prodibit ὁμοίωσις, ἀκο-
λουθία, & deinde θεώσις. Id est, Assimila-
tio, Affectatio, & (ut ita vertam) Dei-
ficatio. Priores duas partes, dum eru-
ditè Lipsius, ex scitis veterum, & Stoi-
corum præsertim, deducit; Luculenter
profectò, quantum profana Sapiencia
ad Divinam assurrexerit, ostendit. Me-
ritòque miratur, quomodo ad profanos
augusta hæc, & sancta, vel delata sint,
vel illapsa. Utrumq; probabile esse Cle-
mens Alexandrinus dicit. Dum Plato,
(inquit) hæc docuit: seu concurrens
cū dogmate legis; (solent enim magnæ
mentes, nudæ affectuū, veritatem attingere:
) seu id è sacris didicit; uti semper
cupidus omnis doctrinæ. Quanquā pro-
fectò, si inspicis; parcè illi, & languidè
talìa, quæ ducunt ad Deum: nec eo Spi-
ritu, quo propriæ rationis dictamina.

Consentienter tamen veritati docue-
re; τέλος εἶναι ὁμοίωσιν Θεῷ: Finem esse,
Dei assimilationē. Hoc enim Deus ipse,
& voluit; & edixit. Voluit primū; cū
ad imaginem, & similitudinem sui ho-
minem creavit: Edixit deinde, dum;

Vetus
Philoso-
phia mu-
ta vera
vidit.

Homojo-
sin Dei,
docuit,
seu assi-
milatio-
nem.

*Conformi-
ter verie-
tati.*

Sancti estote, (ait;) quia ego Sanctus sum, Dominus Deus vester. Et Christus: Estote perfecti, sicut Pater vester caelestis perfectus est. Apostolus verò: imitatores Dei nosse debere dicit; illique, quā potest, similes. Definit verò hanc Assimilationem satis conformiter Plato: *δικαιοῦν καὶ ὅτι γένεσθαι*: Justū, & Sanctum fieri. Nempe; ut simus in sanctitate, & justitia, coram ipso; qui verè solus Sanctus, & justus est.

*Item ac-
turiā, seu
affectatio-
nem.*

Ἀκολουθεῖν, Affectatio, seu Obedientia est. Hanc quoq; veteres agnovere. Unde Epictetus: Præcipuus Philosphorū, inquit, sermo brevis admodū est: quid enim longū dicere? *τέλος ἐστὶ τὸ ἐπεσθαι, θεῷ*. Finis est, sequi Deum. Hoc Christus requirit; dum toties; Sequere me; & nisi quis reliquerit omnia, & sequatur me; & vos qui secuti estis me: toties inquam, ingeminavit. Hæc sequela, seu Obedientia est; Deo se submittere; omnia ad eum referre: ab illius nutu pendere: audire quid loquatur in nobis

*Quæ à
Christo
jussa.*

Dominus: petere, ut jubeat, quod vult; & promptè exequi, quod jussit. Ecce me; mitte me, dicebat ille: Alter; Domine, quid me vis facere? Alius; loquere, audit

audit servus tuus: vel; paratus sum: &;
paratum cor meum. Idem tu dic, ac
præsta: & postquam tibi innotuerit vo-
luntas Dei; actu, & facto eam imple.

Tertia est Θεωσις; seu (ut semel verti)
Deificatio. Hæc itidem veteri Philoso-
phiæ non ignota prorsus. Non quidem
in illa insana assertione; qua Sapientem
Deo parem, imò potiozem docuere;
Id enim, non minùs stultum, quam im-
pium; sed eo sensu, quo dixit Laertius
in Zenone: Divinum quid, esse Sapien-
tè: habere enim in se quodamodò Deū.
Ideoq; alter dixit: eum Θεὸν εἶναι ὁ δὲ πῶτον
ἐπιθυμῶν ἀγαγεῖν αὐτὰ: cupere, ut ex ho-
mine, Deus fiat. Hoc Sapientia Chri-
stiana non tam cupit, nec suis viribus cu-
rat, & molitur; (Id enim esset pravi, per-
versi, superbi illius spiritus, ambitiosè,
& arroganter ascendere, & similem fieri
altissimo volentis:) Sed, ut dixi; hoc
agit: ut se seipso spoliaret, privet, orbet;
quo capax Dei sit: eumque demum ul-
trò illabentem recipiat, ac patiat; pro-
ut de Dionysio illo dictum, quod esset

Denique
Theosin:
seu Deifi-
cationē.

Quā Sa-
pientia
Christia-
na ex-
quirat.

παθὼν τὰ δὲ αὐτῶν.

Patiēs di-
vinorum.

Porrò id eum velle, exinde evidens
est: quòd ideo ipse homo factus, ut ho-

mo fieret Deus: Quod filios nos vocat;
 &, ut nominemur, & simus, requirit;
 id est; ut gratiæ cooperando, efficiamur
 unus cum illo Spiritus; Divinæ
 consortes naturæ; & in eam convertamur.
 Cujus rei similitudo peti potest
 ab ignito, & candente ferro. Illud enim
 prorsus suam naturam amittere videtur,
 dum recipit igneam. Nam ex frigido,
 opaco, duro, gravi; urit, splendet,
 mollescit, levius fit. Sic anima verè à
 Deo possessa; & ut possideatur, per triplicem
 recensitam *ἀσκήσιν*, Mortificationem,
 inquam, Abrenunciationem, & Abnegationem
 apta; tota immutatur, & Divina fit. Ita ut,
 & dū hīc vivit, dicere possit; vivo ego jam non ego,
 vivit in me Deus: Et, dum hinc migrabit,
 tum demum verè, tota Diva erit.
 Postremò (ut in hoc fine, qui verè
 est *τέλειον τέλος*, finem operi imponam;) manifestum est:
 ea quæ hætenus de Officiis dixi, huc cuncta referri;
 & hoc compendio contineri. Facile enim est;
 Concupiscentiarum victorem, Commotionum arbitrum,
 Virtutum compotem, id est Probum; Deinde; Charitatis,
 in jure Potestatis, Domini, Obligationis

Dum velut ferrū candens.

Exercitationem.

In Dei naturam mutatur.

Conclusio: & Synopsi totius operis. Perfectus finis.

gationis studiosum; Denique Pium in sensu, cultu, & Amore erga Deum, esse: Facile, inquam, cuncta hæc implere Mortificato; Renuncianti externis; & se Abneganti: id est; ad Dei amorem cuncta referenti; Inde verò totum id quod sis, in causam tui finemque, seu Deum se transformanti.

Fac ergo ò Deus, ut hunc finem nostrum cognoscamus: & ad illum; vel hoc scripto; quod tua ope cæptum, finitumque est; deveniamus. Ut, inquam, transformemur in eam, quam nobis creatione indidisti; & Redemptione, ac Sanctificatione reparasti, Imaginem tuam: Et vita, animoque appetamus; referamus; & assequamur TE, UNUM VERUM, BONUM.

Cum voto: ut finimus con- poter finis, seu Dei.

A P P E N D I X.

Ad Librum Tertium.

DEduxi, ut vides Lector, rem, quo destinaveram: & unde ultra, & altiùs non itur. Quod enim majus officium homini assignari potest; quam ut mutetur in Deum? Audax profectò, & improbus videretur hic conatus; si Gy-
ganteo

Monita pauca appendit.

ganteo ambitu, viribusque suis fieret; & divinitatem suo studio, velut Promethei astu, furaretur. Verum, ut dixi, status hic non usurpatione contingit, sed dono. Quod, ut memoria retineamus semper; uti libris superioribus, ita & huic pauca quædam monita appendam.

*Primum,
ut nolis
alta sa-
pere.*

Primum autem erit: ut ex cognitione tam altæ sapientiæ, non incipiat alta sapere. Vides sublimem hanc pietatis, immò sanctitatis Christianæ fructuram? cogitas hanc fabricam? à fundamento incipe: quod tantò magis ima petit; quantò altius superædificabitur. Ergo, ut fabrica, (inquit Augustinus:) ante celsitudinem humiliatur; & fastigium post humiliationem demum erigitur: Ita & tu deprimas te, & totus in eo sis; ut præceptum Domini impleas in simplicitate cordis. Altiora verò te ne quæsieris: (inquit Ecclesiastes,) Sed, quæ præcepit tibi Dominus, illa cogita semper, & imple. Cognitio enim sola, te bonum non faciet; sed voluntas, sed amor: qui sine rationationis magno molimine, affectu fertur, & impletur.

*Alterū:
ut scias*

Alterum monitum: ut scias in par-
vis

vis profectum consistere . Nam , quæ *in parvis esse profectum.*
 ardua , & sublimia videntur ; facile , annexam elationem habent : raro implentur ; ferè in proposito tantum consistunt ; in futurum destinantur . Interim , dum voto pendet ; differtur vita : & transcurrit . Itaque tu , vive hodie . *Quotidie vivito .*
 Impone manum presenti tempori . Quotidiana , & velut domestica vitia , supera ; leviora affectuum corrigere stude ; virtutes , quas putas altas ; & ex illis opera eximia ; nec ambitiosè affectes , nec ostentes . Denique , intra usum vitæ *Uso vitæ emendate .*
 probæ , ac emendatæ arcta te ; ac contine . Et in pura , ac simplici actione , eorum præsertim , quæ à legitima potestate jussa , & imperata : Ecclesiæ , inquam , sancita , cultum præsertim Mysticum ; tum verò bonas piorum consuetudines studiosè imple ; & exequere . Quidquid verò vel dignè egeris ; vel meritò spreveris ; vel patienter sustinueris ; dic tibi obvium illud : servus inutilis sum ; nihil enim aliud , nisi quod debui ; nec ut oportuit , feci .

Tertium Monitum est : ut interiorum *Tertium monitum ut pietatem occultes .*
 animum , & profectum pietatis non modo non ostentes , sed quantum potes ,
 etiam

etiam occultes. Christus id sæpius præcepit: dum apparere, & videri ab hominibus; & jejulantibus faciem exterminare, vetuit: Eleemosynam largiri occultè iussit: denique, omnem hypocrisim sustulit: idque non iussu tantum; sed etiam exemplo. Qui aliter faciunt; illi non proficere, sed conspici volunt. Itaque recipiunt mercedem suam; Gloriam Vanam consequuntur: ad quam non eundo eunt; & fastum calcant, sed fastu alio. Ambitio, inquam, admiratio, & laus sæpè quæritur: quæ omnia corrumpit, & depravat.

*Etenim Hypocri-
sim ve-
tuit Chri-
stus.*

Atqui vel natura ipsa rerum nos docet, bona nostra occultare; dum pretiosissima quæque in abdito habet: Metalla intra terræ viscera, Uniones in fundo maris, Gemmas crusta dissimili tectas: Cætera denique, verè magna, in recessu; & sæpè sub diversa specie latent. Itaque, & virtutes tegere, & abscondere oportet, ne vilescant; aut facilè auferantur.

*Natura
ipsa tegit
pretiosa.*

Sed etiam aliorum causa ostentatio omnis vitanda: offendimus enim faciliè tali exemplo; & quos emendare volumus, affectata austeritate fugamus; Efficimusque, ut nihil velint nostri imitari;

*Etiam ob
alios, vi-
tanda o-
stentatio.*

ri; dum timent, ne talia imitanda sint. Satis autem ipsum nomen Sanctitatis Christianæ molestia terret: quid si ejus sectatores cæperint se consuetudini hominum excerpere? Itaque, intus pleraque dissimilia sint: frons, & facies, ut plurimum populo conveniat. Fac: ut, in quocunque vitæ genere, quod elegeris; nihil in te, & habitu tuo, notabile nimis sit; & ab omnibus diversum.

In sermone præsertim; ne sis mihi æsonans, aut cymbalum tinniens. Quemadmodum enim vasa vacua, leviter quamvis tacta, sonum edunt; plena vix respondent: sed si promendum sit; illa nihil, hæc largiter fundunt; ac affatim suppeditant: Ita mens inanis, clamosa sæpè; sed actu nulla: quæ verò plena; latet primum, & tacet: sed opere se prodit. Ita ut, & videant cuncti opera ejus bona, indeque glorificent Deum; & si sit opus; ex abundantia cordis, etiam os loquatur eximiè; & cum fructu.

Quartum monitum: etiamsi te longa exercitatio, aut potius gratia Dei, ad gradum perfectioris vitæ perduxerit; attamen quamdiu hic vivis, nunquam te putes à lapsu securum. Nam in

Quia est scandalum.

In sermone ne absit jactantia.

Inania strepens

Quartum monitum: ne securitate pecces.

in quocunque statu; tentatio, & collu-
 statio, & militia est; vita hominis super
 terram. Cerrandum itaque semper; ne
 experiamur falsæ pacis mala. Et unica
 securitas hic est, securitatem timere.

*Quintū:
 ut in Tē-
 ratione
 recte te
 geras.
 Sugge-
 stioni re-
 sistens.*

Quintò: si in tentationem incideris,
 non despondeas animum; sed memen-
 to, eam constare suggestionem, oblecta-
 tione, assensu. Suggestio, non est arbi-
 trii nostri: Et, quod sine ulla culpa nos
 invadere possit; testis est tentatus in
 deserto Christus: qui, ut Gregorius
 ait, tentari per suggestionem potuit;
 sed ejus mentem peccati delectatio non
 momordit. Itaque, in tali aggressio-
 ne, non opus terreri; sed cum Deo ar-
 ma sumere: ut mereamur illud respon-
 sum: sufficit tibi gratia mea; Nam vir-
 tus in infirmitate perficitur.

*Oblecta-
 tionē de-
 fugiens.*

Oblectatio, etsi rarò potest culpa
 carere; saltem negligentia; tamen, si
 reluctantante superiori sua parte animo,
 per blanda illicia titillaverit tantum
 mentem, non verò pellexerit ad assen-
 sum; inculpata adhuc, insons, & inno-
 cens est. Itaque hic maxima decertan-
 di occasio. Solet autem Dæmon sub-
 dolè triumphum ante victoriam cane-

re.

re : Ergo circumspice , ac expende vi-
restuas : & quamdiu resistis , non te vi-
ctum existimes . Spera ex tentatione
proventum . Ad Deum confuge : con-
fide ejus auxilio ; illoque fretus , longè
te hoste fortiolem cense .

Quod si labi , & assensu peccare con-
tingat : Non diu prostratus jace ; sed
erige te , & à lapsu validior surge . Hoc ,
inquam , age : ut aut non pecces ; aut
peccare quantociùs desistas . Si primum
admisisti ; alterum subito , & sedulò præ-
sta . Non desperes : nec divinæ miseri-
cordiæ diffidas ; modò cum dolore ve-
niam implores : verè , inquam , coram
Deo pœniteat fecisse ; & firmum sit pro-
positum , ampliùs non facere . Experi-
mentum deinde tui cape : & in futurum
firmare ; & sapienter cave . Pœnitentia
enim , (ait Ambrosius ,) delictum abo-
let , Sapientia cavet .

*Alapsu
citò sur-
gens .*

Ultimum monitum : non ad hunc
modò librum , sed ad opus totum per-
tinense est : ut , cùm exiguam ejus mo-
lem , & minorem omnino copia rerum
tractatarum , videas ; ut , inquam , non
pigeat relegere illud , ac repetere . Mul-
ta enim breviter dicta invenies ; quæ
prima

*Ultimum
monitū ,
ut hæc
repetan-
tur .*

prima, ac festinata lectione, fallere te potuerunt. Præsertim, si non totum; aut non continuò legisti. Tunc, mihi crede, perdidisti operam. Revoca igitur, & ruma: si vis, proficuo cibo pascere, & explere mentem. Ego spondeo: non nauseam, & cramben recoctam; sed novum forsan saporem semper invenies. Magna volumina qui scribere amant; primùm non meminere: Paucisci. Deinde; nolunt legi: & frustra accuratum requirunt lectorem, in supina Scripti incuria. Ego verò conatus sum paucis multa dicere; cassa verba vitare; nulla superflua, & quædemi, sine sensus detrimento possint; ponere: parcè quædam elegantia, aut amænitati indulgere; meditationi cujusque, consultò multa relinquere: imo Notis etiam reservare quædam; uberius, si Deus volet, explicanda. Mereor itaque & legi; & repeti.

*Memento
anim.*

F I N I S.



